



MEMOIRES
D'ESTAT,
RECUEILLIS DE
diuers manuscrits :

En suite de ceux de Monsieur
de Villeroy, viuant Conseil-
ler d'Estat, & Secretaire des
commandemens des Roys
Charles IX. Henry III. Hen-
ry IV. & Louis XIII.

TOME TROISIEME.



A P A R I S ,

Par la Compagnie des Libraires du Palais.

M. D C. L X V.


Avec Privilege de sa Majesté.



STC 100

THE NATIONAL ARCHIVES

RECORDS SECTION



T A B L E D E S P I E C E S C O N T E N V E S
en ce troisiéme Tome des diuers Memoires d'Etat

L ettre du Roy à plusieurs Potentats, Princes & autres Seigneurs, auparauant sa conuerfion à la Religion Cathol. Apostolique & Romaine.	
Au Roy d'Escoffe de la main du Roy.	fol. 1
A luy mesme.	2
A la Reyne d'Angleterre.	4
A elle mesme de la main du Roy.	5
Aux Maire & Escheuins de la ville de Londres.	6
A ladite Reyne d'Angleterre.	8
A elle mesme.	9
A elle encore.	11
A elle mesme.	13
Au Comte d'Essex.	15
Lettre escrite au Roy d'Espagne par les Seize de Paris.	la mesme
Discours au Roy par vn sien suiet & seruiteur.	26
La charge & creance donnée au Pere Matthieu Aquarius par ceux de la Sorbonne de Paris.	44
Lettre de Monsieur de Villeroy à Monsieur de Bellicure.	50
Responfe des Deputez de la Ligue à ceux du Roy aux propositions par eux faites aux conferen- ces.	53
Declaration du Roy sur l'absolution des Prelats qui l'ont receu en l'Eglise Catholique.	61
Lettres du Roy au Pape, Cardinaux & autres sur ce suiet.	
A sa Sainteté de la main du Roy.	64
A elle mesme.	66
A elle pour le Royaume de Nauarre.	67
Au sieur Aldobrandin.	69
A Monsieur le Cardinal de Gondy.	70
A Monsieur de Retz.	71
Instruction portée par Monsieur de Neuers à Monsieur le Marquis de Pisany.	71
Au sieur Marquis de Pisany.	82
A sa Sainteté.	85
Aux Ducs de Ferrare, de Mantoue, & autres sur	



T A B L E

le mesme sujet.	86
Instruction aux fleurs Euesque du Mans , Doyen Seguier , & Commandeur Gobelin.	87
A sa Sainteté.	98
Instruction au fleur de Fresnes enuoyé en Espa- gne.	100
Instruction du fleur de la Cliche s'en allant en Italie.	123
Discours fait par Messire Nicolas de Harlay, Che- ualier Seigneur de Sancy , &c. Conseiller du Roy en ses Conseils d'Etat & Priué, sur l'occur- rence de ses affaires.	127
Accord fait entre les fleurs du Plessis & de saint Phale , le 13. Ianuier 1599.	193
Lettre de M. le Marechal de Bouillon au Roy sur ce qu'il est accusé d'estre complice de M. le Marechal de Biron.	198
Autres lettres de M. de Bouillon au Roy	201
Extrait d'une lettre de la Reyne d'Angleterre à son Ambassadeur en France, sur le sujet du Ma- reschal de Bouillon.	203
Lettre faisant mention de la mort de la Reyne d'Angleterre.	209
Lettre du Marechal de Bouillon au Roy.	212
Edict du Roy d'Angleterre contre les Iesuites.	217
Lettre du Marechal de Bouillon au Roy.	223
Autre lettre dudit Marechal de Bouillon à M. de Rosny.	224
Lettre de M. de Rosny au Marechal de Bouil- lon.	225
Réponse du Marechal de Bouillon à Monsieur de Rosny.	227
Instruction donnée à M. de Boissize en l'année 1619. allant en Allemagne en la iournée de Hall.	230
Les noms des Princes & leurs rangs tenus en l'assemblée d'iceux faite à Hall, en l'année 1610.	
<i>Forme d'escrire par le Roy aux Potentats d'Ita- lie & d'Allemagne.</i>	
A tous les Princes d'Italie & d'Allemagne.	256
Aux Estats du pays-bas.	257

T A B L E.

Aux Princes d'Allemagne.	la mesme.
Aux villes Imperiales.	258
A ceux de Strasbourg.	259
Aux Princes vnis & villes.	la mesme.
Discours présenté à la Reyne mere du Roy en l'année 1612.	259
Tres-humble remonstrance de la Cour de Parlement de Prouence au Roy sur la poursuite faite au Conseil de sa Maiesté, par Monsieur l'Archeuesque d'Aix.	274
Lettre de Frideric Comte Palatin au Roy, sur sa nouvelle Election du Roy de Boheme.	290
Lettre dudit sieur Comte Palatin à Monsieur le Duc de Boüillon.	292
Lettre dudit sieur Comte Palatin escrite au Roy le 24 Mars 1620.	294
Autre lettre du Côte Palatin au sieur de S. Catherine agent pour le Roy près l'Empereur.	300
Instruction donnée à Messieurs le Duc d'Angoulesme, de Bethune & Preaux, Ambassadeurs extraordinaires pour sa M. vers l'Empereur, Princes & Potentats d'Allemagne, en l'année 1620.	305
Lettres écrites par le Roy à l'Empereur, Princes & Potentats d'Allemagne, desquelles sa Maie. sté a chargé lesdits sieurs Ambassadeurs.	
Al'Empereur.	327
Au Roy de Pologne.	328
Au Roy de Dannemarc.	330
Au Roy de Suede.	331
A l'Archeuesque de Cologne.	332
Au Comte Palatin.	333
Au Duc de Lorraine.	335
Au Comté de Vaudemont.	336
A l'Archiduc Leopold.	337
Au Duc de Bauiere.	338
Au Prince de Transylvanie.	339
Pour les autres Princes d'Allemagne.	340
Aux villes Imperiales.	341
Aux villes Anseatiques.	343
Lettre escrite à Monsieur d'Angoulesme par Messieurs le Marquis d'Anspac & Duc de Vvitemberg, enuoyée par le sieur de Spinoza, receüe.	

T A B L E

à Chaalons le 12 May 1623.	344
Lettre écrite par Messieurs les Ambassadeurs au Comte de Tornielle grand Maître de Lorraine.	346
Response dudit sieur de Tornielle, receüe à Thoul le 17. May 1620.	347
Lettre à Monsieur le Duc de Vvitemberg par Messieurs les Ambassadeurs, enuoyée par le sieur de Spinoza.	348
Premiere lettre écrite au Roy par Messieurs les Ambassadeurs, de Luneuille, entre Nancy & Strasbourg, mise és mains d'un Gentilhomme du sieur de Vannes, Gouverneur de Thoul enuoyé exprés par ledit sieur de Vannes audit Luneuille.	349
Lettre à Monsieur de Puyfieux accompagnant celle du Roy.	353
Instruction donnée au sieur de Sigongne enuoyé de Balmont vers l'Archiduc Leopold, sur l'avis qu'on eut qu'il estoit à Sauerne.	356
Lettre écrite audit sieur Archiduc Leopold.	357
Lettre de M. de Puyfieux, receüe à Strasbourg par le laquais de Monsieur de sainte Catherine.	358
Lettre écrite par l'Archiduc Leopold à Messieurs les Ambassadeurs, receüe à Sauerne le 24. May 1620.	361
Lettre écrite au Comte de Hanau & enuoyée de Strasbourg par le sieur de Courlants.	362
Lettres aux Ducs de Vvitemberg & Marquis de Baden, par le sieur de Sigongne enuoyé exprés vers eux.	la mesme
Lettre du Comte de Hanau ausdits sieurs Ambassadeurs.	364
Response desdits sieurs Ambassadeurs au Comte de Hanau.	la mesme
Lettre desdits sieurs Ambassadeurs au Duc des deux Ponts.	365
Lettre du Duc de Vvitemberg, &c.	366
Lettre du Duc des deux Ponts à Messieurs les Ambassadeurs.	367
Seconde lettre écrite au Roy par les Ambassadeurs de sa Maisté.	370
Lettre du Roy de Messieurs les Ambassadeurs à Monsieur de Puyfieux.	375

T A B L E.

A Messieurs d'Esslingen ville Imperiale.	377
A Messieurs de la ville d'Vlme, &c.	378
Lettre de l'Electeur de Treues à celuy de Colo- gne, &c.	379
Lettre de l'Electeur de Cologne, &c.	380
Lettre de l'Electeur de Mayence, &c.	383
Lettre à Messieurs les Ambassadeurs, &c.	385
Response à la precedente.	387
Lettre de Monsieur de Puyfieux, &c.	398
Response à Messieurs les Ambassadeurs, &c.	391
Liste des Princes & Deputez de l'assemblée d'VL me, &c.	395
Abbrege des griefs des Princes & Estats, &c.	398
Bref recueil baillé par escrit, &c.	405
Extraict des lettres escrites à l'Electeur Palatin, par le Duc de Bauiere.	410
Autre extraict de lettres, &c.	411
Extraict de la Declaration des Electeurs Catho- liques, &c.	412
Lettre du Landgraue Maurice de Hessen à Mes- sieurs les Ambassadeurs.	414
Proposition faite par les Ambassadeurs du Duc de Bauiere, &c.	415
Extraict du point principal, &c.	422
Replique des Deputez du Duc de Bauiere.	423
Response des Princes & Estats vnis à la replique des Ambassadeurs du Duc de Bauiere.	427
Lettre de Monsieur de Puyfieux.	434
Lettre de Messieurs les Ambassadeurs, &c.	435
Lettre desdits sieurs au Duc de Nieubourg.	436
Lettre de Monsieur de Puyfieux.	la mesme
Autre lettre ausdits sieurs dudit sieur de Puy- fieux.	439
Lettre à M. d'Angoulême par M. Miron.	440
Lettre du Duc de Bauiere, &c.	442
Autre lettre du mesme Duc.	443
Lettre du Duc de Nieubourg à Messieurs les Am- bassadeurs.	444
Lettre de Messieurs les Ambassadeurs à Monsieur le Duc de Bauiere.	445
Lettre de Messieurs les Ambassadeurs au Landgra- ue Maurice de Hessen..	446

T A B L E.

Troisième lettre écrite au Roy par Messieurs les Ambassadeurs.	447
<u>Lettre de Messieurs les Ambassadeurs à Monsieur de Puyfieux envoyée avec la susdite.</u>	<u>472</u>
Quatrième lettre desdits sieurs Ambassadeurs es- crite au Roy envoyée le 29. Juin 1620. par Pi- caut avec les susdites.	475
<u>Lettre à Monsieur de Puyfieux en suite de la pre- cedente.</u>	<u>476</u>
Lettre desdits sieurs Ambassadeurs, &c.	478
Traité fait à Vlm ^e entre le Duc de Baviere & le Marquis d'Anspach, &c.	la mesme
<u>Cinquième lettre écrite au Roy par Messieurs les Ambassadeurs.</u>	<u>483</u>
<u>Lettre desdits sieurs à Monsieur de Puyfieux.</u>	<u>493</u>
<u>Lettre desdits sieurs Ambassadeurs à Monsieur de Baugy.</u>	<u>495</u>
<u>Lettre du Roy à Messieurs les Ambassad. la mesme</u>	
<u>Lettre dudit iour ausdits sieurs Ambassadeurs par Monsieur de Puyfieux.</u>	<u>499</u>
Memoire présenté au Roy de la part de l'Electeur Palatin, &c.	502
<u>Memoire présenté au Roy de la part du Prince d'Anhalt, &c.</u>	<u>503</u>
Lettre à Messieurs les Ambassadeurs, &c.	505
Lettre de l'Empereur au Roy.	506
Lettre de l'Archiduc Leopold au Roy.	509
Responſe du Roy à l'Empereur.	510
Responſe du Roy à l'Archiduc Leopold.	512
Sixième depeſche faite au Roy, &c.	516
Lettre à Monsieur de Puyfieux.	518
Lettre du Roy à Messieurs les Ambassadeurs.	520
Lettre de M. de Puyfieux dudit iour.	520
Lettre du Roy à Messieurs les Ambassadeurs.	522
Lettre de M. de Puyfieux ausdits sieurs.	524
Lettre de Messieurs des Etats de Lintz, &c.	525
Lettre à Monsieur d'Angoulême.	527
Instruction donnée par Messieurs les Ambassa- deurs, &c.	530
Lettre desdits sieurs Ambassadeurs, &c.	530
Lettre desdits sieurs à Messieurs des Etats, &c.	530



MEMOIRES D'ESTAT DE VILLEROY.

LETTRES DV ROY A
plusieurs Potentats, Princes, &
autres Seigneurs, auparavant sa
conuersion à la Religion Catho-
lique Apostolique & Romaine.

AV ROY D'ESCOSSSE
de la main du Roy.

MONSIEVR MON FRERE, Estant
venu jusques en ce lieu faire un
voyage de quatre ou cinq jours
pour quelques affaires, je n'ay
voulu m'en retourner sans vous
faire ce mot de ma main, pour
vous assurer de ma santé, croyant pour l'ami-
tié qui est entre nous, que vous serez bien aise.

Tome III. A

2 MEMOIRES D'ESTAT.

de l'entendre , & pour le surplus de mes nouvelles je laisse au sieur du Vvimes vostre Ambassadeur , de vous en auertir comme je l'en ay prié , ayant seulement reserué de vous dire , que pour l'attente où je suis d'auoir bien - tost l'armée qui me vient d'Allemagne , & encore un nouveau renfort d'Angleterre , suivant l'esperance qui m'en a esté donnée de la part de la Reine , je ne vous incommoderay pour cette heure du secours de vos hommes que vous m'auuez liberalement accordé jusques au nombre de trois mille , sur la requeste que le sieur de Morlant vous en fit en mon nom , dequoy je ne laisse de vous estre obligé , comme si l'effet estoit desia ensuiuy. Mais parce que la guerre continuant , il sera besoin que les forces qui me viennent soient rafraichies dans quelques mois : Je vous prie me reseruer , & faire tenir prestes les vostres pour enuiron le mois de Feurier , afin que je les puisse plus promptement recouurer apres le premier auis que je vous en donneray , vous assurant que vous me trouuerez tousiours aussi correspondant en tout ce qui vous pourra toucher de ma bonne volonté & amitié enuers vous que vous témoignez la vostre en mon endroit. Cependant je prie Dieu , &c.

A LVY MES ME.

TRES-HAUT, &c.

Le sieur de , &c. nostre Conseiller & Maistre des Requestes ordinaire de nostre Hostel , qui a

MEMOIRES D'ESTAT. 3

esté vers vous de nostre part , nous a par ses lettres , accompagnant celles que vous nous avez écrites, bien particulièrement fait entendre la bonne volonté que vous luy avez fait connoistre nous porter , & les effets que vous en avez rendus en tout ce dont il vous a requis pour le bien de nos affaires, ensemble le témoignage que vous luy avez encore accordé d'y ajouter d'un secours de vos hommes si nous en avons besoin. Ce que nous avons reçu à tres-singulier plaisir & contentement , & avons bien voulu vous en remercier , comme nous faisons tres-affectueusement par la présente, tenant mesme ledit office à speciale recommandation : & pour la confiance que ces nouvelles demonstrations nous la donnent encore plus grande de vostre amitié ; Nous vous prions nous conserver la bonne affection de laquelle ledit office a procédé , pour l'effectuer si le besoin de nos affaires nous donne occasion de vous en requerrir , vous voulant bien cependant assurer que si vous avez l'avantage d'estre le premier à produire des fruits d'une bonne amitié entre nous en autre chose , nous mettrons peine de le récompenser où vous nous voudrez employer. Nous adressons la présente pour vous la faire tenir , au sieur de Beauvoir nostre Ambassadeur en Angleterre , qui vous fera aussi part de nos nouvelles , & pour fin d'icelle nous prions Dieu, &c.

A L A R E Y N E

d'Angleterre.

MADAME ,

Je serois indigne de plus participer à vos faueurs ayant de nouveau si signalé tesmoignage comme i'ay de la vigilance qu'il vous plaît rendre par tout à ma conseruation y employant avec vos moyens vostre bon credit , si ie ne vous en reconnoissois l'obligation que merite le soin que vous me faites ce bien d'auoir de moy , au moins en la confessant & auoiant , si autrement ie ne puis satisfaire. C'est Madame , ce que la presente vous portera de ma part avec l'humble remerciement que ie vous en fais , ensemble du prompt secours qu'il vous a plû donner à mes affaires du costé de Dieppe , au premier auis que vous auez eu du besoin qu'il y en pouuoit auoir ; surquoy pour ne vous ennuyer de longue lettre , i'ay donné charge au sieur de Beauvoir mon Ambassadeur de vous faire plus ample declaration en mon nom de l'affection avec laquelle ie sens & reçois tous vos biens-faits , & desire de m'en reuancher par tous les moyens où ie vous pourray seruir , sans y épargner ma propre vie , que ie n'estimeray iamais mieux employer qu'en ce qui vous pourra tourner à seruice & contentement. Et en cette ferme

MEMOIRES D'ESTAT. ;
deuotion , vous baisant tres-affectueusement
les mains , ie prie Dieu , &c.

A E L L E D E L A
main du Roy.

MADAME ,

Ie ne sçay si ie me dois excuser enuers vous,
& vous demander pardon , comme d'un pe-
ché commis contre vostre volonté , d'auoir
retenu le beau pourtrait qu'on m'a voulu
faire croire que vous vouliez estre enuoyé à
ma sœur , ou vous remercier , comme d'une
faueur particuliere qui m'estoit destinée en
vostre cœur : si i'ay fait faute , ie me pro-
mets que vous m'en excuserez d'autant plus
volontiers que vous en estes la principale
cause : car la representation d'une si grande
beauté est une trop forte tentation à qui en
aime & reuerse lesuiet pour preferer le plai-
sir d'autrui au sien. Ce que aussi i'eusse
moins peu permettre que nul ne peut égaler
l'affection avec laquelle ie vous honore &
sert en mon cœur. Mais ie laisseray les
excuses pour la persuasion que ie me suis
faite en la contemplation de ce que l'art
s'est voulu efforcer de rendre admirable
à ceux qui n'ont l'heur de voir le natu-
rel , en quoy ie confesse aussi auoir com-
mis le peché d'enuie contre le peintre qui
la pourtrait , comme ayant quelque es-

A ;

prit diuinement infus ; a consenty à mon desir , de n'en permettre la possession à vn autre, & m'a assuré que vous n'en dédirez mon opinion. Sur cette esperance, MADAME , ie vous remercie bien humblement d'une si singuliere faueur qu'il vous a plu me departir , que ie tiendray pour gage bien cher & obiet de l'amitié que ie me persuade que vous me faites l'honneur de me porter , & qui m'excitera tousiours d'autant plus à tâcher par tous les moyens qu'il me sera possible de la pouoir meriter, comme en vous baisant bien humblement les mains ie reconnoistray à iamais d'estre , &c.

AVX MAIRE ET ESCHEVINS
de la ville de Londres.

TRES-CHERS & bons amis , Les grandes demonstrations que nostre tres-chere & tres-amée bonne sœur & Cousine la Reine vostre Princesse fait de sa bien-ueillance enuers nous , & les faueurs qu'il luy plaist departir continuellement à l'auancement de nos affaires , nous sont argumens si indubitables de semblable affection de ses bons suiets en nostre endroit que pour le lieu que vous tenez entre iceux , & pour la reuerence que vous luy portez , nous ne pouuons douter que vous ne secondiez volontiers ses bons offices par quelque secours de vos moyens pour le bien de nosdites affaires , mesme en

l'occasion qui vous sera représentée, le bon succès de laquelle, que nous espérons de la bonté de Dieu, assurera la liberté du commerce à présent interrompu entre nos deux Royaumes, & produira à nostre profit particulier dequoy vous rendre ce que vous y aurez voulu avancer, dont toutesfois l'obligation du plaisir que vous nous aurez fait, demeurera à jamais grande en nostre mémoire pour en reconnoître le mérite en tous les endroits que nous pourrons. A cette cause sur cette confiance de vos bonnes volontez, nous auons voulu vous écrire la presente avec la depesche que nous faisons à la Reine sur le même sujet, pour vous prier, comme nous faisons bien affectueusement, de nous y vouloir aider, selon que vous en ferez particulièrement requis en nostre nom avec la permission de ladite Dame, de laquelle nous espérons avec ses autres bienfaits cette grace particuliere que non seulement elle le trouuera bon, mais vous sçaura gré que vous vous rendiez faciles à nostre dite requeste, & acquerrez aussi ce faisant tant de recommandation d'avantage que vous en receurez aux occasions qui se pourront offrir tous les bons effets que vous pourrez désirer de nostre part. Cependant nous prions Dieu, &c.

A LADITE DAME

Reine d'Angleterre.

MA D A M E , Je pecherois trop contre le deuoir & obligation que ie vous ay , sçachant le soin & apprehension que vous auez de mes affaires , si ie n'allegeois au plû-tost l'attente où ie sçay que vous estes de l'issuë de ce siege , en vous donnant compte de l'estat où i'en suis. Le dernier effort que i'y fis faire , quoy que lors le succez n'en fut tel que ie desirois , a donné tel acheminement à nous rendre maistre du haut de la breche de ce costé-là & d'un rauelin que i'auois assailly du commencement d'un autre costé , que ceux de dedans voyans le danger proche & leur secours si loin qu'ils n'y pourront plus guere auoir de fiance , sont entrez en conference , & enfin venus à composition arrestée & signée ce matin de me rendre la ville , si dans huit iours, dont cestuy est le premier, il ne vient armée qui me fasse leuer le siege. Celly auquel ils se sont attendus, n'a pas montré grande resolution de le vouloir entreprendre , car estant venu iusques à Paris, il tourna arriere aussi-tost, & pour colorer son recullement, est allé assieger Chasteau-Thierry, que i'espere me donnera le loisir d'acheuer icy , & de le pouuoir secourir , comme i'y suis resolu avec l'aide de Dieu , & ceux de dedans se promettent de le pouuoir attendre. Au demeurant ,

Madame, le bien de mes affaires depend apres Dieu, de vostre bonne aide & assistance, de laquelle ie ne pourrois douter sans offencer vostre bonté: Mais ie vous supplie aiouster ce bien au bonsecours qu'il vous plaira me donner, que ie puisse par la celerité d'iceluy gagner sur la longueur des ennemis ce qu'ils eussent pû gagner sur moy si le leur eust esté aussi prompt en effet qu'en paroles: Vous assurant que si j'ay cét avantage avec le bonheur qui accompagne tout ce qui vient de vostre part, ie le feray si bien valoir que j'espere que le fruit en sera double, qui rendra aussi mon obligation d'autant plus grande en vostre endroit: Et si rien me restoit à vous engager de moy mesme, ie le vous offrirois en recompense, mais vous estant desia acquis tout entier, ie ne vous puis proposer que l'honneur que ce vous sera de conseruer ce qui est à vous, comme en vous baisant humblement les mains, ie vous supplie croire que ie seray toujours, &c.

A E L L E M E S M E.

MADAME, C'est vne de vos gloires & dont Dieu a voulu honorer vostre regne, que d'estre le recours des affligez, & mesme en suiet de tel merite que d'auoir receu, entretenu & preserué de ses ennemis vn Roy iniustement spolié de sa Couronne. Le bien & l'honneur que vous luy avez fait, duquel il n'est pas ingrat à vous donner la


louange qu'il doit, meritoit bien qu'il suivit pareillement vostre bon conseil touchant le voyage qu'il auoit enuie de faire par deçà, que i'eusse bien aussi désiré qu'il eust remis iusques à ce qu'il eust meilleur moyen de luy aider. Mais puisque son affection luy a fait passer par dessus toutes autres considerations, i'ay esté fort aise que sa venue & la mienne en ce lieu se soient rencontrées si à propos, qu'il n'a eu besoin de se mettre en danger de passer plus outre pour me voir & contenter son desir de la communication qu'il vouloit auoir avec moy, dont combien qu'il ne se puisse à present rapporter aucun auantage en ses affaires, si est-ce qu'elle m'a d'autant plus accru la compassion de sa condition que lors qu'il aura plu à Dieu rendre la mienne meilleure qu'elle n'est à present, ie tiendray à grand heur de pouuoir participer au bon œure que j'espere que vous aurez l'honneur d'acheuer & le remettre en son Royaume, comme vous auez de sa conseruation deuë & reseruée à vous seule pour ne la pouuoir trouuer ailleurs guere assurée en attendant mieux : & si ma priere peut aiouster quelque chose à la bonne recommandation en laquelle vous l'auiez, ie vous supplie la receuoir en ce lieu comme pour chose que ie n'affectionne moins que mon fait propre. Sur ce ie prie Dieu apres vous auoir tres-affectueusement baisé les mains qu'il vous ait, &c.

Vostre tres-affectionné
bon frere.

A E L L E E N C O R E. .

MADAME , l'ay l'image de vos bien-faits tellement empreinte au cœur qu'ils me sont en objet perpetuel , & mes sens plus continuellement occupez à la consideration de leur merite & de magnanimité & grande bonté enuers moy , avec souhait ordinaire entre mes plus ardentès prieres de vous pouuoir vn iour tesmoigner par quelque bon seruice , que ie n'en veux laïsser le fruiet enseucly au tombeau d'ingratitude. Et comme en toutes qualitez ie les reconnois & auoüe sans exemple , aussi ie vous supplie , Madame , de croire que ie ne mets en comparaison avec nul autre l'estime que ie fais de vostre Majesté , ny l'honneur & l'obeïssance que ie desire toute ma vie vous rendre. Le secours qu'il vous a pleu à present m'enuoyer m'est en singuliere grace pour la qualité de celuy auquel il vous a pleu en donner la principale charge , & pour la belle force dont il est composé , & vous en remercie tres-affectueusement , & vous diray , Madame , que ie ne me suis de rien tant resiouy de ce que le sieur de Beau m'a rapporté à son retour , que d'auoir entendu que vous faisiez estat de venir à Porthenne lors que nous serions vers la coste de Normandie, ce qu'auenant ie vous supplie que ie vous y aille baiser les mains comme Roy de Navarre , & estre aupres de vous deux heures , afin que j'aye ce bien d'auoir veu , au moins

A G



une fois en ma vie , celle à qui j'ay consacré & corps & tout ce que j'auray jamais , & que j'aime & reuere plus que chose du monde ; & dès cette heure ie reçois vn grand contentement en moy mesme de l'esperance que j'ay que vous ne me denirez ce bon heur, duquel ie m'assure que la iouissance me sera ouuerture cōme gage de toute felicité à l'auennir. Je vous supplie aussi prendre en bonne part la charge que j'ay encore donnée au sieur de Reau vers vous, ou au sieur de Beauvoir s'il est encore en vostre Cour, dont l'instance qu'il m'a faite de luy permettre faire vn voyage par deçà me rend incertain, qui m'a fait en cela prendre double adresse : mais s'il n'en est encore party , ce sera luy qui fera cēt office , ayant en ce cas ordonné audit sieur de Reau de demeurer auprès de mon cousin le Comte d'Essex vostre Lieutenant , pour tenir la main afin qu'il soit seruy , & vos forces qu'il conduit traitées le mieux qu'il sera possible ; & soit l'vn ou l'autre qui fasse ledit office en vostre endroit. Je vous supplie luy vouloir donner benigne audience & creance qu'il vous plairoit faire à moy mesme , qui vous baisant sur ce humblement les mains , prie Dieu, &c.

Vostre plus affectionné frere
& seruiteur, &c.

A E L L E M E S M E.

MADAME, Je ne pouvois recevoir témoignage plus signalé de l'amitié & faveur qu'il vous plaist me porter que d'auoir voulu commettre la charge du nouveau secours que m'avez fait ce bien de m'enuoyer, à Seigneur si principal qu'est mon cousin le Comte d'Essex, en quoy vous m'avez surmonté, non mon souhait que ie vous confesse, regardoit sa personne pour la grande estime que sa reputation m'auoit imprimée, mais bien l'opinion d'estre tant favorisé de vostre part que i'eusse aussi osé vous demander: Mais c'est acte de vostre grande magnanimité de rendre vos graces plus parfaites qu'elles ne sont esperées, & lier celuy qui les reçoit en si haute obligation que rien de sa part ne la pouuant égaler il soit à iamais tenu reconnoistre vous deuoir plus qu'il ne sçauroit acquiter. Celle que vous avez maintenant acquise sur moy est paruenüe à ce degré, & pour tout ie ne vous puis offrir que de ce que vous avez rendu entierement vostre: Vous assurant, Madame, que ie remarqueray la journée de la premiere veüe que j'ay eüe de mondit Cousin pour l'une des plus heureuses de ma vie, pour la reputation qu'elle m'apporte & pour ce qu'il m'a dit de vostre part, & pour la dignité de sa personne de vostre singuliere bien-veüillance en mon endroit, dont ie vous remercie tres-humblement & de tout mon cœur, & vous supplie croire que vostre res-

14 MEMOIRES D'ESTAT.

peut a tant de pouuoir de me le faire aimer & cherir, que c'est chose qui ne me fera de moindre soin que la conseruation de moy mesme, qui auroit trop de regret de mourir auant que vous auoir fait quelque agreable seruice. Et vous diray aussi que si ses vertus ont merit  le iugement que vous auez fait de luy, l'affection & grande reuerence que i'ay connu qu'il vous porte, le rendent encore d'autant plus digne de vostre bonne grace, & aioustant tant en mon endroit aux autres considerations qui le rendent recommandable qu'elles luy acquierent pour iamais tres-grande & assur e part en mon amiti . Je croy qu'il vous fera entendre ce que nous auons trait  & resolu ensemble avec mon Cousin le Marschal de Biron & ce qu'il a connu de l' tat de mes affaires, qui me gardera de vous ennuyer par la presente, ioint que i'ay donn  charge au sieur de Beauvoir mon Ambassadeur de vous le representer de bouche. Vous suppliant aussi pour fin de cette lettre, croire que i'observeray le plus exactement que ie pourray les auertissemens qu'il vous plaist me donner par la vostre, & que ie n'us r y de vos hommes qu'avec toute la raison que requiert l'honneur que vous me faites de m'en assister. Vous baisant sur ce tres-humblement, &c.

Vostre affectionn  & humble
frere & seruiteur, &c.

AV COMTE D'ESSEX.

MON COUSIN, Je vous ay fait vne depesche sur mon partement de Chauny par double voye, dont ie m'assure que l'une & l'autre aura eû leur passage. I'en fais à present vne en Angleterre, tant pour tenir la Reine auertie de la continuation de mon voyage, que pour les autres points contenus en la lettre que i'escris au sieur de Beauvoir mon Ambassadeur, de laquelle i'enuoye copie en chiffre à mon cousin le Marschal de Biron, & luy mande de vous la communiquer & en conferer avec vous, afin d'y ioindre vos bons avis & offices, selon que par ensemble vous iugerez estre à propos, comme ie vous prie me continuer en cela & en toutes autres occasions qui s'offriront, les bons témoignages que vous m'avez déjà donnez de vostre amitié, & vous assurer que vous en receurez à iamais toute la bonne correspondance de ma part que vous scauriez desirer. Priant Dieu, &c.

LETTRE ESCRITE AV ROY
d'Espagne par les Seize de Paris.

SIRE,

Vostre Catholique Majesté nous ayant esté tant benigne que de nous auoir fait entendre

IN MEMOIRES D'ESTAT.

par le tres-Religieux & R. Pere Matthieu , non seulement ses saintes intentions au bien general de la Religion , mais particulièrement ses bonnes affections & faueurs enuers cette cité de Paris (nagueres tres florissante , maintenant fort desolée) nous a induit à prendre la hardiesse de luy écrire pour luy faire reconnoissance des étroites obligations que nous luy deuons.

Quant aux obligations, nous connoissons & confessons deuant le Ciel & toute la terre , qu'après l'assistance & conduite de Dieu , nous receuons iusques à maintenant la sainte Religion Catholique, Apostolique & Romaine , de vostre Catholique Majesté, du secours de laquelle nous auons esté soutenus & auancez dès le commencement : Qu'après la mort du Duc d'Anjou celuy que nous reconnoissons Roy , tenta d'introduire l'heretique à la succession de cette Couronne , & que les Princes Catholiques de ce Royaume resolurent de s'y opposer , ce que deslors nous declara le bon & valeureux Duc de Guise , afin que par ignorance ne fussions ingrats à vostre dite Catholique M. lequel secours sans aucune ambitieuse pretension il luy plaist continuer iusques à maintenant , laissant & remettant à vn autre temps beaucoup de belles occasions qui s'offrent & reüssiront à son bien particulier. Ce qui nous est vne obligation si grande que nous n'estimons point que nous la puissions acquiter ; tant étroite que quiconque de nostre nation ne la reconnoisse pour s'auotier perpetuellement tres obligé seruiteur à vostre Ca-

tholique Majesté , & à la posterité d'icelle , nous le tenons pour ennemy de Dieu , de la Religion , du repos & paix publique de cét Etat , & de toute la Chrestienté.

Quant à nos larmes , deux maux nous les font épandre ; le premier , l'affliction generale de la maison de Dieu , la longue continuation d'icelle, la pollution de ses temples , la ruine des sacrez autels , la discontinuation en plusieurs lieux de son sacrifice , de toute la lechargie des Chrestiens , les cruelles & inhumaines persecutions contre les Prestres & Prophetes de Dieu , les saintes Vierges à Dieu sacrées corrompuës & violées , la perte de tant d'ames qui perissent par l'heresie , nostre ville deserte , nos beaux Colleges vuides, nostre Vniuersité depeuplée , n'y restant en vn nombre que la faculté de Theologie , laquelle tant icy que par tout le reste du Royaume par ses diuines admonitions & exhortations tant verbales que par écrit , estraint tousiours plus estroitement la sainte Vnion entre les Princes , Seigneurs & peuples Catholiques. Mais ce qui nous poind le plus de douleur , est de voir combien lentement se fait l'œuure, lequel par la benediction diuine pourroit apporter remede à tant de maux & les arrester si plus de diligence y estoit employée. Le second est , la misere continuelle de cette ville tant excellente & renommée par tout le monde , laquelle misere est telle que nos peres n'en ont ouy parler en ce Royaume de plus estrange, ny peut-estre de semblable, dont nous sommes tellement oppressez qu'à grand peine pouuons nous respirer , & en feront de bref

du tout opprimez sans secours humain , si vostre Catholique M. n'en prenoit le soin , la tuition & deffence.

Mais Dieu par son infinie bonté ne permettant que les siens soient tentez outre leur portée , donne bonne issue avec la tentation , afin qu'ils ne succombent sous icelle. Nous recréez de deux bonnes nouvelles : Sçavoir cette sainte affection & resolution de vostre Catholique M. enuers le general de la cause de la Religion & le particulier de Paris , inuitant à faire de mesme sa Sainteté ja fort encline à secourir les oüailles persecutées pour subuenir à ce bon peuple & le relever de ses souffrances , particulièrement ceux qui pour s'estre les premiers plus courageusement & constamment employés à ce saint ceuvre , sont pressés de grandes incommoditez. Nouvelles à la verité qui redoublent à toute loüange pour porter plus alaigrement cette presente croix , & desquelles nous faisons participantes les autres grandes & nobles citez de la sainte Vnion Catholique , afin que s'esioüissant avec nous elles en rendent graces & en fassent pareille reconnaissance. Deux ou trois iours auparauant nous auons sceu la deliurance de ce ieune Prince Duc de Guise fils du premier martyr en ce Royaume de la qualité duquel depuis ces presentes persecutions excitées contre l'Eglise, nous auons trouué tant d'esperance & les ennemis tant de crainte , pour les belles vertus desquelles on le remarque estre doué de Dieu, que chacun l'estime d'entre nos Princes seul de son âge de telle & si grande expectation.

Nous esperons que Dieu ne mettra en oubly ses longues souffrances , son innocence persecutée , & qu'il benira la pureté des mains d'iceluy pour les employer à la diligente execution & consommation de son œuvre en cette cause sous l'ombre , faueur & aide de vostre Catholique Majesté.

Ces deux bonnes nouvelles qui nous apportent tant d'allegresse , nous ont esté renduës durant le mois d'Aoust , le quel depuis quelques années , selon la signification du mot , Dieu nous a rendu prospere : & c'est pour mesme cause qu'en l'an 1572. les conspirations de Chastillon Admiral de France reconnuës , il fut ignominieusement traité selon ses temeritez. Ce Royaume & les Estats de vostre Catholique Majesté en la Gaule Belgique & Germanie inferieure furent garantis de l'invasion qu'en pretendoient faire les Heretiques. Depuis assez long-temps apres vne ligue tres dangereuse poursuiue & auancée par le Roy de Navarre , par aucuns des premiers du Parlement & autres Cours Souueraines seantes à Paris , fut en ce mesme mois descouuerte , intermise , voire le cours d'icelle arresté du tout. Il y a deux ans que cette cité assiegée fut deliurée par la mort étrange du feu Roy : & l'année derniere passée 1590. que ledit Roy de Navarre nous renoit par l'espace de quatre mois si estroitement assiegez, nous fûmes garentis en ce mois de plusieurs grands perils , que les traistres demeurans en cette cité nous auoient preparez par diuers moyens. Et finalement nous

fûmes deliurez de ce long & cruel siege par les armes de vostre Catholique Majesté sous la prudente & genereuse conduite du Duc de Parme , lequel y vint tant à propos que trois ou quatre iours de remise nous conue-
noit ouurir la porte à nostre ennemy sous conditions miserables où nous attiroit la mort , comme desia fort grand nombre estoient peris de faim , ne nous restant plus dequoy viure ces trois ou quatre iours passez, dont est tesmoin oculaire Dom Bernardin de Mendozze , Ambassadeur de vostre Catholique Majesté , lequel souffrant avec nous les mesmes necessitez , a fait des liberalitez aux pauvres & à la cause publique digne de la grandeur de son maistre.

C'est vne merueille surpassant le sens humain que ce grand peuple Parisien , lequel n'auoit accoutumé que l'aize , se soit auisé & resolu de souffrir tant de disette , voire plutôt mourir ou endurer de plus grandes cruautez, que de s'assuiettir au ioug de l'heresie, mais le S. Esprit qui souffle où il luy plaist, & par l'inspiration d'iceluy , les hommes prenoient resolution d'entreprendre les choses au iugement humain impossibles , & souffrir les maux & tourmens aux forces humaines insupportables. A cette grace diuine tant abondamment eslargie à ce peuple, il foule aux pieds & met en oubly les aises , & delaisse ce qui luy estoit ordinaire entre lesquelles il est nay , pour s'exposer à souffrir toutes sortes de pertes , d'incommoditez & miseres des biens & du corps , la mort mesme plutôt que de voir

la ruine de la Religion en laquelle il a receu naissance, Baptisme & nourriture, & l'heresie voguer au lieu d'icelle, & triompher de leurs despoüilles.

Dieu se sert & s'est seruy entre les plus grands combats pour ce grand œuvre, des saintes & prophetiques predications, exhortations & sermons de nos bons Peres de la faculté de Theologie, maistres de nos consciences, & de la diligence, veille continuelle & resistance au mal qu'il luy a pleu faire la grace à nostre compagnie des Seize quartiers de la ville de Paris, d'y pouuoir apporter, de laquelle ces bons Docteurs sont moderateurs, & y president, sans l'avis & conduite desquels elle ne fait aucune resolution & entreprise, tant & si estroite est entr'eux & nous l'Vnion, & de nous à eux la reuerence & obeyssance grande, comme des enfans aux peres & des soldats à leur Capitaine.

Sous cette conduite nous auons souffert tout ce qui estoit possible de souffrir de disettes & toutes sortes de necessitez & miseres, lesquelles ne nous sont encore allegées, ains croissans de iour en iour nous sommes sur le point d'en estre accablez, si Dieu du Ciel ne nous suscite vn liberal bien-facteur, lequel nous tende sa main charitable perpetuelle & puissante pour nous releuer de nostre trebuchement, & nous faisant respirer sous ce fardeau qui nous est insupportable, nous releue du precipice auquel on nous a tirez & où nous demeurons sans ce secours.

Car Paris ayant long-temps porté tous les

frais de la guerre, frayé plus de cinq millions d'or tant pour leuer l'armée generale plusieurs fois decheuë , plusieurs fois remontée , que pour les armées particulieres des prouinces , iusques à ce qu'il ait pleu à vostre Catholique Majesté la soulager , n'ayant aussi depuis trois ans recueilly de ses terres & heritages, rien perceu de ses rentes, les officiers rien receu de leurs gages , ny les marchands fait aucun traffic , qui sont les quatre moyens qui souloient la remplir & luy apporter splendeur; il est impossible qu'elle ne soit fort desnuee de peuple , voire les plus riches chargez de la misere des plus pauvres, & les Hospitaux ne soient reduits à de grandes necessitez.


Nous esperons en Dieu que de bref les armes de sa Sainteté & de vostre Catholique Majesté iointes , elles nous deliureront des grandes oppressions de nostre ennemy, lequel nous tient iusques à maintenant depuis vn an bloquez de toutes parts , sans que rien puisse entrer dans cette cité qu'avec hazard , ou par la force des armes , & s'efforceroit de passer outre , s'il ne redoutoit les garnisons qu'il a pleu à vostre Catholique Majesté nous donner de gens de guerre pris entre vos sujets , desquels nous reccuons vn grand contentement, pour leur zele en la Religion , leur valeur au combat , leur modestie entre nous & la prompte obeyssance qu'ils rendent à leurs chefs , qui prudemment les conduisent & sagement leurs commandent. Mais nous auons vn extrême regret que nos necessitez si grandes ne nous permettent leur rendre le



traitement tel que nous desirons , ce qu'eux connoissans bien se sçauent gouverner avec nous & compatir en nos disettes.

Vne chose reste pour avec l'aide de V. Catholique Majesté , remedier à nos miseres, sçauoir que nous ayons vn Roy declaré , receu selon les solemnitez accoustumées , selon le prudent & Chrestien Conseil de vostre Catholique Majesté pour redresser sur nous la Monarchie, forme de gouvernement & domination , laquelle, comme la plus digne, est tellement naturelle à nostre nation , que sans icelle ce grand Estat ne peut demeurer paisible & subsister.

Pour paruenir à ce point auquel tendent tous les trois ordres de ce Royaume , nous nous remettons à la prouidence & volonté de sa Sainteté & de vostre Catholique Majesté , comme par Arrest en l'Hostel de nostre ville, l'article en a esté posé pour principale piece de nos cahiers , contenant ce qui se doit remonstrer & requerir , & que tous desirent conclure aux Estats conuoquez à Reims moins commodement qu'à Paris, auquel article toutes les autres villes de l'Vnion concurrentes : & pour faire connoistre ce que apres continuelles supplications publiques & prieres particulieres à Dieu tous sentent de ce desir engraué dans le plus bel endroit, & au plus profond cabinet de leurs cœurs : nous pouvons certainement assurer à vostre Catholique Majesté , que tous les biens & souhaits de tous les Catholiques sont de voir vostre Catholique Majesté tenir le sceptre de cette Couronne ,



& regner sur nous, comme nous nous iettons tres-volontiers entre ses bras, ainsi qu'à nostre pere, ou bien qu'elle y en establisſe quelqu'un de sa posterité ; que si elle nous en donne vn autre qu'elle meſme, il luy ſoit agreable qu'elle ſe choiſiſſe vn gendre, lequel avec toutes les meilleures affections, toute la deuotion & obeyſſance que y peut apporter vn bon & fidel peuple nous receuions Roy, luy obeyrons ; car nous eſperons, tant de la benediction de Dieu ſur cette alliance, que ce que iadis nous auons receu de cette grande & tres-Chretienne Princeſſe, Blanche de Caſtille, mere de nostre tres-Chreſtien & Religieux Roy S. Louys, nous le receurons voire au double de cette grande & vertueuſe Princeſſe, fille de voſtre Cathol. M. laquelle par ſes rares vertus arreſte tous nos yeux à ſon obiet, & y reſplendiſſant l'vnion du ſang de France & d'Eſpagne pour vne alliance perpetuelle fraterniſer ces deux grandes Monarchies ſouz leurs Roys à l'aduancement de la gloire de nostre Seigneur Ieſus-C. pleigneur de ſon Eglise & vnion de tous les habitans de la terre ſouz les enſeignes du Chriſtianisme, comme voſtre Catholique Maieſté avec tant de ſignalées & triomphantes victoires ſouz la faueur diuine a par ſes armées fait tres-grands progresz & auancement, lesquels nous ſupplirons Dieu, qui eſt le Seigneur des batailles, continuer tel accroiſſement que l'œuvre en ſoit bien toſt accomplie, & pour ce faire prolonger à voſtre Catholique M. en parfaite ſanté tres-heureux comble de victoires, triomphe de tous ſes ennemis. A Paris ce 20.
iour

MEMOIRES D'ESTAT. 21

iour de Septembre 1591. Plus à costé est écrit.

Le Reuerend pere Matthieu present porteur, lequel nous a beaucoup edifiez, est bien instruit de nos affaires, il suppléera au deffaut de nos lettres enuers vostre Catholique Majesté, laquelle nous supplions bien humblement y aiouster foy à ce qu'il luy en rapportera. Et au bas. Vos tres-humbles, tres-affectionnez & tres-obligez seruiteurs, les gens tenans le Conseil des Seize quartiers de la ville de Paris : ainsi signez.

B. Martin Docteur Theologien.

C. Sanguin Chanoine de l'Eglise de Paris.

Genebrard Docteur & Professeur du Roy.

Soly l'un des Capitaines de ladite ville, &

Conseiller au Conseil general de l'Union.

I. Turgis Colonel du quartier, & de la paroisse saint Jacques de la Boucherie.

E. Mesnagier l'un des Capitaines de l'Vniuersité

Rebuffleau, Colonel au quartier de la Cité.

Anselme Louchart, Commissaire.

I. M. de Caonne Conseiller au grand Conseil du Roy.

Girard Cappelain Hamilton Curé de S. Cosme.

O. Crucé Capitaine en l'Vniuersité.

I. Accarie Conseiller & Maistre ordinaire en la chambre des Comptes.

M. de Launay l'un de ceux qui president au Conseil.

De la Bruyere.

Ysouard Cappel.

Et sur la suscription,

AV ROY CATHOLIQUE.

Tome III.

B

DISCOURS AV ROY
par un sien sujet & serviteur.

SIRE,

Je me iette aux pieds de vostre Maiesté , vous suppliant de lire vous mesme les plaintes de vos bons & fidels sujets que ie vous presente en ce papier, lequel ie m'efforceray de faire tomber entre vos mains propres , pour n'estre iugé indiscret , puis qu'il y va de vostre honneur, & que mon dessein n'est pas de vous blasmer en public, mais de vous donner auis en particulier. Ce sera le genouil enterre, la larme à l'œil, le cœur ouvert, plein d'un zele à vostre service , d'un saint desir de vous voir estably en vostre Estat sur les fondemens les plus asseurez de la Religion & de la Iustice. Et croy, SIRE, que c'est la meilleure & plus saine partie de vos pauvres sujets qui parlent maintenant à vous & se plaignent maintenant à vous de vous mesmes ; car c'est la voix de vostre peuple, que Dieu a retiré partie de ses benedictions de dessus vous, & qu'il n'accompagne vos armées de ses faueurs comme il souloit. Ce qui est la voix du peuple que vostre changement est cause de ce changement, car qui s'esloigne de Dieu, Dieu s'esloigne de luy. SIRE, ce sont paroles que ne pouuez mespriser sans mespriser vostre ame & vostre Estat. Car combien que chacun de nous ne doive imputer la faute qu'à

son peché , & ne chercher la cause de son mal qu'en soy-mesme , si est-ce qu'ayant veu vne mutation en vos mœurs , & tout soudain vn tel reuers de fortune , on a jugé par l'exemple ordinaire que vos sujets portent la peine de vos fautes. L'exemple en est en Daud , & en beaucoup d'autres ; & les Payens mesmes ont remarqué semblables éuenemens à l'auenture. Ce sont les trophées de vostre victoire d'Iury qui vous ont haussé le courage ; car c'est environ ce temps que vostre fortune commença de raualer , ce vous estoit plustost vn sujet de donner gloire à Dieu & vous humilier sous sa puissante main qui a bataillé pour vous ; les hommes y firent peu ou rien , vos gens mesmes commencerent à fuir , & vostre nombre estoit le moindre de beaucoup. Apres vostre belle victoire de Coutras , & les autres deliurances miraculeuses que Dieu vous donnoit auparavant , vous souliez l'en reconnoître pour auteur , & luy en rendiez les sacrifices de loüange : on ne iugeoit point alors , ou que les prosperitez vous eleuassent , ou que perdissez courage pour les aduersitez : on a veu depuis qu'enflé de tant de victoires , & vous voyant deuant la ville capitale de vostre Royaume , accompagné de tous les Princes de vostre sang , & suiuy de la plus belle Noblesse qui se vist oncques , vous commençastes à vous appuyer sur le bras de la chair , & dedaignez aucuns de vos anciens seruiteurs , dont Dieu qui vous aimoit , ne vous laissa pas porter bien loin ce peché , car l'euenement du siege de Paris en fit la punition sans doute. En la continua-

tion de ces miseres ie mettray les nostres avec les vostres, à cause de tant d'autres disgraces & mal-heurs qui nous ont reduit en l'extrémité où nous sommes & où nous nous voyons reduits aujourdhuy, en laquelle auez le plus grand interest, puis qu'il y va de la perte entiere de vous & de vostre Estat. Vous, SIRB, en l'election duquel nous reconnoissons tant de moyens diuins: vous, dis-je, SIRB, que vos seruiteurs affligez auoient tant de fois choisi pour leur protecteur: Vous dis-je, SIRB, sur qui, non pas vos sujets seuls, mais toute la Chrestienté iette les yeux comme sur vn Hercule nouueau qui nous deliureroit de ces monstres tyrans de l'Europe: Vous, dis-je, qui avec vne poignée d'hommes auez acquis tant de trophées & conquis tant de cœurs, qui ja portez en vos lauriers & en vos titres le surnom de Grand, faut-il que soyez méprisé des vns & hay des autres? Parmy les Rois d'Israël Salomon fut le plus sage & le plus accompli Prince, & rien n'approcha oncques de sa gloire, avec le témoignage mesme de N. S. toutefois nous reconnoissons & rougissons encore à la honte de sa cheute, sur ses vieux iours il fut tellement possédé par les femmes, qu'à leur induction il se fit Payen & idolatre. Iehu auoit esté spécialement appelé de Dieu, oinct par le Prophete pour executer ses iustes iugemens sur Iesabel, & la maison d'Achab; neantmoins à la fin de son regne il se déuoya, & fit mal. L'histoire Romaine nous apprend les cinq premieres années du regne de Neron, vous sçavez quel monstre il fut apres. Tacitus

dit que Galba estoit digne d'estre Empereur s'il n'eust esté Empereur, c'est à dire, qu'il auoit esté iugé tel auant, & non pas apres son aduenement à l'Empire. Avec vn grand nombre d'autres exemples, ce peu vous seruira, SIRE, s'il plaist à vostre Majesté prendre le loisir de les mediter. J'accorde que l'amour des femmes est de tant plus supportable qu'il est commun à tous les hommes, & propre quasi à tous les grands; mais les autres defauts qui se remarquent en vous, si vous ne les corrigez, vous rendront & moins capable de regner, & moins amiable à vos sujets: car tout premier, si vous n'aimez ny ne haïssez, comme l'on dit, tant s'en faut que ce soient perfections d'un Prince, que c'est plustost le propre d'une chose insensible: Il faut detester les vicieux, reconnoistre les bons, en quoy gist la vigueur de vos loix & l'establissement de vostre Estat. Certainement n'estre point vindicatif n'est pas seulement vne exemption de vice, mais ie le compteray parmy les vertus les plus signalées d'un Prince, d'autant qu'en un Prince ou en un Grand qui ont moyen de nuire, elle se trouue fort rarement. Mais quel deuoir, quelle affection reciproque pouuez vous attendre de vos sujets si vous ne les aimez? On tient que celuy merite le mieux d'estre aimé qui aime le mieux. Les Philosophes en l'Echole disputent que l'amour descend plustost qu'il ne monte; l'enfant aime son pere quand il se void aimé par son pere; il n'y a rien plus semblable à un pere, qu'un Roy, aux enfans que les sujets.

Et si vous pardonnez indifferemment à tous vos ennemis, cherissez & recevez comme vous faites à vostre service & amitié esgalement tous ceux qui dès leur ieunesse ont employé leurs moyens & hazardé leur vie pour vous : Que peut arriuer de cette impunité autre chose, sinon vne licence aux meschans de continuer à mal faire, & vn mescontentement à vos bons & fidels sujets & seruiteurs? Si vous n'aimez rien moins que ceux qui ont couru vostre fortune, & qui vous ont apporté dessus leurs espaules de deça la riuere de Loire, & permettez que leur condition soit pire que sous les feus Rois vos predecesseurs, les esloignans de vos bonnes graces, & de toutes charges & dignitez : Sera-ce pas vn sujet de rire aux Ligueurs, sera-ce pas aux bons Catholiques vn sujet de croire que quand ils vous auront presté l'espaule pour monter sur le throsne de la Royauté, vous leur donnerez du pied comme aux autres? Car se pourroit-on promettre autre chose d'un homme qui à tous propos quitte les vieilles amitez pour les nouuelles, qui va si souuent au change de ses affections? Vous direz assez, (sçay-je bien) qu'il n'y a point de defect de bonne volonté que la crainte du mécontentement d'aucuns, lesquels à la verité vous ont iusques icy tenu le pied sur la gorge, que le dessein de gagner les autres, ou retenir le tiers party vous font mettre vos bons seruiteurs à part pour vn temps, mais que vous ne les auez pas oubliés. Si vous le faites à ce dessein vostre prudence est loüable, & patissons avec vous, &

posédons cependant nos ames en silence : mais si de cette bonne volonté il ne nous apparoist aucune chose , ny en secret ny en public , & au contraire, si nous voyons que ne les voyez qu'à regret , mesmes que vous ostez de leurs Charges ceux qui vous ont fidellement seruy , ne leur donnez vous pas des impressions contraires à ce que leur voulez faire croire ; il est plus malaisé de dissimuler l'amitié que la haine , il échappe par fois vne parole, & vne œillade descouure nos affections. Parmy vos bons sujets Catholiques, il y en a qui plaignent plus nostre fortune que nous mesmes , car ils ne sont pas tant excitez au mal & nourris en la pauvreté. Nostre premier grief est , de voir Dieu mal seruy par vos sujets, lesquels de vous doivent prendre exemple de bien faire. Le reglement de la reformation d'une maison doit commencer en la personne d'un pere de famille. Quelle honte, quel reproche , quel opprobre , si on voit un Roy de la Religion Reformée , en ses mœurs n'y estre semblable ? Vous permettez aux Catholiques Romains de conseruer leur Religion, & vous deuez auoir soin de conseruer la vostre. Aussi ie croy qu'ils ne s'en attendront d'oresnauant à vostre vigilance. Daudid , que volontiers ie vous proposeray pour exemple & miroir, dit que le zele de la maison de Dieu l'a bruslé, cette maison est l'Eglise de Dieu. Depuis vostre aduenement à la Couronne, quelle preuue auez vous donné de vostre ardeur à l'aduancement de vostre Religion ? car si

vous auez creuiusques icy que la vostre est la
vraye , pourquoy en l'exercice d'icelle vous
montrez vous si froid & si remis ? Si vous la
pensez fausse , que n'embrassez - vous incon-
rinent la Romaine, aussi bien vos sujets d'un
& d'autre party vous en font instance , aussi
bien dit-on qu'une Messe rendra la paix à la
France. Que si vous croyez, ce qui est verita-
ble, qu'il n'y ait qu'une Religion Chrestien-
ne, une Eglise Catholique , mais qu'entre les
Pasteurs il est survenu des disputes & diffi-
cultez , que par le laps de temps il s'est glis-
sé des abus , des erreurs & des superstitions
en l'Eglise , que ces erreurs fussent retran-
chez, & que la paix fût remise en l'Eglise, qui
auez vous mis en besongne pour cét effect ?
S I R B , ne pensez pas que vos ennemis mes-
mes vous en ayent en meilleure estime , car
ce sont ceux qui vous donnent ce blâme les
premiers , & sont bien aises en auoir ce su-
jet. La crainte de Dieu, l'amour de son pro-
chain, ce sont les fruits d'une bonne ame , ces
vertus on les aime , on les admire en un
Turc, en un Sarrazin, sur ces vertus , l'on fait
iugement de toutes les actions d'un Prince ,
on y prend augure de la benediction de Dieu:
cherchez tout premierement le Royaume de
Dieu & toutes choses vous seront données
comme de surcroist , Dieu fera luy mesme
vos affaires , établira vostre Estat & le
couronnera d'honneur & de gloire. Parmy
vos actions on reconnoist encores d'autres
deffauts que nous vous dirons franche-
ment : Pardonnez - moy , S I R B , si nous

prenons tant de liberté à dire la verité, la
 longueur de cette maladie & la violence de
 nostre mal nous fait perdre patience. Vous
 avez vn Conseil que ne tirez prés de vous ;
 ou s'il y est n'y assistez que peu ou point ,
 c'est là plustost qu'ailleurs où vous pourrez
 descouvrir ceux qui vous sont vtils & fide-
 les d'auec les mal-habiles & mal-affection-
 nez. Vous avez vne impression qu'ils sont
 tous marquez à la marque de la Ligue ,
 comment en iugerez vous sans les connoi-
 stre ? & comment les connoistrez - vous
 sans les voir ? & les voit en la sorte que di-
 soit le Philosophe, Parle afin que ie te voye :
 deux heures d'assiduité la Semaine vous en
 feroient la raison , vn clin d'œil vous en
 donneroit la connoissance , vn rayon de ce
 soleil les eschaufferoit à vostre seruice , par
 vostre esloignement ils se refroidissent , par
 vostre absence ils prennent vne autorité
 contre vostre autorité , par vostre desdain
 ils se depitent & prestent l'oreille à vn par-
 ty nouveau , ne vous en prenez qu'à vous-
 mesmes , dés-ja vous vous trouuez aban-
 donné de la pluspart de vos Officiers & Do-
 mestiques : Je sçay qu'ils doiuent tous serui-
 ce à vostre Majesté & leur sang à la patrie ;
 mais quel courage leur donnez vous de ren-
 dre ce deuoir s'ils demeurent sans moyens &
 sans dignitez prés de vous ? car c'est l'hon-
 neur & la dignité qui les y fait venir , c'est ce
 qui les y retient pour la pluspart, & ne se trou-
 uera oncques Prince si barbare & inconside-
 ré , qui ait attendu seruice des siens , qu'au

B.v.

moins il ne leur ait donné du pain à manger : le peuple ne laisse pas d'estre chargé de tailles insupportables & trois fois plus grandes que ne souloient leuer vos Predecesseurs , il ne laisse de souffrir le mal extraordinaire de la guerre & du gendarme. Si vous demandez que deuiant cet argent , c'est bien-fait à vous de le demander, car c'est à vous de le sçauoir, c'est à vous de vous faire représenter par ceux qui sont commis pour vous, l'estat de recette au vray pour iuger quel mesnage y a esté fait. Prenez donc garde, SIRE , à ce que font vos Officiers de Finances : Pensez si les Gouverneurs des Prouinces , des Villes , des petites Places ne sont pas deuenus vos Financiers, & s'ils ne disposent pas du plus beau & plus clair de vos deniers à leur plaisir & profit , sous l'ombre qu'aucuns d'eux ont la suprême autorité de vos finances, si bien que n'en estes pas secouru : Vos domestiques meurent de faim, vos estrangers s'en vont sans argent, & chacun est miserable, sinon eux : Enfin ils prennent pied à pied ce qui vous reste de moyen & d'autorité, & comme a esté dit par de plus sages que moy, si bien-tost vous n'y mettez vne main, vous verrez en vostre Royaume ce qui s'est veu apres les guerres d'Italie, autant de villes autant de tyrans. SIRE , les mauuais ne sont retenus en deuoir que par la crainte, cette crainte est la terreur des loix, la licence de tout faire gaste mesme les bons bien souuent, vous craignez qu'ils trahissent le party, qu'ils vendent vos villes : Il n'y a rien qui les gardera plus de mal faire que la seuerité

té des chastimens, & rien ne les induira à faire mal que la mollesse de vostre naturel, la crainte que vous avez d'eux & la facilité à leur pardonner : moins de dommage y auroit - il par cette rigueur (si Iustice se doit ainsi nommer) d'en perdre trois ou quatre que par vne douceur mal à propos en hazarder trois ou quatre cens, ou tout l'Estat. Espargner les méchans, c'est ruiner les gens de bien ; trop de clemence a plus perdu d'Estats que trop de rigueur. Voulez vous estre reconnu Roy ? il le faut, il est raisonnable : mais comment voulez vous que vos sujets pensent que vous le soyez si vous ne le pensez pas vous mesmes ? & comment iugerons nous de l'interieur de vos pensées que par l'exterieur de vos deportemens ; qui doiuent estre pleins de majesté, d'honneur & d'autorité ? En vne comedie pour y représenter la personne d'un Roy, on fait choix de celui qui sçait mieux faire le Roy & qui a plus de majesté : ie dis cecy pour vne autre consideration. On s'est apperceu quelquesfois que ceux à qui vous faites vn bon visage en public, vous les brocardez en vostre cabinet & en faites risée parmy vos plus familiers. Il vous est échappé de dire lors qu'on parloit de quelqu'un de vos Officiers releué de maladie, Il n'estoit pas assez honneste homme pour se laisser mourir. Cette parole semée parmy les autres, leur a fait croire que vous souhaitez leur mort pour remplir vos parties casuelles : Ce que vous avez dit pour vn qui ne valoit gueres a esté recueilly comme si vous l'auiez pensé de tous. Les brocards à peine sont-ils

supportables en qui que ce soit, mais ils ne sont point plus mal-seants qu'en la bouche du Prince. Il se lit en l'Histoire de France de quelques Rois qui se sont mal trouvez de cette liberté de médire : toutes les actions du Prince doiuent estre composées de grauité, puis qu'elles sont exposées à la veüe d'un chacun, tout y doit paroistre grand & genereux : par fois il vient des Ambassadeurs & autres gens negocians les affaires en pais estrangers, tant de vos sujets que d'autres : leur plainte ordinaire est que vous ne les écoutez point, ou que c'est à regret. S'ils faisoient leurs affaires & non les vostres, si n'aurez vous point d'excuse de leur donner audience. I'en sçay d'aucuns & des plus apparens, ie dis des derniers Seigneurs qui sont partis de vostre Royaume, lesquels emportent avec eux ce regret de n'auoir receu de vous les caresses que leurs seruices meritoient, cela leur touchoit plus viuement au cœur que le mal de leur bourse qu'ils ont vuidée par-deça : Au moins, ce disoient-ils, s'il nous eust contenté de belles paroles, la pluspart des hommes, & mesmement les François, se payent de cette monnoye, d'un bon visage de son Prince, d'un accueil gracieux & d'un adieu de mesme ; c'est la monnoye qui seule vous reste aujourd'huy pour les contenter, en l'honneur de Dieu, SIR R. ne la leur espargnez point attendant que leur puissiez mieux faire. La vertu la plus propre d'un grand Roy est la liberalité, si vous estes chiche d'un bon visage ou d'une belle parole, iugera-on pas par

plus forte raison que vous le devez estre de vostre bourse ? Je ne dis pas que parmy vos Conscillers , vos Officiers , vos seruiteurs , il n'y en ait aucun de mauuaise creance , mais qui les doit connoistre que vous qui estes leur maistre ? Il me feroit beau voir de laisser coucher mon valet en ma chambre & auoir toutes les nuits apprehension qu'il ne me voulust couper la gorge , il ne se peut dire que le fassiez à dessein, ou qu'en esperiez quelque vtilité. Dieu veuille qu'on ne die point parmy nous, comme on fait désja parmy vos ennemis, qu'il y a de la foiblesse d'esprit , & que cette debilité de cerueau est encore vn effet de ce coup de masse que receut vostre ayeul le Comte de Clermont fils puisné de Saint Louys , le mot *di poca ingegno* , qui est vne lettre intercepte de l'Euesque de Plaisance , montre que les Italiens ne sçauent que trop de nos affaires. Pour balancer ces defauts avec vos vertus desquelles vous n'estes pas despourueu , graces à Dieu , l'on couche pour premier article vostre valeur , vostre adresse , laquelle a produit tant de beaux & admirables effets. Et à la verité , S I R E , c'est ce qui a donné à vostre Majesté plus de nom parmy les peuples estrangers , & qui plus arreste le cœur de vostre Noblesse. Mais voyons si vous ne les auez point ternies par les hazards , auxquels sans propos vous auez souuent exposé vostre personne , & en vostre personne vostre Estat ; iugeons si vous n'auiez point merité plustost le nom de Capitaine que de Roy , ou plustost le nom de Soldat

que de Capitaine : aussi est-ce la louange que l'on vous donne plus communement , comme si vostre vie deuoit vn iour fournir aux écriuains de sujet plutôt à faire des Romans que pour écrire vne histoire. Autres sont les vertus d'un Roy , autres celles d'un gendarme. Des Roys du vieil temps il y en eut qui sur toutes perfections sçauoient ou bien baler ou bien dire , il fut dit que l'un estoit vn baladin , & l'autre vn bon orateur. Je sçay que la valeur vous est bien seante , ie sçay qu'en ce temps il nous estoit nécessaire d'auoir vn Roy courageux, mais pardonnez moy si ie vous dis en l'oreille que la valeur sans prudence approche fort de la temerité , l'âge & l'expérience vous detremperont cette ardeur qui est née en vous , en ceux de vostre maison , en ceux de vostre nation. Mais il me reste vn scrupule, sçauoir si caresser vos ennemis , ceux qui vous ont trahy tant de fois ; ceux qui cherchent vostre mort & la ruine de vostre Estat , & au contraire si gourmander & desdaigner ceux qui volontiers ployent sous le ioug de vostre obeïssance , ceux qui tous les iours sacrifient leurs vies pour vostre conseruation ; si dis-je ce sont effets d'une vraye generosité de cœur , ou bien s'ils effacent pas le lustre de vostre valeur : car i'auois tousiours oüy dire que le propre d'un grand cœur est de faire tout le rebours : craignez vos ennemis , vous voila mesprisé, mesprisez vos amis , vous estes odieux , c'est fait d'un Roy hay ou desdaigné. Nous lisons que souvent les plus vaillans Roys de France ont

perdu cét Estat , ou au moins l'ont mis au hazard, & que les plus sages & plus fins l'ont remis & restably. Il ne se lit rien de plus vaillant qu'estoit le Roy Jean qui perdit la bataille à Poitiers. Il ne se lit rien de plus sage que le Roy Charles cinquiesme, surnommé le Sage , qui regagna ce que son pere auoit perdu. Il ne se lit rien de plus rude que Charles sixiesme qui donna son Royaume aux Anglois, & rien de plus fin que Louïs vnzième , qui acheua de refranchir la seruitude des Anglois & des Bourguignons. Je sçay que vous aimez mieux ressembler aux deux qui l'ont remis , qu'aux deux autres qui l'ont perdu. Si est-ce que Philippes de Comines , (l'histoire duquel le dernier Empereur Charles sçauoit par cœur) assure que ce Charles le Sage vostre predecesseur ne bougeoit le plus de temps de son cabinet à écrire memoires , faire depescher , prendre auls de son Conseil. Louïs XI. ne montoit pas si souuent à cheual que vous, & auoit toutesfois à faire à d'aussi mauuais garçons que ceux qui vous travaillent aujourd'huy. C'est vn erreur populaire semé à dessein parmy nous , que le Roy Philippes ne se mesle aucunement de ses affaires, & qu'il s'en est entierement deschargé sur son Conseil : car il est certain qu'il voit luy mesme toutes ses depeschés , garde la clef de ses lettres & memoires plus importants , n'en communique à son Conseil qu'autant qu'il a besoin de leur conseil, employe au cabinet du moins quatre heures tous les iours, voyez au reste de quelles armes il vous assaut, de ruses,

d'argent, & de gens, & vous ne vous deffendez que de la pointe de vostre espée : Il n'y eut iamais en combat telle disproportion, les armes sont inégales, & neantmoins il faut dire la verité & en donner gloire à Dieu, si vostre bon heur ne vous eust si tost abandonné, toutes ses finesses & finances s'en alloient le sujet de vostre gloire, car Dieu suppleoit à vos deffauts par ses benedictions : reste deux choses, l'vnc ou opposer vos ruses à ses ruses, vostre or à son or, ou si vous n'y estes bastant, reprenez le cours de vostre premiere integrité & recourez au Dieu des armées & grand Dieu des batailles, qui vous fit triompher à Coutras & couronner à Arques : les larmes vous serviront plus que les armes, la plume plus que le cousteau, & le conseil que la force. Regardez par quel artifice vos ennemis ont bataillé cét Estat : le feu Duc de Guise par ses menées & secrettes intelligences, en somme par son bon esprit & industrie, estoit desia monté iusques au plus haut eschelon de cette Couronne, le moins dont il s'est seruy sont les armes & la force, il faut vaincre les cœurs, cette victoire est vostre, plus utile, voire plus honorable. Prenez garde au chef de vos ennemis, ie dis à ce finet le Prince de Parme, voyez si par sa resolution il sçait pas effectuer ses desseins, & par sa subtilité échapper du mauuais chemin. Les anciens souloient dire que qui ne se fait pas sage & par soy-mesme & par autrui, est hors d'esperoir de guerison. Et vn ancien Docteur de l'Eglise dit plaisamment qu'il n'est donné qu'aux enfans de chop-

per deux fois, & sur tout par mauuais conseil, & en fait de guerre & en fait d'Estat, & maintenant qu'elles sont faites nous pouuons micux le dire que les r'habiller. Je m'en rapporte à vous mesmes, SIR B, qui estes reputé le plus grand Capitaine de nostre temps. Or ne veux ie pas icy particulariser tout ce que vos seruiteurs & vos ennemis trouuent à redire en vous; possible que le bon zele des vns & la malice des autres leur en fait dire plus qu'il n'y en a, de moy ie le veux ainsi croire. Je ne veux pas par ce recit de vos deffauts ramenteuoir tous nos malheurs, à peine auons nous du temps assez pour plaindre ceux qui nous arriuent tous les iours: Je ne veux pas vous enseigner icy l'art de bien regner, ie suis trop mauuais maistre, les liures en sont tous pleins: vn ancien disoit qu'il n'y auoit point de meilleurs maistres que les maistres muets, & pour le Prince & pour eux mesmes, car ils sont hors de soupçon de flatte-rie, & ne craignent point le courroux de ce luy qui les lit. Seulement ie vous diray, SIR B, que vous estes le pere de vôtre peuple, le chef de vos armées, le medecin de vôtre Etat, sur vous seul, apres Dieu, nous iettons l'ancre de nos esperances, de vous seul, apres Dieu, nous attendons nôtre deliurance. SIR B, si c'est vn sômeil qui vous auoit assoupy, il est temps de vous re-ueiller, si c'est vn erreur, chassez les nuages & prenez lumiere & instruction de ceux qui vous peuuent donner conseil fidele & salutaire. Apres la gloire de Dieu & la conseruation de vôt-
tre peuple, il n'y a rien qui vous doie plus
toucher au cœur que le soin de vôt-
re me-

moire à l'aueuir , que de laisser à la posterité vn beau nom, vn vray suiet de vos louanges. L'iniustice de ceux qui veulent enuahir cét Estat & vous voler cette Couronne , les punitions soudaines que Dieu donne à nos pechez , tant de merueilles faites en vostre personne & par celuy qui ne fait guere les choses extraordinaires sans vn but extraordinaire ; les prieres de tous nos bons voisins, les pleurs & gemissemens de vostre peuple & prou d'autres considerations me font esperer que Dieu aura finalement pitié de nous & de vous , & que ses verges sont d'un pere & non d'un bourreau. Daudid auoit failly lourdement, il vous a laissé le patron de sa repentance en sept ou huit de ses Pseaumes & en l'histoire de sa vie, il dit luy mesme qu'il n'a point plütoüst confessé à Dieu son forfait que par sa bonté vray pardon ne luy ait esté fait : faites de mesme, & le mesme vous auendra, la faueur de Dieu estant eclipsée , elle paroistra dès l'heure que vous la chercherez avec amendement de vostre vie & resolution de suiure son conseil. Cependant prenez la peine de lire vos traits en cét écrit: Si iamais vne belle Dame ne regardoit en sa glace , enfin la crasse luy couuriroit le visage. I'ay veu aucuns qui ne se plaisoient qu'aux faux miroirs , & qui leur rendoient leurs faces plus belles & plus ieunes ; mais c'estoit pour se tromper soy mesme & se faire mocquer par autrui. Quelques Princes font de mesme , leurs flatteurs leur sont pendants d'oreilles , la verité leur est à contre-cœur , il n'en est pas ainsi

de vous, Dieu mercy, vous estes Prince bien né, & nourry en bonne école, & sçay que naturellement vous detestez telle sorte de gens, aussi ie me promets que ne reietterez cét écrit pour quelques traits que i'y aye couché vn peu trop librement, & plus que le malheur de ce siecle flatteur & depraué ne me le permet. Il se lit de quelques Roys & Empereurs Payens qui pardonnoient à ceux mesmes qui leurs disoient iniure, & que quelques autres se sont transuectus pour oüyr dans la foule du peuple ce que leurs suiets trouuoient à redire en eux. Vous estes plus que tous ceux-là puisque vous portez ce beau nom de tres-Chrestien; & puis qu'ainsi est, faites que nous puissions vanter comme Tacitus faisoit en faueur de son Trajan Vespasien, heureux siecle auquel il est loisible de penser ce que l'on veut, & dire apres ce que l'on a pensé, il faut neantmoins y apporter l'amour & le respect, & Dieu m'est tesmoin que c'est à mon trop grand regret que ie vous ay fait ce discours & représenté les plaintes de vostre pauvre peuple. Mon ancre est destrempé de mes larmes, mon papier est laué de mes pleurs & puis deseché du vent de mes soupirs, ausquels pour faire fin i'aiouste à souhait du plus profond de mes entrailles, Que nostre Dieu veuille amender nos deffauts, accroistre vos vertus & vous remplir de ses benedictions au bien de cét Estat, à la paix de vos sujets, & à la ruine de vos ennemis.

LA CHARGE ET CREANCE

*donnée au Pere Matthieu Aquarius
par ceux de la Sorbonne de Paris.*

ENcore que les gens de bien & bons Catholiques soient grandement affligez & reduits en extreme pauvreté , si ne perdent ils pas courage , ayant ferme esperance en Dieu, lequel miraculeusement par son accoustumée bonté les a iusques icy conseruez, aussi visitez de cette affliction presente , sans laquelle ce miserable Royaume , sans aucun doute, s'en alloit par vne corruption de mœurs plonger en atheïsme.

Contre laquelle ny plus ny moins que contre l'heresie , ils combattent & font la guerre voyant que l'une donne secours à l'autre , & que Dieu par icelles est offensé en ce temps principalement où l'iniustice qui regne s'oppose aux bonnes fins & precogitations des hommes.

Et à celle fin qu'ils soient deliurez de ces deux si detestables vices , ils desirent auoir vn Roy , lequel ait la Religion & la vertu, & avec telle vertu la puissance. C'est pourquoy ils prient continuellement Dieu de leur en donner vn tel , estant bien certains de ne le pouoir obtenir sans sa prouidence & singuliere bonté.

Toutesfois , par ce que Dieu agit & opere

par les secondes causes , & qu'il veut que nous vſions des voyes ordinaires , & moyens humains : de fait ayant bien confideré d'où nous pourrions eſperer quelque aide & bon confeil , encore ſe trouue il beaucoup de difficulté : car encore qu'en ce Royaume on peut trouuer homme amateur de la Religion & iuſtice , ſi n'auroit il pas toutesfois telle authorité & puiſſance acquiſe à choſe ſi grande : de ſorte que difficilement ſ'en trouueroit-il vn d'ailleurs de ceſtrois ſuſdites choſes , car qui fait du tout deſeſperer de cecy eſt la tres-grande ieuneſſe de l'un , & la vieilleſſe de l'autre qui tous deux nous pourroient ſeuls aider , outre beaucoup d'autres difficultez & raiſons, leſquelles ſans doute ſe pourroient en cét endroit & ailleurs mettre en auant ; pour ce que les paſſions humaines qui en ce temps icy ſont peruerſes , ſemblent auoir plus de poids & authorité que n'a pas le zele à l'honneur de Dieu.

Les choſes eſtant en tel eſtat , il ſeroit de beſoin pour preuenir le mal qui menace toute l'Europe, de nous ayder les vns les autres , & que l'abondance d'un Royaume rempliſſe le deffaut de l'autre , & pource il faut ſ'aider d'une perſonne d'icy , ſe ſeruir d'une puiſſance & authorité eſtrangere & la maintenir.

Sa Sainteté & ſa Maieſté pourroient faire & l'un & l'autre, pour mieux faire conſeruer & eſtablir cette authorité , il ſeroit bon faire vn mariage avec la fille d'un Prince , ce qui me fait eſtimer que pour ce ſeul ſuiet quel-

ques vns quitteront ce qu'ils esperent & prétendent en cette cause. Ce que à grande peine se pourroit il faire autrement.

Mais maintenant pour plus particulierement parler d'icelle personne , qu'il ne fut preferé à tous autres & esleué en cette dignité pour ce qu'ils sont de lignée Royale, & aliez avec nos Roys, ioinct aussi qu'ils sont suiuis de la plus grande partie de la Noblesse, mais iusqu'aujourd'huy ils ont donné si peu ou point d'esperance d'eux, iusques à ce qu'ils pensent leur estre plus expedient, & pour paruenir à la Couronne desuiure leur cousin, & le peuple Catholique, auquel ils ne se fient, & duquel aussi ils pensent estre hays, & ce pour raison qu'ils voyent que leurdit cousin n'a point d'enfans, & que de iour en iour il s'accroist, & dautant qu'il se fait en leur nom quelques menées, si sont elles si profondes qu'à peine peut-on croire cela proceder d'eux, mais i'estime tendre à autre fin.

Cette maison estant deboutée, la seule maison de Lorraine nous reste en laquelle dautant que la dignité & merites se combattent, si se trouue il de si grandes difficultez, car outre la préeminence & grands merites du Duc de Lorraine & de ses enfans, aussi l'esperance d'un mariage en cette maison se pourroit faire, soit pour raison du pere ou du fils, encore sont ils germains & aliez du sang Royal, chose de tres-grande importance, mais pour ce que les deux autres, A sçauoir, les Ducs du Mayne, & de Guise sont natifs en ce Royaume, & que le peuple leur est affectionné, pour

cause que ledit du Mayne, & le pere de Guyse ont exposé leurs vies en mille dangers pour la deffence du Royaume, ou de la Religion, comme ont fait leurs predecesseurs, ce que encore qu'on laissaît debattre entr'eux deux, ne manqueroit de grandes difficultez : car encore que ledit Duc du Mayne se soit exposé aux dangers pour la deffence de la Religion, & de nostre liberté, & nous ait conserué iusques icy, si n'a il pas eu l'heurny credit (disent quelques vns) ny l'habilité de se maintenir en son autorité ; soit que cela soit aduenü par nos pechez, ou bien que ses troupes ne fussent égales à celles de l'ennemy, au contraire les hauts & excellents faits du feu Duc de Guise, lequel outre ce qu'il estoit vouë pour la deffence du peuple, sont tellement fichez en la memoire des hommes qu'il n'y a nulle doute qu'ils ne fauorisent sur tous autres son dit fils : veu que principalement il est d'esprit, prompt & gaillard, courageux & vaillant, ayant tousiours bonne opinion de foy.

Les affaires estant en tel estat, s'ils ne tombent d'accord entr'eux, & que deux ne quittent à vn seul, ie serois d'auis que l'on ne passast outre pour l'election ; mais plütoist que l'on les repeust & entretint tous d'une esperance, les encourageant tous d'un commun consentement à procurer la ruine des ennemis à l'exemple de tous les autres Princes Catholiques & Chefs de guerre : & iagoit qu'en cela ils s'accordassent, si toutesfois de uons nous grandement desirer d'auoir le plütoist que faire se pourra vn Roy, à celle fin que

par vn si haut & honorable nom , il attire les vns vers soy , & donne crainte & épouuante aux autres , n'y ayant pour les troubles presens aucuns moyens d'assembler les Estats , qui seroient pour vne si importante affaire deuëment & legitimement assemblez. En apres l'ennemy ayant vne si belle & puissante armée , il seroit à craindre que par cette precipitation , on bouchast le chemin à quelque meilleur dessein pour pouruoir à cette dignité.

Si toutesfois on met en auant d'autres raisons pour persuader cette election , il faudra que le saint Pere interpose sa puissance & autorité , persuadant aux deux de quitter à vn seul , lequel pourra prendre pour femme la fille de sa Maiesté , afin de d'auantage assurer son Royaume , lequel autrement va tomber. Le croy qu'il ne sera difficile à leur persuader : toutesfois si on ne peut assembler les Estats ordinaires , cela se pourra faire par election de tout le Camp , à la coustume des Romains & anciens François.

Et pour ce faire il est tres expedient & tres necessaire de faire la guerre plus cruelle que l'on n'a pas oncques fait , car si les Chasteaux des Gentils-hommes fort proches des Villes ne sont ruinez & démolis , & que l'on ne prefere le droit de guerre à l'amitié & alliance qui se pratique entre les Nobles , car ces guerres seront immortelles , & pour mieux dire toutes voleries. Les doctes & bien aisez coniecturent deuoir durer à nostre grand letriment plus de trente ans.

On

On pourroit sur ce propos alleguer aucunes raisons , que pour estre bref ie laisseray, reste vne autre chose à faire ; C'est qu'il faut establir pour la guerre vn fidel, & aisé conseil, & faire que les Chefs de guerre tiennent quelque ordre entr'eux, & que l'argent destiné pour la guerre, ne soit mis entre les mains des Thresoriers de Cour. Que outre ce qu'ils en font inutile despence, se pariurent souvent ; Ioinct aussi qu'ils sont mal affectionnez à nostre party.

Enfin pour conclure en vn mot , il faut que nous confessions qu'apres Dieu nous ne tenons vie que du Roy Catholique, lequel nous a conserué en franchise & en nostre Religion, non pas seulement en ce pays, mais aussi par toute l'Europe, la bonté & liberalité duquel nous aurions iusques à present experimentée. C'est pourquoy nous faut incessamment remercier Dieu de nous auoir donné vn tel protecteur de l'Eglise, & le prier tous les iours de le conseruer longuement sain & sauf, & que pour si grands trauaux & labeurs il soit receu au Ciel de tous les saints, & mené avec les Roys & Empereurs, lesquels pour l'honneur de Dieu n'ont redouté & craint les trauaux & dangers.

Pour lesquelles choses toutes les facultez de Paris supplient tres-humblement le Roy Catholique, se prosternans deuant luy, de secourir par son accoustumée & Royale bonté toute cette pauvre France de ses moyens & forces, & ne permettre que le Duc de Parme avec toute son armée estrangere s'en re-

tourne , iusques à ce que nous soyons du tout deliurez de nos ennemis, & que nous puissions servir & honorer Dieu sans aucune crainte. C'est pourquoy non pas seulement tout l'ordre des Theologiens, ny la ville de Paris, ny mesme ce Royaume , mais en general tout le monde connoist & confesse le Roy Catholique estre comme pere protecteur de la foy , bouclier de la Religion, fleau des Heretiques, & protecteur de toute l'Eglise.

Quant au reste que nous auons pû discourir de paroles avec le Pere Matthieu , enquoy luy auons ouuertement decouvert nostre volonte , il n'est ja besoin de la mettre icy , sera à faire à luy , à la prudence duquel auons commis toutes choses, de la raconter à sa Majesté quand il verra bon estre & expedient pour la cause publique, & pource , le supplions pour l'amour & affection qu'il porte au retablissement de toute l'Eglise , de diligemment s'acquitter de tout cecy.

LETTRE DE MONSIEUR DE *Villeroy à Monsieur de Bellicure.*

MONSIEUR ,

Si ie pouuois par mes raisons & réponses vous rendre la consolation que ie reçois de vos lettres , qui sont pleines de bons enseignemens & d'amitié , ie vous escrirois souvent , & n'usé tant tardé que i'ay fait à vous

remercier de celle du vingt-sixiesme Feurier, que Monsieur de la Verriere me fit tenir : mais tout me manquant pour ce faire , excepté la bonne volonté , ie m'abstins de vous importuner comme celuy qui n'a pouuoir que de desployer les gens de bien plutôt que de iustifier leur cause ; i'en ay dit mon auis, où ie me suis trouué , mais il y en a qu'il faut que l'experience enseigne , & le pis est , que ce sera aux despens du public , auxquels plusieurs innocens auront part comme les autres. I'ay esté des premiers à desirer , & peut-estre à proposer cette conference des Catholiques, comme vn moyen tres propre pour faire parler les vns avec les autres à cœur ouuert , & pour arrester le cours à plusieurs desseins extrauagans qui se font par tout : mon intention estoit bonne , & vous diray que l'ayant communiquée à mon arriuée à Paris, elle fut bien receuë , & toutesfois nostre malheur est tel , que quand elle fut depuis proposée , elle fit peur à beaucoup de gens , & neantmoins elle n'a pû estre reiettee , parce qu'un tel refus condamneroit les auteurs d'iceluy , & chacun craint ce iugement public. C'est pourquoy avec les autres raisons qu'il vous a plu m'ecrire , ie serois d'auis que l'on y voulût entendre. Il n'en peut mal auenir qu'à ceux qui y procederont de mauuaise foy , & qui n'auront l'intention bonne , elle retardera plusieurs mauuais desseins qui sont sur le bureau , & peut estre qu'elle produira plus de fruit que nous n'esperons. Combien auons nous veu de choses succeder tout au contrai-

re de l'intention de ceux qui les auoient commencées & acheminées. Nous sommes en vn estat que nous ne deuons faire de difficulté de traiter toutes sortes de remedes, car nous sommes comme abandonnez des medecins, & faut considerer quel est le but d'vn chacun. Je pense vous auoir écrit cy-deuant, que si i'auois vn procès qui me fust de grande consequence, & où ie creusse auoir bonne cause, ie ne m'attendrois aux poursuites ny m'arrêteroïis aux écritures & productions de ma partie, pour en auoir la fin à mon contentement, parce que ce ne seroit son profit d'auancer le mien, & aussi que nous en voyons peu qui soient aussi sages pour se resoudre de quitter leurs esperances, quand ils s'y sont laissez emporter pour iouir d'vn bien qu'ils estiment moindre, encore qu'il soit plus certain. Monsieur que ceux qui ont plus d'interest à la matiere fassent leur deuoir & Dieu leur aidera sans doute, car il est protecteur de l'equité & de la verité, c'est ce que i'ay à répondre à vostre derniere lettre, ie vous presente mes bien humbles recommandations, ce dix-septiesme Mars mil cinq cens quatre vingt treize. Monsieur i'ay eu des lettres de Monsieur le Cardinal de Gondy par Monsieur de Bussy, mais ie remets le tout sur ce qu'il me dira, à quoy il m'a promis de satisfaire au retour de Chartres où il est allé voir Madame sa mere. Je ne vous puis dire combien i'ay esté picqué des trauerses qu'a receuës ledit sieur Cardinal en son voyage, contre les promesses que ie luy auois faites, & ce que

i'auois eu charge de luy dire , dont m'estant plaint viuement , on s'est excusé sur l'indiscretion de ceux qui ont fait l'office , Dieu en fera le iuge. Mais toutes dissimulations se descouuriront avec le temps aux despens de ceux qui en vsent quand elles tendent à mal.

RESPONCES DES DEPVTEZ
de la Ligue à ceux du Roy , aux
propositions par eux faites
aux conferences.

MESSIEURS , Vous nous avez dit & depuis écrit & publié, que le Roy de Navarre se veut faire instruire & se rendre bon Catholique dans peu de iours , que ce vœu estoit en luy , ou pour mieux dire, qu'il estoit Catholique en l'interieur de son ame. Il y a delia long-temps que vous nous inuitez sur cette assurance de traiter avec vous des moyens d'assurer la Religion & mettre le Royaume en repos luy se faisant Catholique , & pour preuue de sa bonne volonté , offrez en son nom vne surseance d'armes pour deux ou trois mois.

Nous désirons cette conuersion que vous promettez , & prions Dieu qu'elle auienne bien-tost , qu'elle soit vraye & sincere, & que les actions qui doiuent proceder & suiure ce bon œuure , soient telles que nostre S. Pere (auquel seul appartient d'en faire le iugement & le recueillir en l'Eglise) puisse demeu-

rer satisfait , & la Religion assurée à son contentement & de tous les bons Catholiques , qui apres auoir souffert tant de maux ne desirerent rien plus que de iouyr d'un bon heur & assuré repos , sans lequel ils prenoyent , & iugent bien la ruine inéuitable de cet Estat.

Nous ne pouuons toutesfois celer que nous ne voyons rien en luy qui nous puisse donner cette esperance. Celuy qui veut faire le bien, il faut premicrement laisser le mal , qui veut entrer en l'Eglise & receuoir les impositions des Euesques , Prelats & Docteurs , comme vous le publiez desia par tous endroits , doit approcher de luy les gens de bien , esloigner les ministres & discontinuer l'exercice de la Religion qu'il commence à blâmer , comme chacun sçait qu'il est tous les iours en paroles & actions toutes contraires.

Il vaudroit mieux dire qu'il n'estoit pas lors tel, au moins les Catholiques qui reconnoissent l'Eglise Catholique Apostolique & Romaine le veulent & desirent , mais que Dieu luy en a aujourd'huy donné le mouuement & la volonté, c'est luy seul qui le peut faire aussi quand il luy plaist , & ce discours nous satisferoit d'auantage que de mettre encore en auant comme vous faites , qu'il est flechy à la priere des siens , car les considerations temporelles & les raisons humaines peuuent changer l'exterieur, mais nostre ame ne peut estre atteinte & rendue capable de cette doctrine que par la grace du S. Esprit.

Vous ne deuez faire aucun preiugé de sa volonté sur le refus qu'il a cy-deuant fait à Mon-

lieu: le Marquis de Pisany, car il estoit enuoyé de la part des Catholiques qui assistent ledit Roy de Navarre, & non de la sienne, qui est vn mespris duquel il se pouuoit bien tenir offensé & vn tesmoignage aussi que la volonté de celuy de la conuersion duquel on luy donnoit quelques esperances, en estoit du tout esloignée, puis qu'il n'y enuoyoit en son nom, outre qu'au mesme temps que le voyage se fit, des Magistrats qui tiennent les departemens en son party, donnoient des iugemens diffamatoires contre la Bulle & autorité du Pape & du saint Siege. Or nous voulons croire qu'à l'auenir on y procedera d'une autre façon & avec plus de respect & consideration du saint Siege & du deuoir que nous auons au saint Pere.

C'est doncques ce que nous pouuons respondre sur l'ouuerture que nous auez faite de la conuersion que nous desirons vraye & sincere, mais qu'elle se doit faire avec l'autorité & consentement de nostre saint Pere, qu'il se doit adresser à luy, & non à nous. Tout ce que nous pourrions apporter dauantage seroit d'enuoyer de nostre part deuers sa Sainteté, pour luy représenter l'estat deploré & miserable de ce Royaume, & le besoin qu'il a d'un assuré repos: ce neantmoins que nous sommes deliberez d'endurer tout, moyennant la grace de Dieu, plutôt que de laisser nostre Religion en peril, & entendu la dessus son intention, recourir à ses commandemens & y obeyr: en quoy nous procederons avec telle foy & intégrité que chacun connoistra que

auec la Religion, nous y auons recherché & voulons rechercher de tout nostre pouuoir le bien & repos de ce Royaume, qui ne peut faire naufrage & peril que n'y trouuions nostre ruine & vous la vostre.

Auant que cette conuersion soit aduenüe & qu'elle soit aussi receüe & approuuée; nous vous prions prendre de bonne part, si nous desirons de traiter avec vous, car nous le pouuons faire, sans approuuer dès maintenant cette conuersion dont le iugement doit estre remis à sa Sainteté.

Nous desirons d'auantage, quand l'approbation en sera faite, prendre l'auis de nostre saint Pere, sur les seuretez requises pour conseruer en ce Royaume la seule & vraye Religion, qui est la Catholique Apostolique & Romaine.

Auec ce nous considerons que quelques difficultez pourroient naistre sur le traité desdites seuretez qui empescheroient ou retarderoient l'effet de si bonne œuvre, au blâme peut estre de ceux qui en seroient les moins coupables.

Pour le regard de la surseance d'armes, après que nous serons éclaircis de vostre intention sur les deux precedens articles, nous y ferons réponse, qui tesmoignera que nous ne desirons que le bien & soulagement du peuple.

Messieurs en nos premieres conferences, nous vous auons prié sur les differens qui empêchoient nostre reconciliation & sur le commun desir & besoin de la paix, qui ne peut

estre que souz vn Roy legitime , ny souz autre que celuy qui en a le droit par la Loy du Royaume , de vouloir considerer avec quelle patience & modestie , les autres Chrestiens ont tousiours obey aux Princes souuerains , & Magistrats par eux ordonnez , bien qu'ils fussent Payens , ennemis & persecuteurs de ceux qui faisoient profession de la Religion Chrestienne , cette patience procedant non de leur petit nombre & foiblesse , mais des enseignemens qu'ils auoient en la sainte Escriture , exhortations & exemples des saints Peres.

Nous vous auons neantmoins remonstré pour le regard du Roy qu'il a pleu à Dieu nous donner , que nous estions en meilleure condition qu'eux , & ce que nous desirions tous , pour le regard de la Religion : de sorte que nous auons occasion de l'estimer comme faite par elle. C'est en somme la priere que nous vous auons faite au premier , & non autre , ny à autres conditions. Nous l'auons bien voulu derechef représenter en ce peu de mots , pour ne laisser aucun doute en l'esprit de personne , avec lequel nous n'auons voulu , & ne voulons tousiours proceder en ce fait.

Nous ne pouuons aussi moins faire pour plus claire intelligence de ce qui s'est passé entre nous , si ce n'est que vous desiriez comme nous la conuersion de sa Majesté.

Mais que ne pouuiez entrer en aucun traité avec nous , qui fut à son profit , que n'eussiez eu sur ce l'avis de sa Sainteté , alleguans avec quelques passages d'Escriture.

Cs

des raisons d'Estat , qui regardent comme vous dites la conseruation de vostre party , par lesquelles foustenez ne vous pouuoir plus amplement declarer sur ladite priere.

Cela ayant esté rapporté aux Princes & Seigneurs , de la part desquels nous sommes icy venus par deux d'entre nous, & le tout représenté , elle auroit pris la bonne & finale resolution que nous vous auons baillée par écrit dès le 16. May : portant l'assurance de ce qu'auparauant nous desirions , à laquelle pour briefueté ne pouuons ny voulons aioüter aucune chose.

Messieurs quand on vous accordera ce que pour ce regard vous dites , qui ne se trouuera toutesfois, qu'il y ait aucune contrarieté, à ce que nous auons baillé par écrit , ny aussi aucune contrauention aux promesses de sa Majesté , laquelle est d'ailleurs conuë pour Prince de bonne foy , nourry de simplicité , qui n'a point de fard , ny en ses promesses, ny en autres choses.

Mais la façon esloignée de tout artifice, avec laquelle il a procedé iusques à present , peut assurer vn chacun que ce qu'il aura vne fois promis , il l'observera saintement & de bonne foy. Ny le Roy Clouis , ny l'Empereur Constantin ne declarerent pas au premier iour , ce à quoy ils estoient résolus dans leurs cœurs , touchant la Religion Chrestienne , toutesfois il semble n'estre hors de propos de le mettre en consideration , pour monstrier que les changemens où il y va non seulement de la conscience , mais aussi de l'exemple

mesmement de personnes de si grandes dignitez , ne se peuuent faire en vn moment , & faut que les formes qui y sont requises precedent.

L'autre point de vostre réponse contient que vous ne pouuez traiter d'aucun accord avec nous , si ce n'est par l'auis du Pape , remonstrans que vous n'approuueriez en aucune sorte la conuersion de sa Maiesté , si ce n'est apres qu'elle aura esté iugée & approuuée par sa Sainteté.

A cela nous répondons que nul n'a montré plus que les Princes & Seigneurs, de la part desquels nous conserons de ces affaires , & avec lesquels nous sommes ioints : Nous au contraire en auons receu & senty toute faueur , si est ce que cela n'a point changé ceux que nous representons , ny fait perdre le desir exterior qu'ils ont tousiours eu , & auquel ils continuent de gagner la bonne grace de sa Sainteté.

Pour le regard de sa Maiesté , si sa conscience & sa ferme resolution de se bien vnir avec sa Sainteté, qu'elle estime aussi Prince tres-vertueux , amateur du repos de la Chrestienté , l'assuroient de le trouuer fauorable au bien de ce Royaume , toutes apparences & procédures passées luy fourniront assez de iustes argumens pour s'excuser & iustifier enuers le monde , si elle demeueroit retenuë de s'adresser à sa Sainteté.

Mais par nostre écrit precedent , nous vous auons dit ouuertement la sainte intention de sa Maiesté , qui est de contenter au fait de la

Religion ses bons ſuiets Catholiques , & ſe comporter pour le regard de l'obeyſſance & reſpect qui eſt dû à ſa Sainteté.

Pour cét effet ſa Majeſté a mandé & conuoqué, ainſi que nous auons deſia déclaré, les Princes de ſon ſang , aucuns Princes, vn bon nombre de Prelats de l'Egliſe & Docteurs en la faculté de Theologie , les Officiers de ſa Couronne , & pluſieurs autres grands Seigneurs de ce Royaume, enſemble aucuns des principaux & notables Officiers de ſes Parlemens , eſperant moyennant la grace de Dieu & bon conſeil qui luy ſera donné par vne ſi notable aſſemblée, qu'il ſera pris vne ſi ſainte & ſi ſage reſolution, touchant le fait de l'abſolution & conuerſion, que ſa Sainteté, & tous les autres Potentats Catholiques auront occaſion d'en eſtre bien contens & ſatisfaits , & tenons pour aſſuré que nul deſirant la conuerſion Catholique & la proſperité de cét Eſtat, ne pourra ny voudra contredire. Au demeurant la ruine que nous voyons en ce Royaume & ſouffrons tous avec infinny regret des gens de bien , & que nul bon François ne peut regarder à yeux ſecs , doit faire exercer tous moyens autant qu'il eſt au pouuoir des hommes , de haſter les remedes pour empéſcher la totale ruine de noſtre patrie. C'eſt à cette fin que ſa Majeſté nous a fait dire ſa bonne reſolution touchant la trefue , à laquelle ſi ne voulez entendre , ſinon que vous ſoyez plus auant ſatisfaits , que ne pouuons & ne deuons par raiſon , de ce que vous deſirez de voſtre répoſe: Dieu qui eſt le iuge des

uns & des autres , fera que tout le Royaume connoistra & verra clairement d'où vient le conseil qui luy a esté donné par vne si notable assemblée, qu'il sera pris vne si sainte & sage resolution, ainsi que doit vn Roy de France, premier fils de l'Eglise, tres-Chrestien, & Catholique, & à qui deura estre imputé le retardement du bien & soulagement qui aduendra par le moyen de ladite Trêve, qui nous pourroit avec l'aide de Dieu, acheminer à vne bonne & perdurable paix.

DECLARATION DV ROY
*sur l'absolution des Prelats qui l'ont
 receu en l'Eglise Catholique.*

HENRY par la grace de Dieu Roy de France & de Nauarre : Declarons par ces presentes, qu'encores qu'apres l'inspiration qu'il a pleu à Dieu nous donner de nous vnir à la sainte Eglise Catholique, Apostolique & Romaine, & auoir fait sur ce protestation de nostre foy deuant les Prelats à cette fin assemblez : Nous ayons requis absolution en ce que pouuoit dépendre d'eux sur le cas qu'elle nous pouuoit estre necessaire, afin de ne differer nostre reception & incorporation en ladite Eglise, pour les iustes raisons & considerations que leurs aurions remontrées, & par eux meurement examinées avec l'aduis d'aucuns Docteurs en la sacrée faculté de Theologie, qui les assistoient ; Toutesfois nous n'a-

uons vſé de ce moyen pour mépriser & ne vouloir reconnoistre l'autorité de nostre saint Pere le Pape , mais seulement pour ne pouuoir recourir à sa Sainteté pour cet effet si promptement que le besoin le requeroit pour la décharge & ſcureté de nostre conscience , que pour le bien vniuerſel de nostre Royaume, & avec intention de nous adreſſer à sa Sainteté , plutost qu'il nous ſeroit poſſible , pour luy rendre le deuoir & la reuerence que nous luy deuons, & luy representer nos iuſtes excuses, de ce qui a eſté fait en cet endroit, afin qu'il luy plaiſe nous y impartir le remede & la ſouueraine puiſſance & autorité, comme Chef de l'Egliſe, & Vicaire general de nostre Seigneur Ieſus-Chriſt en terre, ainſi qu'elle en ſeroit requiſe, & ſuppliée de nostre part , lequel deuoir ne pouuant acquiter en perſonne pour nostre qualité , à cauſe des troubles de ceſtuy nostre Royaume : A CES CAUSES, nous auons fait, conſtitué & ordonné, conſtituons & ordonnons par ces preſentes nostre Procureur ſpecial en cette part , ledit nostre tres-cher & tres-amé Couſin le Duc de Nevers , pour en nostre nom s'y transporter , voir nostre saint Pere , ſe preſenter en toute humilité aux pieds de sa Sainteté , & luy preſenter nostre declaration , proteſtation & excuse, ſur ce qui a eſté fait , ainſi qu'il a eſté cy-deſſus contenu , la ſupplier & requerir de le vouloir approuuer & valider en tant que besoin ſeroit , & d'abondant nous oſtroyer auſſi la ſainte benediction & ſouueraine abſolution des cenſures que aurions encou-

ruës , & qui auroient esté déclarées contre nous à cause des erreurs, dont nous nous sommes départis pour plus grande seureté & repos de nostre ame, & le bien de cestuy-nostre Royaume sous les protestations & submissions en tel cas requises , lesquelles nous donnons plein pouuoir & puissance à nostredit Cousin de les faire en nostredit nom , avec telle obligation & promesse que besoin sera , & en telle forme que de droit & de raison se doit au Chef souuerain de l'Eglise ; & tout ainsi que ferions ou faire pourrions si presens en personne y estions, promettant en bonne foy & parole de Roy, auoir agreable & tenir ferme tout ce que par nostredit Cousin sera fait , & promis de nostre part en la presente charge , & pour l'execution d'icelle l'approuuer, ratifier, & confirmer , & iamais n'aller, venir, ny faire au contraire, & en quelque sorte que ce soit. En témoin dequoy nous auons signé lescrites presentes de nostre main , à icelles fait mettre & apposer le cachet de nos armes, & commandé à l'un de nos Secretaires d'Estat de contresigner. Donné, &c.

LETTRES DV ROY
au Pape , Cardinaux , &
autres sur ce sujet.

A SA SAINTETE' DE LA
main du Roy.

TRES-SAINTE PÈRE, Dieu m'ayant fait la grace par l'inspiration de son saint Esprit, avec la bonne instruction que i'ay receuë des Prelats & Docteurs en Theologie, que i'ay à cette fin appellez, & la preparation que i'y ay apportée d'un saint zele de mon salut, de me faire connoistre que l'Eglise Catholique Apostolique & Romaine, est la vraye Eglise, à laquelle il a donné intelligence certaine de sa parole & volonté, aussi-tost ie me suis resolu d'entrer & me resoudre en la sainte communion d'icelle, & volontairement soumis aux formes ordinaires pour y estre receu, comme i'ay esté & commencé en faire la protestation dans vne Eglise de la ville de Saint Dans, le Dimanche vingt-cinquiesme Juillet. Après ce premier acte, & auoir rendu graces à Dieu d'un si grand benefice que i'ay receu de sa main, ie n'ay rien plus à cœur, que rendre le deuoir à vostre Sainteté qui luy appartient de ma part, & luy en asséurer la continuation pour l'aduenir, pour la protestation & promesse que ie desire luy faire.

de ma perpetuelle obseruance & deuotion fidele enuers vostre Sainteté, & le saint Siege, laquelle ne cederà en aucun party de bons effects qui en peuuent dépendre aux exemples que m'en ont laissé les Rois de France, tres-Chrestiens, mes predecesseurs. Et ne pouuant tres-saint Pere, m'acquitter de ce premier office en personne, que ie reputerois toutesfois à tres-grand-honneur, i'ay bien voulu au moins y suppléer par vne si digne & si honorable election, qu'elle seruist de preuue à vostre Sainteté de mon affection en son endroit, & fist connoistre à tout le monde, le respect & l'honneur que ie porte à sa personne & dignité. Auquel mien desir i'ay pensé ne trouuer aucun sujet plus correspondant de toutes qualitez à cause de la ieunesse des Princes de mon sang, que mon Cousin le Duc de Neuers, puis qu'il est mon proche parent, doüé d'une singuliere vertu & prudence, sur tout de pieté & de zele exemplaire à la Religion Catholique & Romaine, & tres-deuot enuers vostre Sainteté, & saint Siege, qui m'a fait resoudre de luy commettre cette charge, nonobstant que l'indisposition de sa personne l'en eust pu iustement excuser, & m'addeurant que ma bonne intention aura pour propice enuers vostre Sainteté, contre tout obstacle qui luy pourroit estre suggeré, sa bonté propre; de sorte qu'elle aidera volontiers le bien que ma susdite resolution peut apporter à la conseruation de la Religion Catholique Apostolique & Romaine de ce Royaume, & au repos de toute la Chrestienté. Je la supplie tres-affectueuse-

ment d'accepter ce deuoir que ie luy rends en la bonne part & avec la faueur qu'il merite , donnant s'il luy plaist benigne audience, & la mesme creance à mondit Cousin , qu'il luy plaira donner à moy-mesme. Et en cette confiance ie prie Dieu, tres-saint Pere, qu'il veuille longuement conseruer vostre Sainteté avec parfaite santé au bon gouuernement de sadite Eglise.

A E L L E M E S M E.

TRÈS-SAINTE PÈRE, Apres qu'il a pleu à Dieu nous appeller à la connoissance & communion de la sainte Eglise Catholique Apostolique & Romaine, & la protestation que nous auons faite d'y viure & mourir, rien ne nous peut estre plus cher ny de plus grande consolation en nostre esprit pour parfaire nostre contentement & nostre action, que de la voir approuuée & autorisée de la benediction de vostre Sainteté, en luy rendant de nostre part le deuoir qui luy appartient, dont desirant nous acquiter avec tout l'honneur & respect enuers vostre Sainteté que nous pouuons. Nous auons à cet effet choisi la personne de nostre tres-cher & bien-amié Cousin le Duc de Neuers, pour l'esperance que nous auons que les excellentes & vertueuses qualitez qui sont en luy, specialement illustrées de singuliere pieté & de deuotion à la Religion Catholique, rendront cette nostre election, à la charge qui luy est par nous com-

mise d'autant plus agreable à vostre Sainteté, l'un des principaux points de sadite charge, estant de presenter à vostre Sainteté, & au S. Siege Apostolique en nostre nom l'obedience que nous luy deuons comme Roy de France tres-Chrestien, & que ne desirons moins imiter l'exemple des Rois nos predecesseurs à meriter le titre & rang du premier fils de l'Eglise par nos actions, qu'ils ont esté soigneux de le maintenir & garder. A cette cause, tres-saint Pere, nous supplions tres-affectueusement vostre Sainteté, que le bon plaisir soit d'accepter & receuoir cet office & deuoir qui luy fera de nostre part rendu par nostredit Cousin, avec les submissions deuës & accoustumées, comme s'il estoit par nous fait en personne, & adjoustant foy & creance à tout ce qu'il vous dira & fera entendre de nostre part, tant pour ce regard que autres choses, tout ainsi qu'il vous plairoit faire à nous-mêmes. Sur ce nous prions Dieu tres-saint Pere, qu'il veuille longuement preseruer, maintenir & garder la personne de vostre Sainteté au bon regime & gouuernement de la sainte Eglise.

A E L L E P O V R L E
Royaume de Nauarre.

TR E S - S A I N T P E R E, Avec la resolution que nous auons prise de prester l'obeissance à vostre Sainteté & au S. Siege,

que nous deuons à cause de nostre Royaume de France, nous n'auons voulu faillir de luy rendre aussi le semblable deuoir pour raison de nostre Couronne & Royaume de Nauarre, qui nous appartient par droit de legitime succession du costé maternel : ayant donné charge & pouuoir à nostre tres-cher & bien-amié Cousin le Duc de Neuers d'y satisfaire de nostre part à la submission & reconnoissance que nous sommes tenus en ladite qualité de Roy de Nauarre, faite à vostredite Sainteté & au saint Siege. A cette cause tres-saint Pere, nous supplions tres-humblement icelle vostredite Sainteté, qu'il luy plaise receuoir cét office de protestation de nostre obeïssance en la qualité susdite que nostre Cousin luy rendra en nostre nom, & l'auoir autant agreable que si elle estoit par nous faite en propre personne, sur l'assurance que nous donnons à vostre Sainteté, qu'en ce qui dependra de nostre deuoir nous tiendrons l'obligation de ce qu'il promettra pour nous en cét endroit comme contractée par nous mesmes, & nous remettant sur ce à la declaration plus particuliere que nostredit Cousin en fera à vostre Sainteté de nostre part comme bien informé de nostre intention : Nous supplions y adjoûter foy tout ainsi que si elle l'entendoit de nostre propre bouche. Nous prions Dieu qu'il veuille longuement preseruer & garder vostre Sainteté au bien, regime & gouuernement de la sainte Eglise.

AV SIEVR ALDOBRANDIN.

MON COUSIN, Ayant pris resolution de me joindre à la sainte Eglise Catholique & Romaine, & reconnoissant nostre saint Pere le Pape pour Chef & souverain Pasteur d'icelle, j'ay bien voulu en donner au plustost le plus honorable témoignage que j'ay peu à sa Sainteté, & à cet effet depescher par de-là, personne de si bonne & grande qualité qu'en cette eslection paroisse ma deuotion enuers elle & le saint Siege, & le respect dont ie la veux perpetuellement accompagner. Ce que cognoissant ne pouuoir plus dignement faire qu'en commettant ceste charge à mon Cousin le Duc de Neuers, j'ay eu plus d'esgard au contentement que j'ay pensé que sa Sainteté en receuroit, qu'à l'excuse que le peu de force des sens que ie luy pouvois suggerer ainsi l'enuoyant deuers sa Sainteté. J'ay bien voulu vous escrire particulièrement la presente, pour vous prier vous vouloir rendre fauorable de tout ce que pourrez aux affaires qu'il aura à traicter, desquelles il communiquera avec vous, & le croire de tout ce qu'il vous dira de ma part comme moy-mesme. Priant Dieu, &c.

A MONSIEUR LE
Cardinal de Gondy.

MON COUSIN, Je fais estat que vous & tous mes amis & seruiteurs qui sont par delà, vous vous trouuerez en lieu sur le passage de mon Cousin le Duc de Neuers où vous vous pourrez voir & communiquer ensemble de ce qui peut concerner mon service, tant sur l'occcasion de son voyage; que sur toutes autres choses; & me promets aussi que l'accez vous sera libre à Rome pour vous y pouuoir rendre à mesme temps que luy, ce que ie desire bien fort que vous fassiez pour l'adrese, assistance & support qu'il peut receuoir de vostre presence aux affaires qu'il y doit traiçter de ma part, où ie m'attends que la bonne esperance qui m'a esté donnée de l'inclination qui se void, de m'y tendre la main apres ma conuersion, produira maintenant ses effets, puis que ie me suis mis en tout le deuoir qu'on desire de moy, apres lequel il ne peut plus demeurer aucun pretexte de me faire la guerre, ny de plus s'y aider de l'autorité de la Sainteté, sans montrer toute autre intention que celle qui par raison se doit iuger d'elle, ou qu'elle n'ait plus que le nom, & d'autres la puissance du lieu qu'elle tient, qui seroit le plus grand malheur qui pourroit aduenir à la Chrestienté, & lequel neantmoins ie veux croire qu'il feroit resoudre les Princes

de laquelle sont les plus proches & peuuent les premiers sentir le dangereux effet qui en pourroit sortir à quelque bon remede pour empescher le cours. Je vous prie mon Cousin vous éuertuer de vostre costé & tout ce que vous pourrez pour reduire les choses au bon chemin, que tous les gens de bien desirent pour le bien de la Religion Catholique, & le repos vniuersel de la Chrestienté. A quoy comme i'ay volontiers flechy ma propre conscience apres auoir esté le vray but auquel tendront tousiours mes actions, & ne pouuant rien dire sur ce, ny sur l'estat de mes affaires que vous n'entendiez encore plus particulièrement par la bouche de mondit Cousin, ie ne feray la presente plus longue, que pour prier Dieu.

A M. DE RETZ.

MON COUSIN, Ayant satisfait à ce qui estoit tant desiré de ma part, & que seul l'on montroit par delà d'attendre, pour apres apporter tous autres bons remedes aux troubles de ce Royaume, il reste maintenant que ceux qui ont fait connoistre d'auoir cette bonne intention en rendent à present les effets tant en ce qui depend de sa Sainteté, qu'en toutes autres choses, selon que le besoin leur est connu, & qu'ils apprendront encore plus particulièrement par l'information que mon Cousin le Duc de Neuers leur en donnera, lequel m'assurant que vous verrez, comme ie

desire, que tous mes seruiteurs qui sont par delà se rendent sur son passage en lieu propre pour cet effet, ie me remettray en ce que vous entendrez par luy de l'estat de mes affaires à la resolution que vous ensemblement pourriez prendre avec luy, de ce qui échet pour le bien de mon service, auquel ie vous prie d'y apporter de vostre part toute l'assistance que vous pourrez non seulement de vos bons aduis, mais aussi des autres moyens que vous y pourrez contribuer: & avec cette creance que vous n'y obmettrez rien qui puisse dependre de vous, ie prie Dieu.

instruction portée par Monsieur de Neuers à M. le Marquis de Pisany.

INstruction que le Roy a aduisé d'enuoyer à M. le Marquis de Pisany, Cheualier des Ordres, Conseiller au Conseil d'Estat de sa Majesté & Capitaine de cinquante hommes d'armes deses Ordonnances, estant de present en Italie, tant sur le sujet de la charge qu'elle luy a donné de son Ambassadeur en Cour de Rome, que pour les autres affaires auxquelles elle desire qu'il s'employe pour son service, selon qu'il est cy-apres contenu.

Sa Majesté s'estant (apres s'estre reüny à l'Eglise Catholique Apostolique & Romaine) resolu d'enuoyer Monsieur le Duc de Neuers vers nostre saint Pere le Pape, tant pour luy donner la nouvelle de cette conuersion, s'en conjoüir avec sa Sainteté, & impetrer la benediction

nediction à sa Majesté pour plus grande satisfaction de sa conscience, & en signe de son amour & bien-veillance paternelle, que pour luy rendre & au S. Siege en son nom l'obeissance que luy doit vn Roy de France Tres-Chrestien & premier fils de l'Eglise, elle a estimé d'y faire visiter les Princes d'Italie, qu'elle tient pour ses amis, & les prier de faire tous bons offices enuers sa Sainteté pour le sujet de la disposition dudit seigneur Duc, afin de luy rendre plus exorable, toutefois elle a iugé qu'il ne seroit pas conuenable employer à cet effet vers lesdits Princes la personne dudit seigneur Duc pour ne rien diminuer en l'opinion de sa Sainteté, la dignité avec laquelle sa Maiesté desire s'acquitter de ce premier deuoir en son endroit, lequel elle ne pourroit tenir en moindre compte: & si ccluy qui en a la charge auoir auparavant fait ailleurs d'autres offices: à cette cause sa Majesté a voulu que ledit Marquis satisfasse pour ce regard enuers lesdits Princes.

Ce qu'il commencera vers Monsieur le Duc de Mantoue, comme le premier sur son chemin pour passer outre, & apres l'auoir salué au nom de sa Majesté, & à iceluy baillé la lettre qu'elle luy écrit, il luy dira que Dieu luy ayant fait connoistre que l'Eglise Catholique, Apostolique & Romaine est la vraye Eglise, il luy auroit pareillement donné la volonté de s'vnir & incorporer en icelle, comme elle auoit fait dès le Dimanche 25. Iuillet, avec les formes & solennitez qui y auoient esté requises & necessaires par les Prelats & Docteurs en la Faculté de Theologie qui estoient à cette

fin assemblez , auxquels sa Majesté se seroit volontairement soumise , avec promesse & protestation de reconnoistre nostre saint Pere le Pape comme Chef de ladite Eglise Catholique & le S. Siege , & luy rendre l'obeïssance deuë ainsi qu'ont fait les Rois de France Tres-Chrestiens ses predecesseurs.

Que sa Majesté a reconnu que cette action a esté vrayement vne grace & inspiration diuine pour la consolation qu'elle a sentie & sent encore plus de iour à autre en sa conscience , & qu'elle a esté tres-aise en faisant le salut de son ame, de pouuoir aussi donner le contentement à tous ceux qui le desireront pour le bien de la Chrestienté & pour l'affection particuliere qu'ils portent à sa Majesté & à la prosperité de ses affaires.

Que le tenant des premiers & principaux de ce nombre tant zelé à la Religion Catholique & bien vniuersel de la Chrestienté, qu'en bonne volonté & affection à la prosperité de sa Majesté & de ses affaires, encore qu'il pourra déjà auoir entendu ailleurs la nouvelle de ladite conuersion, elle a bien voulu la luy donner elle mesme & s'en conjoûir avec luy, pour l'assurance qu'il a qu'entre tous ceux qui s'en seroient réjouis , il en aura pour plusieurs respects receu plus particulier plaisir & contentement : & comme avec cette occasion les offices & vrayes amitez pourroient cy-apres estre exercées plus librement en sa Majesté & ledit Seigneur, elle luy promet & assure que de la part d'icelle il en recerra à iamais tous les bons effets qu'il peut desirer d'un tres-

bon parent & amy comme sa Majesté luy est , & dont elle ne perdra l'occasion de luy rendre tous les témoignages qui seront en son pouuoir.

Que sa Majesté apres auoir satisfait sa conscience interieurement & fait les actes extérieurs qui conuiennent à vn tres-bon Catholique ; a voulu au plustost qu'elle a peu témoigner sa deuotion & obeissance filiale enuers nostre saint Pere le Pape & ledit saint Siege , laquelle si elle se pouuoit faire en personne ce seroit bien son plus grand souhait & contentement, & de rendre cét honneur à sa Sainteté & au saint Siege : mais puisque la condition du temps & l'estat de ses affaires ne le peuvent permettre, elle y a suppléé par vne tres-belle & honorable election, qui est de la personne de Monsieur le Duc de Neuers , combien que son indisposition le pût iustement exempter du travail des voyages. Toutefois sa Majesté connoissant que ceste charge ne pouuoit tomber en sujet plus digne ny en qui concourent tant de bonnes & grandes qualitez ensemble, elle desire qu'elle fasse cét effort à sa santé pour vn si bon œuvre, & pour d'autant mieux faire connoistre à sa Sainteté l'affection de sa Majesté à luy rendre & audit saint Siege, tout le plus grand honneur & respect qui luy est possible, ce qu'aussi fait postposer audit seigneur Duc toutes les cōsiderations de son particulier qui luy pouuoient seruir de legitime excuse.

Sur ce que ledit sieur Marquis dira audit seigneur Duc, que sa Majesté l'a bien voulu aduertir de cette resolution & depesche , &

encore que le chemin dudit seigneur Duc de Nevers le pourroit porter à le voir ou ne passer gueres loin de luy , toutefois elle a pensé deuoir faire cét office par autre que iceluy seigneur, tant enuers luy que les autres Princes , pour ne donner occasion à sa Sainteté de s'offencer, si estant depesché exprés vers elle , sa charge estoit commune à d'autres : qui a esté occasion que sa Majesté s'est resoluë de donner cette charge particuliere audit sieur Marquis de voir lesdits Princes de sa part.

Que sa Majesté se promet tant de la bonté de sa Sainteté, qu'elle luy fera la benigne reception & recueil que merite sa bonne & sainte intention , & la reuerence avec laquelle elle s'y presente, ne pouuant croire qu'elle voulust tacher la memoire de son Pontificat d'une telle rigueur, & faire vne si grande playe à la Chrestienté, que de vouloir separer de l'Eglise vn membre si vtile & important à la grandeur d'icelle, qu'est vn Roy & Royaume de France, au lieu que nostre Seigneur Iesus-Christ, duquel il est Vicaire en terre, a donné precepte & enseignement en son Eglise aux Pasteurs d'icelle, de trauailler & chercher les moyens d'y ramener ceux qui en sont déuoyez.

Toutefois outre les autres indices & preuues qu'elle a des mauuais desseins de ceux qui pensent tirer profit des troubles & de la ruine de ce Royaume, elle est tres-bien aduertie, qu'ils sont preparez à n'épargner aucune sorte de calomnie enuers sa Sainteté pour empêcher la reconciliation que sa Majesté recherche de faire avec elle & le S. Siege, & ne doute

qu'aux persuasions ils n'adjouſtent des menaces pour gagner par intimidation ce que par raiſon ils ſçauent ne pouuoir eſperer, d'autant qu'ils voyent déjà vne telle & ſignalée conuerſion des volontez en ce Royaume à reconnoiſtre ſa Majeſté & ſ'accommoder avec elle depuis qu'elle ſ'eſt vnée à l'Egliſe Catholique, qu'il ne leur reſte plus autre confiance que celle qu'ils conſtituent aux empeschemens qu'ils traſchoient de ſuſciter enuers ſadite Sainteté.

Et d'autant que c'eſt choſe qui importe de tant que chacun connoiſt à toute la Chreſtienté, & que tous ceux qui y tiennent les premiers lieux & dignitez ont intereſt de fauoriſer les bonnes & ſalutaires reſolutions qui ſont en cela neceſſaires de la part de ſadite Sainteté. Ledit ſieur Marquis priera iceluy ſeigneur Duc au nom de ſa Majeſté, d'y vouloir employer ſon credit & moyen, faire ſur ce telles remonſtrances & offres que l'affaire merite, & ſeroit tres à propos qu'il luy pleuſt y enuoyer quelques perſonnages de qualité exprés, pour faire d'autant connoiſtre qu'il prend les choſes à cœur, & en iuge la conſequence telle, qu'il y veut apporter toute l'aide qui peut dependre de luy, encore qu'il ne l'eſtime pas neceſſaire pour flechir la volonté de ſa Sainteté au bien qui depend d'elle, mais bien pour la fortifier contre les braueries qui luy pourroient eſtre faites pour l'empeschier : & afin de la rendre plus aſſeurée en ſe reſoluant à faire office de pere debonnaire enuers ſa Majeſté d'eſtre aſſiſtée contre ceux qui

voudroient entreprendre quelque chose à son preiudice dont elle pourra faire fondement sur les moyens & appuy desdits Princes, selon les demonstrations & offices qu'ils luy en feront en cette occasion, comme ledit sieur Marquis priera ledit seigneur Duc de sa part qu'il les veuille faire telles qu'elles puissent servir à vn si bon effet. Et outre le merite qu'il en acquerra enuers sa Sainteté mesme & le public, sa Majesté luy en aura particuliere obligation, dont elle cherchera les moyens de se reuancher enuers luy en ce qu'elle connoistra luy pouuoir porter aduantage & contentement.

Après auoir veu la resolution que ledit seigneur Duc prendra là dessus & le moyen qu'il voudra tenir, dont il poursuiura que la despesche se fasse au plustost, il se transportera à Venise, où ayant conferé avec le sieur de Maisse Ambassadeur ordinaire pour sa Majesté audit lieu, il fera semblable office, compliment & poursuite enuers la Seigneurie, & par le mesme ordre qu'il est cy-deuant contenu.

De là s'en ira à Ferrare pour faire de mesme que dessus enuers Monsieur le grand Duc, accommodant le langage qu'il aura à luy tenir, selon qu'il iugera estre à propos de changer ou diuersifier en quelques poincts, ce qui est remis à la prudence dudit sieur Marquis, l'importance de l'affaire consistant principalement à disposer ledit sieur Duc de se joindre avec les autres Princes en l'office que sa Majesté desire d'eux enuers sa Sainteté.

Ayant fait ce compliment enuers ledit sieur Duc, il verra le sieur Dom Cesar d'Este de la

part de sa Maieſté, luy baillera la lettre qu'elle luy écrit, & luy dira que ſi les Rois ſes predeceſſeurs ont aimé la Maiſon de Ferrare, ſa Maieſté n'y eſt moins affectionnée, & qu'auec cette occaſion du voyage qu'elle luy a ordonné faire vers mondit ſieur le Duc, elle luy a donné charge de le voir & l'aſſeurer pour ſon particulier que ſa Maieſté le veut aimer, & s'employera touſiours tres-volontiers pour luy en ce qu'il en pourra auoir beſoin, dont il prendra pour arres l'offre que dés à preſent elle luy en a voulu faire, qui ſera ſuiuie des effets aux occaſions qui ſ'en pourront offrir où il ſe peut preualoir de la bonne volonté d'icelle en ſon endroit.

De là ſ'en ira à Florence ou en autre part où ſera Monsieur le grand Duc de Toſcane, auquel il parlera des choſes ſuſdites auec plus particuliere conſiance, & luy en dira ce qu'il aura rapporté deuers les autres Princes & connu de leurs intentions, le priera non ſeulement de ſemblable office & aſſiſtance qu'eux, mais que comme celui qui a montré auoir plus de ſoin de voir ſa Maieſté vnie à l'Egliſe Catholique Apoſtolique & Romaine, & qui eſt ſatisfait en cela de ce qui dependoit de ſa Maieſté, il vucille auſſi prendre l'affaire en main vers ſa Sainteté de ſi bonne façon que ſa Maieſté y recoiue le bon & fauorable recueil, & traitement que merite le deuoir où elle ſe met pour contenter ſadite Sainteté.

C'eſt tout ce que ledit ſieur Marquis aura à faire auant que de ſe rendre à Rome: & pour ce que le premier office qui ſe doit faire de la

part de sa Majesté, est par Monlieur le Duc de Nevers seul, elle remet à se resoudre en la communication que les sieurs Cardinal de Gondy, Duc de Rets, & ledit sieur Marquis auront de luy à son arriuée en Italie, s'il sera meilleur que ledit Marquis se rende en mesme temps que ledit Seigneur à Rome, ou qu'il differe quelques iours, en quoy il se conduira selon ladite resolution qu'ils en auront prise ensemble.

Estant arriué en ladite ville, & apres auoir connu par ce que ledit Seigneur Duc aura traité avec sadite Sainteté, qu'elle soit disposée à reccuoir vn Ambassadeur de la part de sadite Maiesté, ledit sieur Marquis se presentera à elle, avec la reuerence qui luy appartient, & luy dira qu'encore que sadite Maiesté luy ait ouuert son cœur par ledit seigneur Duc, touchant la deuotion & obeyssance filiale, qu'elle est resoluë de luy rendre toute sa vie & au saint Siege, comme premier fils de l'Eglise, toutesfois pour faire paroistre cette resolution par les effets, elle auroit voulu pour premier gage d'icelle establir vn Ambassadeur de sa part, pres sadite Sainteté, comme les Roys ses predecesseurs ont donné ce tesmoignage, entre autres de l'honneur qu'ils portoient au saint Siege, & que l'ayant sadite Maiesté choisi pour faire cette charge, le plus expres commandement qu'elle luy auroit fait estoit d'assurer sa Sainteté, que non seulement elle desire l'honorer & obeyr comme Chef de la sainte Eglise Catholique, mais aussi la seruir en son particulier avec autant d'affection qu'elle peut esperer de nul Prin-

ce de la Chrestienté. Et quand il luy plaira se laisser entendre de quelque chose qu'elle desire de sa Maiesté, elle y trouuera vne prompte volonté d'y satisfaire. Suppliera aussi sadite Sainteté, qu'il luy plaise aiouster à cette bonne intention de sa Maiesté l'obligation qu'elle peut acquerir sur elle & son Royaume par sa bien-veillance paternelle en luy faisant sentir les effets selon que les occasions se presentent, esquelles fauorisant les affaires de sa Maiesté & le repos de sondit Royaume, elle y acquerra en son particulier vn tres-grand merite dont ils luy rendront graces immortelles & illustrera sa memoire d'une louange perpetuelle enuers sa posterité: A quoy ledit sieur Marquis aiousterá encore tout ce dont le suiet luy suggerera la matiere en tel ordre & façon que par sa prudence il iugera estre à propos.

Quant aux choses particulieres dont il se pourra offrir occasion de parler, sa Maiesté ne luy en peut donner à present aucune charge, d'autant qu'elles dependent de ce que ledit sieur Duc doit traiter & des resolutions qui en dependront, desquelles ledit sieur Marquis aura communication, & selon icelles il se conduira en la poursuite qu'il aura à faire pour les faire reüssir le plus à l'auantage de l'honneur & seruice de sa M. qu'il luy sera possible, comme elle se tient tres assurée qu'il sçaura bien iuger, & y garder ce qui appartient à l'un & à l'autre. Sa M. se remet aussi à son iugement des visites & offices particuliers qu'il est besoin faire, tant enuers les sieurs Ciuthio &

Pietro Aldobrandini pres de sa Sainteté , que Messieurs les Cardinaux pour les lieux qu'ils tiennent, & les rendre plus disposés que faire se pourra, en faueur des affaires de sa Maiesté & de sondit Royaume.

*AV SIEVR MARQUIS
de Pixany.*

Monsieur le Marquis, Je n'ay rien plus à cœur apres m'estre par la grace de Dieu vny à la sainte Eglise Catholique Apostolique & Romaine, que de rechercher le Chef d'icelle nostre saint Pere le Pape de sa bienueillance & benediction paternelle de tous les devoirs qu'il peut desirer de moy, tant pour les choses passées, que pour l'obeissance & deuotion filiale à l'aduenir qui luy est deuë de ma part : & pour m'en acquitter avec tant d'honneur qu'il en doive receuoir contentement, j'ay fait election de la personne que j'ay pensé luy deuoir, pour toutes considerations & qualitez, estre plus agreable à cet effect, qui est celle de mon Cousin le Duc de Neuers, en qui j'ay trouué plus de bonne volonté que sa santé ne luy promet de force pour en porter le travail : toutefois il ne s'est arresté en cette consideration ny autres de ses incommoditez particulieres, quand il a connu que ie desirois qu'il entreprist ce voyage. Et pour ce que j'ay estimé qu'avec tant de satisfaction que sa Sainteté receura de ma part, le moyen me sera ouuert d'establis mon Ambassadeur aupres

d'elle, & qu'elle me voudra en cela garder lieu & rang qui y a esté tousiours conserué aux Rois de France mes predecesseurs : I'ay, suivant la resolution que i'auois prise lors que vous partistes d'aupres de moy, de me seruir de vous en cette charge que vous auez déjà si dignement tenuë, resolu de vous en enuoyer la depesche dès à present, iugeant que si cét establisement se doit faire ce sera en mesme temps, ou bien-tost apres que mondit Cousin aura esté receu à faire l'office, dont il a charge de ma part : mais d'autant que pour le rendre de plus d'efficace, i'ay pensé estre plus à propos d'y employer le credit des Princes d'Italie, que ie tiens pour mes amis, lesquels à cette occasion il est besoin de prier en mon nom, & que si pour ce faire mondit Cousin passoit vers eux, sa Sainteté s'en pourroit tenir offensée, que sa charge fust commune à d'autres qu'à elle. Je n'ay pas peu prendre autre resolution sur ce, pour faire plus dignement l'office necessaire en cela vers lesdits Princes, que de vous prier d'en prendre la charge, m'assurant tant de vostre affection au bien de mes affaires, que vous ne mettez iamais difficulté où vous connoistrez d'y pouuoir seruir, mesmes venant l'occasion de mon election, laquelle aussi vous pouuez croire que ie ne voudrois faire indigne de vostre qualité & merite. Vous aurez avec la presente vne instruction que i'ay fait dresser, tant sur le sujet de la charge de Rome, que de ce qui est à faire vers lesdits Princes, encore que la principale depende de la communication que ie desire.

estre faicte entre mondit Cousin à son arriuée en Italie, mes Cousins le Cardinal de Gondy & Duc de Retz, vous & le sieur de Maille, s'il se peut trouver, de mes affaires, pour y apporter tout ce que vous pourrez de la disposition où ils seront, avec vos aduis des moyens & de l'ordre qui s'y doiuent tenir? dont la resolution qui se prendra vous seruira de plus particuliere instruction que celle que ie vous puis donner: de fait n'estant le memoire que ie vous enuoye, que pour les Chefs Generaux, avec lequel ie vous enuoye aussi les lettres, tant pour Sa Sainteté que pour les autres Princes susdits; lesquelles vous doiuent donner l'entree à la negociation que vous aurez à faire de ma part, & vous prie que l'incommodité que vous peut auoir apporté la longueur de vostre voyage & seiour de par delà, n'empesche le bon deuoir & seruice que ie me promets de vous en l'occasion qui se presente maintenant de tirer le fruit du temps que vous y auez desia employé, & que ie sçay pouuoir estre mieux conduit à sa perfection à vostre main que de nul autre. Et afin que le deffaut des moyens ne vous empesche d'y satisfaire, ie feray aduiser & pouruoir en bref à ce qui est necessaire pour vostre residence à Rome, qui est tout ce que ie vous diray pour ceste heure, remettant le surplus à ce que vous pourrez en apprendre par la communication que mondit Cousin vous fera de toutes autres choses concernans mon seruice selon la bonne information qu'il en a. Et pour fin de la presente, ie prieray Dieu, &c.

A S A S A I N T E T E'.

TRÈS-SAINTE PÈRE, Comme nous sommes résolu de faire prestre en nostre nom, & rendre toute nostre vie l'obeyssance que nous deuons à vostre Sainteté, & au saint Siege Apostolique : Nous desirons aussi reprendre & suiure en toutes choses les moyens qui ont esté tenus & vsez par les Roys tres-Chrestiens, mes predecesseurs, en l'observation de l'honneur deu aux saints Peres, & audit saint Siege, & pour entretenir avec la deuotion & reuerence filiale qui y appartient, la bonne & parfaite intelligence qui est requise entr'eux, & les Roys & Royaume de France pour le bien vniuersel de la Chrestienté, & manutention de la sainte Eglise & Religion Catholique en iceluy, pour cét effet, nous auons bien voulu incontinent apres la dite protestatiō de nôtre obeyssance remettre & reestabli vn Ambassadeur ordinaire de nôtre part, près de vostre Sainteté, ainsi qu'il a esté accoustumé par le passé. A quoy scachant que ne pourrions employer personne accompagnée de plus dignes qualitez pour bien s'en acquiter, que celle de nostre amé & feal le Marquis de Pisany Cheualier de nos Ordres, Conseiller en nostre Conseil d'Estat, & Capitaine de cinquante hommes d'armes de nos Ordonnances, lequel durant le temps qu'il a desia exercé semblable charge sous le feu Roy dernier decedé, nostre predecesseur, que Dieu

85 MEMOIRES D'ESTAT.

absoluë , y a rendu si grande preuue de pieté & vertu , que nous auons occasion d'esperer qu'elles seront tousiours la regle de ses actions: de sorte que vostre Sainteté en aura tout contentement. Nous l'auons pour ces dignes considerations, choisi & ordonné pour nous y faire seruiue. A cette cause tres-saint Pere , nous supplions tres-humblement vostre Sainteté , que le bon plaisir d'icelle soit le recevoir & admettre en ladite charge de nostre Ambassadeur prés d'elle , l'honorer de sa bienueillance , & de la mesme faueur , & bon traitement en ce qui nous concerne , que les merites de nosdits predecesseurs enuers le saint Siege , nous y ont acquis & laissé par iuste possession, laquelle sera tousiours accompagnée de nostre part de tout le deuoir qu'il conuient pour s'y estre conseruez, suppliant aussi vostre Sainteté qu'en tout ce qu'il aura à traiter, & luy faire entendre en nostre nom pour nos affaires & de nostre Royaume, elle veuille aiouster mesme foy & creance à ses paroles qu'il luy plairoit faire à nostre propre personne. Et sur ce nous prions Dieu tres-saint Pere qu'il veuille vostre-dite Sainteté longuement preseruer , maintenir , & garder en parfaite santé , au bon regime & gouuernement de la sainte Eglise , Escrit en , &c.

*Aux Ducs de Ferrare, de Mantouë, &
autres, sur le mesme sujet.*

*INSTRUCTION AVX SIEURS
Euesque du Mans, Doyen Segnier,
& Commandeur Gobelin.*

LE Roy voulant donner toute occasion à nostre saint Pere le Pape de demeurer satisfait de la conuersion, absolution, & vnion de sa Majesté à l'Eglise Catholique Apostolique & Romaine & de l'approuuer, a auisé d'enuoyer vers sa Sainteté le sieur Euesque du Mans, Conseiller au Conseil d'Estat de sa Majesté, & avec luy le sieur Segnier, Doyen en l'Eglise Cathedrale de Paris, & Conseiller en la Cour de Parlement, & Maistre Gobelin Religieux & Commandeur en l'Abbaye saint Denis, & Docteur en la faculté de Theologie, pour luy estre représenté par la bouche dudit sieur Euesque, la vertu des formes & solemnitez qui ont esté gardées & obseruées en tout ce qui s'est passé en cette action, à laquelle ils ont esté presens & opinans, où sa Sainteté connoistra auoir esté gardé le respect qui luy appartient comme au Chef souverain de ladite Eglise.

Mais auant qu'entrer aux particularitez d'icelle action, & afin qu'il ne demeure aucune mauuaise opinion à sa Sainteté du retardement qu'il y a eu, ledit sieur Euesque luy remonstrera de la part de sa Majesté que depuis son aduenement à la Couronne, elle a esté si continuellement occupée aux exploits de la guerre, que ses ennemis luy ont faite,

qu'elle n'a pû prendre le loisir competant pour vacquer à recevoir instruction, mesmes que toutes les fois qu'elle auroit fait demonstration d'y vouloir entendre, sesdits ennemis auroient fait plus grands efforts contre elle, pour luy en ôter le moyen, faisans assez connoistre qu'autre chose les pouvoit à ce qu'ils faisoient que le zele de la Religion, dont est aussi argument invincible que cette guerre n'est que la continuation de celle qu'ils avoient commencée contre le feu Roy dernier, sur lequel n'y avoit rien à reprendre sur le fait de la Religion.

Que sa Majesté auroit neantmoins toujours, & à toutes les occasions qui s'en seroient présentées tesmoigné, & déclaré ne vouloir demeurer obstinée en l'opinion & creance en laquelle elle avoit esté nourrie, mais au contraire protesté qu'elle estoit prestée de s'en departir à la changer aussi-tost que l'on luy feroit connoistre qu'il fût en erreur.

Qu'au desir qu'elle avoit d'estre instruite & éclaircie de la verité pour la satisfaction de sa conscience, estoit coniointe vne ardente affection de tous ses bons suiets & serviteurs Catholiques, par l'instruction qu'ils luy en faisoient, qui estoit cause que sa Majesté portoit d'autant plus de regret de tenir en plus de longueur sa resolution pour ce regard.

Qu'elle avoit neantmoins grandement désiré d'y entrer par le moyen de sa Sainteté, à quoy tendoit la depesche du sieur Marquis de

Pisany vers elle : mais les empeschemens qui luy ont esté donnez en cela , & vn peu de relasche qu'elle auroit eu des violentes occupations de la guerre par l'esloignement & diminution de l'armée ennemie , luy auroient fait prendre ce temps & loisir pour regarder à ce qui touchoit si auant le salut de son ame , & le contentement de sesdits suiets.

Que pour ce faire apres auoir conferé avec plusieurs hommes doctes desquels elle auroit appris que l'Eglise Catholique Apostolique & Romaine , est la seule & vraye Eglise ; & entendu que les abus qu'on luy auoit dès sa ieunesse persuadez estre en icelle , & qui l'en tenoient separée , estoient plutôt és mœurs & vsage qu'en la doctrine , laquelle bien entendue estoit pure & nette : elle auroit mandé & conuoqué vn nombre de Prelats, Docteurs & autres personnes Ecclesiastiques de ceux qui estoient sous son obeyssance , & reconnus de tout temps zelateurs de la Religion Catholique Apostolique & Romaine , & du repos du Royaume , & avec eux aucuns de ceux qui estoient dans la ville de Paris , plus recommandez de sincerité & probité : tous lesquels s'estant rendus en la ville de saint Denis , au temps assigné , & ayant sa Majesté par l'instruction qu'ils luy auroient baillée en quelques conferences qu'elle auoit eues avec eux , a esté encore plus auant informée de la vérité & pureté de la doctrine de ladite Eglise , & confirmée en la creance qu'elle en auoit desia prise , elle seroit resoluë de se ranger au plutôt à l'obeyssance d'icelle , se soumettant à

ce que lesdits Prelats, Docteurs, & autres Ecclesiastiques trouueroient sur ce iuste & raisonnable, dont elle se seroit remise à eux pour en deliberer, les ayant toutesfois admonestez de considerer non seulement sa qualité ; mais aussi l'estat de son Royaume, la necessité des affaires, les occasions qui la pouuoient distraire de l'execution de cette volonté, si elle estoit differée, le peril ordinaire de sa vie, les difficultez que le temps & les occurrences d'iceluy apportoint, à enuoyer vers sa Sainteté, & attendre son mandement, ioint que les deportemens du Cardinal de Plaisance, qui se dit Legat de sa Sainteté en France, faisoient croire & craindre qu'il feroit tels offices enuers elle, que ceux que sa Majesté y enuoyeroit ne seroient receus, & qu'ils eussent aussi égard à toutes autres particularitez qui pouuoient donner iuste suiet d'accelerer ce bon œure.

Que l'affaire ayant esté mise en deliberation entr'eux, & toutes autres meurement debatues & examinées, ils ont tous vnanimement conclud & resolu de receuoir sadite Maiesté en l'Eglise Catholique Apostolique, & luy donner l'absolution sans renvoyer à sa Sainteté ny attendre son mandement ; reseruant neantmoins à sadite Sainteté son autorité, & à la charge que les empeschemens cessans, sa Majesté enuoyeroit deuers elle, & obeyroit audit mandement de l'Eglise, le tout suivant les constitutions Canoniques.

Que ladite resolution ayant esté effectuée par la grace de Dieu, & sa Majesté receuë en

L'Eglise le Dimanche vingt-cinquième du mois de Juillet dernier , dans l'Eglise saint Denis entre ceux du Pontificat de sa Sainteté, & du bon presage , pour espérer que durant iccluy la Religion sera restaurée en tous les Estats de la Chrestienté.

Que voulant sa Majesté effectuer la promesse par elle faite recevant l'absolution, aussi-tost que la trefue a esté faite elle s'est mise en deuoir de dépescher Monsieur le Duc de Neuers vers sa Sainteté pour luy donner la nouuelle au nom de sa Majesté de ladite conuersion & sainte resolution , luy rendre l'honneur & respect qui luy appartient , & au saint Siege , & luy prestet l'obeyssance deuë de la part de sa Majesté.

Mais d'autant qu'il est raisonnable que sadite Sainteté soit bien particulièrement informée de tout ce quis'est passé en cette affaire , ce qui ne pourra mieux conuenir qu'à aucuns desdits Prelats & Ecclesiastiques qui y ont assisté , lesquels ont aussi fait entendre à sadite Majesté leur desir de rendre la reuerence qu'ils doiuent à sadite Sainteté, & ont mesme choisi d'entr'eux ledit Euesque du Mans : sa Majesté l'a bien voulu enuoyer avec ledit seigneur Duc , & avec luy les autres susnommez pour satisfaire à cette particuliere charge en ce qui est de leur vacation & profession , s'assurant qu'ils s'en acquiteront si bien , que sa Sainteté demeurera contente de la procedure qui a esté tenuë tant pour le regard de sadite Majesté , que desdits Prelats & Ecclesiastiques.

Pour cét effet seront représentées à sa Sainteté les difficultez proposées & debatues en leur assemblée sur ce sujet , selon qu'ils les sçauent & entendent , & les raisons qui leurs auroient fait prendre la resolution susdite , ensemble l'ordre & la forme qui y auroit esté gardée. Voulant sa Majesté que pour plus particuliere instruction de tout , & pour en pouuoir rendre sa Sainteté mieux éclaircie , ils ayent avec eux le proces verbal sur ce dressé par ordonnance de ladite assemblée , lequel ils presenteront , ensemble la profession de foy présentée par sa Majesté, signée de sa main, & contresignée de l'un de ses Secretaires d'Estat , & les articles mentionnez en ladite profession qui auoient esté monstrez & leus à sadite Majesté.

Entre autres causes de n'auoir deu differer ny remettre à attendre le bon plaisir de sa Sainteté , il y en a vne de tres-grand poids , & qu'on a estimé que sa Sainteté iugera emporter vne necessaire consequence de ce qui a esté fait. Pour l'intelligence de laquelle il est besoin premierement entendre que lors que les Deputez de sadite Majesté firent declaration aux Deputez du Duc de Mayenne & de l'assemblée de Paris , qui fut au lieu de Surresne le dix septième iour de May dernier , de la bonne resolution de sa Majesté sur ce qui estoit tant desiré par tous les gens de bien de ce Royaume , il fut répondu par le sieur Archeuesque de Lyon qui portoit la parole pour ledit seigneur & ses adherans, qu'ils se resioüissoient d'une si sainte resolution , de laquelle

ils loüoient Dieu, & sur ce declara en general & particulier, comme aussi firent plusieurs autres des plus notables desdits Deputez, qu'ils estimoient estre requis pour le bien de la Religion & du Royaume, enuoyer & se reconcilier à nostre saint Pere le Pape, que ce faisant ils deputeroient aucuns d'entr'eux vers sadite Sainteté pour luy représenter au vray à quoy se trouue reduit ce Royaume, tant pour la Religion que pour l'Estat.

Cette ouuerture fut iugée par les Deputez de sa maiesté digne de grande consideration, comme tendant au bien que tous les bons François & vrays Catholiques doivent desirer & embrasser de tout leur pouoir. De sorte que pour responce, il fut dit aussi par lesdits sieurs Archeuesque & autres Deputez, que si de leur costé ils desiroient la bonne grace de sa Sainteté, la maiesté auoit encore plus de volonté d'affermir vne bonne reconciliation entre le saint Siege & ce Royaume, estant son intention d'enuoyer vers sa Sainteté vne notable Ambassade, & qu'on desiroit que de leur costé il ne fust fait aucune chose à Rome qui pust apporter retardement à ladicte reconciliation que l'on iugeoit tres-necessaire pour le bien de la Religion & de l'Estat: surquoy ils promirent que ceux qui seroient enuoyez de leur part feroient tous bons offices pour l'auancement & perfection d'une si belle œuvre.

Mais cela ayant esté sceu par les Ministres du Roy d'Espagne, il n'y eut sorte d'inuen-

tion qu'ils n'ayent déployée pour empêcher que les François ne pûssent entendre à aucune reconciliation, blasmerent ledit sieur Archevesque de s'estre lasché à vn si honorable langage qu'il en auoit tenu, distribuerent l'argent qu'ils peurent recouurer de leurs amis aux plus factieux pour les lier tousiours plus estroitement avec eux, & empêcher le repos, & finalement connoissant que tels moyens n'estoient suffisans pour empêcher les volontez qui se voioient generally inclinées à embrasser ceux de la paix, ils eurent recours aux moyens qui pouuoient interesser les grands à s'y opposer, ayant promis vne forte & puissante armée, & fournir dans quatre mois de tres-grandes sommes de deniers, moyennant lesquelles promesses avec l'offre qu'ils faisoient par mesme moyen de donner l'Infante d'Espagne au Duc de Guise, ils s'estoient persuadez de pouoir tellement troubler les cerueaux des François qui suiuoient ledit party, qu'il seroit par eux procédé à l'election d'vn autre Roy, chose qui a semblé de telle & si grande consequence à l'Estat, & si preiudiciable à la Religion Catholique, que tous les bons François ont eu crainte de voir le dernier iour de ce Royaume, si par malheur vne telle innouation s'y faisoit, ne pouuant aucun homme de sain entendement faire doute qu'outre la ruine miserable que ce Royaume en souffriroit, il aduiendroit à l'Eglise Catholique le plus grand & le plus dangereux schisme qu'il y ait eu depuis le commencement d'icelle.

A cette cause lesdits Prelats & Docteurs qui se sont trouvez assemblez avec autres personnes Ecclesiastiques pour traiter de la conuersion & absolution de sa Maiesté, voyant que contre ce qui auoit esté mis en auant d'enuoyer de part & d'autre vers sa Sainteté, l'on precipitoit de faire passer à l'assemblée de Paris l'eslection d'un autre Roy, qui ne pouuoit estre fondée sur autre cause que sur le defect de ladite conuersion, & voulant pour le bien de la Religion & de l'Estat obuier à si grands desordres, malheurs, ruines & inconueniens qu'ils preuoyoient deuoir necessairemēt aduenir, s'il estoit par eux plus longuement différé au iugement de ladite absolution. Apres auoir entendu & s'estre bien informé de la bonne & tres-Chrestienne resolution de sa Maiesté de vouloir d'oresnauant embrasser de tout son cœur & de toute son ame ladite Religion Catholique, & sur ce par eux imploré la grace de Dieu, ils auoient tous d'un commun accord reconnu & déclaré que le bien de ladite Religion & de l'Estat requeroit qu'il fût promptement procedé à ladite absolution, ainsi qu'il a esté fait, sans y auoir rien obmis des solemnitez pour ce requises & accoustumées en l'Eglise catholique Apostolique & Romaine.

Que si aucuns obiectoient qu'il eust esté requis de conferer de cēt affaire avec le cardinal de Plaisance enuoyé à Paris pour tenir lieu de Legat, sera remonstré à sa Sainteté qu'il s'est monstré en toutes ses actions, même en cette derniere brigue & poursuite de l'ele-

Etion d'un autre Roy, si passionné ennemy de sa Majesté, partial serviteur du Roy d'Espagne, que nul en ce Royaume tant d'un party que d'autre, n'en a autre opinion, si ce n'est qu'il procede non pas comme Ministre de nostre S. Pere, mais plutôt comme étant aux gages dudit Roy d'Espagne, ainsi que sa Sainteté connoistra clairement, s'il luy plaist s'informer de la verité de ses comportements: & partant n'y ayant aucune plus iuste cause de recusation contre un iuge, que celle qui procede pour raison d'inimitié, lesdits Prelats ont estimé ne pouvoir conferer avec luy pour le iugement d'une personne si excellente comme est le Roy de France, duquel ledit Cardinal se declare ouvertement ennemy juré & du tout irreconciliable.

Après l'information particuliere donnée à sa Sainteté de toutes les choses qui peuvent appartenir à cette affaire selon la connoissance qu'ils en ont, ils la suppliront de croire que ce qui a esté fait tant par sadite Majesté que par lesdits Prelats & autres Ecclesiastiques, n'a esté par entremise, ou par oubliance, ou mespris de son autorité, ainsi qu'elle connoistra bien clairement par la charge que Monsieur le Duc de Nevers a devers elle, de la part de sadite Majesté, mais seulement pour l'extrême danger où l'on a veu à l'œil estre reduites les affaires de la Religion & de ce Royaume pour les raisons susdites, & autres qu'ils sçauront déduire selon qu'elles ont esté traitées en ladite assemblée.

Et finalement comme ils sçavent & assurent
avec

avec les autres Prelats & Ecclesiastiques de ladite assemblée n'auoir fait aucune chose qui ne soit conforme aux saints decrets & Constitutions Canoniques & usage de l'Eglise, & avec le deuoir & respect qui appartient à sa Sainteté comme chef de ladite Eglise, & avec le deuoir de l'en esclaircir, contenter & satisfaire, afin qu'il luy plaise, comme ils l'en suppleroient en toute humilité au nom de sa dite Majesté & desdits Prelats & Ecclesiastiques, autoriser par sa sainte benediction ce qu'a esté par eux fait & le confirmer, pour d'autant plus consoler sa Maiesté & fermer la bouche ausdits mesdisans & calomniateurs, assurans sa Sainteté de la bonne intention de viure & mourir en la foy, croyance, & doctrine de ladite Eglise Catholique & sous l'obeissance du saint Siege & du saint Pere, sans iamais s'en departir, selon la promesse qu'elle en a faite lors de son absolution, & depuis reiterée par plusieurs fois & en public & en particulier.

Ce deuoir estant rendu à sa Sainteté, ledit sieur Euesque avec tous les autres susnommez visiteront Messieurs les Cardinaux du sacré College au nom de sa Maiesté, & leur en donneront telle part & communication de leurs charges qu'ils connoistront estre à propos pour les laisser bien informez, & se défier de la susdite action contre les impostures qui leurs pourroient estre suggerées d'ailleurs, pour leur en donner mauvais goust & opinion, comme sa Maiesté ne doute qu'elle sera calomniée de la part de ceux qui crai-

gnent perdre par le moyen d'icelle, le crédit & la faueur qu'ils tiroient à l'avantage de leurs desseins, de l'impression en laquelle ils taschoient de tenir tout le monde, que sa Maiesté ne se ioindroit iamais à l'Eglise Catholique, & maintenant ils forgeront quelque nouvelle inuention pour trouuer à redire en ce qui a esté fait, à quoy lesdits sieurs Euesque du Mans, Doyen Seguier & Commandeur Gobelin opposeront enuers lesdits sieurs Cardinaux, selon que le suiet s'en presentera, ce qu'ils sçauent de la verité de ladite action, & de tout ce qui la peut iustifier, remettant sa Maiesté à faire par eux lesdites visitations en compagnie de Monsieur le Duc de Neuers ou separément, ainsi que ledit Seigneur le trouuera bon.

Et pour les autres affaires de sa Maiesté dont ledit Seigneur a la principale charge, s'il y desire quelque assistance de la part dudit sieur Euesque du Mans, il s'y employera si auant que ledit Seigneur Duc l'aura agreable, & selon que la confiance que sa Maiesté a de sa fidelité & affection au bien de son seruice.

A S A SAINTE.

TRES-SAINTE PERE, Ayant auisé d'envoyer nostre tres-cher & bien amé Cousin le Duc de Neuers vers vostre Sainteté, avec la charge qu'elle entendra, s'il luy plaist, de luy, concernant nostre vnion à l'Eglise Catholique Apostolique & Romaine, avec ferme

resolution d'y viure & mourir avec l'aide de Dieu, & de rendre à sa Sainteté & au S. Siege le respect & l'obeissance qui luy appartient.

Nous auons bien voulu pour nostre deuoir & pour satisfaire au desir des Prelats & autres personnes Ecclesiastiques qui nous ont receu en ladite Eglise, accompagner nostredit Cousin d'aucuns d'entr'eux qui puissent donner la veritable & particuliere information à vostre Sainteté, qu'elle ne peut si bien auoir par nul de tout ce qui s'y est passé, tant de nostre part que de la leur. Et estant l'election tombée par le choix qu'eux mesmes en ont fait és personnes de nostre amé & feal maistre Louys Seguier, Doyen de l'Eglise Cathedrale de Paris, Conseiller en nostre Cour de Parlement, ensemble maistre Gobelin, Religieux & Commandeur de l'Abbaye saint Denis, Docteur en la Faculté de Theologie, connus tres zelateurs de la Religion Catholique, & bien capables pour s'acquiter dignement de l'office qui leur est commis en cét endroit. A cette cause nous supplions tres-humblement vostre Sainteté que le bon vouloir d'icelle soit leur donner benigne audience en la representation qu'ils luy feront des choses susdites par la bouche dudit sieur Euesque du Mans, & en ce qui depend de nous, aiouster mesme foy à ce qu'ils luy diront de nostre part, qu'il luy plairoit faire à nostre propre personne.

*INSTRUCTION AU SIEUR DE
Fresnes enuoyé en Espagne.*

INSTRUCTION au sieur de Fresnes Forget ,
Conseiller du Roy & Secrétaire d'Etat ,
allant de present de la part du Roy vers le
Roy Catholique , de ce que sa Maiesté luy a
donné charge faire avec luy pour le bien com-
mun de leurs Maiestez.

Le premier propos qu'il aura avec ledit sieur
Roy en la premiere audience qui luy sera
donnée , sera de condouloir avec luy de la
part de sa Maiesté de la mort de la feuë Rei-
ne sa mere , & de la perte commune que leurs
Maiestez y ont faite d'une tres-bonne mere ,
qui estoit tres-desireuse de les voir tres-
estroitement liez ensemble d'amitié & bon-
ne intelligence , comme elles sont d'affinité ,
& laquelle par sa singuliere prudence , dont
elle estoit douée , pouuoit estre tres-vtile au
bien commun de leurs affaires : que avec le
regret qui demeure à sa Maiesté tres-Chre-
tienne de se voir priuée du bonheur que luy
apportoit la presence de ladite Dame , au
moins la reuerence de sa memoire fera tous-
jours autant plus viuement embrasser à sa
Maiesté les moyens d'entreprendre cette fra-
ternelle amitié entr'elles & ledit sieur Roy ,
comme elle se promet que de sa part il y
apportera tout ce qui y pourra donner plus
de force & d'augmentation.

Ce compliment acheué remonstrera audit sieur Roy que sa Maiesté tres-Chrestienne n'a iamais eu plus à cœur de voir son Royaume purgé de l'heresie, reconnoissant tenir cette Couronne de la grace de Dieu, avec cette obligation d'y maintenir la sainte Eglise Catholique Apostolique & Romaine, & que là où l'honneur de Dieu est mesprisé, le Prince ne peut auoir l'obeissance qui luy est deuë, ioinct qu'elle sçait son ame estre responsable deuant la Maiesté diuine de ce deuoir pour le premier & principal, dont elle charge les Roys & Princes és charges & estats où ils sont constituez.

Que sa Maiesté a tesmoigné ce saint zele, & l'horreur en quoy elle a tousiours eu l'heresie par toutes ses actions, mesme par l'effort qu'elle a fait tant auparauant son aduenement à cette Couronne, que depuis pour l'extirper de son Royaume. Les armées par elle conduites à cet effet, les batailles données au peril de sa vie, & les victoires qu'elle auroit obtenuës, ostent toute occasion de douter de sa bonne & sainte intention pour ce regard.

Que si elle a fait intermission pour quelques années de la voye des armes contre les Heretiques, ce n'estoit que pour donner quelque relasche à ses suiets Catholiques, las & ruinez de si longue continuation de la guerre, & elle mesme se pouruoir de nouveaux moyens d'y entrer avec plus grand effort & vigueur.

Et ce neantmoins ne laissant par autre moyen

d'affoiblir lesdits Heretiques, car nul de ceste qualité là n'estoit admis aux charges, offices ou estats, soit de la maison de sa Maieité ou autres, & ne receuoit aucune autre grace & bien-fait d'elle.

Au moyen dequoy ceux de la Noblesse qui auoient suiuy ledit party reuenoient de iour à autre, ou faisoient nourrir leurs enfans en la Religion Catholique, pour n'estre tousiours priuez de la bonne grace & des faueurs de leur Roy, le voyant mesmement hors de necessité de conseruer leur vie & fortune par les armes.

Ceux du tiers Estat suiuoient cec exemple, & les mesmes considerations & esperances, pour le regard des charges & estats, dont il est capable, & se laissoient les vns les autres tellement aller à ces appas, & autres tels refroidissemens de l'ardeur, dont ils soustenoient leur party & guerre ouuerte, que sa Maieité auoit desia recouuert plusieurs places sur eux, par eux surprises ou pratiquées, sans que pour ce ils reprissent les armes.

De cela se peut tirer argument tres certain, que si elle n'eust esté interrompuë, lesdits Heretiques peu à peu descheoient tellement de vigueur & de nombre, qu'elle eust eu le moyen dans peu d'années de reduire son Royaume en l'ancienne obseruation & Religion Catholique.

mais le feu Duc de Guise (l'ambition duquel ne pouuoit pendant cette inquietude faire le progres qu'il desiroit faire en ses desseins) impatient de ne posseder l'autori-

té qu'il vouloit auoir en ce Royaume, prit de là occasion de blasmer les bonnes intentions de sa maiesté, & sous couleur du mal que les Catholiques auroient à craindre tant en leur vie qu'en leur Religion, si Dieu appelloit sa maiesté sans enfans, à cause de la pretention du Roy de Nauarre à cette Couronne, tira plusieurs en ligue avec luy tant de la Noblesse que du peuple, & s'y estant aussi fortifié d'intelligences estrangeres il auroit en l'an 1585. commencé contre sa maiesté ce qui sembloit ne regarder qu'une seureté future au cas susdit, que sa maiesté ne laissast enfans pour luy succeder.

Les exploits que luy, ses freres & parens firent en ladite premiere leuée d'armes, furent de se saisir des villes les plus Catholiques & plus esloignées des Prouinces où les Heretiques auoient pris pied, & attacher vne guerre entre les Catholiques tres-dangereuse pour ladite Religion, comme les effets en furent bien-toit reconnus par les surprises que firent les Heretiques en peu de temps de plus de villes & places qu'ils n'en occupoient auparavant.

A quoy sa maiesté voulant remedier, elle auroit fait le premier l'Edit de la reünion de ses suiets Catholiques, sans son autorité, & ouuert la guerre contre les Heretiques, s'estant laschée pour y faire condescendre ledit Duc de Guise, & les siens à toutes les demandes qu'ils luy auoient faites pour leur particulier tres iniques & desraisonnables, pour essayer en ce faisant d'oster toute

noïse & diuorce entre ses ſuiets Catholiques & tourner leurs forces contre les Heretiques.

Le Duc de Mayenne auroit eu la charge de l'armée, qui fut ordonnée du coſté de Guyenne : il ſe peut dire avec verité ; que pendant qu'il y fut pluſieurs Heretiques receuoient des faueurs de luy, qu'ils n'euſſent oſé eſperer de ſa Maieſté, teſmoin en eſt, entre autres l'abolition qu'il procura pour Viuans l'un des principaux Chefs deſdits Heretiques, de pluſieurs grands crimes qu'il auoit cōmis, & ce pour paruenir par le moyen dudit Viuans au mariage d'un de ſes fils avec l'heritiere de Caumont qui eſtoit avec ſa mere au pouuoir dudit Viuans, toutes deux Heretiques ; teſmoins en ſont auſſi les ſauuegardes qu'il auroit données en grand nombre à ceux dudit party.

Et encore que tous les deniers qui furent fournis par le Clergé, & autres que ſa Maieſté pouuoit recouurer, fuſſent employez aux frais de ladite armée, & que ſ'il y defailloit quelque choſe de l'entretienemēt d'icelle, pour le long temps qu'elle demeueroit en campagne, il eſtoit tout notoire que ce n'eſtoit qu'à faute de moyens que ſa Maieſté ſe trouuoit eſpuifée, toutesfois on ne laiſſoit de luy imputer par eſcrits & autres impreſſions que l'on ſemoit parmy le peuple à ſon deſauantage, pour tirer à eux en ce faiſant la bienueillance qu'ils luy ſouſtraioient de ſes ſuiets.

Enfin ledit Duc de Mayenne abandonna ladite armée pour reuenir à Paris où eſtoit

lors sa maiesté, rapportant pour son principal, tant de sondit voyage de Guyenne la prise de Castillon qui est à luy de par sa femme, où il auoit consommé beaucoup de temps & de moyens, & neantmoins y laissa vn homme des siens qui y fit si mauuaise garde, que dans peu de temps apres les ennemis y entrerent par surprise. Pendant le sejour qu'il fit audit Paris, y furent faites plusieurs assemblées sous son support & appuy en armes, & fut descouuerte vne entreprise prestee à executer contre la personne de sa Maiesté, laquelle fut faillie, moyennant la grace de Dieu, & avec l'ordre qu'elle y donna : mais en mesme temps qu'il pensoit l'executer le Duc d'Aumale son Cousin, se saisit par intelligence des villes de Dourlans, & de Crotay, & faillit à surprendre Calais, qu'ils tindrent long temps assiégué, le Duc de Guise ayant de son costé vne armée prestee sous couleur du siege de Sedan & Mets, pour passer outre à leur establissement, si l'entreprise de Paris eût succedé selon leur dessein.

Cependant les Heretiques entreprenoient & s'estendoient sans guere de resistance, la Maiesté estant empeschée d'y pouruoir par la deffiance & alarme en quoy la tenoient ceux de Guise par lescdites entreprises & mescontentemens qu'ils feignoient auoir, dont la Maiesté a recherché & essayé tous les moyens qui luy auroient esté possibles de leur donner satisfaction, iusques à auoir la feuë Reyne sa mere, que Dieu absolu,

mieux establir ladite vnion des Catholiques , & faire fonds des moyens pour l'extirpation de l'heresie.

Les insolences & iniustes requestes que chacun iour faisoient lesdits Deputez à sa maiesté , qui tendoient à luy oster toute autorité & moyens , & les conseils de ceux d'entr'eux qui auoient les premieres voix és lieux & assemblées qui se tenoient ordinairement chez ledit Duc de Guise , faisoient euidentement connoistre qu'ils n'auoient rien de bon en l'ame à l'endroit de sa maiesté & du bien de cét Estat.

Outre ce , elle auoit eu plusieurs avis du dehors & au dedans de son Royaume , de se garder d'une entreprise dressée contr'elle , & que l'on deuoit bien-tost executer , pour se saisir de sa personne & s'emparer de son autorité , qui n'eust esté pour apres espargner sa vie. Au moyen dequoy elle ne voyoit plus aucun lieu ny espoir de salut en ses affaires , ny pour la conseruation de sa personne , que par ce qu'elle a fait.

A quoy pour monstrier qu'elle n'auoit nul dessein auparauant l'effet , & que cette resolution à laquelle elle fut tirée par force , ne luy vint qu'apres auoir eu connoissance certaine de la conspiration faicte & resoluë contre sa personne , le peril estant si proche qu'il n'y auoit plus de lieu d'autre deliberation.

Sera representé audit sieur Roy , que pendant le dernier traité de la paix , & sur

les termes d'enuoyer deux armées contre les Heretiques , l'une en Poictou , l'autre en Dauphiné , sa Maiesté qui connoissoit les humeurs dudit Duc de Guise peu compatibles , ou conformes aux siennes , voulant euitér toute occasion d'aigreur contre luy , fit ce qu'elle put par l'entremise de la Reyne sa mere , qui faisoit ledit traicté , à ce qu'il acceptast la charge de l'une desdites armées , au lieu de demeurer pres de sa Maiesté , comme il vouloit faire , laquelle eust esté plus contente qu'il y eût laissé le Duc de Mayenne son frere , duquel le naturel luy sembloit plus traictable. Ce que ledit Duc ne voulut iamais consentir , qui faisoit assez connoistre le dessein de son ambition , l'execution duquel dependoit de sa presence à la Cour , où sa Maiesté n'eust pas fait instance d'appeller son frere plustost que luy , si elle eust eu intention d'executer ce qui l'a depuis forcée & contraincte de faire.

Et si les choses susdites luy ont fait iuger la necessité de se resoudre , ce qui est aduenü depuis monstre clairement en quel danger elle estoit du viuant dudit feu Duc de Guise , en faueur duquel principalement toutes ses faueurs estoient dressées.

Tous ont esté les fruits de la Ligue par luy bastie , ils crioient contre les Heretiques , & par la guerre & par soupçon , où ils tenoient

sa Maieſté, empeschoient qu'elle ne la pût tourner contre l'herſie, les Heretiques s'y ſont fortifiez en trois ou quatre ans de nombre de places & de moyens, qu'ils n'eſtoient de tout temps paſſé, dont toutesfois elle ne monſtroit que par paroles de ſe ſoucier; les pratiques ordinaires pour gagner les villes, la Nobleſſe, & les propres ſerviteurs de ſa Maieſté, & les menaces & rigeurs que l'on faiſoit à ceux qui n'y vouloient entendre, monſtroient à quoy il aſpiroit. Ce que ſes adherans ne pouvoient meſmes tenir declarer par iaſtance.

Sa Maieſté a du vivant dudit Duc de Guyſe pluſieurs fois eſté aduertie, & dès le commencement meſme de la Ligue, qu'il eſtoit aidé du Roy Catholique; ledit Duc & les ſiens ne le celoient pas: ce qui s'eſt encore plus eſclaircy depuis ſa mort, par les papiers qui ont eſté trouvez dans les coffres, & par la depoſition de ſes Secretaires & autres de ſon Conſeil.

Mais ſa Maieſté croit que ledit ſieur Roy a eſté en cela ſurpris par le pretexte de la Religion Catholique, duquel ledit Duc s'eſt ſeruy en ce Royaume, & meu auſſi qu'il peut eſtre d'eſperance de recouurer par ce moyen la ville & eſtat de Cambray, comme l'on a ſçeu que ledit Duc le luy auoit promis, & neantmoins par traicté particulier qu'il auoit avec Balagny, il s'eſtoit obligé à luy pour l'eſtrecnement de ſa garniſon, & le deffendre enuers tous & contre tous; qui eſtoient deux promeſſes trop incôpatibles, & de perſonnage

qui vouloit faire ses affaires , à quelque prix & titre que ce fust.

Le semblable se peut iuger en ce que notwithstanding le traicté qu'il fit dès le commencement avec ledit sieur Roy , il auoit promis ne faire iamais accord avec sa Maiesté , sans le gré & consentement dudit sieur Roy. Ce qui toutesfois ne l'empescha de passer outre , se voyant accommodé de tout ce que pour lors il vouloit demander.

Quant à ce qui touche le fait de la Religion, les effects qu'il a rendus souz le nom de la Ligue tels qu'ils ont esté cy deuant representez, deuroient auoir ouuert les yeux à vn chacun , pour monstrier que la Religion ne luy seruoit que de couverture pour se rendre maistre de ce Royaume, comme il en alloit tous les iours iettant nouveaux fondemens , pour aduancer son dessein , & se peut dire qu'en ce faisant , il a donné tant de moyens aux Heretiques de s'accroistre & fortifier , qu'il y faudra beaucoup plus de temps & d'effort à purger ce Royaume de l'heresie, qu'il n'eust esté besoin, s'il n'eust alteré trop precipitemment l'estat où sa Maiesté auoit reduit son Royaume. Mais il eust esté bien marry que l'heresie en eût esté ostée , parce qu'il n'eût eu plus de pretexte de demeurer armé , comme estoit son intention, pour soy authoriser dauantage en ce Royaume.

Il n'est aussi à obmettre en cet endroit pour plus grâde lumiere de leurs desseins, qu'ayant sa Maiesté ordonné deux armées contre les Heretiques , l'vne du costé de Poictou , souz

la conduite de Monsieur le Duc de Nevers , l'autre du costé du Dauphiné souz la charge dudit Duc de Mayenne ; ledit sieur de Nevers auroit mise en campagne celle qui luy estoit commise le plustost qu'il luy auroit esté possible , & combienque ce fût ja vers l'hiuer , n'auroit laissé de l'employer : de sorte qu'en peu de temps qu'il y seroit demeuré , il auroit réduit quatre ou cinq places fortes , & fournies de bonnes garnisons des Heretiques en l'obeyssance de sa Maiesté.

Mais ledit Duc de Mayenne, auquel par condition expresse du traicté fait à Paris, l'on auroit fait tomber la charge de l'autre armée , après auoir fait aduancer dans le Dauphiné les forces dont elle deuoit estre composée, se seroit acheminé iusques à Lyon seulement, où il auroit seiourné plus de trois mois entiers à faire des pratiques , pour se saisir de ladite ville , comme il est tant notoire, ayant cependant laissé manger par lesdits gens de guerre ce peu dudit pays de Dauphiné , qui reste en l'obeyssance de sa Maiesté , fait consumer inutilement les moyens qui luy auroient esté ordonnez pour les frais de la guerre qu'il deuoit faire contre les Heretiques.

Et qui est encore pis , les armées qu'il a de nouveau leuées avec autres du party , à la souleuation qu'ils ont faite d'aucunes villes souz le nom de la Religion Catholique , ne peuvent tourner qu'au grand desauantage d'icelle , pour le progrez que les Heretiques peuvent faire pendant

que la guerre se nourrit & entretiendra entre les Catholiques : chose de telle consideration & qui afflige tant sa Maiesté , se voyant frustrée du bon-heur , qu'elle s'estoit tousiours promis de reduire son Royaume sous la foy & Religion Catholique , qu'elle ne veut épargner aucun moyen pour oster les empeschemens qui luy sont donnez en cette bonne & sainte resolution.

Et dautant que si ceux qui se sont , comme dit est, esleuez, ne sont aidez de la part dudit sieur Roy , ainsi qu'ils se promettent, ils seront contrains se remettre en leur deuoir, sa Maiesté a voulu enuoyer vers ledit sieur Roy, pour luy représenter le mal & inconuenient qui peut aduenir en ladite Religion Catholique, si cette guerre n'est appaisée.

Le moyen de paruenir à l'extirpation de l'heresie est, que non-seulement leurs Maiestez ne se courent sus , ny ne fauorisent les rebellions l'un à l'encontre de l'autre ; mais qu'elles se ioignent d'une bonne & parfaite intelligence, pour se rendre en cette cause , qui est de Dieu , & de commune obligation à leurs Maiestez , toute l'aide & mutuelle assistance qui sera possible, estant certain que leurs puissances tendantes & employées à ce bon effet leurs Maiestez pourront esperer d'auoir l'honneur de triompher par une heureuse victoire de l'extirpation de l'heresie.

Que sa Maiesté a eu cette affection de long-temps d'estraindre cette amitié & bonne intelligence avec ledit sieur Roy : auquel finalement en auroit esté fait quelque bonne ouuer-

uerture, comme il en peut estre memoratif, de la part de la feuë Reine mere de sa Maieſté, à quoy il auroit auſſi monſtré de ſa part ſemblable inclination : tellement, que ſans le voyage qu'elle fit faire au ſieur de Pougny vers le Duc de Sauoye, ſur les occurrences du Marquiſat de Saluces, deſlors elle l'eust enuoyé vers ledit ſieur Roy, pour traiſter dudit affaire, & en venir à vne bonne conſclusion, pour le ſeruice de Dieu, bien commun de leurs Eſtats, & conſeruation de leurs authoritez, l'ayant auſſi deſtiné pour y demeurer Ambaſſadeur ordinaire.

Qu'ayant ledit ſieur de Pougny eſté pris à ſon retour de Piedmont, elle a aduiſé de deſpeſcher à preſent vers luy le ſieur de Fresnes, pour le meſme eſſet, pour le deſir qu'elle a de contracter cette eſtroite liaiſon d'amitié & intelligence avec luy, à ce qu'après auoir reünny à ſoy tous ſes ſujets Catholiques, elle puiſſe conuertir tous ſes efforts & moyens à nettoyer ſon Royaume de l'heréſie.

L'un des premiers & principaux moyens de bien eſtraiſdre ladite intelligence, eſt de dénier toute audience, aide, aſſiſtance aux ſujets l'un de l'autre, & ſ'il plaist audit ſieur Roy, outre ce donner le meſme ſecours à ſa Maieſté pour l'extirpation de l'heréſie en ce Royaume, qu'elle auoit promis audit Duc de Guyſe, elle en pourra tant plutoſt & plus facilement acheuer l'entreprife, qui ne ſeroit de peu d'importance & aduantage audit ſieur Roy en ſes affaires du Pais-Bas, pour remettre le tout plus promptement en ſon obeïſſance.

Que s'il auoit fondé esperance de quelque bon succez pour cet effet sur la personne & credit dudit Duc de Guise, il ait beaucoup plus grande occasion de l'esperer de sa Maiesté, qui est Roy legitime de ce Royaume, duquell'autre n'estoit que suier, qui peut iustement mouuoir les armes, & commander à ses suiects. L'autre ne le pouuoit de soy, sans encourir le crime de leze Maiesté, aussi nul ne peut avec raison prédre l'aduantage d'auoir plus de zele à la Religion Catholique que sa Maiesté.

Sur ce sera aussi monstré audit sieur Roy le mauuais exemple que c'est de fauoriser la rebellion des suiects contre leur Prince, que Dieu par iuste iugement permet bien souuent que le mal qu'en ce faisant on a procuré à autrui, retombe sur ceux qui y ont tenu la main, & que luy qui est sur l'aage, & qui laissera son fils heritier de ses Estats encore bien ieune, doit plustost tascher à luy acquerir de bons amis, que luy laisser des ennemis; se pouuant asseurer que quand il auroit obligé sa Maiesté de l'aide qu'il luy peut faire, à remettre ses affaires & estats, qu'elle s'en reuencheroit enuers son dit fils, apres luy, par tous les bons offices d'amitié qui pourront dependre d'elle.

Ayant remontré que cette rebellion, bien qu'elle soit particuliere contre sa Maiesté, regarde neantmoins par son dit exemple generalement tous les Princes souuerains, & ledit sieur Roy, plus que nul autre: pour estre ses Estats separez les vns des autres; le priera de la part de sadite Maiesté, luy vouloir faire

le mesme secours qu'il faisoit audit Duc de Guyse , pretendant qu'il seruiſt à l'extirpation de l'heresie , luy faisant sa Maieſté cette requeste , tant pour luy ayder à reunir à soy par douceur ou force tous les Catholiques de son Royaume, que pour plus facilement apres acheuer l'extinction de l'heresie : & s'il est necessaire particulariser ledit secours, luy demandera iusques à la somme de 300. mille escus , avec promesse au nom de sa Maieſté de les luy rendre , quand elle aura peu reſtablir les affaires en meilleur estat : & outre ledit remboursement l'asseurer de luy donner lors semblable secours ou plus grand s'il en a besoin.

S'il s'excusoit dudit prest , & qu'il voulust remettre à y respondre quand les diuisions estans en France entre les Catholiques seroient composées , parceque sa Maieſté ne pourroit employer lesdits deniers contre lesdits Heretiques, faut luy faire tres-grande instance, que pour le moins il assure de ne donner aucun secours au Duc de Mayenne, ny à ceux de sō party , & pour faire vne demonstration publique qu'il ne fauorise point leur dessein, comme il ne pourroit faire , sans d'autant differer l'extirpation de l'heresie , qui n'est retardée que par l'empeschement que sa Maieſté reçoit de ceux de la Ligue : qu'il escriuiſt au Pape comme ayant entendu le preiudice que les troubles apportent à la Religion il est resolu de ne soustenir ny fauoriser aucunement ceux de ladite Ligue , & incitant sa Sainteté d'interposer son autorité par vn

Legat qu'elle enuoyast en France , parce que celuy qui y est leur est deuenu suspect pour faire cesser lesdits troubles , esquels tous les Princes Catholiques ont tres-grand interest , & que ledit sieur Roy enuoyant vn nouvel Ambassadeur en France , le chargeast de dire expressement aux Chefs de ladite ligue qu'il ne les veut aucunement assister en cette cause , ayant bien connu que lesdits troubles tournent du tout à l'aduancement desdits Heretiques , & affoiblissement des Catholiques.

Si sur ce propos de l'aide qu'il a donné aux affaires de la Ligue en ce Royaume, il obiectoit ce que Monseigneur frere de sa Maiesté a fait contre luy és Pays - bas , pour monstrier qu'il auroit eu occasion aussi de fomentier les troubles de ce Royaume ; ledit sieur de Presnes luy respondra pour chose veritable , que sa Maiesté n'a iamais approuué les susdites actions de feu mondit Seigneur son frere , & y a tousiours contredit tant qu'elle a peu : mais la reuerence qu'elle portoit à la feuë Reyne sa mere , qui soutenoit son dit frere en cela , pour se reuancher du tort qu'elle pensoit luy estre fait en ses pretensions du Royaume de Portugal , empeschoit sa Maiesté d'y donner le remede qu'elle eust bien desiré , pour retenir mondit Seigneur desdites entreprises, lesquelles il auoit dressées pour son particulier interest , pretendait approprier à soy tout ce qu'il eust peu gagner de ce costé là : mais depuis , & que sa Maiesté a reconnu que ce qui eust peu eschoir de cette entreprise à ladite Dame sa mere , luy deuoit reuenir comme son seul

heritier , il a assez paru que sa Maiesté n'a jamais eu intention de s'approprier aucune chose qu'elle n'estime luy appartenir iustement , n'ayant voulu entendre à aucun party qui luy ait esté proposé de ce costé là, comme il se peut iuger par la réponse qu'elle fit à ceux desdits Pays-bas qui luy vindrent offrir de se mettre en son obeyssance , lesquels ne réportèrent aucune chose d'elle qu'un conseil de se remettre bien avec leur Roy, & offre d'interceder pour eux , afin qu'ils fussent benignement receus. Et depuis la mort de la dite Dame Reyne, se trouuera encore moins aucun secours de moyens à Ballagny pour son entretènement , ny qu'elle luy ait donné aucun titre de commandement sous son auctorité.

Ceux qui ne desireroient leur dite union pourroient mettre en consideration audit sieur Roy que venant à mourir si sa Maiesté auoit accommodé les affaires de son Royaume, elle pourroit troubler les Estats du ieune Prince son fils , comme telles occasions sont quelquesfois embrassées par ceux qui en pensent tirer commodité.

Pour preuenir à telles obiections , luy sera remontré que cela seroit plus à craindre de la part du Duc de Mayenne , s'il auoit le succez qu'il peut desirer de ses desseins , par la raison mesme qui auroit fait entreprendre contre son Roy , qui est l'ambition de son naturel , laquelle luy feroit aisement oublier les obligations de l'aide qu'il auroit eu dudit sieur Roy, au lieu que sa Maiesté a fait assez

connoistre qu'elle ayme la paix avec ses voisins , se contentant de conseruer ce qui luy appartient , & dautant plus ledit sieur Roy pourroit prendre certe assurance d'elle , quand elle luy auroit donné sa parole , & qu'il l'auroit encore obligée par les bons offices qu'elle desire de luy pour la restauration de ses affaires.

Et parce que le sieur Dom Bernardin de Mendoza estoit fort auant interesséd'affection & intelligence avec ledit feu Duc de Guise , & l'entretient encore avec ledit Duc de Mayenne & ceux de sa faction , comme sa Maiesté en a de tres-certains aduertissemens, au moyen dequoy elle estime qu'il eslayera plustost de trauerfer l'aduancement de cette bonne union & amitié de leurs Maiestez , que de la faciliter. Ledit sieur Roy sera prié s'il a volonté de la conclure , de le reuoquer de la charge où il est , & y mettre personnage qui y apporte les considerations equitables qu'il conuient à l'entretienement de la paix entre les Princes, dont le naturel dudit Dom Bernardin s'est monstté aliené par ses deportemens en ce Royaume. Que sa Maiesté a tres-grande occasion dese plaindre de luy , mesme le dernier acte qu'il a fait depuis peu de iours d'estre party d'aupres de sa Maiesté sans prendre congé d'elle pour s'en aller à Paris , qui est la premiere & principale ville qui s'est tournée contre sa Maiesté, & en laquelle sont les Chefs & le principal conseil de leur faction ne peut estre trouué que tres-mauuais des sa Maiesté , & icelle iuger que c'est pour

enflammer & fomentier dauantage les affaires contre son seruice , ce qu'elle s'assure ne sera aduoué dudit sieur Roy , & n'estre procedé que de la naturelle & mauuaise inclination que ledit Dom Bernardin a aux affaires de sa M. Pour ces occasions declarera audit sieur Roy de sa part , que ne pouuant prendre plus de confiance dudit Dom Bernardin à ce qui seroit à traiter entre leurs Maiestez pour l'effet & entretenement de leur dite amitié , elle est resoluë de ne le r'appeller ny admettre plus auprès de soy , ny iamais rien traiter avec luy , le priant le vouloir promptement reuoquer , & luy en depescher vn autre : & en attendant qu'il en fasse l'eslection , qu'il y enuoye vn Agent , avec lequel sa Maiesté puisse traiter , que sadite Maiesté proteste ne pouuoir plus faire avec ledit Dom Bernardin , comme ledit Roy peut luy mesme iuger qu'elle a trop d'occasion.

Et afin qu'il ne demeure rien entre leurs Maiestez qui puisse empescher l'effect susdit, iceluy sieur de Fresne au nom de sa Maiesté tres - Chrestienne quittera audit sieur Roy la ville & estat de Cambray , l'assurant que sadite Maiesté pour son regard a esté tousiours en cette volonté & opinion, & n'eust attendu iusques à present à le luy faire reconnoistre sans le respect de la feuë Reyne sa mere , qui pretendoit auoir quelque iuste droit de le retenir , comme pour gage & represaille de ses pretensions susdites au Royaume de Portugal.

Par ce que dessus il pourra connoistre de

quelle franchise sa Maieſté traite avec luy & iuger la bonne volonté qu'elle apporte en cette affaire. Donc comme elle luy a voulu librement ouvrir son cœur, aussi elle deſire entendre clairement quelle intention il y a de ſa part, & en eſtre au puſtoſt reſolu, à ce que ſelon qu'il ſe monſtrera diſpoſé elle regarde de pourvoir à la ſeureté de ſes affaires ſoit ſur le fondement de cette amitié, ſi elle paſſe avant à conditions raisonnables, ou au deſaut de ce, par telle autre voye qu'elle iugera eſtre plus à propos.

Et ſi ledit ſieur Roy vouloit interpreter ledit offre imparfait, & preſumer que ladite place n'eſt pas aujourdhuy en la puillance de ſa Maieſté, & par conſequent qu'il ne la luy peut à preſent liurer, luy ſera remonſtré qu'il n'y a point d'apparence que Ballagny vouluſt en cela contredire la volonté de ſa Maieſté, & n'accomplir ſon commandement, mais où il ſ'oublieroit tant que de le faire, il promet aſſiſter ledit ſieur Roy à la recouurer par la force touteslesfois qu'il le voudra êtrepréde, qui luy eſt vn moyen infaillible, ne pouuant ledit Ballagny ſouſtenir l'effort que peuuent faire leurs Maieſtez enſemble. Et ſi pour les grandes affaires qui ſont à preſent en France, ledit ſieur Roy ne veut faire grand eſtat du ſecours qu'il peut auoir de ſa M. au recouurement par force de ladite place, luy ſera offert au cas qu'il veuille luy ſeul entreprendre, de luy fournir dès à preſent du deſaueu qu'il fera dudit Ballagny & de la declaration qu'il eſtimera pour ce eſtre neceſſaire; & pour luy
faire

faire voir & iuger que ce n'a iamais esté l'opinion du Duc de Guise de luy remettre ladite place, comme sa Maiesté est bien aduertie qu'il la tenoit en bonne esperance, luy fera voir qu'il a vers soy la coppie du traité qu'il auoit fait avec ledit Ballagny, lequel s'est trouué entre les papiers dudit feu Duc de Guise, par où il luy fera voir qu'il auroit toute autre intention que de la faire restituer audit sieur Roy, lequel traité il offrira luy montrer s'il l'a agreable.

Après la premiere audience qu'il aura eüe dudit sieur Roy, il la demandera aussi au Prince d'Espagne & à Madame l'Infante, & fera en leur endroit le mesme office de salutatio de la part de sa Maiesté, & condoléance de la mort de la feuë Reine, spécialement à l'endroit de ladite Dame Infante sa petite fille, laquelle en outre il priera au nom de sa Maiesté vouloir faire tous les meilleurs offices qu'elle pourra enuers ledit sieur Roy son pere en faueur des affaires de sa Maiesté, comme ayant interest & obligation de desirer plustost le bien & la prosperité du Roy son oncle, & en pouuant esperer plus certaine amitié que du Duc de Mayenne & autres de sa faction qui ont iuré l'extinction de toute la race & maison Royale.

Si ces moyens sont receus & embrassez dudit sieur Roy, de sorte qu'il en puisse attendre le bon effet que sa Maiesté en desire, ledit sieur de Fresne après la resolution qu'il en aura eüe, luy pourra encore dire de la part de sa Maiesté, que comme de soy mesme elle s'est

disposée à ce qui luy semble estre du deuoir de la iustice pour le regard de Cambray, aussi elle se promet que ledit sieur Roy voudra par la mesme consideration qu'elle soit restituée en ce que ledit Duc de Sauoye a pris du sien, & y fera les offices qui se doiuent attendre d'un grand Prince, ayant le droict & l'équité pour guide de ses actions, comme il sçait que les Princes en sont responsables deuant Dieu, & y doiuent d'autant plus que les autres hommes qu'il les a esleuez en plus haute dignité & prééminence.

Et où traitant de cette amitié ledit sieur Roy y voudroit entremesler quelque chose de l'entreprise d'Angleterre, pour y obliger sa Maiesté avec luy, comme y ayant mesme interest pour le fait de la Religion Catholique, luy sera remontré que sa Maiesté ne desire moins l'exaltation d'icelle, que luy, suivant ce qui est contenu cy-deuant, elle aidera volontiers ladite entreprise de la commodité de ses ports & autres moyens de son Royaume qui pourront seruir à l'aduancement & execution d'icelle.

Si ledit sieur Roy entroit en traité d'autres propositions sur ce que dessus, qui ne fussent point résolues par la presente instruction, lesquelles il y eust esperance & fondement de pouoir reüssir à quelque bon effet, ledit sieur de Fresnes en aduertira sa Maiesté par un Courrier exprés, & attendra sur ce ses commandemens auant que partir pour s'en retourner par deçà.

INSTRUCTION DV SIEVR
*de la Clielle s'en allant
en Italie.*

LE sieur de la Clielle fera entendre à Monsieur le grand Duc que depuis l'arriuée du sieur de la Boderie auprès du Roy , sa Maesté a tousiours eu intention de le renuoyer, pour donner toute assurance audit seigneur Duc de son amitié , & de la bonne part dont elle auoit receu les propos que ledit sieur de la Boderie luy auoit tenus par son commandement, tant pour son mariage que pour sa Religion , comme il luy en auoit déjà esté fait quelque ouuerture par ledit sieur de la Clielle.

Mais les continuelles occupations qu'elle a eues aux affaires & exploits de la guerre, dont elle ne peut prendre aucune relasche , pour vacquer & entendre a autre chose , luy ont dérobé & fait couler le temps sans qu'elle ait encore pû resoudre le voyage dudit la Boderie, duquel neantmoins elle demeure toujours en même opinion.

Toutefois craignant qu'une plus longue attente de faire sçauoir nouvelles audit seigneur fust prise de luy en mauuaise part, elle a trouué bon d'y enuoyer cependant ledit sieur de la Clielle, & luy a donné charge de trouuer moyen le plus dextrement qu'il luy sera possible, de faire entendre audit sieur que les offres

& propositions faites de sa part à sa Majesté, luy auroient esté tres-agreables pour l'estime qu'elle fait de son amitié, qu'elle seroit tres-aise de pouuoir estraindre par tous les moyens plus propres qui pourroient seruir à la rendre plus asséuré entre eux.

Que n'y ayant point de gage apres la disposition des volontez, qui lie plus estroitement les Princes à embrasser les affaires & fortunes les vns des autres, que l'alliance qu'ils peuvent contracter ensemble, par les personnes qui leur sont plus proches & plus cheres: il ne pouuoit donner tesmoignage plus certain de son affection enuers sa Majesté, que par le mariage de la Princesse sa niepce, l'aimant comme il fait, ainsi que sa Majesté a esté aduertie. En quoy connoissant sa bonne volonté, elle l'en remercie, l'assurant qu'avec l'information qui luy a esté donnée du personnage & des mœurs, respond fort à ce qui peut donner le contentement que chacun desire au mariage, elle n'eust longuement tardé à luy faire connoistre que la proposition luy a apporté beaucoup de plaisir, sans la difficulté qui y est conioincte, laquelle il voudroit estre vuidée avant qu'entrer en autre traité.

Enquoy, combien qu'elle ait pris en bonne part ses conseils qu'elle reconnoist estre pleins de grande prudence & de preignantes considerations, regardans le bien des affaires de sa Majesté: toutesfois sa conscience ny son honneur ne luy permettant de s'en résoudre sans y garder quelque forme qui puisse satisfaire elle mesme, & tous ses amis & ser-

uiteurs, au contentement desquels il est raisonnable, voire nécessaire qu'elle accommode tant qu'il luy sera possible, la resolution qu'elle pourra prendre pour ce regard, & s'assure aussi que ledit seigneur ne luy voudra persuader, ny ne iuge à propos de faire autrement.

Et si elle n'en a iusques icy cherché les moyens qui y peuvent estre conuenables, ce n'est pas faute de bonne volonté, iugeant assez combien il luy importe de ne demeurer, ny laisser ses amis en cette incertitude où ladite difficulté tient sa condition, & est bien résoluë si la violence de la guerre, aux actions de laquelle elle a par nécessité l'esprit continuellement bandé & le corps occupé, luy donne tant soit peu de loisir de l'employer à la deliberation & acheminement de quelque bonne conference & moyen pour essayer de trouver quelque remede, s'il est possible, au scrupule qui empesche vne partie de ses amis, de se descouvrir entierement tels, & sert de pre-texte à ses ennemis pour esbloüir le iugement des plus simples, où sa Majesté apportera toute la facilité & inclination qui y peut estre désirée d'elle, & s'il plaît à Dieu d'en faire sortir quelque bonne conclusion, qui puisse ouvrir le chemin audit mariage, elle fera bientôt paroistre audit seigneur qu'elle desire se ioindre parfaictement & indissolublement avec luy de toutes volontez & interests pour leur commune seureté & grandeur.

Cependant elle le prie de continuer sa bonne affection enuers elle, & ne cesser de luy rendre ses bons offices accoustumez, tant

pour le secours de ses affaires, que pour rompre & empescher les mauuaises pratiques & artifices de ses ennemis.

Sur ce ledit sieur de la Chtielle luy mettra aussi en consideration les grands efforts dont elle est assaillie de leur part en tous les endroits de son Royaume, leurs puissances & moyens, & le peu qu'elle en a d'y resister de soy-mesme, qui est surquoy lesdits ennemis fondent leur plus grande esperance de la pouuoir ruiner, & se bander d'autant plus obstinement à cela, qu'ils estiment que sa ruine leur seroit non-seulement vne acquisition de ce Royaume, mais aussi vne victoire entiere de tous les autres Estats qu'ils veulent reduire sous leur ioug & domination.

Que sa Maiesté espere que Dieu sera toujours protecteur, comme il a esté par le passé, de sa personne & de cette Couronne : & se promet pour le regard des moyens que ses bons amis (desquels le bien & le mal a comme vne connexité necessaire avec elle en cette guerre) seront d'autant plus incitez à luy departir quelque bon secours pour la pouuoir soustenir, qu'ils voyent lesdits ennemis resolu d'employer tous leurs thresors & puissances pour paruenir au but de leurs desseins, venant, comme dit est, l'euenement de cette guerre, dont la France est le theatre, sa Maiesté le principal obstacle pour vn preiugé & arrest diffinitif de la domination & tyrannie à laquelle ils aspirent sur tous les Princes & Estats de la Chrestienté, dont les preuues de ceux où elle est déjà establie peuuent faire

iuger ce qui en seroit, s'ils n'estoient plus retenus de la crainte d'y pouuoir estre empeschez, & doit rendre vn chacun aduisé d'accourir & aider au remede, auant que par le trop grand affoiblissement de la principale partie du corps, la totale ruine s'en puisse ensuiure.

DISCOVRS FAIT PAR

Messire Nicolas de Harlay, Cheualier Seigneur de Sancy, &c. Conseiller du Roy en ses Conseils d'Estat & Privé, sur l'occurrence de ses affaires.

IE confesse que le contentement que i'ay de ce que Dieu s'est seruy de moy pour aider à l'establissement de mon Prince & à la conservation de mon pais, est alteré par le regret que ie porte, de ce que pendant la paix & l'abondance l'on fait difficulté de m'indemniser des aduances que i'ay faites pendant le trouble & la necessité des affaires du Roy. Je ne suis point si peu versé dans les affaires du monde que ie ne sçache que les recompenses dependent de l'affection des Princes qui estendent leurs faueurs & leurs liberalitez selon leur bon plaisir, pource ie ne trouue point estrange que ma fidelité, mon affection, mes voyages & mes trauaux soient mis en oubly, & que ma personne que i'ay tant de fois, & si franchement exposée pour la ma-

nutention de cét Estat, ne soit point maintenant en consideration, pour me gratifier de Charges ou de commoditez en recompense de mes seruices. Bien aurois-je sujet de me plaindre, si mon bien, & celui de mes amis que j'ay presté si liberalement ne m'estoit rendu, & si les grands interests que j'ay soufferts & payez pour n'auoir eu à temps le remboursement de mon principal, consommoient la meilleure partie de mon bien faute d'en estre satisfait. L'on m'arreste sur la consideration du manquement de quelques formalitez, & ie me fortifie sur la recommandation de mes seruices, mais ie voy bien que faute d'estre entendus, ils ne peuvent faire ce que ie desire. La Reine estoit lors si ieune, & si esloignée du Royaume qu'elle n'en peut sçauoir la verité ny les consequences, s'ils ne luy sont representez : & le temps les a tellement, ce semble, enseuclis, que les vns faute de connoissance ; les autres faute de memoire en font peu d'estat. Chacun sçait & reconnoist bien que le seruice que ie fis au Roy Henry III. de luy amener vne armée composée de Suisses, autres Estrangers & bon nombre de François fut tres-important, & que celui que ie fis au Roy Henry le Grand, de la luy conseruer à son aduenement à la Couronne, luy fut si utile que sans cette assistance, il eust souffert de grandes extremitez ; mais tous ne sçauent pas par quel moyen ie dressay cette armée, de quels deniers ie l'ay entretenue, avec combien de hazards & perils ie l'ay conduite, combien à propos ie la presentay, avec quel-

le affection elle fut receuë , avec quelle industrie & resolution ie l'ay retenuë , & quels seruices les Roys en ont receus , & voy encorres que mes autres seruices bien que tres-vtils pour l'Estat ne sont point confidercz. Pour cette cause i'ay pensé qu'il estoit de mon deuoir pour ne manquer à moy-mesme ; & me mettre hors du reproche des miens, de dresser vn discours sommaire de ce que ma memoire me pourra suggerer, auquel i'auray plus de soin de rapporter la verité des choses passées, que de l'orner de langage superflu ou de l'estendre sur ce qui ne me touche point.

I'estois à Blois pres du Roy Henry III. lors que les peuples émeus de sedition se reuolterent en diuers endroits de la France à la suite de ceux d'Orleans & de Paris qui leur en seruirent d'exemple ; du commencement les plus sages n'en iugeoiét pas la suite, & auoient opinion que cet orage se pourroit calmer dans peu de temps , comme promptement il estoit excité, mais ceux qui estoient dans la citadelle d'Orleans ayans esté contrains de se retirer le premier iour de Feurier, mil cinq cens quatre-vingts-neuf , par la venuë du sieur Duc de Mayenne , l'on reconnut la consequence de cette rebellion, & fut iugé que sans forces l'on n'y pourroit pas donner remede. En cette occasion ie proposay d'aller en Suisse & en Allemagne leuer des troupes pour le seruice de sa Majesté, elle loua mon affection, & (si ie l'ose dire) me pria de l'entreprendre : ie partis de Blois le 3. dudit mois de Feurier,

& laisay le Roy reduit en tels termes qu'il n'estoit pas en seureté dans ladite ville de Blois mesme, & ne scauoit où se retirer; en telle necessité qu'il n'auoit pas dequoy payer le Regiment de ses gardes: il me donna telles commissions que ie voulus, mais il ne me bailla pas vn escu pour parachener mon voyage, tant la necessité estoit grande. L'entrepris donc ce voyage sur ma bourse, & sur ma teste, qui neantmoins reüssit si heureusement, que six semaines apres estre arriué en Suisse, ie mis quinze mille hommes ensemble, par l'aide & prudence de Monsieur le Chancelier, lors Ambassadeur en Suisse, qui seruit le Roy en cette occasion, comme en toutes autres tres-dignement, tant pour me faire consentir aux Cantons la leuée des gens de guerre, que pour nous secourir d'argent pour les entretenir: mais comme les Bernois firent le principal effort en cette occasion, c'estoit en esperance que nous chasserions Monsieur le Duc de Sauoye delà les Monts, & les deliurerions de la crainte qu'ils auoient de luy, & de ses forces. L'employay donc cette armée en Sauoye, où ie pris quatorze ou quinze places: enfin estant sollicité par ceux de Geneue d'attaquer vn chasteau que le feu Duc de Sauoye auoit fortifié sur le bord du Lac, nommé Ripaille, dans lequel il auoit enfermé cinq galeres qu'il auoit destinées pour le siege dudit Geneue, le Duc de present qui n'auoit en tous ses Estats rien plus cher que cette place, en laquelle estoient les galeres, avec lesquelles il pretendoit se rendre maistre du Lac &

rendre Geneue en son obeïssance, la vint secourir, esperant encore qu'il n'eust pas tant d'hommes que nous, qu'il auroit bon marché de ces nouueaux soldats; & comme dans les montagnes il y a quantité de sentiers inconnus, il se ietta avec son armée au milieu de la nostre, avec si bonne conduite qu'il ne fut aperceu des nostres, qu'à cinq cens pas de nous. Les sieurs de Guitry, Cadet de Beaujeu, Ville-neue, Cormont, & Beauvoir la Nocle, qui estoient en effet tout ce que j'auois de Capitaines, estoient allez qui deçà, qui de là, pour decouvrir quelle route prendroit l'ennemy, mais le Duc fut si bien conduit par ses sujets dans son pais, que tous lesdits Capitaines demeurèrent derriere l'ennemy, qui se mit entr'eux & nostre armée, tellement qu'à l'arriuée du Duc, ie me trouuay seul parmy les Suisses; le regiment de Soleurre demeura ferme, celui de Berne s'estonna, le Colonel & les Capitaines monterent sur leurs cheuaux, & apperceuans du regiment de Soleurre où j'estois, leur contenance, ie courus à eux, ie les priay de demeurer ferme, & au Colonel & Capitaines de descendre de cheual, ie les fis mettre en bataille. L'ennemy voyant la mauuaise mine que faisoit ce regiment le vint charger, nous le receusmes courageusement Dieu mercy, le combat fut assez grand, il y mourut deux à trois cens ennemis sur la place & enuiron cinquante prisonniers la pluspart Gentils-hommes: l'ennemy se retira avec estonnement, mais comme nous n'auions nulle caualerie, nous ne peusmes suivre, neantmoins l'effroy fut si grand qu'il brûla

les pailles & fit ietter les bleds dans les puits par tout à sa retraite. Le sieur de Guitry & les autres qui estoient allez descouurir l'ennemy, reuindrent & trouuerent besogne faite, en quoy certes i'auoüe qu'il y eut plus de faueur de Dieu, que d'industrie de ma part, parce que ie n'auois pas esté nourry ieune en cette vacation: mais estant né Gentil-homme, comme ie le suis par la grace de Dieu de pere & de mere, ie me proposay en ce danger, qu'il valoit mieux mourir en cette occasion, que de reculer vn pas: en quoy Dieu benit mon intention & l'extreme desir que i'auois de seruir mon Roy & ma patrie. Or au lieu que cette victoire deuoit donner du courage à nostre Colonel de Berne, elle produisit vn effet tout contraire, au bien neantmoins de ce Royaume, parce que les prisonniers qui estoient entre ses mains (comme est dit cy-dessus) le voyant peu assuré, augmentèrent sa frayeur, & luy dirent que le Duc estoit allé recueillir vne armée de vingt mille hommes de pied, & quatre mille cheuaux qui estoient desia sur le mont Senis, laquelle le Roy d'Espagne luy enuoyoit, & que deuant qu'il passast quatre iours il nous reuiendrait voir bien mieux accompagné qu'il n'auoit esté. Ce qu'il crût de telle forte qu'il me vint éuciller à minuit dedans ma tente, & me remonstrant que ie leur auois promis six mille hommes de pied, & deux mille cheuaux François, il protestoit que pour y auoir manqué de ma part, luy & ses Capitaines se retireroient dans deux iours, si ie ne leur faisois paroistre lesdites forces, parce qu'ils

estoyent trop foibles pour resister seuls à si grands ennemis. Je respondis que s'ils se retiroyent en cette occasion, ce leurs seroit vne lascheté reprochable à iamais, & dont leurs Seigneurs ne seroient pas contens, mais que s'ils le vouloyent faire, j'auois assez d'autres forces pour prendre la place.

Le matin Monsieur de Guitry & le reste de nos Capitaines furent d'avis de battre la place à coups perdus de quatre canons que nous auions, pour voir si nous estonnerions ceux qui estoient dedans : la chose succeda si heureusement qu'ayant d'un coup de canon rompu les iambes au Capitaine, & tué quelques soldats, tous ceux de la garnison intimidez du combat precedent, & de la retraite de leur secours qui s'estoit faite à leur veüe, resolverent de capituler, & firent vn signal, la capitulation fut concludë à midy, la garnison qui estoit de cinq compagnies de Sauoyards & de deux de Piedmontois sortit à 2. heures. Cette place estoit si bonne & si bien réparée qu'elle pouuoit souffrir deux mille coups de canon. Je me seruis de la frayeur que le Colonel de Berne m'auoit tesmoignée la nuit, j'assemblay tous les Colonels & Capitaines Suisses, pour deliberer ce qui estoit à faire, les Bernois en pleine assemblée persisterent à ce qu'ils m'auoient dit, que s'ils n'auoient de l'infanterie & caualerie Françoisse, ils ne pourroient subsister, & estoient resolus de se retirer, & comme nous estions dans le conseil suruint vn Courrier que j'auois attiré avec lettres du Roy, par lesquelles il me man-

doit que i'eusse à le venir trouver avec l'armée que i'auois sur pied, laquelle luy faisoit tant de besoin, qu'il s'acheminoit vers Langres, afin de la joindre tant plûtoſt, & qu'estant renforcé de ladite armée, il enuoyeroit le ſieur de Chaſtillon avec quatre mille hommes de pied, & le ſieur de la Noüe avec quatre cens cheuaux pour conſeruer le pays conquis ſur le Duc. Cette lettre reſiout grandement tous les Suiſſes, qui tous reſolurent qu'il falloit tourner la teſte de l'armée en France, & que ſans infanterie & caualerie Françoisſe, ils ne pouuoient ſubſiſter. Le Colonel de Berne fut porté à cette reſolution, pour l'impreſſion qu'on luy auoit donnée des grandes forces de l'ennemy, & qu'auiſſi il ne s'en pouuoit deſdire, ayant dès la nuit dit ſon opinion: les autres y furent portez pour la grande enuie qu'ils portoient aux Bernois, leſquels ils croyoient ſe deuoir trop accroître par cette guerre. Tous doncques, tant les Bernois que les autres, ſignerent qu'il falloit mener l'armée en France, & me fuſſe trouué bien empesché ſans cét accident, parce que n'ayant pas de quoy continuer le payement tous les mois à nos gens de guerre, ie preuoyois que dès l'heure qu'il euſt manqué ils nous euſſent tous abandonnez pour la commodité qu'ils auoient de ſe retirer en leurs maiſons. Ie me reſolus de porter à Berne cette reſolution ainſi ſignée, de peur que ſi ie leur donnois loiſir d'y ſonger ils fiſſent deſdire leurs gens & ſ'oppoſaſſent à noſtre deſſein. Ie paſſay donc le Lac dès le ſoir meſme, & fis vne telle diligence toute la nuit que

MEMOIR ES D'ESTAT. 137

J'arriuy à Berne ainsi comme ils estoient au conseil : Je leur fis sçauoir que i'auois affaire à parler à eux, ils me firent entrer en leur conseil, & me donnerent audience. Je leur racontay la prise du Chasteau de Ripaille qui les contenta fort : mais quand à la queue de cela ie leur monstray la resolution que i'auois prise avec tous les Suisses de mener l'armée en France, ils demurerent estonnez & non sans cause, mais voyant la signature de leurs Capitaines, ils ne sçurent que dire, ils m'offrirent de l'argent, ils me menacerent & firent tout ce qu'ils pûrent pour m'arrester, mais voyant que cela ne seruoit de rien ils me prierent de faire au moins seiourner l'armée encore quinze iours dans le pais, pendant lequel temps ils amasseroient toutes les forces de leur pais pour conseruer le pais occupé sur le Duc, & que ie n'émenerois aucuns de leurs Capitaines ny soldats ; ce que ie leur accorday, dont ie donnay incontinent aduis au sieur de Guitry afin qu'il fist vn nouveau Regiment au lieu de celuy de Berne, & fist viure l'armée pendant ces quinze iours le mieux qu'il pourroit : car ie luy auois laissé tout l'argent que i'auois, tant de ce que les Bernois & autres m'auoient presté, que de ce que i'auois emprunté sur mes bagues pour la payer, afin que faute de payement elle ne se desbandast : cependant ie m'en allay en diligence en Allemagne hastier les Reistres & Lansquenets, que i'y auois fait leuer, afin que nous rendant tous en mesme temps à Montbeliard, nous pussions de compagnie

traverser le Comté , & arriuer en France. Le sieur de Harancourt s'y trouua avec cinq ou six cens cheuaux , & douze cens hommes de pied , Dietriks , de Schomberg , & le Baron de Creange , qui auoient par ensemble douze cens cheuaux , & deux mille hommes de pied , ne furent pas si tost prests , parce que le Roy (qui ne vouloit point passer la riuere de Loire pour venir du costé de Paris , qu'il ne sceust que cette armée Estrangere fust entrée dans le Royaume) me pressoit si fort de me haster , que ie fus contraint de les laisser derriere : ils me suiuirent quinze iours apres , & le Roy ayant eue mes nouvelles & sceu que nous estions proches de la frontiere , me manda qu'il auoit donné charge à Monsieur de la Guiche de venir receuoir l'armée & la conduire là par où il seroit. Surquoy luy ayant mandé que depuis que Dieu m'auoit fait la grace d'auoir avec cette armée combattu le Duc de Sauoye , & eslué plusieurs autres dangers , ie pensois aussi estre capable de luy mener qu'un autre. Il le prit en bonne part & m'enuoya vne commission bien ample & fort honorable pour la commander comme son Lieutenant General : & Dieu fauorisa tellement ma bonne volonté , que ie presentay au Roy cette armée saine & sauue au bout du pont de Poissy , avec trente enseignes de gens de pied , & six cornettes de cavallerie conquises sur le Duc de Sauoye. Il y a encore deux mille Gentils-hommes en ce Royaume qui tesnoigneront avec quelle allegresse il receut ce seruice , me disant à la

teste de toute l'armée que cecy n'estoit vn
 seruice de Gentil-homme , mais vn secours
 d'un grand Prince , & que si Dieu luy faisoit
 la grace de le remettre au dessus de ses affai-
 res , il me feroit si grand que ie n'aurois su-
 iet de porter enuie à Gentil-homme de Fran-
 ce de quelque qualité qu'il fût : neantmoins
 ie suis réduit en telle misere que si ie ne suis
 secouru & reconnu de mes seruices, il est bien
 certain que plusieurs gens seront plutôt di-
 uertis de hazarder leur bien & leur personne
 pour seruir le Roy & la patrie en telle neces-
 sité , qu'encouragez par mon exemple. Ce
 fut le 26. Iuillet que ie fis voir cette armée
 au Roy Henry III. chacun sçait l'honneur &
 la bonne chere que ie receus de luy iusques à
 sa mort , qui fut sept iours apres. Je fus si
 mal-heureux de me trouuer en sa chambre
 quand il fut blessé , & encore quand il rendit
 l'ame le troisieme iour d'Aoust enuiron deux
 heures du matin : Monsieur le grand Ecuyer,
 feu Monsieur le Mareschal d'Aumont , & la
 pluspart des Chefs de l'armée s'y trouuerent:
 tous pleuroient & s'affligeoient , iamaïs ne
 fut veüe plus grande desolation. I'auois bien
 ma part de l'affliction, toutesfois ie me reso-
 lus le premier , & voyant la plus-part des
 Chefs & Capitaines dedans cette chambre ,
 ie dis tout haut , que nos pleurs ne r'appelle-
 roient pas nostre maistre du tombeau , qu'il
 falloit venger sa mort sous le commandement
 & bonne fortune du Roy de Nauarre: Que tous
 ceux qui auoient charges deuoient ce me sem-
 bloit aller à leurs troupes pour les assurer à

son service , quant à moy ie m'en allois trouver mes compagnons. Le Marechal d'Aumont m'embrassa & dit tout haut, que c'estoit ce que chacun deuoit faire. Je m'en allay à nos Suilles , Reistres & Lansquenets , ie leur annonçay la mort du Roy , leur remontrant qu'il n'y auoit que trois conditions qu'ils pussent choisir , l'vne de se retirer les armes à la main en leur pais , & s'ouurir le chemin par la force. L'autre de demander passeport à l'ennemy. La troisieme de s'attacher du tout à la fortune du Roy de Nauarre , & le reconnoissant pour legitime heritier du Roy deffunt , le seruir avec autant de fidelité & d'affection qu'ils en auoient promis à son predecesseur. Que la premiere estoit fort dangereuse , parce qu'ils auoient 4. ou 5. riuieres à passer , au passage desquelles ils seroient sans doute combatus & deffaits entierement, deuant qu'ils pussent estre deuant la frontiere , que la perte de l'armée de l'an 87. leur en fournissoit vne bien ample preuve. La 2. estoit fort honteuse & gueres assurée , parce que c'est chose bien miserable de dependre de la foy de son ennemy , lequel la voulant violer trouue tousiours quelque suiet & excuse pour ce faire. Il ne restoit que la 3. condition , qui estoit la plus seure & la plus honorable , parce qu'ils combattoient sous vn Prince belliqueux & heureux , qui ne les hazarderoit pas mal à propos, & rien ne leur deuoit faire peur que la faute d'argent: mais considerant que les neuf parts de la Frâce estoient ennemis, le butin qu'ils pourroient faire tous les iours vaudroit

deux fois leur paye. Et comme ces nations d'Allemagne & Suisse ne sont pas si prompts à faire responce, ils me prierent de les laisser deliberer: la pluspart s'accorda à ma proposition, hors mis trois Capitaines Suisses qui sous pretexte de la Religion dirent qu'ils ne pouvoient servir le Roy s'il n'estoit Catholique. Cette question ne se pouvoit pas vuider en ce temps-là: Je trouuay si grande creance parmy les autres qu'ils me promirent d'establir trois autres Capitaines en la place de ces trois, qui se trouuerent auoir si peu de part dans les compagnies que pas vn soldat ne demanda à s'en aller avec leurs anciens Capitaines. Et preuoyant la grande necessité où nous tomberions incontinent, ie leur fis iurer de servir le Roy trois mois sans argét, & sans pource refuser aucune faction de guerre (chose qui ne se vid peut estre iamais parmy les Suisses & Reiftres) Cepédant le Roy ayant sçû la nouvelle de la mort du Roy son predecesseur, assemblée ses anciens seruiteurs avec lesquels il resolut de se retirer vers la riuere de Loire pour s'assurer des villes de Boisgency, Blois, Tours & Angers ; iusques à ce que Guitry venant à son opinion, dit que s'il prenoit ce conseil il perdrait toutes les places qui tenoient pour le feu Roy son predecesseur sur les riuieres d'Oise, Marne & Seine, & generalemēt tout ce qui étoit au deça de la riuere de Loire, lesquelles il cōserueroit, pourueu qu'il pût conseruer les troupes Estrangeres que i'auois nouuellement conduites en ce Royaume, lesquelles à la verité faisoient les deux tiers de son armée, principalement pour ce qui estoit de l'infanterie, car il

y auoit quatorze mille hommes de pied & deux mille cheuaux. Le Roy approuua ce conseil, mais ne croyant pas que i'eusse assez de creance parmy ces gens là, pour les faire refoudre si promptement, il donna charge au sieur de Guित्रy de me venir trouuer à Suresne où ie les auois tous assemblez, pour me conuier par toutes sortes de promesses de le seruir en cette occasion. Le sieur de Guित्रy arriuant à Suresne trouua que ie n'auois pas attendu la semonce du Roy pour trauailler à cette affaire. Je luy dis ce que i'auois traité avec tous nos gens, & que ie n'attendois que le retour de quelques Colonels & Capitaines qui estoient allez à Puteaux & à Courbeuois querir leurs cheuaux pour nous en aller tous ensemble iurer toute fidelité & seruice à sa Majesté. Le sieur de Guित्रy s'auança de porter diligemment cette nouuelle au Roy, qui n'estant pas encore accoustumé à cette grauité royale, quand il nous vit arriuer en la cour de sa maison à saint Cloud, descendit & nous vint receuoir au pied du degré. Il y a encore plus de deux cens Gentils-hommes viuant qui peuuent tesmoigner les promesses qu'il me fit, & de quelle affection il receut ce seruice. Tout le monde loue le seruice que i'ay fait au Roy de luy auoir amené en cette necessité des Suisses & des Reistres, mais ils n'en sçauent pas les circonstances, qui sont plus à considerer que la conduite de l'armée. Ce mesme soir se tint vne assemblée des principaux seruiteurs du Roy deffunt, dont ie fus l'un, en laquelle il fut disputé si l'on receuroit

le Roy de Nauarre pour Roy , qui n'estoit pas Catholique. Les histoires escriuent bien la resolution de l'assemblée , qui fut que dans six mois le Roy se feroit instruire, que cependant les Princes & Seigneurs Catholiques qui estoient en l'armée deputeroyent vn d'entr'eux à Rome pour supplier le Pape de les vouloir fauoriser au dessein qu'ils auoient de ramener ce Prince à l'Eglise, & pour cet effet promettre sa benediction au cas qu'il se conuertist, & que Monsieur de Luxembourg fit le voyage, mais ils ne disent & ne sçauent pas en quelle façon cette question fut agitée ny les propositions qui y furent faites: Il s'y en fit plusieurs dangereuses, & la principale fut celle que fit Monsieur le Marechal de Biron, que l'on deuoit considerer qu'estant depuis plusieurs années en ça ce Royaume party en deux partis, les vns Catholiques, les autres Huguenots, les Catholiques se trouuoient auourd'huy separez en deux, les vns de la Ligue, les autres Realistes: que toutes les grandes villes & le menu peupple estoient du party de la Ligue, lesquels se porteroient aisement à la suiection d'Espagne, si les Catholiques qui estoient du party du Roy leur faisoient perdre l'esperance de se reünir avec eux, & la perdroyent sans doute si dès cette heure nous reconnoissons le Roy de Nauarre pour nostre Roy, puis qu'il n'estoit pas Catholique, & que nous ne deuions point franchir le saut iusques apres sa conuersion, & neantmoins pour ne le laisser pas cependant sans qualité, que nous le deuions qualifier Capitaine general, & luy iurer tou-

te obeissance sous cette qualité. La pluspart de ceux qui estoient en cette assemblée trouua cette proposition mauuaise, mais ie suis celuy seul dont Dieu se seruit pour y respondre sur le champ, & tous les Princes & Seigneurs qui estoient là, me conuierent de ce faire, entre autres Monsieur de Longueuille, M. le Marechal d'Aumont & Monsieur de Luxembourg. Je luy respondis, Que nostre Estat estant Monarchique il ne pouuoit subsister sans Roy, non plus qu'un corps sans chef, que pour cette raison le Roy ne mouroit point en France, d'autant qu'à l'instant mesme que celuy qui en porte le titre & en fait la fonction decede, celuy qui luy doit succeder par les loix est inuesty de ce titre sans le tenir d'autre que de Dieu : Que le Roy de Nauarre estoit le plus proche habile à succeder au Roy deffunt, comme estant l'aisné de la maison de Bourbon qui restoit seule de la maison Royale: Que plus grand desseruice ne se pourroit faire au Roy que par la proposition dudit sieur Marechal, parce que si nous qui estions avec luy, luy deuions la qualité que nature luy donnoit, ceux qui tenoient le party contraire auroient grand droit de ce faire : que si nous ne le voulions reconnoistre en la qualité que les loix du Royaume luy donnoient, malaisement luy pourrions nous garantir celle de Capitaine general : Qu'il estoit bien plus expedient pour le Roy que ceux qui faisoient scrupule de le seruir deuant qu'il fût Catholique, se retirassent en leurs maisons en attendant, plutost que de mettre telles proposi-

tions en auant. Le Marechal de Biron se voyant
 pressé par la raison se leua de sa place, me tira
 en vn coin à part & me dit, que iusques a-
 lors il auoit creu que i'eusse de l'entende-
 ment, mais qu'il en perdoit maintenant toute
 opinion parce que si deuant que d'auoir assuré
 nos affaires avec le Roy de Nauarre nous esta-
 blissions dutout les siennes, il ne nous recon-
 noistroit plus & ne se soucieroit plus de nous,
 que ce iour estoit pour faire nos affaires, &
 que si nous en perdions l'occasion, nous ne la
 recouurerions iamais, & le repentir nous en de-
 meureroit toute nostre vie. Je répondis que ie
 ne croyois pas qu'il fust pour l'heure temps
 de penser à nostre particulier, que si le public
 se sauoit, nous penserions puis apres à nos
 affaires, mais qu'il falloit regarder premie-
 rement au general & nous garantir du danger
 dont la confusion en laquelle estoit l'armée
 pendant cette anarchie, nous menaçoit, toutes-
 fois s'il me vouloit dire ce qu'il desiroit pour
 son particulier & qu'il m'estimast capable d'en
 porter la parole au Roy (qui estoit en vne
 chambre au dessus de celle où nous estions at-
 tendant la resolution de cette assemblée) que
 ie l'irois trouuer, & luy en rapporterois la res-
 ponse, dont il me pria & me dit, que si le
 Roy luy vouloit donner le Comté de Perigort,
 il ne l'abandonneroit point quelque fortune
 qui se presentast: ie l'allay dire au Roy qui me
 donna charge de l'en assurer. C'est la vraye
 histoire de ce qui se passa lors, que i'ay
 pensé n'estre point hors de propos d'in-
 serer en ce discours, de laquelle Monsieur

de Dampierre , qui avec le sieur de Rieux estoient les deux Mareschaux de camp du Roy Henry troisieme , & qui seul reste avec moy de tous ceux qui estoient en cette assemblée pour rendre tesmoignage. Ayant donc esté resolu en l'assemblée susdite que tous deuoient reconnoistre le Roy, comme il est dit cy-dessus , & est amplement rapporté par ceux qui ont escrit l'histoire, sa Majesté tint le lendemain vn conseil , auquel il appella tous les principaux de l'armée pour sçauoir ce que l'on deuoit faire ; les vns proposoient de conduire l'armée à Chasteau Thierry , Espernay & Chaalons , villes sur la riuere de Marne pour s'approcher du secours qu'il esperoit d'Allemagne , & par le moyen des ponts qui sont attachez esdites villes , se garantir de combattre si l'ennemy ne luy en presentoit occasion à son auantage. Les autres de refaire en diligence le pont de S. Cloud d'où nous auions le iour precedent chassé les ennemis , mettre le corps du Roy deffant sur ledit pont, & comme l'armée passeroit , que tous les Seigneurs , Capitaines & soldats iurassent sur le corps du Roy la vangeance de sa mort, & que de ce pas toute l'armée allast dōner dans les fauxbourgs S. Honoré, S. Denis & S. Martin, & porter les eschelles aux murailles de la ville, pour avec le feu & le fer venger cette mort. Le Roy ayant entendu avec patience tout le monde , loüa les propositions qui auoient été faites, mais parla en Capitaine plus que tous , & dit , que cōme depuis la mort du Roy plusieurs s'étoient desbandez, aucuns mesme auoient pris le parry

avec

avec les ennemis , il en pouuoit encor rester qui auoient mesme volonté , pour cette cause qu'il falloit faire passer deux riuieres pour le moins à l'armée , parceque ce qui demeureroit apres nous seroit assésuré , & avec ce on pourroit faire vn bon & assésuré dessein. Le Roy reuint donc à Poissi où il passa la riuere de Seine , & s'en alla à Pontoise , incertain s'il iroit à Creil & Compiègne le long de la riuere d'Oyse , ou s'il prendroit son chemin vers la riuere de Marne pour le dessein susdit. Mais pendant cette irresolution il eut nouuelle que Monsieur de Montpensier estoit arriué à Andely avec huit cens Gentils-hômes, & quatre mille hommes de pied Normans , qui le conuierent d'aller en cette Prouince , à quoy il se laissa facilement porter pour la grande consideration en laquelle est cette Prouince dans le Royaume : neantmoins parce qu'il estoit proche de Creil il se voulut assésurer de cette place en passant: Le voisinage le porta à Clermont , de là à Gisors , Pont de Larche, & autres places de Normandie ; Et par ce qu'il n'auoit pas moyen d'entretenir ce grand corps d'estrangers, il se resolut de n'en garder qu'une partie , d'en bailler vne autre partie au Marechal d'Aumont qui les iroit faire viure en Champagne , & le reste à Monsieur de Longueuille qui les employeroit & feroit viure en Picardie , à la charge de se reioindre tous ensemble au premier commandement qu'ils en receuroient. La necessité leur fit prendre ce conseil qui faillit de perdre le Roy quelques iours apres à Dieppe. Mais c'est trop

sur ce sujet , puis que ie n'escriis pas l'histoire. Pour reuenir donc à mon particulier , le Roy estant au siege de Clermont preuoyant les grandes forces qui luy tomberoient dans peu de temps sur les bras , se resolut d'implorer le secours des Princes d'Allemagne , & ayant vcu par l'armée que i'auois peu de iours au precedent amenée , que i'auois part avec ces gens là , il me commanda d'entreprendre ce voyage qui estoit tres-dangereux , parcequ'encore que du temps du feu Roy nous n'eussions gueres de places, il n'y auoit point neantmoins encore de nouuelles que ce peu que nous en auions nous fussent assurées. Je m'y resolus , toute la campagne & le menu peuple estoit ennemy, toutesfois ie passay heureusement par la grace de Dieu , & en moins de quinze iours me rendis à Basle deuant la fin du mois d'Aoust pour voir Monsieur le Chancelier lors Ambassadeur en Suisse , & luy faire sçauoir en quel estat estoient les affaires en France, puis sans tarder aucunement ie passay en Allemagne où ie fus tres bien receu de tous les Princes , lesquels pour la reputation que i'auois acquise en la conduite de l'armée que ie venois de mener en France, ne firent nulle difficulté de me confier toutes les forces qu'ils vouloient enuoyer au Roy , mais avec tant de precipitation que les plus proches, comme le Duc de Vvittemberg & le Duc Jean Cazimir, ayans pris de moy les commissions suiuant les pouuoirs que i'auois du Roy, les departirent à qui bon leur sembla, au Colonel Daurmartin mille Reistres , à Lanty, six mille Lás-

quenets qui se mirent incontinent en campagne deuant que ie fusse de retour de Saxe. Et comme chaque enseigne tenoit deux ou trois villages pour viure plus commodement, ils donnerent beau jeu à Monsieur le Duc de Lorraine d'entreprendre sur eux, & ne sçay comme ils n'en eurent nouvelles, veu qu'estant encore à Nuremberg ie fus aduerti du dessein dudit sieur Duc, i'y accourus, mais trop tard pour les Lansquenets. Quant aux Reistres ie les sauuy dans les terres de Basle, & donnay tel ordre à mes affaires que ledit sieur Duc de Lorraine nous estant venu sur le bord d'un ruisseau au delà duquel ie les auois logez se retira par le Comté de Bourgogne sur les frontieres du Duché & de la Lorraine, se promettant que les Reistres qui estoient à la porte de leurs maisons se defferoient d'eux mesmes, ou qu'estans passez le Comté il les chargeroit avec son armée fraische & triomphante : Mais le voyant retiré, ie me mis sur ses pas, & ayant dressé avec les communes du Comté mes estappes pour aller à Port sur Saune, ie trompay ledit Duc & les Bourguignons, parceque m'estant arresté à la teste des riuieres du Dou & de Lougnon, ie partis d'un grand matin de mon logement, & tenant chemin entre lesdites deux riuieres, ie me rendis en trois iours à S. Iean de Laune, qui est à plus de vingt lieuës du Port sur Saune où ledit Duc m'attendoit. Je donnay ordre d'ailleurs qu'un nommé Frents & Vvambach que i'auois leuez en Saxe, & qui estoient arriuez auprès du port du Rhin de Strasbourg a-

uec douze cens cheuaux & quinze cens hom-
 mes de pied , passassent en diligence à Metz
 pendant que M. de Lorraine estoit occupé a-
 pres nous, & luy fissent la guerre dans son
 pays , m'assurant bien que cela luy rappelle-
 roit bien-tost, comme il aduint. Estant donc
 arriué en Bourgongne & passé la riuere de
 Saulne entre Scurre & saint Iean de Laune ,
 les Bourguignons desiroient de se seruir des
 forces que i'auois dans leur Prouince : Mon-
 sieur de Tinteuille d'ailleurs me conuioit d'al-
 ler aux enuirs de Langres pour luy ayder à
 prendre quelques places qui incommodoient
 cette ville , laquelle estoit en danger de se per-
 dre, si l'on ne monstroit auoir soin de la sou-
 lager : mais comme ie n'auois autre but que
 d'aller trouuer le Roy sans m'arrester nulle
 part, ie luy fis sçauoir que i'estois passé, nonob-
 stant les difficultez que i'auois rencontré, & que
 i'auois enuoié à Mets vne partie des forces
 que i'auois , & en attendant la responce de sa
 Maiesté pour ne demeurer point inutile , ie
 m'allay ioindre à Monsieur de Tinteuille qui
 estoit sur le chemin que i'auois à tenir pour
 aller vers le Roy : nous assiegeasmes & pris-
 mes Monfangeon , & le Roy depescha Mon-
 sieur de Guित्रy pour venir recueillir ce que
 i'auois de forces & les luy mener, & m'enuoia
 vne commission nouuelle pour retourner en
 Allemagne, Mais comme le bon succez de la
 premiere armée m'auoit acquis grande re-
 putation parmy ces Princes , le malheur arriué
 aux Lansquenets me la fit perdre, encore qu'il
 n'y eust point de ma faute , comme i'ay

dit cy-dessus, & demanderent que le Roy leur enuoyast le Vicomte de Thurenne, le sieur de la Nouë ou de Chastillon pour conduire leur armée, & qu'ils ne la vouloient confier qu'à l'un de ces trois. Je le fis sçauoir au Roy qui se resolut d'y enuoyer Monsieur le Vicôte de Thurenne qui est aujourd'huy Monsieur le Marechal de Bouillon. Le Duc Jean Cazimir me voyant sur mon retour, & fasché de me retirer sans auoir rien fait en ce voyage, me dit que si en vertu des pouuoirs que j'auois du Roy ie luy voulois engager la ville & citadelle de Metz il me feroit fournir cent mille escus, avec lesquels ie pourrois leuer deux mille cheuaux & deux mille hommes de pied, pour ne retourner point, vers mon maistre sans quelque effect : Qu'outre ce, il tiendrait douze cens cheuaux & deux mille hommes de pied dans ladite ville de Metz, avec lesquels il feroit la guerre à Monsieur de Lorraine, & occuperait les forces dans son pays & conserueroit ladite ville de Metz, qui faute d'argent estoit prestee de se perdre. Je luy dis que ie ne le pouuois faire, par ce que ie n'auois point de puissance sur la garnison qui estoit dedans, & que ie ne croyois pas que le sieur de Soboles ny les Capitaines qui estoient dans la place, fussent aisez à en desloger. Il me fit response que ie luy laissasse le soin de cela, que moyennant que ie luy baissasse vn bon contract pour la seureté de l'argent qui me bailleroit, & de ce que monteroit pour vn an la depense de la garnison qu'il entendoit tenir en la place, il me feroit tousiours fournir soixante mille

florins pour faire mes levées, & luy ayant dit
 que ie ne pouvois faire ny conseiller au Roy
 de le faire, ils s'en offensa fort, me deman-
 dant si j'aimois mieux voir tomber cette pla-
 ce entre les mains de Monsieur de Lorraine,
 comme la faute des moyens luy reduiroit dans
 peu de temps, que de la voir entre les
 mains d'un amy du Roy, qui luy aideroit à le
 venger de ses ennemis. Je luy fis réponse
 qu'il valoit mieux pour le service du Roy, que
 ledit Duc de Lorraine prit la place par force,
 que si le Roy l'engageoit à un Prince estran-
 ger quel qu'il fut, parce que le Roy n'est
 maintenu que par les grands du Royaume,
 qui desirant n'estre sujets que d'un Prince s'es-
 toient attachez au Roy, qui sembloit seul estre
 obligé de conserver la Monarchie de France
 en son entier: mais s'il donnoit son consente-
 ment à la dissiper, ils perdroient cette opi-
 nion de luy, & voyans le Royaume se des-
 membrer, n'auroient non plus d'intérêt d'es-
 tre sujets d'un autre que de luy, qui seroit sa
 ruine dans peu de temps: Le sieur Durant de
 Metz qui estoit lors Secrétaire du Duc Cazi-
 mir & fut employé en cette negociation, en
 peut rendre tesmoignage, M. de Reuol, à qui
 ie manday tout ce discours, m'écrivit qu'ils
 auoient tous grandement approuvé la répon-
 se que j'auois faite au Duc Casimir, & s'en ser-
 uiroient enuers la Reine d'Angleterre qui leur
 faisoit pareille demande, & qui pour seureté
 du secours qu'à toute heure l'on luy deman-
 doit, pressoit d'auoir Calais & Boulongne.
 Ne pouuant donc rien faire de plus, ie pris
 mon chemin à Basse pour m'en reuenir en

France, ce fut au mois de Septembre de l'an quatre vingt-dix, & ne pensant à autre chose qu'à repasser le plus doucemēt que ie pourrois Il arriva que huit courriers depeschez de Milan avec cinquante six mil escus pour porter en diligence au Duc de Parme qui estoit au siege de Corbeil, passerent à Basle, dont ie fus aduerty, ie les fis suivre, & à quatre lieuës de Basle ie les fis destrousser: l'argent me fut porté à trois lieuës de là. Je pouuois conuertir cela à mon vtilité & profit, comme i'en auois grand besoin, mais ayant receu trois iours au precedent vne depeche de M. Desdiguieres, lequel ayant sçeu que i'estois repassé en Allemagne, & croyant que i'auois vne armée sur pied, me conuioit d'enuoyer six ou sept cens cheuaux, & deux ou trois mille hommes de pied du costé de Geneue, tant pour garantir cette ville qui estoit bloquée de tous costez, de se perdre, que pour y rallumer la guerre, afin de donner de l'exercice au Duc de Sauoye dans son pays, & retirer de Prouence les forces qu'il y tenoit contre le Roy, & que par mesme moyen ledit sieur Desdiguieres executeroit vne entreprise qu'il auoit sur la ville de Grenoble, laquelle il n'osoit tenter si l'on ne faisoit quelque diuertissement du costé de Geneue, parce que si les forces de Monsieur de Nemours & celles du Duc de Sauoye iointes ensemble luy tomboient sur les bras, il n'auroit pas moyen de les supporter. Il me conuioit donc, comme i'ay dit, d'enuoyer des forces du costé de Geneue, & ce par vn nommé Seue qui faisoit la charge de Maréchal

de camp en son armée: mais comme ie n'auois ny forces, ny argent, ie luy auois renuoyé ledit Seue, & le iour mesme qu'il partit, ie pris cét argent que ie creus m'estre enuoyé de Dieu, non pour en vser à mon profit particulier, mais pour le seruice du Roy & le bien de ma patrie. I'enuoyay incontinent aduertir ledit sieur Desdiguieres de la bonne fortune qui m'estoit arriuée, & l'asseurer que daus la fin de Nouembre ie serois à Geneue avec trois mille hommes de pied, & cinq cens cheuaux, & ferois vn si grand diuertissement contre le Duc de Sauoye, que ie luy donnerois loisir d'executer son entreprise. A quoy ie ne manquay point, faisant toute diligence de leuer gens de pied & de cheual sur cette frontiere. Monsieur de Maillé auoit depesché à Venise trois compagnies d'Albanois pour venir seruir le Roy qui estoient arrestez à Zurich & n'auoient point d'argent pour passer outre: ie leur fis aduancer trois mois de folde, ie leuay plus de deux cens cheuaux, quinze cens hommes de pied François, & seize cens Suisses, avec lesquels ie m'acheminay en diligence à Geneue, & y arriuy au commencement de Decembre, & tout chaudement nous courusmes iusques dans les portes d'Anisly, nous bruslasmes les moulins, nous iettasmes les farines & toutes les autres prouisions que l'on faisoit pour les troupes qui deuoient aller au secours de Grenoble, & pour dauantage occuper les forces de Sauoye, ie me resolus d'assiéger le Chasteau de Burin-ge, auquel est attaché yn pont sur la riuere d'Arnc, là où il y auoit vne garnison qui in-

commodoit grandement la ville de Geneue : ce Chasteau auoit grande reputation , parce que l'année precedente cette armée de Berne, composée de plus de quinze mille hommes, & qui auoit succédé à celle que j'auois tirée dudit païs pour mener au Roy , l'auoit attaqué & ne l'auoit pû prendre. Le Comte Martinengue qui estoit à Chambery , pour essayer de secourir Grenoble ayant eu nouuelle que nous auions attaqué cette place , prit l'élite de l'armée du Duc, & vint en diligence pour la secourir, ietta deuant luy trois compagnies de cheuaux legers de Milan conduites par vn nommé Christophe d'Iuara, & cinquens Espagnols pour nous venir taster , ils nous trouuerent en estat de les receuoir, tout cela fut taillé en pieces, les drapeaux & cornettes prises , Christophe d'Iuara tué sur la place, le reste s'enfuit en si grand desordre , que s'ils n'eussent trouué la porte de la ville de la Roche ouuerte , il ne fust pas échappé vn homme de cette troupe : deux iours apres ledit Chasteau de Buringe fut pris d'assaut. Le reste des troupes qui estoient à Chambery vint de nostre costé pour nous empescher plus grands progrès, & laisserent à Monsieur. Desdiguieres ses coudées franches pour acheuer à son aise le siege de Grenoble. L'entre-tins les forces le long de cette riuiera d'Arne iusques à ce que l'armée qui estoit en Saouye, composée des forces du Duc & d'vn Regiment de Napolitains, commandé par le Marquis de Trenico , & d'vn regiment d'Espagnols commandé par Dom Pedro de Toledo,

me tomba entiere sur les bras, ils pouuoient estre neuf mille hommes de pied, & douze cens cheuaux. Je n'en auois pas le tiers, ie fus contraint de me retirer pres de Geneue, & me retrancher à la faueur des murailles de la ville. Le sieur de Guitry qui auoit commandement du Roy de venir secourir Geneue, & auoit receu quelque argent en Italie pour ce faire, entendant les nouuelles de ce que i'y faisois, & scachant que ie n'auois pas forces suffisantes pour resister à celles de Sauoye qui auoient du tout quitté le Dauphiné pour se venir opposer à moy, pensa que ie me retirerois, il m'enuoya prier de l'attendre & que nous partagerions le commandement ensemble : Il y vint & amena trois regimens de gens de pied & quatre cornettes de caualerie, qui pouuoient faire en tout douze cens hommes de pied, & cent cinquante cheuaux. En mesme temps Monsieur Desdiguieres attaqua le Chasteau des Eschelles en Sauoye, tous nos Sauoyards y coururent & nous laisserent la campagne libre : le sieur de Guitry & moy allasmes assieger Tourron, & Esuian sur le Lac de Geneue, & les prîmes. Monsieur Desdiguieres apres la prise du Chasteau des Eschelles fut appelé en Prouence, toute l'armée nous reuint sur les bras, avec telle diligence qu'elle nous surprit anant que nous eussions eu de leurs nouuelles. Leur dessein estoit comme ils feroient à vne lieüe de nous, d'enuoyer leur caualerie, & les plus dispos de leurs gens de pied pour nous engager au combat, en attendant que le reste de leur armée, qui estoit vne

fois plus forte que la nostre , y peust arriuer ,
 ce qu'ils executerent si bien que nous n'eus-
 mes loisir, sinon de choisir vne place de com-
 bat aduantageuse, en vn lieu nommé Montou,
 sur vne petite montagne , dont les aduenuës
 estoient assez difficiles, & parce que les iours
 estoient courts & qu'il estoit déjà dix heures
 quand nous apperceusmes les ennemis , nous
 nous persuadâmes que nous passerions le reste
 de la iournée en petites escarmouches, & que
 nous pourrions la nuit faire doucement la
 retraite à Geneue , ou pour le moins sur vn
 ruisseau, nommé le ruisseau du Chesne, là où
 nous enuoyâmes tout nostre bagage , mais
 ayans les Espagnols qui s'estoient aduancez ,
 pris la charge d'attaquer vn de nos regimens
 commandé par vn de Briquemaut , nommé
 Milleron, que le sieur de Guitry auoit amené
 avec luy , lequel s'estoit retranché à nostre
 main gauche à la teste d'un marais en vn lieu
 fort aduantageux, ledit de Milleron ne fit pas
 son deuoir, abandonnant son retranchement, les
 Espagnols suivis de cinq cens cheuaux , com-
 mandez par le sieur de Sauuas, General de la
 Caualerie du Duc de Sauoye, poursuiuirent les
 fuyards iusques bien pres du gros de nos Suif-
 ses, mais comme ils pensoient auoir tout ga-
 gné, ils poursuiuirent leur victoire si chaude-
 ment , que ledit Sauuas s'aduançant avec les
 cinq cens cheuaux qu'il auoit , se hazarda de
 passer par le trou d'une haye qu'il falloit pas-
 ser pour venir à nostre gros, ie le chargeay à
 demy passé, il voulut repasser , Sauuas y fut
 tué, le reste de la caualerie se renuersa sur les

gens de pied, nous en eûmes bon marché, il y fut tué quinze cens hommes sur la place, tant Espagnols que Napolitains, qui auoient en mesme temps attaqué le retranchement de nostre main droite, qui estoit gardé par quatre cens hommes de pied commandez par le sieur de Rumont, qui les soustint courageusement. L'effroy fut si grand dans le gros de l'armée des ennemis, que si la nuit ne nous eust separé, ie croy que la victoire nous fût demeurée toute entiere, ils firent des feux en leur camp, à la faueur desquels ils se retirerent toute la nuit, & mirent deux riuieres entr'eux & nous, n'ayans plus de dessein de nous venir taster. Ce fut le dixiesme iour de Mars quatre vingts-vnze. Le Roy me fit en ce temps là l'honneur de m'écrire, que ie luy auois fait plus de seruice d'auoir rallumé la guerre en Sauoye que ie ne pensois : & pour me le faire voir m'enuoya la copie d'une depesche du Duc de Parme qu'il auoit surprise, par laquelle il mandoit au Roy d'Espagne qu'ayans les forces qu'il attendoit pour le rafraischissement de son armée, esté arrestées en Sauoye par le nouveau remuement que le sieur de Sancy y auoit fait, ; il estoit contraint, apres la prise de Corbeil, de se retirer au Pais-Bas, parce que ses forces estoient fort diminuées, tant audit siege de Corbeil qu'en tout le voyage qu'il auoit fait. Nous nous fussions sans douter engus lors maistres de toute la Sauoye, si nous eussions eu de l'argent pour soudoyer ce que nous auions de troupes, mais comme i'y eus despensé les cinquante mille

escus que i'auois pris sur les ennemis, & cinquante mille autres que Henry Balbany me presta lors sur mes bagues, nous fumes contrains de nous en reuenir, & arriua qu'en mesme temps le Marschal d'Aumont, qui auoit assiegé Chastelchinon nous enuoya semondre de le secourir. Nous fumes bien-aises d'auoir ce sujet de sortir de Sauoye, parce qu'aussi bien n'auions nous pas moyen d'y subsister, car il ne nous restoit aucun argent. Nous passames ensemble le sieur de Guitry & moy par le Comté, & en cinq ou six iours nous rendismes à S. Iean de Laune. Le sieur de Guitry avec ce que nous auions de Caualerie qui pouuoit faire en six Cornettes trois cens cheuaux, tant François qu'Albanois, alla trouuer le Marschal d'Aumont, & Monsieur de Neuers, qui furent fort réjoüys de ce secours, sans lequel Monsieur de Nemours, & les forces de Bourgogne les eussent contrains de leuer le siege: Quant à moy ie m'en allay avec nos Suisses, & nos gens de pied François à Pontallier sur Saune, là où ie rencontray le feu Baron de Senecey sur le bout du Pont qu'il commençoit à ruiner, mais il se retira à mon arriuée, qui me fut vn tres-grand bien pour y rafraischir nos troupes, & y attendre le retour de nostre Caualerie. Le Marschal d'Aumont ayant pris Chastelchinon qu'il prit le mesme iour que ledit sieur de Guitry fut arriué auprès de luy, vint incontinent en Bourgogne, où ie l'allay trouuer avec ce que i'auois de Suisses & de François: ie le rencontray à Arneleduc, là où il resolut le siege d'Autun.

auquel ie ne me voulus point engager ; ie luy laissay mesdits Suisses & gens de pied François : le sieur de Guित्रy y demeura avec ce qui estoit de ses troupes : quant à moy ie m'acheminay avec cent bons cheuaux pour venir trouuer le Roy que ie rencontray à Villepreux, au retour du voyage qu'il auoit fait en Picardie pendant que le Marechal de Biron auoit assiegé le Chasteau de Dourdam, lequel siege auoit esté entrepris pour faire viure & rafraischir l'armée apres le siege de Chartres. Le Roy s'en alla dés le lendemain à Mantc, où il estoit bien empesché de ses Suisses, parce que comme ils estoient cinquante compagnies qui prenoient cens cinquante écus de preit la semaine, qui n'estoit que le tiers de leur solde, il n'auoit pas moyen de leur continuer, & eux refusoient seruir s'ils n'auoient leurs prests. I'entrepris de les reformer, & qu'en les reduisant à vingt enseignes de deux cens hommes chacune, le Roy ne perdroit point cinq cens hommes, & les prests diminueroient plus des deux tiers. Il fut question de compter avec eux, & les contenter du passé : nous n'auions point d'argent pour ce faire : toutefois par la vente de quelque domaine de Nauarre que Monsieur du Plessis fit à Saumur, & de l'obligation que les principaux seruiteurs du Roy leur firent, nous renuoyasmes trente enseignes au pais, & mesmes ce qui nous resta, qui estoit enuiron de quatre mille Suisses, en train de seruir. Le Roy fut aussi content de ce seruice que ie luy rendis en cette occasion, comme plusieurs, & entre autres

Monsieur le Chancelier de Chiuerny qui s'obligerent mal-volontiers , en furent faschez. Dès cette heure-là le Roy ne voulut point que ie le perdisse de veüe, se persuadant que ie luy ferois plus vtile aupres de sa personne qu'en nul autre lieu, & me fit l'honneur de me confier tous ses plus secrets & importants desseins. Le Roy s'en alla de là au siege de Noyon, & de là au deuant de ses Reistres, que Monsieur de Bouillon , que l'on appelloit lors Vicomte de Turenne, conduisoit. De là nous vinsmes au siege de Roüen , cette grande armée estrangere ny ce siege ne succederent point. Et comme le Roy ayant quitté le siege de Roüen fut à Gisors, il eut aduis que les Espagnols qui estoient en Bretagne , faisoient vn fort à l'entrée du haut de Brest, en vn lieu nommé Crozon. Que s'ils acheuoient ledit fort, ils se rendroient maistres de Brest , qui seroit la perte de tout ce que le Roy auoit en cette prouince. Le Roy fut conseillé d'enuoyer vers le Reyne d'Angleterre , la supplier d'y enuoyer 5000. hommes de guerre, lesquels joints avec les forces que le Mareschal d'Aumont y auoit, empêchassent la perfection du fort, ou le prissent sur les ennemis s'il estoit déjà en defense. On proposa plusieurs Seigneurs du Roy pour y aller, l'on parla aussi de moy : mais le Roy croyant que mon seruice luy estoit plus vtile qu'en effect il n'estoit , ne me vouloit point éloigner. Enfin toutcfois persuadé par l'Ambassadeur d'Angleterre, qui estoit aupres de luy , il me commanda d'y aller. I'obtins en quinze iours tout ce que ie demanday à la Reine , le Co-

lonnel Noris y fut enuoyé avec 5000. Anglois : les Historiens escriuent le succez de ce siege , & la prise de cette place. Pendant mon abience les Reiltres se retirerent. Le Roy qui les auoit conduits iusques aupres d'Espernay, assiegea & prit cette place à la faueur de leur retraicte. Delà alla assieger Prouins, où ie le trouuay & luy rendis compte de mon voyage. Nous vinsmes de là bastir le fort de Gournay, là où il se ietta plusieurs propos de paix, mais avec peu de fruit. En mesme temps s'esleua le tiers party. Le Roy me fit cet honneur de me communiquer le ressentiment qu'il en auoit, & puis dire que i'arrestay beaucoup de violentes propositions qui se firent sur ce suiet, il se disposa de se faire Catholique, & est vray que ie seruis à luy en faire prendre la resolution autant qu'homme de ce Royaume. Enfin il fit profession de foy à saint Denis. Les propos de paix qui auoient esté iettez engendrerent en mesme temps vne trefue generale , pendant laquelle il se fit diuerses assemblées pour paruenir à la paix. Le Roy deputa les sieurs de Belieure, de Schomberg, & moy avec eux pour en traicter , il me confia ce qui estoit de sa volonté. Diuers particuliers las de la guerre preuoyans bien qu'elle ne pouuoit enfin apporter que de la desolation pour le Royaume, & de la ruine pour tous les particuliers, se laisserent entendre que souz hōnestes conditions ils reconnoistroient le Roy. Sa Majesté remit la conduite de tous ces traictez entre mes mains, excepté celuy de Roüen & du Havre, que les sieurs

Desportes & du Perron firent adresser à Monsieur de Rosny, & me puis vanter que nous (horsmis l'Admiral de Villars) sont retournez par mon entremise au service du Roy. Meaux commandée par le sieur de Vitry commença, & se declara pour le Roy le premier iour de l'an 1594. Lyon suivit, Orleans & puis Paris, chacun sçait la suite & l'importance de cette réduction. J'eus l'honneur de commander ce iour-là à cent Gentils-hommes qui entrèrent en la dite ville les premiers, apres le sieur de S. Luc, M. le Marechal de Brissac en peut rendre témoignage. M. le Duc de Mayenne qui estoit sorty de Paris, pour aller sur la frontiere de Picardie, afin d'asseurer à luy quelques places qu'il pensoit n'estre pas bien à sa devotion, se trouva à Laon quand il eut la nouvelle de la réduction de Paris en l'obeïssance du Roy, qui l'étonna fort, & n'eut autre recours qu'aux forces d'Espagne qui estoient aux Pais-Bas. Apres avoir donc changé la garnison qui estoit dans Laon, & y avoir estably vn nouveau Gouverneur, il s'en alla trouver le Comte Charles qui avoit lors le gouvernement des Pais-Bas, avec lequel il resoiut que pour releuer le courage à ceux de son party, & empêcher que les villes de Picardie, qui toutes branloient, ne suivissent l'exéple de Paris, il estoit necessaire de se mettre en campagne & assieger quelques places de celles qui tenoient pour le service du Roy sur cette frontiere. Ils resolurent d'assieger la Cappelie qui avoit quelque reputation, & estoit si éloignée de tout ce que le Roy tenoit en ces quartiers là, qu'ils la prendroient devant que le

Roy y pult arriuer pour la secourir. Le Roy estoit à S. Germain en Laye faisant vne diette quand il eut cette nouuelle, il manda incontinent toutes ses troupes, & escriuit à sa Noble Ie de toutes parts, les coniuant de l'assister pour aller leuer le siege, & donna le rendés-vous à Compiègne, où il s'achemina incontinent, cessant pour cet effet sa diette, & s'y rendit le 25. de May : mais à deux iournées de là il eut auis que ceux de la Capelle auoient capitulé : il s'auança en la plus grande diligence qui luy fut possible, pour se faire voir à ceux de dedans deuant qu'ils se rendissent, pour leur donner courage de tenir plus longuement : mais en vain, le iour qu'il arriua à la Capelle ses gens en estoient sortis : les ennemis le receurent à coups de canon, & ne sortirent iamais de leurs tranchées. Le Roy craignant que la prise de cette place ne fust suiue de plusieurs autres, & que les grandes villes de Picardie ne fussent diuerties de se mettre sous son obeïssance, si par vne armée il ne s'opposoit aux progrès que pouuoit faire l'ennemy, il se resolut de s'attacher à quelque entreprise qui pût retenir le reste de l'Esté quatorze ou quinze cens Gentils-hommes qui estoient accourus à luy pour le secours de la Capelle. Il resolut donc d'assiéger la ville de Laon forte d'assiette, & en laquelle il y auoit bon nombre de gens de guerre, ceux qui estoient sortis de Paris s'y estant retirés, & qui pouuoit pour ce tenir longuement, pendant lequel temps il retiendrait toute cette Noblesse qu'il auoit auprès

de foy , iugeant qu'ils auroient honte de l'abandonner , le voyant attaché à cette entreprise , qui sans doute feroit venir les ennemis à quelque combat pour la secourir. La chose luy succeda selon son dessein, parce que les ennemis le voyant avec cette troupe de Noblesse si proche d'eux n'entreprendrent rien sur ce qu'il auoit de places. Monsieur de Mayenne avec le Comte Charles se resolut de secourir Laon , & prenant vn matin son chemin par vne grande laye de la forest de la Fere , se vint rendre en vn village dont ie ne sçay le nom , qui est au bout de ladite forest , & au pied d'une coline qui void toute cette plaine , qui est au dessous de Laon , il n'estoit qu'à deux petites lieuës de la ville, il la voyoit , & en pouoit estre aisement veu , il se retrancha audit village , & y fit camper toute son armée avec dessein de s'auancer à la premiere occasion vers la ville, ou d'entreprendre sur nostre armée qui estoit separée en diuers logemens. Le Roy estoit allé à S. Lambert , & estoit hors de l'armée lors que le Duc de Mayenne arriua , ie me trouuay au logis du Roy Cerny à demy lieuë du lieu où ledit Duc s'estoit campé. I'assemblay promptement nos Suisses que ie mis en bataille pour m'opposer audit Duc de Mayenne s'il vouloit passer plus outre vers Laon. Les sieurs de Vicq & de S. Denis Mailloc se ioignirent incontinent à moy , Monsieur de Neuers y vint bien tost apres , puis le Roy y arriua , qui loua grandement le deuoir que i'auois fait d'opposer les Suisses au passage dudit Duc ,

lequel neantmoins n'entreprit jamais de passer, ou son intention estoit de tant harasser le Roy, qu'il le fit reculer vers la ville, mais le Roy le voyant arresté en ce lieu sans passer outre, se promit que par famine il le chasseroit luy mesme de là, & ayant eu auis qu'il ne viuoit que des viures qu'il faisoit venir tous les iours de la Fere avec conuoy, se resolut de luy en couper chemin. Ayant donc vn iour eu auis qu'il auoit enuoyé douze ou treize cens hommes à la Fere pour luy amener quantité de viures dont il commençoit d'auoir grande faute, le Roy proposa au Mareschal de Biron d'aller attendre dans la forest le retour de ce conuoy, iugeant que si nous le pouuions deffaire, le Duc seroit contraint de se retirer, le Mareschal s'offrit luy mesme d'aller executer cette entreprise. Il choisit six cens hommes de pied dans toutes les troupes du Roy & cent Gentils-hommes qui se mirent à pied pour l'y accompagner : il desira estre assisté des Suisses, i'en choisit par toutes les compagnies six cens cinquante, dont ie m'assurois bien pour cette execution. Nous partismes de l'armée sur le soir, & arriuasmes à l'entrée de la nuit dans la forest, le Mareschal de Biron mit toute la troupe le long de cette grande Laye qui va, comme i'ay dit cy-dessus, de la Fere à Laon : l'embuscade tenoit pres d'une demye lieüe, il prit à commander la teste qui regardoit la Fere, & me donna à commander celle qui regardoit Laon, ou pour mieux dire, le camp des ennemis, les vns n'estoient point à vne lieüe de la Fere,

les autres à vne lieüe du camp de Monsieur de Mayenne. Le matin les Espagnols ayant eu auis qu'il y auoit des gens du Roy en la forest, estant ia sortis rentrerent dans la ville, ils en firent encore autant à midy, enfin la necessité en laquelle ils sçauoient qu'estoit leur armée, les fit resoudre de passer outre, se persuadant que ce qui estoit dans la forest n'estoient que des voleurs & qu'ils passeroient malgré eux & les tailleroient en pieces : les guettes qui estoient sur les plus hauts arbres de la forest, & qui depuis le matin auoient desia assuré par deux fois que les ennemis venoient, l'assurerent cette fois plus opiniastrement que iamais : le Mareschal qui auoit desia deux fois esté trompé par eux, ne le pût croire, il se leua de son embuscade avec huit ou dix, & s'auança sur le chemin des ennemis pour en apprendre des nouuelles. Or est-il besoin de sçauoir qu'il auroit resolu de laisser auancer les ennemis dans cette grande laye de la forest, qui estoit vn chemin fort creux, derriere lequel nous estions embusquez, & m'auoit deffendu de me leuer de l'embuscade que ie ne les sentisse fort proche de moy, promettant qu'à mesme instant que ie commencerois le combat, il les prendroit par la queue & par les flancs, & que rien n'en eschapperoit : Mais ledit sieur Mareschal s'estant leué par trop de chaleur & d'impatience hors de son embuscade, fut apperceu de douze ou quinze cheuaux que les ennemis auoient iettez deuant eux, qui le poursuiurent & presserent si fort qu'il fut contraint de rendre combat avec

sept ou huit qu'il auoit auprès de luy, la plupart furent tuez, d'autres vindrent à son secours, le gros des Espagnols y arriua, toutes ces petites troupes qui combattirent les vnes apres les autres auprès dudit sieur Marechal, furent deffaites. Quant à moy qui estois au bout de l'embuscade bien loin du lieu où ces petits combats se rendoient, j'entendois le bruit des harquebusades, & vis bien qu'il ne falloit pas attendre que les ennemis fussent si près de moy pour aller à eux, & secourir nos François. Je mis donc mes Suisses en bataille, je rangeay deux cens mousquetaires que j'auois avec moy sur les deux rideaux de ce chemin creux, les vns à la main droite, & les autres à la gauche, & avec les picquiers je me mis dans le chemin creux dans lequel ne pouuoient combattre plus de cinq hommes de front, & marchant en cet ordre sans que les mousquetaires s'auançassent plus de dix pas dauant nous, je cheminay vers les ennemis sans faire sonner les tambours iusques à ce que par la voix que nous entendions je iugeay que nous n'en pouuions pas estre à plus de deux cens pas, car encore que cette laye soit assez droite, si ne l'est-elle pas tant qu'il n'y ait diuerses rondes de cent pas en cent pas ou enuiron, qui empeschent de s'entrevoir. Me sentant donc assez près des ennemis qui faisoient retentir cette forest de cris, comme s'ils eussent tout gagné, je fis sonner vingt deux tambours que j'auois auprès de moy, qui firent esclater de bruit toute cette forest, le Marechal de Biron qui estoit esgaré dans la

forest vint à moy au bruit de ces tambours, & me disant qu'il y faisoit bien chaud, me dit que ie iettasse huit ou dix hommes deuant moy, car i'estois à la teste de la troupe : ie luy dis, que le premier qui s'y mettroit ie luy donneroie de ma picque dans les reins, il m'embrassa & me baigna toute la iouë de l'armes de ioye tant il fut aise de nous voir si resolu. A cinquante pas de là nous entraîmes dans le combat : les ennemis s'estonnerent tellement du bruit de nos tambours, & du bon ordre dont ils nous virent venir à eux, parce qu'en mesme temps ils se sentoient attaquer de nos mousquetaires qui les tiroient de dix pas de haut en bas, & de nous qui les pressions de nos picques, qu'ils ne firent que fort peu de résistance. Nous leur tuâmes en moins de cinq cens pas plus de sept cens hommes, le reste s'enfuit en grand desordre à la Fere, nous prîmes tous leurs viures & bruslâmes les poudres qu'ils faisoient conduire en leur armée. Le Roy eut à dix heures du soir nouvelles de cette deffaite, & en fit faire des feux de ioye par son armée. Le sieur de saint Luc se trouua lors par hazard parlant avec le Comte Charles, avec lequel il auoit amitié, parce qu'ils auoient tous deux espousé les sœurs de Monsieur le Marechal de Brissac : ledit sieur Comte Charles demanda au sieur de saint Luc que vouloient dire ces feux & ces resiouissances qui se faisoient au camp du Roy, lequel luy dit que c'estoit pour le conuoy qui auoit esté deffaite : le Comte Charles respondit qu'il n'en croyoit rien, & que les trou-

pes qui estoient en ce conuoy estoient bastantes pour combattre la moitié de l'armée du Roy, & que c'estoient tous soldats choisis parmy les compagnies de toutes nations : Neantmoins il rompit son discours avec ledit sieur de saint Luc, prit congé de luy, & se retira dans son camp, & demie heure après qu'il y fut, ils se mirent en chemin pour se retirer toute la nuit, l'effroy fut si grand que passant par le chemin où le combat s'estoit fait ils ne se donnerent pas le loisir de retirer à quartier les corps de leurs morts, ains passant tout leur charroy & leur artillerie par dessus ils les froissèrent tous. Le Mareschal de Biron rapportant au Roy ce qui s'estoit passé en ce combat ne me desroba rien de l'honneur que i'y pouuois auoir acquis, les sieurs de Clermont, d'Amboise & de la Curée, qui y fut blessé d'une grande harquebusade au bras, en peuuent encore parler, le Roy en donna auis aux Gouverneurs & principales villes des Prouinces & à ses Cours souueraines, afin qu'ils en rendissent graces à Dieu, & luy pleut par ses lettres tesmoigner le service qu'il auoir receu de moy en cette expedition, peu de iours après la ville se rendit, dont les Historiens escriuent les particularitez. Cela fait le Roy ayant logé son armée dedans les garnisons & licencié sa Noblesse, s'approcha de la ville d'Amiens avec cinq ou six cens cheuaux, laquelle avec la ville d'Abbeuille se remirent en son obeïssance par l'exemple de Laon. Ce fut tout ce qui se fit le reste de l'année 1594. au commencement de l'année suivante le
Ma-

Mareschal de Biron conduisit l'armée en Bourgogne pour fauoriser la bonne volonté de quelques villes qui monstroient desirer se remettre en leur deuoir : la ville de Beaune en fit la planche qui ouurit ses portes audit Mareschal : le Chasteau tint quelque temps , lequel neantmoins apres auoir enduré quelques coups de canon se rendit : ledit sieur Mareschal manda au Roy qu'il en esperoit autant de Dijon dans peu de temps , mais que si sa Maiesté ne s'y acheminoit en diligence , ces pauvres gens qui auoient plus d'affection , que de discretion , se perdroient , parce que l'armée du Connestable de Castille qui estoit à Gié à neuf lieuës de Dijon , ne faudroit point d'y accourir , à laquelle il n'auoit pas moyen de resister s'il n'estoit secouru de la presence du Roy , qui se resolut de s'y acheminer le plus diligemment qui luy seroit possible , & alla à Troyes avec quelques Suisses, le Regiment de ses gardes , & mille ou douze cens cheuaux, où il attendoit encore quelques troupes qu'il auoit mandées de Normandie, mais deux iours apres qu'il se fut retiré à Troyes il eut auis par vn homme que le Mareschal de Biron luy auoit depesché en diligence, que le Maire de Dijon auoit ouuert les portes audit sieur Mareschal, coniurant le Roy de s'y en venir avec sa cauallerie le plus diligemment qu'il pourroit : le Roy s'y achemina dès le lendemain avec huit ou neuf cens cheuaux , & en deux iours & demy se rendit à Dijon, commandant que le reste de l'armée avec l'artillerie , suiuiſt le plûtoſt que faire se

pourroit : ils arriuerent trois iours apres le Roy , lequel si tost qu'il fut arriué se delibera selon sa coustume d'aller visiter les ennemis pour se faire voir à eux , les intimider & leur faire perdre la volonté de venir secourir le Chasteau de Dijon. Il les trouua acheminez pour y venir, parce que le sieur Duc de Mayenne leur auoit celé l'arrinée du Roy, & les alla chercher si loin que rien ne le sauua ce iour là que son courage & le grand iugement qu'il auoit le cul sur la selle en présence des ennemis ; ce fut le combat de Fontaine François tant célébré par les Historiens du temps. Apres ce combat , rien ne s'opposa plus au siege du Chasteau de Dijon , qui peu de iours apres fut rendu en l'obeissance du Roy. Pendant ce siege le Roy m'enuoya à Lyon pour luy faire venir cent mille escus que le grand Duc luy fit fournir pour payer son armée. I'eus grand peine à les luy apporter , parce que c'estoit toute monnoye, & la pluspart douzains ; cette somme estoit sur dix-sept charrettes , Monsieur de Mayenne estoit à Chaalons sur le milieu de nostre chemin avec quinze cens ou deux mille hommes de pied & plus de six cens cheuaux qui peu de iours auparauant auoient deffait deux compagnies de cheuaux legers de Monsieur le Connestable venans trouuer le Roy, & se promettoient bien auoir leur bonne part de cét argent, car ils sçauoient de nos nouuelles à toutes heures , & estoit impossible que ie leur peusse cacher mon passage , venant de Lyon, car il me falloit passer à vne lieüe d'eux, neantmoins estant dés les dix

heures du matin arriué à Tournus, & y ayant seiourné tout le iour, ie me saisis le soir des clefs des portes : i'enuoyay tirer la nuit des coups de pistolet à la porte de Chaalons: i'enuoyay aussi vingt cheuaux vers Clugny, pour leur faire croire que ie voulois prendre ce chemin là, & toute la nuit ie fis passer la Saosne à la compagnie du sieur de Bouteon, celle du sieur de Vaugrenan & celle du sieur de Varenne & deux autres compagnies que le Roy auoit ordonnées pour mon escorte, & enuiron deux cens hommes de pied de la garnison de Mascon & de Louans petite place que le Roy tenoit en la Bresse Françoise. Et ayant la nuit enuoyé aux faux-bourgs saint Laurent de Chaalons pour descouurir si les forces dudit sieur Duc de Mayenne n'estoient point de là la Saosne, ie pris mon chemin dès les trois heures du matin par la Bresse avec toutes mes charrettes, i'estois à six heures à demie lieue de Chaalons. Monsieur de Mayenne eut nouuelles sur les neuf heures de mon passage, à ce qu'il me dit depuis, mais ie fis si bonne diligence que i'arriuay avec ce lourd bagage à soleil couchant à Authume, Chasteau qui tenoit pour le Roy en la Bresse Françoise situé sur la riuiera du Dou. Le lendemain i'allay doucement à saint Iean de Laune, & le iour suiuant à Auxonne, où estoit le Roy fort en peine de moy & de son argent, & fut fort content de nostre arriuée. Peu de iours apres il s'achemina vers le Comté que le Mareschal de Biron se persuadoit estre vne nouuelle Inde, & qu'il y feroit vn grand

butin. Ce dessein nous y porta contre toute raison , tant la necessité estoit grande parmy nous. Le Roy assiegea Pesme petite ville sur la riuere de Loignon , qui endura quelque volée de canon , puis se rendit. Le Marechal de Biron persuadoit au Roy de passer la riuere du Dou , pour s'acheminant à Lyon faire viure grassement son armée. Je reconnoissois le pays pour y auoir passé plusieurs fois , & dis au Roy que s'il passoit ladite riuere sans s'assurer d'une place qui luy donnast moyen de repasser quand il voudroit , il se mettroit en danger de faire mourir son armée de faim , parce que la riuere de Laloy qui se vient rendre entre Dole & Bezançon dans celle du Dou , luy osteroit toute communication avec les villes qu'il auoit sur la riuere de Saône. Je luy proposois deuant que passer ladite riuere , d'attaquer les Châteaux de Ranchot & Dorchan , esquels il y a des ponts sur ladite riuere , ou d'attaquer Bezançon qu'il prendroit avec moins de six cens coups de canon , quelque garnison qui fut dedans , parce que la place ne vaut du tout rien : Mais en ce mesme temps le Marquis de Brandebourg & le Duc de Vvitemberg auoient recommencé la guerre dans l'Euesché de Strasbourg contre Monsieur de Lorraine , qui craignant que ce feu s'espandist plus auant enuoya le sieur de Melay Marechal de Lorraine vers le Roy pour le supplier de m'y enuoyer , ce que sa Majesté ne vouloit faire , mais s'en sentant fort pressé par ledit sieur Duc qui y enuoya diuers cour-

riers l'un apres l'autre , il me commanda d'y aller , cependant le Roy pourſuiuit ſon chemin par le Comté & ayant tiré quelque argent de la ville de Bezançon paſſa la riuere du Dou ſans ſ'aſſeurer d'aucun pont , dont il receut beaucoup d'incommodité , & ſe ſouuint bien de ce que ie luy en auois dit deuant que de partir. Je ne fus pas ſi toſt arriué en Lorraine que nous euſmes la nouvelle de la deffaite de Dourlans , puis celle de la priſe du Chasteau : & preuoyant bien que ces deſaſtres apporteroient du deſordre en la frontiere de Picardie , & qu'elle auroit grand beſoin de ſecours , ie haſtay l'accord entre les Princes , en telle ſorte qu'en quinze iours ie l'acheuay , & comme ils auoient des deux coſtez leué des troupes les vns contre les autres , ie choiſis les meilleurs hommes de toutes leſdites troupes , & en compoſay vn Regiment de quatorze enſeignes , dont ie donnay la charge au Comte Ebichard de Solins , Seigneur d'auiſi grande eſperance qu'il y en eut en Allemagne , & me reſolus (ſans en auoir charge ny commandement du Roy ,) d'amener ledit Regiment en Picardie , & fis en ſorte que le Duc de Vvitemberg & la ville de Straſbourg aduancerent leur ſolde pour trois mois , car ie preuoyois bien que nous n'aurions pas moins faute d'argent que d'hommes. Eſtant le dix huiſt Septembre arriué avec ledit Regiment au neuf Chasteau , ville de Lorraine i'eus nouvelle du ſiege de Cambray , & receus de feu Monsieur de Neuers qui me con-

H ;

uioit de me haster pour le secours de cette place , m'assurant qu'avec ce Regiment & ce qu'il pourroit tirer des forces tant de Picardie, Champagne, que Normandie, nous acquerriens de l'honneur, & ferions leuer le siege de Cambray : ie me hastois tant qu'il m'estoit possible, mais passant la riuere d'Ayne au Neuf-Chastel en Thierache, qui n'est pas a trois iournées de Cambray, i'eus aduis le 18. Octobre que la ville & citadelle estoient renduës, qui me fit vn peu sciouner en ces quartiers là, en attendant les commandemens, du Roy, qui me manda de Lyon que ie m'allasse ioincre au Marechal de Retz qui ramassoit en Picardie le reste de l'armée au Comté, & que nous allassions inuestir la ville de la Fere ; nous l'inuestismes le iour de Toussaints de l'an 1595. Je pris la charge de me loger au faux-bourgs de Butot qui est le plus proche logis de la ville : les ennemis y mirent le feu li tost qu'ils nous en virent approcher, mais nous l'estaignismes malgré eux, & nous y logeasmes. Il y eut vne grande escarmouche au passage d'un petit ruisseau qu'il nous falloit passer pour y aller, où le pauvre Comte de Solins fut blessé d'un harquebusade à la cuisse, dont il mourut depuis. Le Roy y arriua quatre ou cinq iours apres qui trouua ce Regiment fort beau comme il estoit, c'estoient tous soldats choisis, & tous les Capitaines Gentils-hommes : il n'est point entré vn plus beau Regiment de Lansquenets en ce Royaume durant toutes ces guerres. Pendant que le Roy prenoit son

chemin par le Comté de Bourgogne, s'en allant à Lyon, là où les affaires de sa Majesté l'appelloient, Monsieur le Duc de Mayenne fit son appointment avec sa Majesté, de si bonne façon que renonçant à toutes les intelligences qu'il pouvoit auoir dehors, il ne respira jamais depuis que le service du Roy, & le bien du Royaume, qui certes luy a cette obligation, qu'il s'est toujours opposé au démembrement d'iceluy, & ce en plusieurs occasions que j'ay sceües d'autres que de luy, mais qui ne sont pas de ce suiet. La Duchesse de Beaufort fit ce qu'elle pût pour l'engager par son traité au dessein qu'elle auoit d'espouser le Roy, & en furent faites diuerses propositions que sa Majesté me fit l'honneur de me communiquer vn iour ou deux apres qu'il fut arriué en son camp deuant la Fere, durant lequel le Roy me parla deux fois du dessein qu'il auoit de l'espouser; mais comme en toutes mes actions precedentes j'auois bien fait paroistre que ie n'auois autre but ny visée que son service, encore que ie considerasse bien que l'amour qu'il portoit à cette femme luy feroit mettre sous le pied tous mes seruites, j'aimay mieux hazarder de perdre tout que de manquer à cette occasion à ce que ie pensois estre du deuoir d'un homme de bien, de l'honneur de mon maistre, & du salut de ma patrie. Je luy fis sentir deslors ce que j'en pensois, & luy dis que luy & elle estoient tous deux mariez, & qu'il falloit regarder les moyens de dissoudre leur mariage deuant que de penser à autre chose. Mais il aduint le mois

de Feurier ensuiuant, que le Roy allant de son camp à Compiègne pour renoüer le mariage d'entre M. le Duc de Montpensier & Madame sa sœur, sa Majesté se mit en carosse avec la dite Duchesse & ledit sieur de Montpensier, il voulut que ie fusse de la partie, & n'y eust que nous quatre dans le carosse. Entre Chauny & Noyon elle entama vn propos de bastards, & dit qu'il n'y auoit rien si aisé que de les rendre legitimes, & qu'il ne les falloit que mettre sous labrifol: I'eus opinion qu'elle ne s'estoit mise sur ce discours que pour faire voir au Roy que si i'auois la hardiesse de parler à sa Majesté franchement sur ce sujet en son absence, ie n'oserois le faire en sa presence, & que surce elle diroit au Roy que puis qu'elle auoit assez de puissance pour me faire taire, il le deuoit bien faire par son autorité: mais elle se trompa, car ie luy respondis sans aucun respect ce que ie pensay estre de la raison, & de mon deuoir pour l'empescher de plus penser en cela. Elle s'en trouua estonnée, & estant sans masque, elle le mit promptement. Je ne diray point la responce que ie fis pour l'honneur que ie porte aux enfans qu'elle a laissez, que le Roy luy fait l'honneur d'auoüer, m'estant la memoire de ce grand Prince si venerable que i'honoraray toute ma vie ce qui s'auoüera de luy. Le Roy à cinq cens pas de là, n'estant qu'à vne lieuë de Noyon, demanda son cheual, ne voulant pas entrer en carosse dans la ville: Je l'accompagnay, M. de Montpensier demoura avec elle, auquel elle fit de grandes plaintes de la hardiesse que i'auois eüe de luy respon-

dre si vertement deuant le Roy, lequel arriua vn quart d'heure deuant elle dans la ville. Quand elle arriua il l'alla receuoir en bas en la cour, & monterent ensemble en la chambre, Monsieur de Montpensier demeura en bas attendant que le Roy demandast sa viande. Il me dit que cette femme estoit grandement offencée contre moy, mais qu'il ne pouuoit qu'il ne loüast le courage que i'auois de m'opposer à son dessein, qui seroit la ruine du Roy & du Royaume; que tous les Princes & les grands m'estoient grandement obligez, puis que i'estois seul qui m'opposois à ce mal-heur. Je luy fis responce qu'encore que outre la qualité de Prince du Sang ie fusse en particulier son tres-humble seruiteur, comme il le sçauoit, il ne me deuoit point sçauoir de gré de ce que ie faisois en ce suiet, parce que sa consideration ny celle des autres Princes ne me le faisoit pas faire. Que luy & les autres Princes de sa qualité estoient cause de la hardiesse qu'elle auoit d'entreprendre si haut, parce que luy & les autres luy presentent la seruiette, & luy faisoient la soubmission qu'ils pourroient faire à la Reine. Qu'il me seroit plus pardonnable à moy qui estois pauvre Gentil-homme, de m'accommoder au temps, & flechir sous les volontez de mon maistre, que non pas à eux. Que ie voyois bien que la resistance que i'y apportois me mettoit en danger de me ruiner du tout aupres du Roy, mais que i'auois l'honneur de mon maistre & le bien de ce Royaume en telle consideration que quelque danger qu'il y eust en cette occasion, ie ferois ce

H,

qui estoit du denoir d'un homme de bien. Le sieur de la Chénaye qui vit encore, en peut rendre tesmoignage. Ce discours fut aussi-tost rapporté au Roy, qui compensant ce que j'auois dit audit Seigneur, avec les propos que j'auois tenus à sa maistresse, m'appella incontinent qu'il eut dîné, & me dit qu'il sçauoit bien quelle estoit la sincerité de mon affection à son service, & prenoit de bonne part ce que ie luy disois, mais trouuoit mauuais que ie luy disse en la presence de sa maistresse, me commandant de m'en abstenir à l'auenir, comme ie fis tousiours depuis. L'auis que nous eumes peu apres, que les Espagnols alloient attaquer Calais, refroidit tout ce discours de mariage. Le Roy se resolut de m'enuoyer en diligence en Angleterre prier la Reyne faire auancer l'armée qu'elle auoit toute prestee à Douvre pour l'entreprise de Calais, & la faire paroistre deuant Calais, estimant qu'à la veüe de cette armée qui estoit de quinze ou seize mille hommes, celle d'Espagne quitteroit ce dessein, comme elle eust fait sans doute, si l'autre s'y fût aussi promptement présentée comme elle en auoit le moyen, car l'armée estoit à l'anchre, & pouuoit en cinq heures faire l'effect que nous desirions d'elle, mais comme tous les Anglois ne desirent rien tant que de r'auoir Calais qu'ils ont si longuement possédé, la Reyne (qui d'ailleurs affectionnoit bien franchement l'establissement & le repos du Roy) fit paroistre cette passion si grande, que mettant à part la crainte qu'elle deuoit auoir que le Roy d'Espagne se fortifiast de ce Havre

qui estoit bien d'autre importance , & regardoit sa coste de plus pres que celuy de Dunkerque , me dit qu'elle feroit ce que ie demandois d'elle , & secourroit en effect Calais si nous le luy voulions abandonner, me demandant quel interest nous auions de le luy delaisser, puis qu'aussi bien il estoit perdu pour nous. I'estois fort versé en cette question par les demandes que le Duc Iean Cazimir m'auoit faites en cas semblable , comme i'ay dit cy dessus. Je luy dis donc qu'il estoit plus expedient pour le Roy que l'Espagnol le prît par force, que si le Roy le luy quittoit , pour les raisons susdites ; & aiousté que si les Espagnols le prenoient, nous esperions le reprendre sur eux, & si nous le luy auions quitté, nous ne scaurions par quel moyen le luy redemander, & quand nous le voudrions nous l'offencerions , & au lieu d'un ennemy nous en aurions deux. Elle ne me sceut dire autre chose , sinon , qu'elle ne croyoit pas que le Roy eust donné charge de luy faire telle response , ce que ie luy auouay , parce que le Roy n'eût iamais pensé qu'elle luy deust en son affliction faire vne telle demande. Elle enuoya à l'heure mesme le sieur de Sidue Gouverneur de Flessinghe vers le Roy, il le trouua le lendemain matin à Boulogne. I'enuoiay aussi toute la nuit auertir le Roy des demandes que la Reine m'auoit faites, & de mes responses. Il trouua le Roy fort offencé de cette demande, mais comme elle croyoit qu'il n'y auoit aucun lieu d'appointement entre le Roy & le Roy d'Espagne, elle n'en tint pas grand compte, s'assurant

bien que tant que la guerre dureroit entre ces
 deux Couronnes , elle iouyroit du repos aux
 despens des vns & des autres , & que nous au-
 rions tousiours plus affaire d'elle qu'elle de
 nous. Pendant ces allées & venuës, les Espa-
 gnols qui d'abordée auoient pris le Riche-
 ban, prirent la ville, & peu de iours apres la ci-
 tadelle : le Roy ayant perdu l'esperance de se-
 courir Calais se retira & laissa Monsieur de
 Vicq avec le plus de forces qu'il peut dans
 Boulogne, qu'il pensoit deuoir estre aussi-tost
 assiegé des ennemis. Ledit sieur de Vicq me
 fit incontinent sçauoir qu'ils auoient grande
 faute de poudres & d'argent pour faire trauail-
 ler aux fortifications. La Reine me bailla des
 poudres & vingt mille escus sur ma simple
 promesse , que i'y enuoiaï dès le lendemain.
 Les Espagnols apres la prise de Calais allerent
 attaquer Ardres qui ne fit pas grande résistan-
 ce. Le Roy craignoit que de là ils n'allaient à
 Montreuil, mais ils tournerent leurs forces vers
 le Comte Maurice & allerent attaquer la ville
 de Hulst. Cependant le Roy qui estoit retourné
 en son camp de la Fere, print la place par com-
 position, & me manda par Monsieur de Lome-
 nic, deuant que s'esloigner de Boulogne, que ie
 ne partiſſe pas si tost d'Angleterre, parce qu'il
 vouloit faire quelque nouveau traité avec la
 Reine. M. le Duc de Bouillon y arriua incon-
 tinent: nous traitasmes vne ligue offensive &
 deffensive entre les Royaumes de France &
 d'Angleterre , qui eut plus de reputation
 que d'effect ; & apres la conclusion de ce
 traité , ie reuins avec ledit sieur Duc.

de Bouillon trouver le Roy à Abbeville, là où il s'estoit acheminé apres avoir pris la Fere, de là nous reuinmes tous à Paris, environ le mois d'Aoust, où les propos de ce mariage se rallumerent plus que iamais. Et parce que i'auois dit au Roy pendant le siege de la Fere qu'il falloit aduiser aux moyens de dissoudre son mariage deuant que de commencer à se remarier; Il commanda qu'on tint vn conseil de dix ou douze de ses principaux seruiteurs tant de son Conseil que de son Parlement, pour ce sujet, auquel Monsieur de Bourges qui recherchoit la faueur, proposa, que les Euesques & la Cour de Parlement de Paris pouuoient dissoudre ce mariage, & remarier le Roy, puis que sa femme s'y accordoit. Que si nous ne prenions cette voye, iamais le Pape ne dissoudroit le mariage, & ne luy permettroit aucunement de se remarier, témoin l'exemple de Henry huitiesme Roy d'Angleterre: mais quand il seroit marié, il pardonneroit & ratifieroit la chose faicte. Je m'y opposay, comme chacun sçait, & dis, Que puis que l'on auoit iugé que la reconciliation avec le Pape estoit necessaire pour la seureté de la vie, & de l'Estat du Roy, & que le sieur du Perron à present Cardinal, estoit à Rome, & mandoit au Roy tous les iours qu'il esperoit au premier iour de luy donner satisfaction de ce costé-là: nous ne deuions point faire chose pardeça qui peut rompre le cours d'une si bonne affaire, comme il aduiendroit si nos Prelats de France entreprennent de dissoudre ce mariage de leur propre autorité sans le Pape.

Cette raison estoit si forte qu'elle les arresta tous. Quand la Duchesse & les siens virent que ce dessein leur auoit manqué, il leur en fut proposé vn autre, auquel toutefois le Roy ne donna jamais consentement, qui estoit d'oster l'obstacle qui empeschoit le Roy de se marier. La Reyne Marguerite auoit promis de venir à la Cour en ce temps-là; ses carrosses & ses liètières estoient déjà prestes, les brodeurs traualloient aux deuises que Madame de Retz leur auoit fournies: ladite Reine fut aduertie de ne se haster point de partir. Le Roy alla à Monceaux, & voulant auoir l'année suivante sa reuanche de Calais & Ardres que les Espagnols auoient pris sur luy, sa Maiesté nous commoda de rechercher les moyens d'auoir de l'argent pour soudoyer son armée, afin de la faire viure en discipline comme il estoit necessaire, ayant affaire à vn grand Prince qui payoit & tenoit la sienne en bon ordre. Il y auoit lors si peu d'argent és coffres du Roy, que moy qui auois la principale charge de l'ordre de ses finances, estois contraint de m'obliger & de prester tous les iours le mien, & celuy de mes amis, pour soulager la necessité des affaires de l'Estat. Et c'est ce qui m'a causé de faire ce discours pour le ressentiment que i'ay des grandes incommoditez que ces aduances & les interests que i'en ay soufferts m'ont apportez. Nous aduisâmes qu'il falloit tenir vne assemblée en forme d'Estats pour demander du secours aux prouinces. Le Roy escriuit par tout que l'on deputast des plus qualifiez pour

resoudre du fonds que ses sujets luy pourroient fournir en cette necessité : & par ce qu'il y avoit eu de la peste à Paris, le Roy conuoqua cette assemblée à Roüen, où chacun s'efforça de luy donner quelques moyens. Ce fut lors que sa Maïesté r'alluma plus viurement les propos de ce mariage, & me dit en particulier qu'il y estoit resolu. Je luy remonstray tout ce que ie peus pour l'en dissuader, tant par exemples que par raisons, & luy dis entre autres choses : Qu'il n'y avoit point d'apparence que cent mille Gentils-hommes, auxquels il commandoit & qui preferoient ce qui estoit de l'honneur à la vie & au bien, le peussent reconnoistre pour Roy quand il auroit fait cette faute : Que la reputation l'auoit esleué sur le throsne Royal, & qu'il en descherroit facilement s'il la perdoit. Sur ce il m'allegua les grandes obligations que tous ses sujets luy auoient, lesquelles les induiroient de recevoir pour heritiers du Royaume ceux qu'il leur presenteroit. Je respondis que pour cela ils ne le feroient point : Que les François honoroient ceux que les loix leur donnoient pour Roys : Qu'il en avoit vne bien ample preuve en sa personne pour les grands maux qu'il leur avoit veu supporter pour defendre la iustice de sa cause : Que Philippe Auguste n'estoit pas moins honoré & respecté en ce Royaume : & neantmoins pour avoir voulu entretenir vne femme de mauuaise vie, au preiudice de la femme sage & vertueuse, il avoit esté sur les termes de se voir dépoüillé de son Estat. Que ie n'apprehendois pas tant le mal & la

confusion qui seroit apres sa mort, comme ie craignois celuy qu'il sentiroit de son viuant, mesmes s'il faisoit chose qui pouuoit tant offencer tous les sujets, leur faisant voir le peu de soin qu'il auoit de leur repos. Que comme la grande preuue qu'il auoit renduë de sa vertu l'auoit fait honorer de ses sujets, & esleuer en l'estat où il estoit par la grace de Dieu, il seroit en vn mesme temps méprisé & hay, si en vne action de telle importance il faisoit chose indigne de toutes ses actions precedentes. Il ne s'offença point de tout ce que ie luy dis, mais il rapporta tout à sa maistresse qui iura ma ruine; elle n'auoit neantmoins iusques alors pouuoir de me faire mal, tant mon seruice estoit agreable à mon maistre. Cette Assemblée de Rouen estant finie, le Roy reuint à Paris, resolu d'aller faire ses Pasques à Amiens, où il auoit mis trente ou quarante canons, cent milliers de poudre, afin de se jeter au premier beau-temps dans le païs de son ennemy pour auoir sa reuanche de Calais, & Ardres, comme nous auons dit cy-dessus. Mais nous ne fusmes pas si tost à Paris que le Roy eut nouuelle de la prise d'Amiens, qui le mit & tous ses seruiteurs en grande peine, parce qu'il n'y auoit pas vn canon monté hors ce qui estoit dans Amiens. Le Mareschal de Biron y courut en diligence, & prenant le regiment des Gardes, celuy de Picardie qui estoit à Corbie, & és enuiron, & le regiment du Colonel Galaty qui y estoit aussi, il s'alla tout chaudement loger à Longpré, à moins d'une lieue d'Amiens, sur le chemin de Dourlans,

pour empescher la communication dudit Dourlans avec ceux de la ville, & s'opposer au renfort qu'on leur voudroit enuoyer. Les Historiens écriuent amplement les diuers combats qui s'y firent, ce qui m'empeschera d'en faire icy aucune mention. Si ne me puisje garder de dire que ledit Marechal y seruit fort bien, & aussi dignement qu'il se pouuoit souhaiter, & que c'est grand dommage qu'apres ce seruire, que j'estime qu'il ait iamais rendu au Roy, son mal-heur l'ait porté à vne si pitieuse fin. Le Roy alla luy mesme à Corbie, tous ses sujets le secoururent grandement en cette occasion. Il se resolut d'assiéger la place, & poser son camp delà la riuere de Somme, tous ses seruiteurs se disposerent à l'y seruir, mais nul ne crût que cette entreprise se pust exécuter sans vne bataille, parce que les ennemis auoient grande commodité de secourir la place, & n'y auoit riuere ny ruisseau qui les pust empescher de venir à nous. Preuoyant ce danger ie suppliy le Roy deuant que de m'y acheminer, de me donner des Commissaires pour verifier l'estat de ce qu'il me deuoit : Messieurs de Bellieure & de Sillery, qui tous deux sont depuis deuenus Chanceliers de France, furent deputez pour ce faire, avec Monsieur de Rosny qui commençoit d'auoir part dans les affaires du Roy. I'estois au siege d'Amiens aupres de sa Maiesté quand cét estat fut arresté, qui fut le 25. de Iuillet de l'an mil cinq cens nonante-sept. Je conduisois vne tranchée dont le Roy m'auoit donné charge, & arriuai le premier au pied de la muraille de

la ville, comme tous ceux qui estoient en ce siege en rendront tesmoignage : mais la riviere que les ennemis enflerent par leurs escluses, fit flotter nos gabions dans le foillé, & nous fit abandonner cette tranchée, & celle de Monsieur de saint Luc qui estoit proche de la miennne. Ce siege est amplement escrit par les Historiens, seulement ie diray que la reprise de cette place apporta beaucoup plus d'avantage aux affaires du Roy que la perte n'y avoit causé de preiudice. Les propos de paix estoient fort avancez quand les ennemis surprindrent Amiens, mais l'avantage qu'ils pensoient avoir gagné par cette prise rompit tous ces propos. Incontinent que le Roy l'eut reprise l'on renouia les traitez qui avoient esté interrompus, & pour y parvenir il fut accordé vne suspension d'armes au commencement de l'an mil cinq cens nonante huit, afin de pouvoir plus commodement traiter la paix, qui fut conclüe. Le Roy qui n'avoit plus personne en son Royaume qui ne le reconust, horsmis Monsieur de Mercœur, s'achemina en Bretagne pour le ranger par la force ou par composition en son deuoir, sa Maesté apprehendoit que les places de Rochefort & Ancenis sur la riviere de Loire luy empeschassent son chemin à Nantes où il deliberoit d'aller tout droit comme le vray siege de cette guerre : les Capitaines de ces deux places capitulerent à part ; Monsieur de Mercœur craignant mesmes succès de ses autres places, envoya Madame sa femme iusques au pont de Sé au deuant du Roy, & deuant que le

Roy la veid l'accord estoit fait. Monsieur de Mercœur vint trouver le Roy à Angers , & comme il estoit Prince fort courageux & des bons Capitaines de la Chrestienté, il s'en alla bien tost apres en Hongrie, où il fit de beaux & memorables exploits contre les Turcs, mais en reuenant pour leuer des troupes en France & en Lorraine selon les pouuoirs que luy en auoit donné l'Empereur, qui l'auoit preferé à tous les Princes d'Allemagne & d'Italie en la Lieutenance general de ses armées contre le Turc, il mourut en chemin dans la ville de Nuremberg, qui fut vn tres-grand dommage pour la Chrestienté. D'Angers le Roy s'en alla à Nantes , où la Duchesse accoucha de son second fils, qui est Monsieur le Cheualier de Vendosme : lors le Roy luy promit, & iura de l'espouser, ce qu'elle ne voulut point croire, s'il ne luy promettoit de m'esloigner d'aupres de soy : il ne me dit iamais mauuaise parole, mais il tint deux conseils particuliers sans m'y appeller. Je reconnus bien ce que cela vouloit dire. Je luy demanday congé & m'en vins en ma maison. Toute la France me sera tesmoin que les choses ont passé de cette sorte, & que iamais il n'y eut autre sujet de ma disgrâce que celuy-là. Je pardonne à la Duchesse de m'auoir hay : Je ne trouue point estrange que la Duchesse m'ait hay & fait du pis qu'elle ait pû , parce qu'elle croyoit que personne que moy ne s'opposoit à son dessein, duquel toutefois ie ne croy point qu'elle fust iamais venuë à bout. C'est vne opinion contraire à tout le monde, mais ie le croy

ainsi pour plusieurs choses que j'ay autrefois entenduës du Roy sur ce sujet, lesquelles sont: Que s'il l'eust fait il eust mis le feu entre ceux mesmes qu'il destinoit heritiers, dequoy ne faisant pas dessein sur l'aîné, parce qu'il estoit né deuant que le mariage de sa mere & du sieur de Liancourt fust dissout: ie laisse à penser quelle apparence il y auoit que le puîné prit cét aduantage sur son aîné sans en venir aux mains, qui me fait dire que quand c'eust esté au fait & au prendre, il auoit assez de dexterité pour trouuer quelque moyen de dilayer: il connoissoit trop la consequence de cette affaire & aimoit trop son estat, mesmes qu'il se presentoit en l'affaire vne difficulté essentielle, que pour bonnes considerations ie ne touche point. Tant y a que la Duchesse me croyant vn obstacle qui à toutes occasions luy auoit traversé ses desseins, elle a eu raison de me faire tout le mal qu'elle m'a fait: mais comme ma disgrâce n'est venuë que pour ce sujet, lequel a ouuert le chemin à la Reyne pour tenir le lieu que par merite elle possède auourd'huy en ce Royaume, ie croy qu'elle & Messieurs ses enfans ont autant de sujet de me vouloir bien, comme l'autre a eu de me vouloir mal. Or ie ne luy demande que la iustice, qui est que l'on me paye les interets des aduances par moy faictes pour le service du Roy, & dont les deniers ont esté si vtilement employez, qu'au moins me doit-on indemnifer des interets que j'ay soufferts pour l'auance que j'en ay faite. Le sieur Zamet & les heritiers du feu sieur Cenamy tesmoigneront que ie leur

ay payé plus de cent mille escus pour les parties qui ont esté tirées d'Allemagne & d'Italie à Lyon, par ceux qui m'auoient presté l'argent, tant au premier qu'au troisieme voyage d'Allemagne. Je ne demande rien pour les premiers Suisses amenez, ie confesse que i'en ay esté remboursé, l'an mil cinq cens nonante trois, quatre ans apres que i'en eus fait l'aduanee, mais pour tout le reste ie n'ay iamais rien eu que de meschantes assignations, comme la necessité des affaires du Roy ne permettoit pas de me bailler autre chose. I'ay outre ce depuis que ie fus aupres du Roy iusques en l'an 1597. perpetuellement presté, mes bagues estoient tousiours en gage, & mon credit employé. Le Roy estant de retour de son voyage de Bretagne, mes ennemis qui auoient lors toute puillance aupres de sa Maieité, me voyans éloigné d'elle, n'oublierent aucun artifice pour m'empescher d'y retourner, ils inuiterent tout le monde à se venir plaindre de moy, mes actions furent syndiquées à toute rigueur, mais il ne s'est point preseté d'accusateurs Dieu mercy, qui fait paroistre avec quelle innocence i'auois vescu dans les affaires; seulement ils dirent que l'estat que i'auois fait arrester estoit vn estat d'assignations que i'auois eues, mais que ie ne faisois point paroistre pour quelles causes elles m'estoient données. Le Roy enuoya querir le sieur Gobelin lors Thresorier de l'Espargne, & le sieur Beaumarchais qui en auoit fait la charge alternative, comme principal Commis du sieur de Mortefontaine son beaupere, il s'enquit d'eux

de la verité, & tous deux rendirent témoignage que toutes les assignations que j'auois m'auoient esté données pour prests actuellement faits à sa Maiesté. Et de fait, nonobstant mes ennemis j'eus Arrest du Conseil en l'an mil six cens, vn peu deuant que d'aller en Sa- uoye, par lequel il fut dit que ie serois reassigné de tous les mandemens & rescriptions que ie rapporterois, & dont ie n'aurois pû tirer payement : Suiuant lequel Arrest j'eus assignation de cent quinze mille liures à prendre sur la recherche de la maluerfation des Financiers, ou sur la composition qui s'en ensui- uroit s'il s'en faisoit. Si l'on demeure d'accord que ce qui m'est deub fust pour prest, l'on me fait tort de m'en desnier l'interest, puisque ie l'ay si cherement payé : car de m'opposer l'Ordonnance qui rejette les prests faits sans commission, elle ne peut auoir lieu pour moy. Premièrement elle n'estoit point faite en ce temps-là, personne ne peut mettre en doute que ie n'aye presté pendant les guerres, lors que les affaires estoient en tel estat, qu'il n'y auoit en toute la France que moy, qui y vou- lust hazarder son bien. Si ie l'ay fait en ce mi- serable temps, pourquoy ne voudra-on croire que ie l'aye fait encore lors que les affaires ont esté en meilleur estat, & qu'il y a eu plus d'apparence que ie serois payé de ce que ie prestois ? Je prouueray ceux à qui j'ay payé les changes, ie prouueray que la pluspart de mon bien y est allé ; j'ay vendu pour cét effet pour cent cinquante mille écus de bagues, le Roy d'Angleterre a achepté vn de mes diamans

neuf vingts douze mille liures ; la Reyne en a vn dont elle a payé soixante & quinze mille liures ; Monsieur de Rosny m'en paya vingt-cinq mille liures pour vn qu'il achepta, & fut donné à Monsieur le Cardinal de Medicis depuis Pape Leon vnzième : & quand il s'en alla en Sauoye, il en achepta de moy pour quarante mille liures qu'il destinoit aux presens qui estoient à faire pour le mariage du Roy, sans plusieurs autres bagues qui ont esté vendues tant à feuë Madame sœur du Roy, qu'à autres. J'ay vendu mon estat de Colonel des Suisses, dont j'ay esté fort mal payé, la commission de Sur-Intendant des bastimens & le gouvernement de Chaalons, tout cela n'a pas esté suffisant pour payer lesdits interets : Je fais poursuiuy encore de si grandes sommes, que si le Roy ne me fait raison, il faut que pour recompense de mes seruices tout mon bien soit vendu pour satisfaire à mes creanciers. L'on m'a fait vn don de soixante & quinze mille liures au lieu desdits interets : la Chambre en fait difficulté, parce qu'ils en ont beaucoup verifié d'autres depuis peu de temps. Et pour dire verité, il me fasche fort qu'en ne me payant pas le quart de ce qui m'est due l'on me le fasse prendre en don. Je supplie donc tres-humblement sa Maiesté de m'ordonner tels Commisaires qu'il luy plaira pour iuger s'il y a lieu de me priuer desdits interets, & en cas qu'il se trouue que j'aye droit de les demander (comme ie n'en doute point) ie rendray le don, & consentiray qu'ils soient moderez à telle somme qu'il plaira au Roy.

plustost que d'aduoir qu'en me payant vne partie de ce qui m'est deub, on me fassent vn grand present, quin'est en effect que pour me fermer la porte de pouoir vn iour demander recompense de mes seruices. Or encore que ie fusse du tout disgracié, si est-ce que le Roy allant en Sauoye i'eus cét heur d'y rendre encore vn bon seruice à sa Majesté : car comme i'auois beaucoup d'amis & grande connoissance dans le pays, ie sceus que ceux du fort de sainte Catherine ne se doutans rien moins que de la descente du Roy en Sauoye, auoient vendu apres Pasques la pluspart de leurs munitions, parce que le bled estoit cher au pays. Comme doncques le Roy au mois de Septembre resolut à Anissi d'assieger & battre Montmelian, ie luy remonstray que si en mesme temps il ne pouruoyoit au fort sainte Catherine, le Duc le pourroit grandement incommoder en ce siege, parce que si passant par les vallées de la Vaud & Vaudabondance il venoit au fort prendre de l'artillerie où il en auoit quantité & s'alloit loger audit Anissi, il couperoit les viures au Roy de ce costé là & par l'assiette de ce logis qui est forte, le garentiroit de combattre : mais que s'il luy plaisoit me donner douze cens hommes de pied de son armée, & deux cens cheuaux, ie ferois deux ou trois cens hommes de pied, & cent cheuaux és enuiron de Geneue, & aurois aussitost pris ledit fort sainte Catherine qu'il auroit pris Montmelian. Il visita le logement d'Anissy, & iugea ma proposition bonne: Il me donna donc le regiment
des

des Corfes & les compagnies des sieurs de Vitry & Baron de Seneçay , que ie logeay avec ce que ie leuay dans le pays en quatre petits Chasteaux que les ennemis auoient conseruez és enuiron de ce fort, l'vn nōmé le Chastelard, l'autre Cigny, l'autre la Perriere, & le quatriesme Viry qui bloquerent si bien ce fort que de là en auant il n'y entroit & n'en sortoit plus rien. Quand le Roy m'eut enuoyé plus grandes forces, ie les reserray & me logeay plus près d'eux, & en moins de deux mois & demy les reduisis à telle extremité qu'il ne leur restoit au plus fort de l'hyuer ny bois, ny bled, ny vin. Ie suppliay le Roy si tost que Montmelian fut pris , de venir audit fort , l'assurant que dans trois iours il les feroit venir à la capitulation avec sa Majesté : il y vint , & dès le soir qu'il arriua ils commencerent à parler : le lendemain la capitulation fut concludë, & dès le premier iour les ostages estans donnez de part & d'autre, le sieur de Ncrestan qui y estoit entré de la part du Roy, vint demander des viures & du bois pour les assiegez, disant auoir tout foüillé & qu'il n'y en auoit point du tout. Tous les Seigneurs & Capitaines qui virent ceste place, la iugerent aussi bonne ou meilleure que Montmelian, il y auoit deux fois plus d'artillerie en celle-cy qu'en l'autre, & au lieu de sept vingt hommes, qui se trouuerent dans Montmelian, il s'en trouua sept cens : Le fort des Alinges situé sur le haut d'un rocher dans le Chablais que l'on iugeoit imprenable, suiuit l'exemple du fort sainte Catherine, & se rendit six iours

apres l'autre. Ainsi par ce dernier exploit ie tesmoignay que la disgrace ne m'auoit point auily le courage ny leuë l'affection que i'ay tousiours eue de bien faire, & porter mes actions au seruice de son Estat, comme encoresuis-je poullé de cette mesme ardeur autant que mon âge & la disposition de ma santé me le peuvent permettre, bien content neantmoins de viure hors des affaires publiques le reste de mes iours, en m'occupant (si ie puis retirer le mieu) à disposer mes affaires domestiques en telle sorte que mes enfans iouissent de mes labeurs, & se rendent capables de seruir le Roy, s'il leur fait l'honneur de les employer, ainsi que i'ay seruy le feu Roy son pere de glorieuse memoire, avec toute sincerité, comme le discours cy dessus, que i'expose à la censure de ceux qui ont vesçu en mesme temps que moy, le iustifie.

Je pourrois en dire d'auantage, & traicter plus particulièrement des choses que ie n'ay fait que toucher en passant, bien qu'elles soient d'importance ? Mais la rencontre de mon indisposition ne m'en a pas donné la liberté, & l'incommodité de mes affaires qui pressent & mont enuié de faire ce discours, m'a contraint d'abreger; quelque autre sujet me pourra faire dire le surplus.

*ACCORD FAIT ENTRE
les sieurs du Plessis & de Saint
Phale, le 13. Iannier 1599.*

MONSIEVR le Conneftable avec Messieurs les Mareſchaux de France s'en iront trouver le Roy pour luy dire comme ils ont entendu ce qui c'eſt paſſé entre les ſieurs du Plessis & de S. Phale, qu'ils ont trouvé que ledit ſieur de S. Phale a offenſé grandement ſa Maieſté, dont il meriteroit punition, qu'il ne peut venir en combat avec ledit ſieur du Plessis pour la qualité de l'offence qui l'en a rendu incapable.

Et ayant cy-deuant les parens dudit ſieur de S. Phale ſupplié ſa Maieſté de luy pardonner l'offence qu'il luy a faite, mondit ſieur le Conneſtable dira qu'ils l'en ont prié de meſme, & qu'avec eux il en ſupplie ſa Maieſté, & de trouver bon qu'il luy preſente ledit ſieur de S. Phale pour ſe ietter à ſes pieds & luy demander pardon.

Lors ledit de S. Phale ſe preſentera deuant ſa Maieſté, & mettant vn genoüil en terre il la ſuppliera tres-humblement luy pardonner la faute qu'il a faite, & trouver bon qu'en ſa preſence il ſatisfaiſe audit ſieur du Plessis, puis il ſe leuera & dira.

Monſieur, ayant creu que vous auiez fait quelque rapport au Roy qui luy euſt reuoqué en doute la fidelité que ie luy dois comme ſon

tres fidele sujet, cela a esté occasion qu'estant à Angers ayant dîné ensemble au logis de M. de la Rochepot, vous voyant sortir du logis accompagné de quatre hommes, ie sortis vn peu apres vous plus accompagné que vous & en trouuay encores d'autres qui se ioignirent avec moy. Vous ayant r'attaint ie voulus m'esclaircir de ce doute avec vous, surquoy vous me tinstes d'honnestes langages, m'offrant de m'en faire raison telle qu'on a accoustumé entre gens d'honneur, chose suffisante pour m'en contenter: mais la creance de cette offence auoit pû tellement sur moy, qu'elle m'osta la raison & me fit passer à l'iniure que i'auois deliberé de vous faire prenant vn baston que i'auois derriere mon dos sans que vous le peussiez voir, & vous en donnay vn coup qui vous porta par terre. Soudain i'allay à mon cheual, quoy que les miens eussent l'espée à la main & donnerent quelques coups aux vostres qui vous vouloient garantir des miens. Je reconnois vous auoir fait cette offence de propos deliberé avec tel aduantage qu'il n'y a homme d'honneur à qui on n'en puisse faire le semblable, qui me fait vous supplier me la pardonner, & me soubmets de receuoir de vostre main vn pareil coup que vous receustes, vous suppliant interceder enuers le Roy à ce qu'il fasse arrester le cours de la iustice pour les punitions que i'ay meritées d'auoir si indignement offensé vn Gentil-homme de vostre qualité, Conseiller d'Estat, & qui exerceoit vne commission de si grande importance: Et ie demeureray en recompense toute ma

vic vostre amy & seruiteur, vous assurant que si pareille chose m'estoit arriüée ie me contenterois de telle satisfaction.

M. du Plessis dira au Roy qu'il le supplie tres-humblement de pardonner son offence audit sieur de S. Phale, & pour le regard de la sienne, qu'il eust bien desiré d'en tirer sa raison par autre voye.

Le Roy fera alors cét honneur audit sieur du Plessis de luy dire, qu'il a tousiours trouué l'acte tel qu'il n'en denoit estre recherché par la voye des armes, & qu'au reste il reconnoist la submission dudit de saint Phale suffisante pour reparer l'iniure qu'il a receüe, & qu'il s'en doit contenter, mesmes pource qu'il y va de son service de voir assoupir les querelles entre les seruiteurs de telle qualité, qu'il le luy commande, & pour ce qui est de l'offense de sa Majesté, qu'il y pouruoirra selon qu'il verra estre à faire.

Ledit sieur du Plessis lors dira audit sieur de S. Phale, que puis qu'il plaist à sa Maiesté & que Messieurs le Connestable & Mareschaux de France tiennent qu'il y a occasion de satisfaction, qu'il luy pardonne par son commandement.

Le Roy fera lors cét honneur audit sieur de S. Phale de luy dire qu'il luy pardonne à la priere dudit sieur du Plessis, & luy remontrera sa faute, luy commandant de se garder à l'aduenir de retourner en semblable. Signée de Montmorancy, Henry de la Tour, Brislac, Lauerdin, Dornano, & de Lual.

LETTRE DE MONSIEUR
*le Mareſchal de Boüillon au Roy, ſur
ce qu'il eſt acué d'eſtre complice de
Monſieur le Mareſchal de Biron.*

SIRE,

Ayant appris par celle de la main de voſtre Maieſté du 17. de ce mois, que j'auois eſté accué par ceux qui ont eſté ouïs en ſon Conſeil ſur les conſpirations de feu Monſieur de Biron, & qu'elle me commandoit de me rendre incontinent près d'elle pour me juſtifier, ie renuoyay auſſi-toſt celui qui eſtoit venu, avec répoſe à voſtre Maieſté que ie partirois ſoudain pour l'aller trouver, ce qu'eſtant tout preſt à faire, il m'eſt venu aduis certain quels ſont mes accuſateurs.

Cela, SIRE, m'a occaſionné de changer cette reſolution & faire tres-humbles remontrances à voſtre Maieſté pour la ſupplier de mettre en conſideration que les perſidies & deſloyautez contre voſtre perſonne & Eſtat tres-auerées de meſdits accuſateurs, les rendent du tout incapables de m'accuſer, & à plus forte raiſon de me conuaincre. Ils n'ont & ne peuvent auoir pour leur accuſation que des langues menteuſes, lesquelles ne leur ayant ſeruy pour exécuter leurs intentions & les accompagner des effets dont ils ont eſté empêchez par voſtre bon-heur & prudence, ils les

employent à vous rendre suspect le second Officier de vostre Couronne, vostre seruiteur domestique, qui n'a iamais cherché de gloire en ce monde que ce qui luy en est découlé par vostre faueur & bonne grace, & qui vous a de si longue main seruy. Il est à croire qu'ayant dessein de me nuire ils ont émeu vostre courroux contre moy par les plus horribles crimes qu'ils auront pû inuenter. Me feroient-ils, S I R E, ministre de ce qu'ils pouuent auoir promis aux ennemis de vostre Estat : n'en pouuant aujourd'huy suborner d'autres, ils veulent accuser ceux lesquels mesmes en telles affaires ont leur innocence toute prouuée par infinies circonstances si jointes à eux qu'il n'est à croire qu'ils puissent auoir eu la moindre apparence de bien pour estre allez au contraire.

C'est mal reconnoistre vostre misericorde de demeurer tousiours criminels en ne faisant que changer de crimes, ainsi vostre grace ne leur pourroit seruir, veu que depuis ils ont porté faulxeté. Je vous diray, S I R E, comme disoit le Psalmiste à Dieu, *Te voyant courroucé Seigneur, ne t'approche point de moy que ie ne sois renforcé.* Aussi, S I R E, ie crains vostre visage ayant receu telles personnes à m'accuser, puisque vostre Maiesté m'en demande iustification, qui est ce qui ma retenu: non que ma conscience me pique d'un fouuenir de faute digne d'un tel examen.

Puisque cela importe à vostre seruice, il est tres-raisonnable pour satisfaire à vostre Maiesté, à son Royaume & à mon honneur, & aussi

pour oster le deshonneur de Dieu par le scandale qu'auroient ceux de mesme Religion que mon crime soit puny ou mon innocence connue.

Pour à quoy paruenir, SIRE, ie m'assure que vostre Maiesté ne me voudra rendre priué de la liberté dont iouissent tous vos sujets de la Religion pour y proceder, & d'autant plustost que mes autres iuges ne peuuent estre plus interessez en ces affaires, puis qu'il s'agit de la diminution de vostre Royaume pour l'agrandissement d'Espagne, en quoy tous vos sujets ont vne commune perte : mais ceux de la Religion desquels les Chambres sont composées, en ont vne speciale, & qu'ils ont tousiours estimée plus chere que leur vie, qui est la perte de leur exercice : ils seront donc plustost iuges seueres que doux s'ils y voyent de ma faute, & se tourneront plus facilement à me hair qu'un autre, duquel ils n'auront pas attendu le contraire que de moy.

Là donc ie supplie vostre Majesté de renvoyer mes accusateurs & accusations, me tardant d'auoir ce fardeau que me donnent les calomnies, & que vostre Majesté soit suffisamment satisfaicte de mon innocence, pour laquelle accelerer ie m'en vay me rendre à Castres, & y attendre la verification & preuue de ma faute ou innocence, iugeant que le temps que i'eusse mis à aller trouuer vostre Majesté n'eust fait que prolonger l'affliction & vif ressentiment de mon ame demeurant accusé, puis qu'aussi bien vostre Majesté entend à me renvoyer aux Chambres, pour me condamner

ou absoudre, estans les Iuges que vostre Edict me donne.

Qu'il luy plaise donc soulager mon esprit promptement en me donnant les moyens de luy faire connoistre mon innocence, & qu'à cette preuue elle demeure aileurée de la continuation de mes fideles seruices, & moy de ses bonnes graces, qui sont par dessus toutes choses desirées de vostre tres-obeyssant, & tres-fidel suiet & seruiteur, Henry de la Tour. A sainct Cere le trentiesme Nouembre mil six cens deux, receuë le neufiesme Decembre ensuiuant.

*A V T R E L E T T R E D U
Mareschal de Boüillon au Roy.*

S I R E ,

Ayant sciourné à Castres iusques à ce que par Arrest la Cour m'a declaré qu'elle estoit interdite, ne pouuant prendre connoissance de mes accusations, ie m'acheminois à Grenoble, comme seule Chambre qui selon l'Edict pouuoit estre mes Iuges. Ie reconnus mon chemin faisant encores que nulle de mes accusations n'aidast à mes ennemis de continuer leurs mauuais offices que vos suiets en auoient quelque meffiance : ie m'en vins à Orange, lieu d'où i'esperois m'acheminer à Grenoble, & qu'un peu de sejour que i'y voulois faire ne renforceroit les diuers doutes entre vos suiets, voyant que par mauuais artifices on vouloit

aider à les diuiser contre mon intention, qui a tousiours seruy à les voir sous vos iustes commandemens, ne voulant rien mettre au deuant de la iustification de mes actions que ma seule innocence & integrité. Fay aimé mieux sortir de vostre Royaume, ma patrie, quoy qu'avec quelque danger, ie me rendis icy où ie seiournay quelques iours à la priere des Seigneurs de cette cité ; le leur ayant dautant plustost accordé qu'il m'a semblé qu'il y alloit du seruice de vostre Couronne, que ceux qui en sont sujets aidassent à s'opposer à l'agrandissement du Duc de Sauoye & du Roy d'Espagne. Icy m'est arriué le sieur de Bourron qui m'a fait louer Dieu d'auoir suiuy les conseils qui sont pres de vostre Majesté, qui iugeoient que ce seroient ceux qui luy seroient les plus agreables. Je continueray mon chemin en attendant ce qu'il plaira à vostre Majesté deuoir estre fait à la punition de mes accusateurs ou de moy, qui n'auray repos que ie n'y voye tout le monde & sur tous autres vostre Majesté, mes fidelles seruices tenir le rang que la calomnie, & enuie auoient voulu arracher : & que SIRE cet examen bien uis ne me serue à faire connoistre à vostre Majesté que telles choses m'ont esté mises sus pour nuire à vostre Majesté & Estar. J'arresteray tous mes comportements à la regle du seruice de vostre Majesté, attendant d'elle contre la malice de plusieurs, les effets de sa iustice. Priant Dieu, &c. A Geneue ce 2^e Ianuier 1603.

EXTRAIT D'VNE LETTRE
de la Reine d'Angleterre à son Am-
bassadeur en France, sur le sujet du
Mareschal de Bouillon.

L'Ambassadeur de France nous a parlé de la part du Roy son maistre du fait du Duc de Bouillon, & des depositions, lesquelles, comme il dit, ont esté faites de beaucoup de choses qui taxent sa fidelité. Il nous a bail-
lé vne coppie d'une lettre que le Roy luy es-
criuoit, par laquelle il luy commandoit de
venir à la Cour pour s'en iustifier : dans laquel-
le lettre encore que les particularitez dont on
charge le Duc ne soient pas spécifiées, toute-
fois l'Ambassadeur n'a pas l'aisné de dire qu'il
est accusé d'estre participant de la conspira-
tion de laquelle le feu Mareschal de Biron
a esté artaint, où il a complotté avec autres
grands, touchant la succession de la Couron-
ne de France, & finalement qu'il a eu agrea-
ble que quelque ouverture se soit faite au Roy
d'Espagne pour le recevoir en sa bonne grace.
Sur lesquelles particularitez qui touchent de
pres au Roy, sondit Ambassadeur a demandé
de sa part nostre aduis pour sçauoir comment
il auoit à proceder avec ledit Duc. Or enco-
res que nous iugeons bien que la demande que
le Roy nous fait soit par ceremonie, & qu'en
communiquant à nous & aux autres de cette
affaire, son but soit plustost à preoccuper nos

iugemens par choses preiudiciables à celuy, en la cause duquel il pense que nous ayons quelque interest, le chargeant de crimes tels que pour l'atrocité d'iceux nous ne pourrions (nostre honneur sauf) en entreprendre des excuses, que non pas avec intention de soy seruir de nos conseils, lesquels nous ne pourrions croire qu'il veuille preferer aux resolutions qu'il a volontiers desja prises contre luy s'il le tient pour coupable : Neantmoins vne si belle occasion nous estant présentée de la part du Roy de parler d'une affaire de laquelle autrement nous ne voudrions pas nous ingerer, nous trouuons bon de declarer ce que nous croyons fermement de l'innocence du Duc, & par ce moyen luy rendre les fauorables offices que requierent de nous la creance que auons tousiours eue de sa loyauté & l'affection que nous luy portons à cause de la Religion. Nous vous faisons doncques sçauoir qu'il nous plaist, que incontinent apres auoir receu cette depesche, vous alliez trouuer le Roy, & le remercier de la franchise & priuauté de laquelle il vse en nostre endroit, & confiance qu'il fait paroistre auoir en nostre amitié nous communiquant vne affaire de telle qualité entre luy & son sujet : cas sur lequel les Princes n'ont point accoustumé de communiquer leurs intentions à leurs voisins, qu'aussi de ce qu'il demande nostre aduis sur la procedure la plus conuenable & expediente qu'il doit suiure contre le Duc. Vous luy direz que c'est vne affaire de laquelle nous aimerions mieux nous taire que d'en

enuoyer nos conceptions , n'estoit qu'il nous y conuie si amiablement, pource qu'elle est de telle qualité , qu'en discourant d'icelle difficilement pouuons nous euitier deux inconueniens. L'vn de faire chose contraire à la prudence que la longue experience nous a enseignée , à sçauoir de n'estre point curieuse des affaires des autres Princes. L'autre de preiudicier à l'integrité de laquelle nous faisons profession , ayant à craindre d'une part que nous ne nous rendions suspects (parlant d'un personnage duquel le Roy sçait fort bien que nous auons de longue main bonne opinion) & d'autre qu'en le fauorifant nous paroissions nonchalante de la seureté du Roy. Mais puis que la demande du Roy nous acquite de l'un & la sincerité de nostre conscience nous discharge de l'autre : Nous hazardons de luy dire nostre auis sur ce qui nous en apparroist , iusques à ce que l'on nous fasse voir le suiet de quelque chose de plus important. C'est qu'entre plusieurs autres circonstances considerables nous auons ces particulieres & fortes occasions qui nous font croire que le Duc n'a pû tant oublier son deuoir enuers le Roy. La premiere, l'ancien & continuel seruice non iamais suspect iusques à present qu'il luy a rendu par vne deuotion cordiale , tesmoigné souuent avec risque de sa vie & de ses fortunes, commencé dès sa ieunesse, accru avec le temps & continué sans aucune tache de blasme lors des plus grandes aduersitez du Roy. Et cette affection extreme à sa personne est vn fort lien pour contenir le Duc en

sa fidelité , & cela seul est vne suffisante preuve de la iustice de sa cause : car quelle apparence qu'il luy prist à present enuie de fourvoyer de cette humeur , veu qu'aucontraire la grandeur de l'Estat auquel le Roy est monté la luy aura plûtoist confirmée en luy faisant esperer les dignes recompenses de ses premiers seruices, & l'aura lié par vne plus estroite obligation de fidelité , conuertissant ce que auparauant ne pouuoit estre au Duc que simple affection en ce deuoir plus estroit qui est requis du suiet au Souuerain. Et d'ailleurs quand nous considerons qu'une partie de l'accusation est , qu'il s'entendoit avec le Maréchal de Biron , avec lequel nous sçauons fort bien qu'il n'a iamais eu bonne intelligence , mais plutoist inimitié & emulation: Nous esperons que le Roy trouuera l'accusation foible au fonds , dequoy personne ne se resiouyra plus que nous. L'autre raison est la Religion , de laquelle le Duc fait profession , laquelle ne peut iamais admettre ce que cette accusation pretend , à sçauoir l'intelligence avec le Roy d'Espagne le plus capital ennemy de nostre Religion , d'entre ceux mesmes qui sont de l'Eglise Romaine. Toutes lesquelles raisons ont tant de force pour faire croire l'innocence du Duc , que combien que nous n'entreprenions pas de donner au Roy nostre auis affirmatif ou negatif en vne question si chatouilleuse : toutesfois estant requise par luy, & l'affaire du Duc ne nous étant point connue plus que ce que le premier rapport nous en a représenté, Nous estimons que nos argumens

sont si bien fondez que nous pouvons prendre cette liberté de conseiller au Roy ce que nous voudrions nous conseiller à nous mesmes, qui est d'vser de sa moderation & prudence accoustumée, & cōsiderer en cette affaire ce qu'il a accoustumé de regarder en toutes grandes actions, le commencement & l'issuë. En quoy il luy plaira d'observer ces circonstances, que plusieurs autres personnes de marque sont comprises en cette affaire, & le seul Duc choisi entre tous pour en estre recherché, quoy que cōtre toute apparence. Traitement lequel par nécessité engendrera beaucoup de ialousie en ceux de la Religion, leur faisant craindre que quelque opinion ou dessein soit tombé en l'esprit du Roy qui le rend plus prompt à les soupçonner & condamner que non par les autres suiets : & toutesfois nous auons cette creance, ou autrement nous les haïrons, que si le Duc estoit coupable, ils crieront crucifié plustost qu'aucuns : d'ailleurs si cette accusation se trouue foible, delicate, ou faulce, la playe que cette calomnie leur aura faite se guerira. Aussi nous concluons que encore qu'il y eust quelque chose à redire en son Estat, nous en souhaitons la restauration, comme pour nous mesme, & pour y paruenir la meilleure voye soit suivie, & quoy que ne voulions entreprendre de pousser nostre auis si auant en vne chose si importante : Nous vous commandons pourtant de faire entendre au Roy le regret que nous auons (si les preuues contre le Duc ne sont fort euidentes, & plus claires que le iour en plein

midy) qu'il n'aye voulu choisir vne autre voye pour faire sçauoir au Duc partie de ses accusations, & par mesme moyen receuoir sa responce : ce qui eust fort esclaircy le iugement du Roy plustost que d'auoir passé si auant que de l'aiourner en personne par vne lettre notoire à tout le monde ; pource qu'il est à craindre que le Duc qui auoit tousiours mis son azile en la constante faueur du Roy, se voyant traité comme le commun de ses autres suiets (entre lesquels à nostre auis fort peu ont merité comme luy) ne soit tellement intimidé qu'il en soit porté plustost à craindre la puissance & les inuentions de ses ennemis, que à se iustifier en comparoissant, quoy qu'il se sente innocent, qui est vne mauuaise procedure, & vn grand mal-heur pour luy de se voir exposé à telles difficultez qui luy doiuent engendrer des craintes dangereuses, tombant non seulement à vn esprit courageux, mais du tout innocent. Enfin nous vous commandons de luy faire sçauoir que puis que les pratiques du Roy d'Espagne sont si manifestes, & que pour embrouïller son Estat il n'espargne nulle faction, nulle personne, nulle Religion, ce luy seroit chose fort heroïque d'auoir vn plus vif ressentiment des trahisons & perfides comportemens du Roy d'Espagne enuers luy, moyen par lequel ses suiets pourront voir qu'il le tient pour son ennemy, & ses alliez & amis reconnoistre qu'il se ressent de tel affront, ce qui les encouragera de ioindre avec luy, & leurs conseils & leurs actions pour preuenir son ambition. En quoy comme en

tous autres offices d'amitié, nous ne cederons jamais à nul autre Prince de l'Europe.

*LETTRE FAISANT MENTION
de la mort de la Reyne d'Angleterre.*

MONSIEUR,

Je vous auois donné auis par ma lettre du 27. du mois passé, de la maladie de la Reyne, & de la disposition qui se reconnoissoit entous les grands, & au peuple de ce Royaume de nommer promptement apres sa mort le Roy d'Escoſſe pour son successeur. Mais le commandement qui dès le lendemain fut fait par Messieurs du Conseil aux Gouverneurs de tous les ports de les tenir fermez, & ne permettre qu'aucun en sortît, empescha que nostre Courier qui estoit de ſia arriué à Douures, peut passer : maintenant qu'ils sont ouuerts, & qu'une prompte occasion se presente par un Gentil-homme que Monseigneur l'Ambassadeur depesche expres au Roy sur le ſuiet de la mort de ladite Dame, ie m'en ſeruiray à vous dire que ce iourd'huy sur les trois heures du matin, elle a rendu l'esprit fort doucement ; ayant commencé de perdre la parole depuis deux heures, sans auoir enduré ny fièvre ny aucune douleur pendant sa maladie, ny perdu le ſens ny l'entendement, & ledit Roy a esté proclamé dans la Cour à Richemont pour Roy d'Angleterre, & puis ce iour-

d'huy en cette ville par le Heraut d'armes à cheual, accompagné de tous les Seigneurs du Conseil, Archeuesques, Euesques, Comtes, Barons & Gentils-hommes qui se sont trouuez icy en nombre de trois cens, le sieur Cecil lisant deuant le peuple la proclamation dont ie vous enuoye la traduction. Voila comme ce changement que toute la Chrestienté attendoit & estimoit depuis tant d'années, ne se deuoir passer sans alteration ou diuision, s'est accommodé avec vn contentement si vniuersel de tous les Anglois, & vne vnion si miraculeuse en leur nation, que certes leur bon-heur en cela se doit autant ou plus reconnoistre que leur prudence, en ce que la resolution qu'ils ont prise, laquelle auparauant ils n'eussent osé concerter entr'eux, ait trouué tant d'accord en leurs auis, & se soit si promptement confirmée de tous, veu les diuerses humeurs qui sont en ce Royaume, tant pour le fait de la Religion que pour plusieurs occasions qui se sont passées sous les derniers temps du regne de la Reyne. En fin cette ancienne & ferme haine des Anglois contre les Escossois; qui vray semblable pouuoit causer quelque empeschement ou retardement au Roy d'Escoce à la Couronne d'Angleterre: mais outre son titre legitime qui de soy a vne grande force, l'accroissement & la seureté qu'il y apporte par son Royaume d'Escoce, & les enfans & le bien qu'on espere de sa personne, comme estant desia accoustumé à commander, & avec tout cela la crainte que chascun s'est proposée de leur diuision ou irreso-

lution, n'ouurist la porte à l'Estranger, a fait que tous vnanimement ont estimé le deuoir reconnoistre & receuoir incontinent pour Roy. Or l'on verra venir dans peu de temps & recueillir cette belle & riche succession, & considerera-on sur quelle demarche il se mettra à l'entrée de son regne, quel ordre il donnera au fait de la Religion, & quel il se montrera enuers le Roy, & si selon la verité & la raison il se souuiendra de l'obligation qu'il a à son amitié, ou si selon le naturel des Princes il aura plus de consideration de ses interets, & vestant l'humeur Angloise pleine de soupçon & d'ancienne ialousie contre nous, il se voudra conseruer comme neutre & esgalement amy des deux Couronnes de France & d'Espagne, suiuant le conseil de ceux qui gouernent sous la feuë Reyne, lequel sera toujours plus enclin à la paix qu'à la guerre, veules discours qu'ils en ont eus avec mondit Seigneur & les remonstrances qu'ils en faisoient à cette Princesse dont ils n'ont peu ebranler ny persuader son courage digne à la verité de toute loüange pour ce regard & remarquable sur tous les autres siecles à venir. Cependant ie vous diray Monsieur, que l'opinion commune, & de ses Medecins & de ceux qui la seruoient priuement à sa chambre, est que sa maladie ne procede que d'une tristesse qu'elle auoit fort secrettement quelques iours deuant que s'en plaindre, & se fondent en ce iugement sur ce qu'il n'est apparu aucun signe de mal qui fut mortel en elle, outre celuy de l'aage, ayant eu toujours l'vrine, le poux, & les yeux bons

iufqu'à la fin. Et auffi qu'en tout le cours de fa maladie , principalement elle n'a iamais voulu vfer d'aucun remede que l'on luy ait propofé , nonobftant les prieres & menaces de la mort que fes feruiteurs & Medecins luy faisoient , comme fi , ou l'apprehenfion du mefpris de fa vicilleffe , ou quelque autre refentiment fecret que l'on attribué au regret de la mort du feu Comte d'Effex , l'euffent efmeuë à la chercher & defirer elle mefme. Quoy que ce foit, c'eft la verité que deffors qu'elle fe fentit atteinte de mal , elle dit de vouloir mourir. Elle n'a fait aucun testament ny declaration de fon fuccesseur , & ne s'eft mise au liët que trois iours avant fa mort , & ayant demeuré plus de quinze affife fur des couffinets , & veltuë, les yeux fichez en terre , fans vouloir parler ny voir perfonne. L'Archevefque de Cantorbery Prince d'Angleterre, l'Euefque de Londres avec fon Aumosnier n'ont pas laiffé de l'affifter à fa fin , où elle a telmoigné beaucoup de fignes de deuotion & de reconnoiffance enuers Dieu , &c.
De Londres ce 3. iour d'Auril 1603.

LETTRE DV MARESCHAL
de Bonillon au Roy.

SIRE ,

Simes aétions euffent auffi bien eſté garanties de malheur comme Dieu a toujours pre-

serué mon ame de desloyauté : L'aurois à present autant de ioye à continuer le tres-humble service que ie dois à vostre Majesté, que i'ay besoin de l'importuner de mes plaintes à cause de la priuation de cette singuliere felicité. Mais puis qu'il y en a qui ne pensent se pouuoir rendre vtils à vostre personne ny à vostre Royaume, qu'en y rendant inutiles ceux qui ne sont moins fideles que obligez à l'un ou à l'autre, puis qu'ils ne trouuent repos qu'en me priuant de celuy que ie soulois prendre en trauaillant pour vostre Majesté, il faut que i'en cherche en me plaignant de mon malheur, de vostre indignation & sur tout de leur malice, seule cause de l'un & de l'autre. Certes, SIR, quand i'entre en l'examen de ma vie passée, quand ie l'espluche, tous mes desirs, d'effeins & actions qui ne visent iamais à autre but (apres le service de Dieu) qu'à celuy de vostre Majesté qui me le presente en terre, quand ie contemple en ma memoire les admirables traicts de vostre bonté naturelle qui a tousiours vaincu & fait reboucher les traicts les plus acerez de la calomnie, ie demeure plus estonné de la force & puissance de ce dernier qui a non seulement percé vos oreilles, mais penetré profondement en vostre croyance, que ie ne suis du contrecoup qui m'a atteint & quasi porté par terre. Si vostre bonté a esté notoire à tout le monde, si elle est si viuement engraüée en mon ame que le contraire n'en peut estre effacé tant qu'elle demeurera en mon corps, les preuues & tesmoignages de vostre courroux contre moy

sont maintenant si claires, manifestes & évidentes que ie n'ay moins de sujet de craindre & redouter que i'ay eu autrefois d'esperer & m'esjouir, si bien que de me trouver deuant vostre face en tel estat, sans y voir, sans y esperer les moindres rayons de vostre bienveillance accoustumée, voire n'y voyant, ny esperant rien que d'horribles vagues & orages qui me menacent, qui m'accablent presque nonobstant cét esloignement de vostre presence. Et ce ne seroit pas assurance n'y temerité, ce seroit estourdissement, voire force-nerie, & voguer sans vent du Nord, contre vent de marée : Ce seroit mespris manifeste de l'auctorisement que l'esprit de Dieu me fait par la bouche du plus sage Roy qui ait esté, & qui scauoit mieux que homme du monde de quelle pesanteur & importance est la colere des Roys, quand il dit qu'elle est messagere de mort, & ie suis assuré en mon ame que V. M. mesme en laquelle ie veux croire pour ma consolation, a encore des interualles de son ancienne bonté enuers moy, nonobstant les artifices de ceux qui la veulent du tout esteindre, & ne me pourroit ny voudroit alors conseiller d'apprehender si peu l'ire d'un tel Monarque, de mespriser tant ma vie & salut temporel en faisant ou plustost precipitant si inconsiderement un voyage qui mene à ruine. On represente, on exagere à vostre Majesté l'intcrest & conseruation de ses dignitez royales, comme si la benignité laquelle seule fait ressembler les Roys à Dieu, pouuoit ternir ce lustre plus qu'en vous adou-

cissant enuers vn tres-fidelle sujet de vostre Royaume & ancien seruiteur de vostre personne vous ne la rendiez plus illustre , qu'en continuant vostre courroux & appesantissant vostre main sur moy. Comme si cette esmotion de vostre esprit , SIRB , ne preiudicioit plus à vostre repos qu'elle n'affermist vostre throsne, comme si l'inquietude qui accompagne vn courroux vehement n'estoit plus à craindre pour vous, que toute la vengeance que vostre Maiesté voudroit exercer contre moy n'eist à desirer pour le contentement des autres. Certes si la tranquillité & affection que ie souhaite à vostre esprit, SIRB , se pouoit procurer & racheter de mon sang, ie ferois gloire de le respendre pour vn si noble suiet. I'en ferois littere comme i'ay fait à toutes les occasions pour le seruite de vostre Maiesté : Mais de prodiguer mon honneur , d'abandonner & prostituer ce qui se doit acquérir & maintenir au prix du sang & de la vie mesme, il m'est d'autant plus impossible à m'y resoudre que ie voy manifestement qu'apres vne telle perte il ne me resteroit plus rien qui ne me fut plütoist abominable que digne d'estre consacré au seruite d'un si grand Roy , voire d'estre seulement présenté à sa veüe. Et de quel airain seroit le front , qui flestry de telles marques que les horreurs que l'on m'attribuë emportent , oüst demander permission ou place pour faire quelque acte d'honneur par apres, ou qui se deust seulement trouuer en la moindre occasion aux compagnies honorables en cas si miserable.

La plus grande & desirée grace du monde me seroit de trouuer vne mort bien prompte, & les esguillons de despit & de desespoir me piqueroient iour & nuict, d'en rechercher la voye la plus courte pour en finir non la vie, mais la honte, puisque ce n'est plus vie ce qui reste apres que la bonne renommée, qui est l'ame, & la vraye vie de nostre vie, est ostée, & que nulle mort, nul supplice ne peut estre plus cruel que desseruir à son honneur, pour la conseruation ou acquisition duquel, il n'y a cœur si peu genereux qui ne trouue cette vie heureusement employée, n'y ayant perte quelconque qu'un tel gain ne contrepeste & emporte en vne iuste balance. Et quelque contraire que soit vostre presente indignation à tous mes dits & faits, SIRE, si suis-je tres-assuré que la generosité & magnanimité naturelle de vostre Majesté ne luy permet non plus de contredire à ces propos, qu'elle luy promettroit puis apres de se seruir en ses heroïques exploits d'un instrument flestry & deshonoré, ne se trouuant ny Prince, ny courage au monde qui soit plus competant iuge ny plus equitable estimateur de ce joyau d'honneur que celuy de vostre Majesté, deuant laquelle ie ploye les genoux de mon cœur pour la supplier tres-humblement de vouloir repousser, au moins pour vn temps les sinistres opinions qui pour le present occupent son esprit pour y faire place à vne si iuste & necessaire consideration qui me retient & retiendra tant que Dieu me laissera vne estincelle de sens & iugement de quitter & abandonner honteusement

teusement ce qui ne se peut estimer pour bien du monde, ny reparer par aucun Monarque, soubmettant aux pieds de vostre Majesté tout ce que Dieu m'a donné au reste, comme ne l'ayant receu ny ne le desirant tenir à autre condition & usage que pour le conuertir en matiere des preuues de la tres-humble obeissance que ie luy dois, ensemble à sa Royale posterité, à laquelle ie prie le Createur, S I R B, de donner felicité temporelle & eternelle. A Heildelberg ce deuxiesme iour de Iuin 1603.

EDICT DV ROY D'ANGLETERRE *contre les Iesuites.*

DE PAR LE ROY.

AYANT employé quelque temps à l'establisement des affaires politiques de ce Royaume, & depuis trauaillé à composer quelques differens que nous auons trouué parmy nostre Clergé touchant les ceremonies Ecclesiastiques cy-deuant receuës en cete Eglise d'Angleterre, lesquelles nous auons reduites à telle forme & si bon ordre que nous ne faisons doute que tout esprit guidé seulement par la pieté, & non par passion, en demeurera satisfait: Il nous est apparu pendant nostredite conference sur telles affaires, qu'il y auoit du peril plus eminent pour nostre Religion, qu'il n'en eust pu

Tome III.

K

arriuer par ces differens de peu d'importance, & ce à l'occasion de ceux qui sont ennemis de l'un des deux partis, & spécialement pour le grand nombre de Prestres tant de seminaires que des Iesuites qui abonde en ce Royaume, dont aucuns y estoient auparavant nostre aduenement à cette Couronne, les autres y sont venus exerçans leurs charges & fonctions avec plus de liberté, qu'ils n'eussent esté cy-deuant, partie par vne vaine confiance de quelque renonciation au fait de la Religion qu'ils esperoient deuoir estre faite par nous, à quoy nous n'auons iamais pensé ny donné suiet à homme viuant de s'y attendre, en partie aussi sur l'assurance de pardon general accordé par nous lors de nostre Couronnement selon la coustume de nos predecesseurs, pour les offences faites auant le dectz de la feuë Reyne, lequel pardon plusieurs desdits Prestres ont obtenu sous nostre grand seau, & se tenant par là affranchis du danger des loix, exercent avec beaucoup d'audace toutes les fonctions de leur profession, tant à dire Messes que diuertir nos suiets de la Religion qui est establee en ce Royaume, les reconcilians à l'Eglise Romaine, & les seduissans en suite de la droicte créance que tous nos suiets doiuent auoir de la fidelité & obeïssance laquelle nous est deuë. Au moyen dequoy comme ce n'est pas la moindre partie de l'office d'un Roy de pouuoir à garantir son peuple d'une corruption de la Religion, pieté & obeïssance: aussi nous reconnoissons nous obligé en con-

science & en police, de tenir tous bons moyens pour empêcher tous nos sujets de tomber en des opinions superstitieuses en fait de Religion, lesquelles ne sont pas seulement dangereuses pour leurs ames, mais sont le vray chemin de les desuoyer & detraquer de leur deuoir & fidelité, à quoy nous ne scaurions mieux pouruoir qu'en les separant d'auec les ministres & instrumens de cette corruption, qui sont les Prestres de toutes sortes ordonnez en pays estranges d'une autorité prohibée en ce Royaume : Et à cette fin nous auons iugé conuenable de publier à tous nos sujets cette declaration manifeste de nostre volonté pour le regard des Prestres qui sont en cestuy nostre Royaume, reguliers ou sans regle, ou de quelque autre sorte que ce soit, prisonniers ou en liberté, ceux qui ont obtenu nostre pardon sous nostre grand sceau, ou qui n'en ont point obtenu, ceux qui sont icy deuant nostre aduenement à cette Couronne, & qui y sont depuis venus ; que quant à ceux qui son prisonniers, nous auons donné ordre qu'ils seront embarquez à l'un de nos ports plus commode, & renuoyez dehors de nostre Royaume le plâtoist que faire se pourra, avec deffence de ne plus reuenir en aucuns de nos lieux de nostre obéissance sans nostre commandement & permission, sous peine d'encourir la punition portée par les loix de nostre Royaume faites contr'eux. Et pour ceux qui sont en liberté, soit qu'ils ayent impetré nostre pardon ou non, nous les aduertissons & tous nos sujets en general, que ledit pardon ne s'entend

que pour les choses faites & commises pendant la vie de ladite feuë Reyne , & n'exempte aucun Prestre du danger de la loy pour son seiour en ce Royaume depuis nostre succession & aduenement à cette Couronne par delà le temps porté par l'ordonnance. Nous enioignons & commandons par ces presentes, à toutes sortes de Iesuites seminaires & autres Prestres quels qu'ils soient, ayant ordination par autorité prohibée par les loix de ce Royaume & pays de nostre obeïssance, d'en sortir & vuidier dans le 19. iour de Mars prochainement venant apres la datte de ces presentes. Et qu'à cét effet il sera permis à tous officiers de nos ports & havres de souffrir & laisser partir d'icy tous lesdits Prestres pour s'en aller en pays estrange où bon leur semblera entre cy & le 19. iour de Mars. Aduertissant & asseurant tous les Iesuites, seminaires & Prestres quels qu'ils soient, que si aucun est pris & apprehendé apres ledit iour en cettuy nostre Royaume & pays de nostre obeïssance, ou estant party en vertu de cette nostre declaration, il reuienne neantmoins en nostredit Royaume & pays de nostre obeïssance, qu'ils sont abandonnez à la punition portée par les loix de ce Royaume sans espoir de faueur de nostre part. Partant nous enioignons & ordonnons à tous Archeuesques, Euesques, Lieutenans des Prouinces, Iusticiers des pays & tous autres officiers, gardes de nos ports & havres; Qu'apres ledit iour 19. de Mars ils ayent soin & égard, fassent tout deuoir de faire saisir & apprehender tous Prestres qui demeureront

deçà contre cette nostre volonté & declaration. Et encore qu'elle semblera à aucuns un presage de plus grande rigueur contre les autres suiets, lesquels faisant profession de religion autre que celle qui est establie par les loix, se nomment Catholiques, que nous n'avons donné sujet iusqu'à present par nos portemens d'attendre de nous; que quand nous considerera avec iugement & sans passion les raisons nous ont meu d'vser de cette procedure contre lesdits Iesuites seminaires & autres, chacun nous excusera en cela: car qui sçait en quel peril a esté nostre personne, & quelle confusion a esté proche nostre Estat pas long temps par la conspiration dernièrement desleignée par gens de cette condition, lesquels en ayant pratiqué aucuns auoient entrepris d'en attirer vne infinité d'autres à les suivre par l'autorité de leurs persuasions & motifs, principalement sur le fait de la conscience & de la Religion. Ce qu'estant deuenant remarqué par les autres Princes, nous nous sommes assésurés qu'ils ne iugeront point que ce nement procede d'aucune alteration de nostre naturel & volonté portée à plus d'aigreur & violence qu'auparauât, ains d'une preuoyance nécessaire, afin de preuenir les dangers qui infailliblement seroient inuitables, attendu que par leur soumission absoluë à autre iurisdiction que la nostre dès qu'ils reçoient les ordres, n'estant aux Roys sur leurs suiets vne autorité conditionnée & limitée que ce pouuoir par lequel ils sont establis, apporte vne dispende fort libre du lien le plus estroit de fidelité

& amitié entre le Roy & vn peuple. Parmy lesquelles puillances estrangeres ores que nous nous reconnoissons pour nostre personne, tellement obligé à l'Euesque de Rome à present seant pour sa courtoisie, bons offices & particulier soin & deportement temporel enuers nous à plusieurs affaires, que nous serions tousiours prest de nous en reuancher en son endroit cōme Euesque de Rome en estat, qualité & condition de Prince seculier. Toutesfois considerans & remarquans les procedures & pretensions de ce siege, nous n'auons suiet aucun de iuger que les Princes de nostre Religion & profession s'en puissent promettre aucune assurance & de durée, sinon que par l'exemple des autres Princes Chrestiens l'on s'accorde à tenir quelque bon moyen comme seroit vn Concile general, libre & legitimement conuoqué pour déraciner ces dangers & ialousies qui naissent à l'occasion de la Religion, soit entre les Princes mesmes, ou entre les Princes & leurs suiets, & faire que nul Estat ou Potentat a, ou peut pretendre le pouuoir de disposer des Royaumes & Monarchies temporelles, ou de dispenser les suiets de l'obeissance naturelle qu'ils doiuent à leurs souuerains. A laquelle action loüable & pleine de charité nul Prince viuant sera plus prompt que nous à contribuer tout ce qui sera de nostre pouuoir, non seulement par nostre particuliere disposition à viure en paix avec tous Princes & Estats de la Chrestienté, mais aussi parce que par quelque bonne vnion & concorde en la Religion, il se pourroit establir vne telle amitié entre les Princes Chrestiens

nous serions tous ensemble assez forts
 & résister à l'ennemy commun. Donné en
 notre Palais de Wesmunster le 22. iour de Fe-
 vier , l'an de nostre regne d'Angleterre &
 d'Irlande le premier , & d'Ecosse le trente-
 sixiesme , 1604.

LETTRE DV MARESCHAL DE

Bouillon au Roy.

SIRE ,

Ayant reconnu que mes lettres & mes actions
 ont cy-deuant dépleu à vostre Majesté n'ayant
 esté honorées d'aucune sienne approbation ne
 réponse , i'ay pris cela iusques icy pour com-
 mandement de me taire: Mais d'ailleurs i'ap-
 prehende que mon silence fasse désormais
 tort à l'affection extrême que i'ay , & au soin
 assidu que ie desire rendre à mon deuoir pour
 remercier encore l'honneur de vos bonnes
 graces , sans lesquelles ma propre vie ne me
 peut agréer. Et d'autant qu'en cet esloigne-
 ment de vostre visage & de ses precedentes
 bien-veüillances ie me sens accablé des iustes
 regrets & déplaisirs qui me naissent d'en estre
 priué, desirant passionnement de retrouver le
 moyen d'y paruenir : I'ose en toute humilité
 prosterner mes supplications & mon cœur de-
 uant V. M. pour (avec le respect que doit vn
 humble suiet à son Roy, vn tres-fidele seruiteur
 à son maistre) la requérir de me vouloir or-
 donner quelle voye ie puis & dois tenir pour

regagner en sa bonne grace le lieu d'où mon mal-heur m'a depuis quelque temps esloigné, esperant que ses volonteز tiendront à me conseruer les choses sans lesquelles ie serois indigne de viure & d'estre nommé vostre seruiteur. Surquoy ie prens la hardiesse de depecher du Maurier à V. M. la suppliant tres-humblement de le vouloir ouir & eroire que les obligations qui me lient à vostre Maiesté & à vostre personne me sont precieuses à l'égal de ma propre vie, laquelle ie cômenceray d'aimer quand il plaira à VM. faire cesser les effets de son courroux contre celuy qui sera pour iamais, &c. De Sedan le 21. Feurier 1604.

AUTRE LETTRE DV DIT MARESSchal de Bonillon à Monsieur de Rosny.

MONSEIEVR, Ie me sens tellement obligé aux bons offices qu'il vous plaist me rendre & promettre, que ce seroit ingratitude de ne vous en faire de tres-affectionnez remerciemens, lesquels ie vous prie de receuoir par du Maurier, & vouloir fauoriser son voyage par les effets de vostre assistance, croyant que l'obligation m'en sera si sensible que ie ne viuray iamais content qu'apres m'en estre reuanché par quelque seruice qui vous vienne autant à gré comme il procedera sincerement de moy, qui vous baise tres-affectueusement les mains. C'est vostre, &c. De Sedan le 21. Feurier 1604.

LETRE DE MONSIEVR DE ROSNY
au Marechal de Boüillon.

MONSIEVR,

Les maladies qui s'aigriſſent contre les remedes ont touſiours eſté iugées tres-faſcheuſes, mais quand le malade meſme s'oppose à l'application, ou le fait à demy & contre les remedes vſités : les plus entendus en tels acci-
dens les reputent comme incurables. Il me ſouue-
nit infiniment de voir vos affaires ſuiure meſme chemin par les ombrages & deſſian-
que vous prenez de vos amis. J'eſtime qu'il n'y a
pas ſouuent encore d'une reſponſe que ie n'aie
ſis à la lettre que vous m'eſcriuiez ſur la
ſentention du feu Duc de Biron, & comme
ie n'ai priſtes le conſeil que ie vous donnois
mauuaſe part ſans aucun ſuiet : car ie iure
par Dieu que quand il eut eſté queſtion de mon
ſort, ma procedure ne pouuoit eſtre plus
ſincere : auſſi vous diray-ie avec verité que la
poſition du Roy en voſtre endroit ſe ren-
tra telle que vous l'euffiez peu deſirer, ſa
Majeſté eſtant reſoluë quand il y eût eu con-
tre vous toutes les charges du monde, de les
ſouler & remettre ſans aucune formalité.
Ius ſçauiez ce qui s'eſt paſſé depuis, & ſi au-
cunes de vos paroles ou actions l'ont pû of-
fer, & nul ne peut eſtre ſi bon iuge que vous
ſmes des remedes qu'il y faudroit appor-

K s

ter, connoissant l'humeur de sa Majesté, & l'estat des affaires presentes comme vous faites. Mais pource que bien souvent les ennuis & autres preoccupations de l'esprit font prendre vne couleur pour l'autre, aucuns de vos principaux amis, & moy desireux de vostre prosperité, auions estimé vous deuoir donner le conseil que du Maurier vous a apporté de nostre part, comme le seul & vnique remede pour guerir vostre mal, & pour vous faire paruenir à ce bien que vous desirez avec tant de passion : Mais tant s'en faut que vous ayez suivy vn si bon & salutaire aui, que vos lettres ont esté trouuées plus generales, plus conditionnées & plus remplies d'ombrages que iamais, au lieu que la principale vertu d'icelles deuoit consister en vne franchise & simplicité naïue, & aux offres speciales & particulieres de toute espee de submission, afin de tirer l'esprit du Roy des soupçons où il est entré par plusieurs de vos procedures qui luy ont déplu, lesquels à mon aui vous pouuez & pouvez encore effacer si vous voulez absolument croire le conseil de ceux qui vous aiment de tout leur cœur, tesmoignant au Roy par paroles & par effets continuez & suivis, que vous ne voulez chercher protection ny appuy qu'en vostre innocence, ou en la bonté & clemence de sa Majesté, ny pratiquer ou contracter aucunes amitez qui luy puissent estre suspectes ou defagreables : car encore que la pluspart de ceux avec lesquels vous estes apparemment le plus estroitement lié & conjoinct, soient des meilleurs & principaux

s de sa Maiesté , neantmoins le deuoir
 d'un fidelle suiet & seruiteur enuers son Roy
 son maistre , & qui veut estre reputé tel
 de sa vie , est de s'informer auparauant
 quelles choses luy seront plaisantes & agrea-
 . Excusez ie vous supplie la liberté de
 mon discours , & l'attribuez à l'ennuy que ie
 te de vous voir reduit en telle condition &
 extreme desir que j'ay d'y pouuoir trouuer
 remede , & d'estre l'instrument de vostre re-
 conciliation avec le Roy , comme chose que
 mes vos meilleurs amis , & moy iugeons
 estre non seulement vtile & honorable ,
 mais tellement necessaire que vostre vie , vo-
 stre honneur , vostre contentement & tout
 que vous auez de plus cher en ce monde
 soit conioint & attaché. Je souhaite ardem-
 ment que vostre response soit telle que le
 chemin me soit ouuert à ces choses, & tenez-
 vous assuré que ie n'obmettray rien de tout
 que mon deuoir me pourra permettre. Sur
 cette resolution ie vous baise tres-humble-
 ment, &c. De Paris ce 7. Mars 1604.

RESPONSE DV MARESCHAL
de Bouillon à Monsieur de Rosny.

MONSIEUR ,

Je reconnois bien que mes souffrances
 peuuent comparer à vne maladie qui s'ai-

K

grit contre les remedes, mais non à celles où le malade s'oppose à la guerison. Je reconnois qu'elle dépend de mon reſtabliſſement en la bonne grace du Roy. L'ay avec ardeur tenté tous moyens que j'ay iugé me les pouuoir regagner, me ſuis ſouuent, & encore dernièrement par du Maurier, departy d'avec moy meſme pour ſuiure le conſeil de mes amis au lieu de m'en meffier. Mon mal-heur & non l'obſcurité de ma lettre ont rendu cét eſſay auffi vain & inutile comme les precedens, voyant & oyant de plus en plus croiſtre l'indignation du Roy contre moy, eſtant certain & aſſeuré que ce ne ſont mes actions qui l'augmentent, viuant chez moy auffi priuement que ie puis, & me gardant moins qu'il ſeroit poſſible neceſſaire pour euitter ce que pluſieurs voiſins fort puisſans pourroient faire ſur ce lieu, ſans crainte d'autre ſuite, pour le voir priué de la protection du Roy, neantmoins ie luy veux teſmoigner que meſme avec peril ie deſire m'accommoder aux choſes qui autrement luy pourroient eſtre ſuſpectes. L'ay dit, j'ay eſcrit & proteſté à pluſieurs, meſme par la derniere lettre que j'ay eſcrite à ſa Maieſté, j'ay exprimé le plus clairement qu'il m'a eſté poſſible l'ardent deſir que j'ay de rentrer en ſes bonnes graces, le prix auquel ie les voudrois auoir rachetées, le teſmoignage que ma conſcience me rend de n'en eſtre deuenu indigne, comme ie ſerois ſi ie m'eſtois departy tant ſoit peu de la fidelité d'un Gentilhomme François ſon ſujet, du ſerment d'un officier de ſa Couronne, & de celuy d'un

iteur domestique : toutes choses sont en entier sans aucune incision, s'il estoit auant à quoy seruiroient tant de recherches n'à montrer mes fautes plus grandes & la grace du Roy plus illustre en me faisant tout al que meriteroit vne telle infidelité com- de fiction & déguisement. Ce lieu icy est protecteur quoy que non sans danger, me le pouuez iuger, sans peur à m'y maintenir ; mais ces peines encore qu'elles croissent par leur continuation, me semblent dou- au prix du déplaisir que j'aurois de rece- autre protecteur que mon Roy, & qu'il dit à la posterité que par sa volonté, & mon extreme necessité son Royaume eust surcy sa puissance. Derechef ie dis que ny r moy ny pour cette place ie n'ay cherché ne desire trouuer protection qu'en l'au- ité & bonté du Roy, contre le seruice du- ie n'ay fait nulle amitié. Et quant à celle t Dieu m'a fauorisé, si les yeux & les oreil- le mon Roy n'eussent esté preoccupées de ong courroux contre moy, ie suis tres-assu- ue sa Maiesté eust pû entendre & voir- lles sont plus vtilles & conuenables à son t & seruice que cette sienne indignation- uy doit faire trouuer suspectes. Ce que- ere que luy mesme iugera tres-bien quand- y qui tient les cœurs des Roys en sa main- a changé le sien enuers moy pour donner- z & efficace à mes humilitez & sou- sions tousiours continuées afin de ne me- dre incapable de luy continuer mes tres- lles seruires. Il seroit superflu de m'esten-

dre davantage sur ce sujet , car ie suis crû ou mécrû, Si le premier, on m'entend assez , & ne me peut-on raisonnablement demander autre chose, outre ce que ie dis. Si le second , aussi peu seruiroit -il à dire tout ce que l'on me sçauroit prescrire, puis que iamais on n'y adjousteroit foy. C'est pourquoy ie vous supplie de me rendre cette signalée preuue de vostre affection en aidant à dissoudre cette noire nuée que l'indignation du Roy met au deuant de ma veüe , m'empeschant de connoistre la regle de sa volonté, contre laquelle allant ie iuge assez la perte de mon contentement & des biens temporels , me restant ma vie qui depend immediatement de Dieu , & mon honneur de moy, estant personnel & non diuisible. Cette obligation que ie vous auray me fera vous rendre tous les seruices que vous sçauriez desirer de moy, qui vous baise , &c.
A Sedan le seiziesme iour de Mars mil six cens quatre.

Instruction donnée à Monsieur de Bois-sixe, en l'année mil six cens neuf, allant en Allemagne en la iournée de Halle.

DIEU ayant fauorisé les iustes armes du Roy de la suite & recompense d'une paix entiere & generale dedans & dehors le Royaume de l'année 1598. de laquelle la Ma-

& la France ont ioüy depuis & ioüyssent
 ore de present par la mesme prouidence
 ne heureusement & pleinement sans
 arence aucune qu'elle puisse estre inter-
 puë & troublée d'aucun endroit quel-
 l soit, ladite Majesté n'a pas seulement
 qué & employé ce repos, & les grands
 antages qu'elle a recuellis d'iceluy, à re-
 rer la France deffigurée & affoiblie en
 es les parties hors de tout exemple par
 ongueur de la guerre ciuite fortifiée des
 es estrangeres, mais aussi a eu soin de
 faire en diuerses sortes & manieres à ses
 voisins, amis, & alliez, desquels elle auoit
 secouruë en sa necessité, vsant en cela d'v-
 royale gratitude & singuliere prudence :
 roy les sieurs les Estats des Prouinces vnies
 pays-Bas, comme ceux qui estoient les plus
 ez & exposez en peril plus grand, ren-
 it à la posterité vn tesmoignage, leur ayant
 erty, comme elle a fait, son assistance tres
 alement en temps de guerre comme en
 traictez lors qu'ils ont voulu y enten-
 pour asseurer leur liberté, comme ils ont
 du consentement mesme de leurs aduer-
 s.

Majesté a monstre qu'elle auoit pareil
 de la liberté, & prosperité des Princes de
 ermanie anciens alliez & confederez de
 Royaume & de sa personne, se resou-
 nt, comme elle fera eternellement, des
 irs & secours qu'elle a receus d'eux
 es vrgentes necessitez : car elle les a
 ent exhortez & admonestez en diuers

temps depuis ladite paix, de pourvoir à la seureté de leursdites libertez, dont elle reconnoissoit que aucuns estoient enuieux, & mesabusoient trop librement (dequoy ils sont meilleurs resmoins que nuls autres) pour ce qu'ils les estimoient foibles, à cause de leurs diuisions: iugeant sadiète Majesté que rien ne leur pouuoit estre plus vtile en general & en particulier, que ladite vnion, par le moyen de laquelle comme ils deuiendroient plus forts & puissans, ils en feroient aussi respectez & chers dauantage, tant de leurs ennemis, que de leurs amis, d'autant qu'ils auront lors meilleur moyende resister aux vns, & de bien faire aux autres: & comme la felicité est toujours courtisée & recherchée, les voisins feront lors plus de compte de leur amitié & bienveillance, & s'y attacheront plus volontiers & plus hardiment.

Lesdits sieurs Electeurs & Princes seront doncques memoratifs des conseils que sa Majesté leur a donnez, & des lettres qu'elle leur a escrites sur ce suiet longtemps auant le deceds du feu Iean Guillaume de Cleues & de Iuliers, dernier decedé, preuoyant que les differens qui naistroient à cause de sa succession rempliroient la Germanie & le voisinage d'une grande confusion.

Sa Maieité reconnoissant aussi qu'aucuns voisins desdits pais, dès le viuant dudit Duc, proiettoient de s'acommoder desdits pais apres sa mort, par le soin qu'ils prenoient d'y pratiquer des intelligences, & faire tomber les charges principales d'iceux, és mains de person-

à leur deuotion sous pretexte de l'imbecité dudit Prince, & à la faueur des armes & le voisinage estoit remply.

dicte Majesté a vsé de cette preuoyance à droit desdits Princes deuant le deceds du Duc, si tost qu'elle fut aduertie d'iceluy, publia & fit entendre & connoistre par qu'elle vouloit proteger la iustice de la lè des Princes, ausquels telle heredité estoit deuë, & legitime succession & s'opposer à l'euë inuasion violente & iniuste.

le le fit sçauoir aux Archiducs de Flandres, Comte, en Espagne, & par tout ailleurs, afin ceux qui voudroient y attenter sceussent ils auroient à faire à sadicte Majesté, comme ausdits Princes heritiers.

En suite de cela la Majesté a promis publiquement le compromis & accord fait à Dordrecht entre les Marquis Ernest de Brandebourg, pour l'Eslecteur de Brandebourg son frere & le Comte Palatin Vvolfgang Guillaume de Rhin, pour la Duchesse sa mere, par l'entremise du sieur Langraff, Maurice de Nassau, pour faciliter la prise de possession dits pais, qu'ils entendoient & deuoient estre, comme principaux & plus proches heritiers d'iceluy, entre lesquels deuoit tomber & estre la principale difficulté & contention de droit de ladite heredité pour les raisons chacun sçait.

Lesmes sa M. voulut lors faire acheminer quelque compagnie de gendarmerie en la frontiere de Champagne, expres pour fauoriser l'execution dudit accord, comme elle fit sçauoir.

voir ausdits Princes: & à leurs principaux, tant par le sieur de Vanbecourt, que par le sieur de Rougars, & par les lettres qu'elle en escriuit à leurs alliez.

Ce que sa Majesté ne dissimula ausdits Archiducs de Flandre par le feu President Richardot, qu'ils enuoyèrent vers elle expres pour estre esclairez de son intention sur cela: non plus qu'à l'Archiduc Leopold, par l'un de ses Conseillers qu'il enuoya vers sa Majesté apres son arriuée & reception en la ville & forteresse de Iuliers.

Sa Majesté en a usé de mesme enuers l'Empereur par le Comte Holskoloren, depesché vers elle à mesme fin, declarant & protestant neantmoins son intention n'estre d'entreprendre sur l'auctorité & iurisdiction de sa Majesté Imperiale, ne s'entremettre d'autre chose que d'empescher que les vrais heritiers dudit Duc de Cleves fussent opprimez & violentez en la perception de ladicte succession contre iustice & equité.

Ce que sa Majesté a semblablement déclaré & confirmé hautement & publiquement à tous autres, mesmes à ceux que l'Electeur de Saxe a enuoyez vers elle pour s'informer de sa pretension & deliberation sur la poursuite d'icelle.

Chose que sa Majesté veut estre encores répétée & exposée ausdits Electeurs & Princes dudit Empire, & à tous autres que besoin sera quand l'occasion s'en presentera, afin que chacun en soit esclaircy, & non douté en aucune sorte.

Et d'autant plus que sadite Maieſté a bien
 qu'aucuns enuieux de ſa gloire, & de la re-
 ation de ſa foy, ont malicieuſement con-
 uë & ſemé des bruits fondez ſur les gran-

demonſtrations qu'elle a faites d'affe-
 onner la defence de cette cauſe pour la dé-
 r & mettre en doute auſdits Princes, com-
 ſi elle auoit deſſein de ſe preualoir de ladi-
 uceſſion à leur deſauantage, qui eſt vne
 oſture & menterie auſſi groſſiere, que ma-
 euſement inventée pour nuire autant auſ-

Princes, que fleſtrir la reputation de ſa-
 Maieſté, acquiſe par tant de preuues qu'el-
 a renduës de l'integrité de ſa foy enuers
 amis & ennemis en tout temps.

Leantmoins s'eſtant coulé quelque temps
 que ſadite Maieſté fut aduertie de ce que
 Princes de Brandebourg, & de Neubourg
 roient d'elle depuis auoir eſté reconnus
 ceus audit païs pour vrayſ heritiers des
 ts, & les gouuerneurs d'iceux, ny quel ſen-
 ent ils auoient de la fauſſeté deſdits bruits,
 ite Maieſté, qui a touſiours eſté plus ialou-
 le ſon honneur que de ſa vie, fut veritable-
 nt indignée de la creance qu'il ſembloit
 aucuns auoient données à telles calomnies,
 ui fut cauſe qu'elle prit reſolution de reti-
 de ladite frontiere. ladite Gendarmerie
 oſt qu'elle n'auoit deliberé, & de proce-
 en ſes affaires avec plus de circonſpection
 etenuë que deuant, ſans toutefois dimi-
 r rien de ſon affection & deliberation en
 ur deſdits Princes, ainſi qu'elle declara
 uis aux deux Comtes Georges & Frideric

de Solmo , que leſdits Princes depeſcherent vers elle long-temps apres, & au ſieur de Collis enuoyé par l'Electeur Palatin, dequoy ſeroit encore enſuiuy que ſadite Maieſté auroit differé iuſques à preſent, aupres leſdits Princes vn Ambaſſadeur pour y reſider & fauoriſer leurs actions, & leur departir ſes conſeils, cōme elle auoit deliberé & leur auoit fait ſçauoir.

Mais ſi toſt que ſadite Maieſté a eſté éclaircie deſdits ſoupçons, elle a repris à cœur, comme deuant, le ſoin de leurs affaires, a renuoyé vers eux, & delà audit Electeur de Brandebourg ledit ſieur de Bougars, & le ſieur de ſainte Catherine, aux Ducs de Neubourg & des Deux-Ponts, pour de nouveau les aſſeurer de la continuation de ſon amitié & aſſiſtance, les inciter à ſ'aſſembler avec leurs amis pour prendre avec en leurs affaires vne plus ſolide reſolution qu'ils n'auoient encore fait, d'autant que ſa Maieſté ne pouuoit prendre & former la ſienne que ſur la leur.

Les choſes eſtans en ces termes, le ſieur Prince Chriſtian d'Anhalt eſt arriué aupres de ſa Maieſté avec lettres de Monsieur l'Electeur Palatin & du Duc de Vvitemberg aux noms des autres Princes vnis, lequel luy a fait la propoſition qui ſera representée, par laquelle, comme entre autre choſe, il a montré deſirer que ſadite Maieſté fit entendre ſes intentions & aduis ſur leſdites affaires de Cleues auſdits ſieurs Electeurs, Princes & Eſtats vnis, & en conſoler les intereſſez en la cauſe pour fonder ſur cela leur finale reſolution : à quoy ſadite Maieſté eſtoit de ſoy ia tres - diſpoſée,

qu'elle auoit fait ſçauoir ausdits Princes. & la Majesté a fait election de la personne de Boissize Conseiller en son Conseil. & luy a commis cette charge & fait bail-
 présent memoire, suiuant lequel elle
 id qu'il se conduise en l'execution d'icel-
 fleurée qu'estant de telle importance
 cest à l'honneur & seruice de sa Majesté
 bien public de la Chrestienté, qu'elle y se-
 uie par luy avec l'affection, diligence &
 té qu'il a employée au contentement de
 jesté iusques à present en toutes les au-
 gations & commissions qu'il a executées.
 our ce faire ledit sieur de Boissize se ren-
 la ville de Hall en Suaube, sinon le di-
 e du mois prochain, à nostre compte,
 oit commencer la diette & conference
 e desdits Esleeteurs, Princes, Estats &
 vnies, du moins dans quatre ou cinq
 apres, afin qu'il les trouue encore en-
 e pour leur pouuoir exposer & faire en-
 e en general & en particulier, ainsi qu'il
 a estre de la dignité & du seruice de sa
 sté, les bonnes intentions d'icelle tant
 dites affaires de Cleues, que sur tout ce
 garde & concerne la deffence & con-
 ion de la liberté & repos de la Germa-
 utant qu'eux mesmes iugeront que sa
 nce & entremise comme l'affection
 e leur porte, y pourra estre vtile, les as-
 it que sadite Majesté n'est meüe à leur
 ueller les offres de sa bonne volonté sur
 cations, que pour s'acquiter enuers eux
 uoirs & offices d'un vray & cordial

amy, ancien allié & confederé, & se revancher des plaisirs que sa Maiesté & son Royaume ont receu d'eux en leurs necessitez passées, dont il leur dira qu'il ne perdra jamais la memoire.

Il semble qu'il sera à propos que ledit sieur de Boissize se contienne en sa premiere audience & proposition dedans les termes generaux de la bien-veillance de sadite Maiesté autant qu'il pourra, soit à cause de la diuersité des personnes qui y assisteront, des humeurs desquelles il n'aura eu le loisir de s'informer, & pour ce qu'il doit mettre peine de decouvrir les deliberations de ladite Assemblée & des particuliers, dont elle sera composée deuant que leur declarer ce que sadite Maiesté veut faire pour eux, & en desirer, dequoy toutefois sa Maiesté se remet en sa prudence.

Mais pour mieux se regler en cela, il faudra qu'il sçache à son arriuée dudit Prince d'Anhalt comment il aura usé, & la réponse faite par sa Maiesté à sa proposition qui luy a esté baillée par écrit signée de sa main, s'il la communique & fait voir à ladite Assemblée, & en ce cas comme elle y aura esté receuë & interpretée, & s'il est possible, sçauoir leur deliberation sur icelle, car ce luy sera vn grand advantage de tirer cet éclaircissement de luy deuant que de se presenter en ladite Assemblée.

En laquelle en tout cas sadite Maiesté entend qu'il declare, offre & confirme ce qui est porté par ladite réponse, de laquelle à cette fin leur sera baillé vn duplicata signé de

nain de sadite Maiesté.

Mais toute ainsi que sadite Maiesté s'est richement & librement fait ouverture audit Prince d'Anhalt de ce qu'elle pretend, & est tenté de faire en faueur de cette cause de ues, elle estime aussi qu'elle sera embrassé vnanimement par tous lesdits Electeurs, Princes, Estats & Villes vnies avec la generosité, fermeté & constance que la consequence elle merite, dont il tirera d'eux par écrit declarations & assurances generales & particulieres qui seront necessaires pour contenter sadite Maiesté.

Pour ce faire comme il conuient, il recherchera de voir & estre informé au vray des pannes, accords & traitez de l'union & association que lesdits Electeurs & Princes ont fait; car c'est le fondement sur lequel est basée la force d'iceux, duquel partant il faut que sadite Maiesté retire & reçoie la seureté de confiance & correspondance qu'elle pretend traiter avec eux.

Point que sadite Maiesté estime qu'ils auront reserué par les communications de ladite union, tout ce qui regarde & appartient à l'autorité de l'Empereur, la paix & concorde de l'Empire pour n'offencer sa Maiesté Impériale, & n'estre accusez de rien faire qui puisse troubler la tranquillité publique: quoy estant, importe que sadite Maiesté soit éclaircie & assurée comment ils entendront en user en ce qui concernera lesdites affaires de Cleues, comme ledit Empereur a resolu de mettre au ban de l'Empire & en proye non seule-

ment les Estats & personnes des Electeurs & Princes interessez en la cause qui n'auront obey à ses commandemens : mais aussi de ceux qui leur prestent assistance, il est nécessaire que sadite Majesté sçache s'ils n'entendent defferrer ausdits mandemens qu'ils luy en donnent leur parole en bonne forme , afin que sadite Majesté soit assurée , comme il est raisonnable, qu'elle ne sera delaisnée d'eux en general & en particulier, apres qu'elle aura engagé ses armes & sa reputation en leur faueur. Doncques ledit sieur de Boissize aura esgard de faire respondre ce poinct comme l'un des principaux duquel il doit auoir soin.

Ledit Prince d'Anhalt declarera à sa Majesté que les deux Princes de Brandebourg & de Neubourg qui sont à Dusseldorff, soudoieront & entretiendront à leurs fraiz & despens & de leurs principaux, les gens de guerre qu'ils ont ensemble de present, faisant quatre mille cinq cens hommes de pied & mille à chaval, outre les autres frais qu'il conuiendra faire: Et que les autres Princes vnis le secoureront de quatre mille hommes de pied, de mille à cheual, & d'un bon equipage d'artillerie pour six mois, ainsi qu'il est porté par la proposition, & repeté par la response que sadite Majesté y a faite.

Ledit sieur de Boissize sçaura d'eux quel ordre les vns & les autres ont donné ou donnent à la seureté & forme du payement desdites forces pour en aduertir sadite Majesté, non qu'elle se défie de leurs paroles ny de leurs moyens, mais parce que ce qui depend d'une communauté

MEMOIRES D'ESTAT, 241
é & de la volonté de plusieurs, est souvent
te à incertitude & qu'il est raisonnable,
e nécessaire que comme sa Majesté veut
chement exposer son Estat, ses facul-
t ses sujets pour les secourir, non pour
n besoin, mais de sa seule volonté, qu'el-
t assurée aussi que lesdites forces qu'ils
mettent d'employer en cette guerre, soient
tenuës comme elles doivent estre, sans
y ait faute.

auantage sadite Majesté desire que lesdits
ces vnis pouruoient que celles qu'ils doi-
faire soient entretenuës, non seulement
six mois de l'année prochaine, ainsi qu'ils
proposé, mais pour tel temps qu'elles se-
nécessaires, & que la guerre durera, car
ne les euénemens ne peuvent estre que
cux & incertains, l'on ne peut prescrire
niter maintenant le susdict temps.

tant ledit sieur de Boissize les admone-
d'y faire considération & y pourvoir,
que l'on ne soit contraint d'abandonner
reprise au milieu de la carrière & la lais-
nparfaite à la honte des entrepreneurs, &
ciudice irreparable de la cause commune
rticuliere, tant de sadite Majesté que des
Electeurs & Princes.

dit sieur de Boissize sçaura d'eux aussi
est leur aduis pour le regard du temps
faut que lesdits gens de guerre soient
s à seruir, les assurant que ceux de sadite
sté qui seront composez des plus expe-
ntez & aguerris de son Royaume, ne man-
Tome III. L

queront de l'estre, & se trouuer au camp & rendez-vous qui sera arresté & conuenu entre sadite Maiefté & eux, & surquoy elle leur fera sçauoir son aduis si tost qu'elle aura sçeu le leur, avec leur derniere resolution sur ce que dessus.

Mais ledit sieur de Boissize leur remontrera sur cela deux choses que sadite Maiefté a mises en consideration, afin que de leur costé ils y ayent tel égard que la suite & consequence d'icelle, qui est tres-importante & serieuse, le merite.

La premiere, qu'il faudra que lescdits gens de guerre que sa Maiefté enuoyera en Iulliers au secours desdits Princes, trauersent par les païs des Archiducs de Flandres.

Et l'autre, que sadite Maiefté entreprenant de les secourir se met au hazard de rompre la paix qu'elle a avec le Roy d'Espagne & lescdits Archiducs, car c'est sans doute qu'ils assisteront l'Empereur en cette cause pour la consideration de sa personne, celle de la conseruation & defence de son autorité, & pour le desir qu'ils ont de ioindre lescdits païs contentieux à leur domination.

Tellement qu'en l'un & en l'autre cas, comme sa Maiefté courra le peril de tomber en vne rupture ouuerte avec lescdits Roy ou Archiducs, soit qu'ils en soient les auteurs ou que sadite Maiefté soit contrainte pour donner passage à ses gens d'y employer les armes, il est necessaire que sadite Maiefté sçache quel estat elle peut faire de l'assistance & amitié desdits Electeurs & Princes en l'une & en l'autre.

tre occasion & necessité, n'estant raisonnable, aussi ce ne seroit prudence, que sadite Maiesté exposast son Royaume & ses affaires en ce danger pour bien faire ausdits Princes, sans estre asseurée, comme il conuient de leur deliberation & de leur foy en vn secours reciproque: partant ledit sieur de Boissize leur en fera la proposition, & aduertira sa Maiesté de leur réponse.

Et d'autant que lesdits Ele&eurs & Princes pourroient desirer de sa Maiesté quelque aide mutuelle en faueur de leurs libertez & Estats, autre que celle que sa Maiesté offre aux affaires de Cleues en contreschange & recompense de leur susdite obligation & assistance contre ledit Roy d'Espagne & lesdits Archiducs, en cas de guerre, s'ils en font la proposition & demande audit sieur de Boissize, il en aduertira sa Maiesté, & s'il iuge qu'elle soit receuable, leur donnera esperance de l'obtenir, sinon il s'abstiendra de s'y engager plus auant, sinon que de se charger d'en donner aduis à sa Maiesté.

Mais il leur fera considerer qu'ils ont & auront encore cy-apres plus grand besoin que sa Maiesté, de se lier & joindre estroittement avec elle pour ce regard, parce que la France est de foy assez puissante pour faire resistance audit Roy d'Espagne & à toute la Maison d'Autriche ensemble, comme elle a fait du temps des Roys ses predecesseurs, qu'elle n'estoit si florissante qu'elle est de present: & partant pouuoir mieux se passer de l'aide desdits Ele&eurs & Princes qu'ils ne peuuent faire de

la sienne : Et d'autant plus qu'il leur sera fort difficile de tellement aileurer l'establisement desdits Princes auxquels lesdites Duchez de Iuliers & Cleucs appartiennent, mesmes par la voye des armes qu'ils ne soient tousiours sujets d'estre inquietez & assaillis par ceux d'Autriche, principalement tant qu'ils possederont la Couronne Imperiale, laquelle ils vont perpetuans en leur Maison, en quoy ils seront tousiours commodement & aduantageusement secondez & fortifiez des gens de guerre que lesdits Archiducs de Flandres & ledit Roy d'Espagne entretiendront audit Pais-Bas, pour estre logez si pres desdits pays, & comme portez sur les lieux pour pouuoir choisir telle commodité & aduantage que bon leur semblera d'y entreprendre : Et apres auoir deposez lesdits Princes de leur heritage, se redentir & venger encore sur leurs confederes de l'assistance qu'ils leurs auront departie en cette cause.

A quoy toutefois il semble estre difficile d'obuier principalement pour l'aduenir que par deux moyens, l'un seroit de chercher & trouuer moyen de transferer & faire tomber la Couronne Romaine en vne autre Maison que celle d'Autriche : Et l'autre d'esloigner tellement du Duché de Iuliers les places & les garnisons tenuës par les Espagnols & leurs dependans que la facilité de faire cette inuasion ne fust à l'aduenir telle qu'elle est, & ne dependist de leur discretion.

Les Electeurs & Princes peuvent mieux iuger & connoistre que sadite Maesté, si le pre-

mier remede est faisable, & par quels moyens il faudroit y pourvoir, surquoy elle aura à plaisir d'entendre leur advis, offrant, s'ils trouvent bon, d'y penser & mettre la main, de les y seconder & assister autant qu'elle le pourra faire.

Mais pour le regard de l'autre, sadite Majesté estime que l'on n'y peut pourvoir que par le moyen d'une grande & puissante armée bien conduite & exploitée comme elle doit, & peut estre au mesme temps que l'on commencera la guerre de Cleves & Juliers, pour assaillir & prendre s'il est possible, les places que lesdits Espagnols & Archiduc tiennent sur la rivièr de la Meuze, & autres qui seront advisées pour estre possédées & gardées par les amis de la liberté & seureté Germanique, comme est sa Majesté : & sont aussi les Estats des Prouinces vnies, lesquels pourroient de leur part aussi fauoriser & seconder ce dessein fort utilement pour le public & pour eux mesmes, & partant y a apparence que l'on les y pourroit disposer & faire resoudre s'ils en estoient recherchés par sa Majesté, & assurez qu'elle le voulust entreprendre cependant que lesdits Electeurs & Princes travailleroient à nettoyer lesdites Duchez de Juliers.

Sa Majesté a discouru de ce dessein avec ledit Prince d'Anhalt estant icy, non pleinement & ouuertement, mais assez auant pour luy donner sujet de le goustier, comme il a monstré faire, & mesme d'en faire quelque ouerture ausdits Princes vnis, comme de luy mesme. Partant il sera à propos que ledit

sieur de Boissize apprenne de luy ce qu'il en aura fait, & en quelle disposition il aura trouvé pour ce regard lesdits Princes, pour regler selon cela, ce qu'il aura à en dire, & poursuivre par delà.

C'est le desir de sa Maiesté de conuier le Roy de la Grande-Bretagne d'entrer en cette confederation, ainsi qu'elle veut faire, pour tousiours pacifier d'avantage le party, & ne donner sujet audit Roy de prendre ialousie des armes des confederez, ny de l'employ d'icelles. Ledit sieur de Boissize leur dira que sadite Maiesté renuoye vers ledit Roy pour cét effect le sieur de la Boderie, avec charge de luy en faire la proposition, & le persuader de l'embrasser, comme sadite Maiesté veut esperer qu'il le fera; car il a souuent déclaré vouloir favoriser la iustice de cette cause, & a montré n'approuver la poursuite entreprise par l'Ele-cteur de Saxe, à laquelle il a esté induit par les Ministres de l'Empereur pour abuser de son nom & de ses armes. Lesdits Princes seront aduertis par ledit sieur de Boissize de la negociation dudit sieur de la Boderie.

Sadite Maiesté se promet que lesdits sieurs des Estats des Prouinces - Vnies des Pays Bas embrasseront cette cause à son imitation & selon ses conseils, ainsi qu'ils ont tousiours déclaré & qu'aura appris d'eux ledit Prince d'Anhalt, qui aura pris son retour par leur pays.

Et sa Majesté moyennera que le Roy de la grande Bretagne & lesdits Estats fassent trouver leurs Ambassadeurs en la premiere diette que lesdits Princes assigneront apres la pro-

chaine de Halle, ne pouuant plus arriuer à temps à celle-cy pour n'en auoir esté aduertis.

Mais sadite Majesté desire que ledit sieur de Boissize procure & obtienne desdits Electeurs & Princes, que les Princes de Brandebourg & Neubourg aillent tellement les Catholiques habitans dudit pays demeurans tant aux villes qu'aux champs, qu'ils ne seront empeschez ny inquietez aucunement en la libre iouissance de l'exercice de leur Religion par lesdits Princes, leurs principaux, ny par leurs officiers ou quelque autre sous pretexte que ce soit, sadite Majesté estant obligée comme Roy tres-Chretien, de procurer & obtenir cette seureté pour la consolation desdits Catholiques, laquelle aidera aussi à fermer la bouche & priuer de ce pretexte ceux qui pretendent vsurper lesdits pays, ce qui ne sera de peu d'efficace, mesme pour affoiblir la ligue que lesdits Princes Catholiques d'Allemagne poursuient, partant ledit sieur de Boissize fera instance qu'il soit donné acte à sadite Majesté de ladite seureté pour la consolation desdits Catholiques, & le contentement particulier de sadite Majesté.

Il est aussi tres-necessaire que sadite M. s'engageant en ladite vnion & au secours desdits Princes, ils s'obligent à elle qu'ils ne feront aucun accord & traicté general ou particulier ensemblement ou separement contraire à ladite vnion pour les affaires de Cleues ou autres qui importent à la cause commune, sans le consentement de sadite Majesté. Ce que sa

Maieſté entend eſtre compris au Traité qui ſera fait entre ſadite Maieſté & leſdits Princes ſur ladite vnion, ou qu'il luy en ſoit deli-
vré acte en bonne forme.

Ledit ſieur de Boiſſize ſ'informera des deliberations deſdits Princes ſur l'eſlection d'un Roy des Romains, & dira aux principaux eſtre bien aduertty que les Eccleſiaſtiques ſollicitent le Roy d'Eſpagne d'en faire la poursuite pour ſa perſonne meſme, puis qu'il n'y a moyen de diſpoſer l'Empereur d'y appeller & fauoriſer aucuns de ſes freres & conſins d'Allemagne, & qu'ils ſont d'ailleurs ſi foibles qu'ils ne peuvent fournir aux frais qu'il conuient faire pour releuer & faire valoir cette dignité comme il faut, que de la bourse & des deniers dudit Roy d'Eſpagne, leſquels il employera plus volontiers pour ſoy que pour les autres : partant il faut que leſdits Electeurs y prennent garde & y pouruoyent ; car il eſt certain que cette menée eſt fort aduancée & pourſuiue ſecrettement par leſdits Electeurs, qui reconnoiſſent eſtre le ſeul & vnique moyen qui leur reſte de reſtaurer l'Empire, & en iceluy ladite Religion Catholique, mais il priera de receuoir leſdits aduis & en vſer avec diſcretion.

Il ſ'informera deſdits Princes en quels termes eſt ladite ligue Catholique, & de quels Princes elle eſt compoſée, quelles forces elle fera, ſa Maieſté ayant ſceu que le Duc de Baviere en doit eſtre le principal chef, & l'Archiduc Léopold ſon Coadjuteur ou Lieutenant en ladite charge.

Aduiser s'il y auroit point moyen encore de regagner l'Electeur de Saxe, & le retirer du party des Imperialistes, dequoy ledit sieur de Boissize conferera particulièrement avec ledit sieur Landgraff Maurice, auquel sa Maiesté a toute fiance, ainsi qu'il luy dira.

S'informera de ce que fera le Roy de Danemark: car encore que du commencement il ait recommandé à sa Maiesté le droit de la Maison de Brandebourg; toutefois l'on dit qu'il a changé d'opinion depuis qu'il a sceu la pretension dudit Electeur de Saxe son beaufrere.

Il s'informera particulièrement dudit sieur Langgraff, des deliberations & moyens de l'Electeur de Brandebourg, pour sçauoir s'ils seront suffisans pour soustenir les frais de la guerre, & s'il ne sera point inquieté ou pressé par le Roy de Pologne qui doit estre sollicité de ce faire par les Ministres d'Espagne, & si ayant la guerre en ses Estats de Brandebourg, il pourra entendre & pouruoir comme il conuient à celle qui se fera en Cleues & Iuliers.

Ledit sieur de Boissize fauorisera du nom & de l'aduis de sadite Maiesté, l'entrée en la dite vnion dudit Electeur de Brandebourg, autant qu'il iugera estre necessaire pour bien faire à la cause commune, & rendre aux autres Princes pretendans tels témoignages de l'affection de sadite Maiesté enuers eux & leurs maisons qu'il verra estre à propos.

Ledit sieur de Boissize obseruera diligemment à son arriuée, & durant son séjour auprès desdits Princes, leurs inclinations & conduites en la poursuite de ses affaires, carenco-

re qu'ils fassent demonstration de les affectionner, & de vouloir s'engager bien auant aux frais qu'il conuient faire, pour fauoriser les pretensions desdits Princes heritiers presumptifs desdits pays, & que ceux-cy fassent contenance aussi d'estre fort resolu de poursuiure & defendre par leurs armes, leurs pretensions constamment, & iusques à l'extremité, toutefois comme la partie de leurs aduersaires sera puissante, & que celle desdits Princes est composée de plusieurs testes, non duites & accoustumées à la guerre, ny à porter les dépenses qu'il conuient, & qu'ils ne sont outre cela également interessez en cette cause. Il y a grande apparence de raison de se defier de la persuerance de leur vnion & volonté en la poursuite & continuation de ladite guerre, mais plustost de s'attendre qu'ils embrasseront toutes les occasions qui leur seront offertes de la terminer par vn accord ou traicté, & peut-estre par vn partage legitime de ladite succession.

Au moyen dequoy ledit sieur de Boissize sera aduerty d'y prendre garde, pour s'il s'apperçoit qu'ils inclinent à tel accord, ou autre, en aduertir diligemment sa Maiesté, & en attendant ses commandemens, mettre peine non de s'y opposer, & empescher ouuertement, s'il n'est asseuré de le pouuoir faire l'entreprenant, mais pour entretenir les choses en tel estat que sadite Maiesté puisse auoir part à ce qui se fera, & ne soit rien aduancé & accordé sans elle, si elle trouue bon d'y participer & s'en entremettre.

Ledit sieur de Boissize visitera Monsieur

le Duc de Loraine en s'acheminant en ladicte assemblée, luy presentera les lettres du Roy, l'asleurant de la continuation de son amitié, & luy dira comme ladicte Majesté l'enuoye en ladicte Diette, pour sçauoir ce que les Electeurs & Princes interuenus en ces affaires pretendront faire, pour obuier & pouruoir aux accidens & troubles qui menacent l'Allemagne à cause de ces differens.

Que ladicte Majesté est obligée par les anciennes & nouuelles alliances, que ses predecesseurs & elle ont contractées & entretenues avec lesdits Electeurs & Princes, d'affectionner leurs affaires, & les defendre d'oppression & violence.

Que l'Empereur eût pris bon conseil, s'il eust recherché les moyens de composer & terminer ces differens par voye amiable, sans s'opposer si formellement, comme il a fait à la prise de possession des Princes de Brandebourg, & Neubourg, puis qu'ils sont les deux heritiers plus proches, du feu Duc de Cleues : Mais l'enuoy en Iuliers de l'Archiduc Leopold, & ses actions & comportements depuis qu'il s'est saisi de la place, & les mouuemens de l'Electeur de Saxe, qu'il a suscitez & fomentez, tesmoignent assez que le but dudit Empereur & des siens, est de s'emparer de ladicte succession, souz pretexte de conseruer son auctorité, & d'astraindre lesdits Princes à se soumettre à ses iurisdicions. Outre cela lesdits Imperialistes s'aident du pretexte de la Religion, pour esmouuoir & obliger le Pape & les Electeurs, &

Princes Catholiques de la Germanie à favoriser son dessein, qui est vn chemin pour remplir non seulement lesdits pays de Iuliers, Cleues, & les autres qui dependent de ladicte succession, mais aussi l'Allemagne, & voir la Chrestienté, de feu & de sang.

Que sa Majesté est tres desplaisante de voir les choses en ces termes, mais que la coulpe en doit estre attribuée audit Empereur, & à ceux qui l'eschauffent & opiniaftrent en cette poursuite : en laquelle ledit sieur de Boissize luy dira que ladicte Majesté ne deffendra à ses amis & alliez, ne le pouuant faire aussi sans manquer à sa foy, à sa reputation, ny à sa Couronne, laquelle receuroit vn desauantage trop grand, si lesdits pays tomboient au pouuoir de la maison d'Autriche, qui n'y a aucun droit. Aquoy ledit sieur de Boissize remonstrera audit Duc, qu'il y a aussi notable interest, pour estre si voisin desdits pays qu'il est & partant il le priera au nom de ladicte Majesté, de vouloir se joindre a elle en la deffence de cette iuste cause.

Quant aux moyens par lesquels sa Majesté entend y proceder ledit sieur de Boissize luy dira qu'elle s'en resoudra suivant ce que resoudront lesdits Electeurs & Princes, deuers lesquels ladicte Majesté l'enuoye, car s'ils ont volonté, & moyen de sortir desdits differends par voye d'accord, ou arbitrage, il a charge de les y stimuler & favoriser, comme si c'est chose qu'ils ne puissent obtenir de l'Empereur, sans faire trop grand preiudice à leurs droicts & libertez, leur offre son assistance contre

quiconque entreprendra de les opprimer & violenter souz quelque pretexte que ce soit.

Ledit sieur de Boissize fera part aussi à Monsieur de Vaudemont , de la deliberation de sa Maiesté en luy baillant la lettre qu'elle luy escrit , & entretiendra sadite Maiesté , aduertie des propos qu'ils luy auront tenus comme de tout ce qu'il aura appris en son passage à Nancy , où il visitera pareillement la Duchesse de Lorraine , la salüant au nom de leurs Majestez , & luy renouvelant les assurances de l'amitié qu'elles luy portent. Il fera aussi les complimens conueables enuers la Duchesse de Cleues , veſue du feu dernier Duc , Madame de Vaudemont , & la Princesse de Lorraine , sœurs dudit Duc : & si la Princesse fille d'iceluy est à Nancy , il la visitera aussi , & dira à leurs Alteſſes , auoir charge de leurs Majestez de leur mander leur bonne disposition.

Le Roy fait bailler audit sieur de Boissize les lettres adressantes aux Electeurs Ecclesiastiques dudit saint Empire pour s'en seruir , soit qu'il passe és villes de leur residence , s'il iuge qu'il soit à propos qu'il les voye , ou leur faire entendre les bonnes intentions du Roy , pour bien faire au public , & mieux seruir sa Maiesté , auquel cas il vſera enuers eux des offices de complimens qu'il conuiendra & employera la creance que sa Maiesté luy a donnée par leſdites lettres , ainsi qu'il iugera estre expedient pour

l'effet susdit , & leur donner bonne odeur des commandemens que sa Maieſté luy a faits , & de ſes particulieres actions. Pourquoy faire il pourra prendre l'auis des Electeurs Princes & autres affectionnez à ſa Maieſté , & à la cauſe generale.

Pareillement ſadite Maieſté fait bailler audit ſieur de Boiffize les lettres particulieres aux villes de ladite vnion , & à celle de Cologne , pour luy donner creance en icelles , & des lettres de pouuoir , en forme requiſe , pour negocier , accorder & traiter avec leſdits Electeurs , Princes , Eſtats , & villes que beſoin ſera , tout ce qui luy eſt ordonné par le preſent memoire , & ſera d'abondant neceſſaire pour le ſeruiſſe de ſadite Maieſté.

Fait à Paris le 30. iour de Decembre , 1609.
ſigné Henry , & plus bas Bruſſart.

LES NOMS DES PRINCES
& leurs rangs , tenus en l'assemblée d'iceux , faite à Hall , en l'année 1610.

POUR Monsieur l'Electeur Palatin , Monsieur le Duc des deux Ponts , le Comte de Solme , & autres de son Conseil Priué.

Monsieur de Brandebourg l'Electeur.

Monsieur le Palatin Philippe Louys , Duc de Neubourg.

Monsieur le Marquis Ioachim Ernest de Brandebourg , communement nommé d'Auspac.

Monsieur le Duc de Vvitemberg.

Monsieur le Landgraff , Maurice de Hesse.

Monsieur le Marquis de Baden.

Monsieur le Prince Chrestien d'Anhalt , pour luy & toute sa maison.

Messieurs les deux Princes aînez de Neubourg, Vvolfgang Guillaume & Auguste.

Monsieur Iean George de Brandebourg , frere de l'Electeur, administrateur de l'Euesché de Strasbourg.

Pour le Marquis Christian de Brandebourg, frere de celuy d'Auspac son Ambassadeur & Chancelier.

Pour les Comtes Protestans du Rhin , & de là , & Monsieur le Comte Iean de Nassau , & le Comte de Hanau.

Les Comtes de Hohenloo Nolusterin , & tous les autres de Franconie.

Les Deputez des trois principales villes d'Allemagne. A sçavoir , Strasbourg, Nuremberg , & Ulme , avec les Deputez de toutes les autres villes Protestantes des trois cercles , de Cimbre, du Rhin , & de la Franconie.

FORME D'ESCRIRE PAR le Roy aux Potentats d'Italie & d'Allemagne.

*A TOVS LES PRINCES D'ITALIE
& d'Allemagne.*

MON Cousin le Duc ou Comte de &c.
Sauf au Duc de Sauoye , l'Archiduc de Flandres & Duc de Lorraine, auxquels on met mon frere. Et au bas , Vostre bon frere. Celle du premier est contresignée , & les autres non , l'on met sur celles de l'Archiduc , A mon frere l'Archiduc Albert d'Autriche : & à l'Infante , A ma sœur la Princesse d'Espagne , Archiduchesse d'Autriche.

AVX ESTATS DV PAYS-BAS.

A Nos tres-chers & bons amis , alliez & confederez les Estats Generaux des provinces vnies des pays-Bas : la lettre se ferme en grand , & depuis qu'ils sont reconnus Souuerains, l'on a mis au bas; Vostre bon amy & confederé.

AVX PRINCES D'ALLEMAGNE.

A Mon Cousin le Comte Palatin du Rhin , Duc de Bauiere , Prince & Electeur du saint Empire.

A mon Cousin le Duc de Saxe , Prince & Electeur du saint Empire.

Il y a ces deux freres , Jean Cazimir , & Jean Ernest, Ducs de Saxe , auxquels on escrit en commun avec luy , & en particulier. Aussi il y a encore vn frere, auquel on escrit , à mon Cousin Jean George , Duc de Saxe.

A mon Cousin le Marquis de Brandebourg , Prince & Electeur du saint Empire.

A mon Cousin Ernest de Brandebourg, c'est son frere.

A mon Cousin Frideric , Marquis de Brandebourg , à Auspac.

A mon Cousin Jean George , Marquis de Brandebourg , Duc de Legendorff , c'est le

frere dudit Ele&teur , iadis administrateur de
Strasbourg.

A mon Cousin le Duc Philippe Louys Com-
te Palatin du Rhin , Duc de Bauiere , & de
Neubourg.

A mon Cousin le Duc Vvolfgang , Guillau-
me Comte Palatin du Rhin, Duc de Bauiere
& de Neubourg , c'est son fils aisné.

A mon Cousin Iean Comte Palatin du Rhin,
Duc de Bauiere , & des deux Ponts , il est
administrateur du Palatinat Ele&toral.

A mon Cousin le Duc de Vvitemberg , Iean
Frideric.

A mon Cousin Louys Frideric , Prince de
Vvitemberg.

A mon Cousin le Marquis de Baden.

A mon Cousin Henry Iules, Duc de Brunf-
wich , & de Lunebourg.

A mon Cousin le Prince Christian d'An-
halt.

A mon Cousin Maurice Landgraue de Hes-
sen à Cassel , Colonel General des gens de
Guerre Allemans entretenus pour mon ser-
vice.

A mon Cousin de Landgraue de Hessen à
Adernstet.

AVX VILLES IMPERIALES.

TR E S - chers & bons amis.

A CEUX DE STRASBOURG.

AVx chers & bons amis les Maistres , & Senat de la ville & republique de Strasbourg.

A mon Cousin l'Administrateur & Chapitre , & aux Doyen , Chanoines, & Chapitre de Strasbourg.

AVX PRINCES VNIS ET VILLES.

AHauts , Puissans, & Excellens Princes les Electeurs & Princes du saint Empire, nos tres-chers Cousins , & les Estats & villes dudit saint Empire , vnis & allicz de present en la ville de

A Messieurs les Electeurs, Princes, Estats, & villes du saint Empire de l'union.

DISCOVRS PRESENTE' A LA
Reyne Mere du Roy, en l'année 1612.

MA D A M E ,

Les Roys & ceux qui ont le gouvernement des Monarchies ou des Republiques, doiuent sçauoir les bons & mauuais deportemens des hommes qui leur sont assuiettis , & ne point negliger de faire iugement de ce qui se fait

& dit parmy les plus grands & parmy les plus petits de leurs peuples , mais d'autant qu'il est impossible qu'ils voyent tout d'eux mesmes , il est nécessaire qu'ils voyent aussi par les yeux d'autrui. Quels yeux plus clairvoyans & plus fidelles peuvent ils choisir que ceux de leurs bons suiets conduits par le respect & deuoir naturel qu'ils ont au service de leur Prince, & par l'intérêt particulier de leur conservation qui depend de la sienne. Excusez , MADAME , si la tres-humble & tres-entiere affection que ie dois à vostre service me porte hardiment à vous faire sçauoir ce que ie puis apprendre des discours & iugemens diuers qui se font par les compagnies de plusieurs personnes de qualité, de sçauoir & d'experience sur l'estat present , & sur les occurrences des affaires , & coniectures pour l'aduenir , s'accordant tous en cela , que le premier & principal point , est de pouruoir à l'instruction, conduite & conservation de la personne du Roy , en laquelle seule consiste le salut & la vie de cette Monarchie. Tibere sur telle importance disoit vn iour à Nero , & à Drusus destinez à l'Empire : Qu'ils estoient nés sous vne telle constellation que le bien ou le mal qu'ils feroient en leur ieunesse retourneroit à l'vtilité ou à la ruine de la Republique , attachant par ce iugement la bonne ou la mauuaise fortune des Empires ou des Royaumes à la premiere nourriture qui se donne à vn ieune Prince, laquelle à cette fin doit estre commise à des personnes sans reproche , de preud'homme & de suffisance reconnuë &

approuvée de tous les gens de bien. La sage Mamée se voyant tutrice de l'Empire & de l'Empereur Alexandre Seuer son fils qui receut cette dignité en suçant le lait de sa nourrice, donnoit aucunes fois des trefues aux affaires publiques pour penser soigneusement à l'instruction de son fils. Elle faisoit mettre des gardes à toutes les portes de son Palais quin estoient ouuertes qu'à ceux qui portoient le caractère d'honneur empraint dessus leur face : elles estoient fermées aux vicieux, aux flatteurs & boufons, & à telle sorte de gens, dont la frequentation affoiblit & ruine le bon naturel du Prince. Elle luy donna vn Precepteur des plus consommez en toutes sciences & des plus vertueux qui fut alors entre les Romains. La France, MADAME, ne doit rien à l'Empire Romain, vous surpassez Mamée en prudence & toutes les autres Dames qui se sont renduës recommandables à la posterité. Cét Alexandre ny tous les Cefars en ce qu'ils ont eu de releué n'egaloit pas nostre ieune Roy ; Si vostre Maieité luy donne à ce premier iour de l'an, mais plustost si vous estrenez vostre peuple en luy donnant vn Precepteur semblable à vn Cardinal du Perron ou à vn President du Vair, ou à quelque autre de ce merite, qui par son sçauoir & l'exemple de sa bonne vie appuye ses royales inclinations. Ce fut vn extrême contentement & vn espoir de fortune prospere à ce Philosophe, lors qu'ayant esté ietté par la tourmente au port des Rhodiens, il apperceut sur la gréue des formes de pied d'hommes & de figures

Mathematiques imprimées sur le sable , iugeant par là que les sciences y estoient en credit, & que celuy qui y commandoit estoit vertueux. Aussi quand nous voyons nostre Prince en vne si tendre ieunesse par forme de passe-temps fabriquer des nauires , tirer des plans , fortifier des places , ordonner des batailles , nous croyons, & les estrangers mesme , que si cét esprit est bien mesné , tous les Royaumes ne sont faits que pour estre vn iour le prix de sa vertu & la conqueste de ses armes : Nous releuons en le voyant toutes nos esperances , que nous pensions apres vn si funeste coup estre du tout enseuclies dans le tombeau de nostre grand Roy : Mais il n'est point mort , nous en voyons l'image , les actions , le vif esprit , & ferme entendement en son fils , il n'a changé que de nom , & s'est renouvelé comme vn Phoenix en ses cendres royales. Si bien que l'on peut dire que l'ame de ce grand Henry se trouue en son Louys avec plus d'apparence de verité que ne faisoit cét Empereur Romain qui vouloit que l'on creust qu'il auoit l'ame d'Alexandre. Ainsi , MADAME , quand nous considerons comme cette belle plante qui naturellement se porte iusques dans le Ciel , d'où elle est descenduë , est si mal cultiuée , & que cét esprit releué s'enerue & s'amolit s'il n'est secouru & raffermi par la suffisance & integrité de vie de quelque grand & qualifié personnage , qui approche de luy , efface les traits fardez & cét ombrage de sçauoir de son premier maistre : nous desesperons de l'aduenir , & nos ioyes con-

ceux se conuertissent en plaintes & soucis lamentables. Car quel profit peut faire le Prince de l'exemple de sa vie & de ses instructions? Ses leçons sont en toutes leurs parties prodigieuses sans testes & sans pieds, semblables à ces monstres qui lors que les Geants firent la guerre à la Lune, nasquirent surchargez de ventre & rempans contre terre. C'est vn beau dés-ieuner à ce ieune Prince de luy dire, que la grandeur d'Espagne s'estoit accreuë par la lance de chair: C'est bien vn entretien digne d'un Roy de luy reciter la vie de la courtisane Flora & de Pomone, & des avant parlers des comedies, & mille autres discours effeminez, à bastons rompus & à cordes aualées, & si mal mis en œuvre, que ceux qui entendent celuy qui les iargonne n'estiment moins la plagiaire, n'ayant pas l'esprit de déguiser ses larcins. Quelque bon François voyant cet abus vn peu deuant la mort du deffunt Roy, luy en fit le rapport & le contraignit, aydë de la force de la verité, d'auoir contre sa coutume, la mauuaise eslection qu'il en auoit faite, & qu'à la verité il auoit mis auprès de son fils vn gouuerneur choisi à sa fantaisie & digne d'un grand Prince, & vn Precepteur ignorant, qui par l'importunité de Monsieur de Vendosme & d'autres estoit en cette place plustost pour luy apprendre vn bien peu de la Grammaire que pour autre suiet, mais qu'il en choisiroit vn autre de meilleure estoffe quand il seroit plus grand, pour l'esleuer & luy donner toutes les touches necessaires pour sa parfaite instruction. On sçait aussi que vo-

estre Majesté informée du peu de sçavoir de ce payeur de bonne mine & de son infame & couuerte vie , ne vouloit en façon du monde qu'il eleuast nostre Prince. L'institution qu'il a faite imprimer pour Monsieur de Vendosme, tesmoigne auez le peu de pieté & la corruption de ses mœurs quand il dit ,

Sans faire le deuot que ton cœur soit entier

Autant que peut porter la loy de ton mestier.

L'impiété de ces deux vers & assez rudes , le font connoistre ce qu'il est, vostre Maieité les a pû voir. Or maintenant que le Roy est en vostre tutelle, mettez auprès de luy quelque personnage de bonne reputation , nourry en la connoissance de Dieu, qui la luy imprime , & l'instruise en la crainte & à l'amour qu'il doit auoir pour ses sujets & luy represente que c'est la puissance des puissances qui donne les Royumes & les oste, qu'il est le iuge des Roys, comme les Roys le sont des hommes , qu'il n'a point d'acception du sang ny des personnes , que bien souuent il marie les sceptres avec les houlettes , que c'est la seule tramontane qui aligne toutes leurs actions & leurs affaires , & conduit leurs desseins à bon port. C'est le sujet où il faut s'arrester principalement puis que regner c'est luy obeir. Le Sculpteur Phidias faisant la statuë de Minerue enchassa si industrieusement l'effigie de son visage dans le bouclier de cette Deesse , qu'il en fit comme vn poinct principal auquel toutes les autres parties respondoient comme du centre à la circonference, tellement que si quelqu'un eust voulu tirer l'image de cet excellent ouurier

sans

sans ce visage, toutes les autres pieces se fussent trouuées en desordre & informes. Les Roys sont les parcelions & images de ce grand Soleil de iustice, si nous separons les ouurages de ce grand ouurier, toutes les bonnes parties du Prince, sa force, son courage, son pouuoir, & toutes les autres luy tourneront à confusion. Les grands Roys de Perse qui n'estoient pas esclairez de la connoissance du vray Dieu ny de la foy, neantmoins par quelques rayons spirituels remarquoient en leurs puissances vne cause superieure & vn premier mobile qui les faisoit mouuoir, qui leur donnoit le commandement & à leurs sujets l'obeissance: & pour cette raison ils auoient vn Chambellan ordonné à cét office pour leur venir dire tous les matins, Leue toy, SIR B, & pouruoy aux affaires auxquelles le grand Dieu t'a ordonné de pouruoir, ils pouuoient bien commencer leurs iournées & luy donner les premices puis qu'ils ne les pouuoient heureusement finir sans sa grace & son assistance. L'on deuroit faire de mesme, non seulement le matin, mais à toutes heures donner cette impression à nostre ieune Roy, & disposer cét esprit à la connoissance de cette premiere cause maintenant qu'il est en âge d'estre repris. Le Soleil, qui en son Orient se peut regarder fixement, nous esbloüit en son midy, dans trois ou quatre ans ce Prince ne sera plus suiet à fléchir, il commandera au lieu d'obeïr. C'est à V. M. particulierement à y auoir l'œil comme mere, vous seriez responsable deuant Dieu s'il arriuoit des desordres de sa mauuaise

nourriture. Souvent par punition de Dieu telles indulgences, ou plutôt negligences, retournent sur les testes des peres & des meres, & de ceux qui ont la charge de la jeunesse des Princes : Vos sujets vous supplient de redoubler le deuoir de mere, & vostre pouuoir en vne instruction de si grande importance; leur voix est vn Echo general, tout le monde y contribuë, contentez les en chose qui ne va qu'à vostre honneur & à vostre profit. Ce n'est pas assez de regler l'esprit, il faut qu'il y ait du rapport & temperer les exercices trop violens du corps, les voyages de Ruel sont aucunement à craindre. La feuë Reyne mere avec son grand courage auoit de la preuoyance, & n'esloignoit point de veuë ses enfans. En matiere d'Estat pour ne point faillir, il se faut rendre presentes les choses qui peuvent arriuer; c'est remedier au mal de le preuenir: car encore que les temps ne soient en apparence semblables, ils le sont en effect, c'est prudence que de craindre les choses les plus assurées, puisque les grands calmes sont presages des grandes tourmentes, puisque les grands naufrages arriuent souvent à l'entrée du port, puisque nos meilleurs amis le plus souvent nous trompent. Vous l'avez assez reconnu depuis six mois à vos despens, MADAME, ne vous assurez de personne qu'à bonne veuë: ceux qui font les grandes fautes les scauent & doivent mieux reparer & en faire leur profit. Les vices espalent la vertu & la font paroître. Ceux que vous pensez auoir obligez & arrestez à vostre service par tant de sortes de liberali-

tez, au lieu d'apporter des remedes necessaires au mal qu'ils voyent, l'ont par aventure entreteu, voire augmenté par leurs artifices suivant la mesure de leur interest. Ils vous ont imprimé en l'ame vn si grand estonnement qu'ils vous ont fait oublier vostre autorité pour accroistre la leur. Je sçay qu'il faut donner quelque chose à la crainte, vn accident inesperé accable & estonne l'ame, mais apres les premiers mouuemens il faut reuenir à soy. Les plus forts esprits ont flotté sur cette tourmente, mais peu apres voyant l'estat paisible, ils se sont estonnez de leur trop grand estonnement, ils se sont estonnez des desseins de ceux qui l'augmentoient & de leur crainte propre. Faites enainfi, MADAME, & maintenant que vous auez les yeux ouuerts & que ces tenebres plus qu'Egyptiennes sont dissipées, que leurs filets sont percez, & leurs intentions reconnues, prenez vne ferme resolution, animez vous de vos propres pointes, faites que les discours que vous tintes dernièrement à table portent coup, vostre parole & l'effect soient vne mesme chose, que ceux que vous redoutiez sans sçavoir leur pou de puissance, tremblent avec raison sous vostre autorité: C'est le seul moyen de s'assourer. Visez s'ils continuent en leurs temeritez, de remedes qui les arrestent: ce n'est qu'irriter le mal que de l'auoir: vn ulceré a besoin de la coupe: donner, estre libérale, accorder ce qu'ils demandent, auoir ce qu'ils font en le souffrant, est leur donner le ieu sans voir les cartes & nourrir la passion: le desir de regner & commander s'offeint plu-

cost par la punition que par la recompense. L'ambitieux n'a point de milieu, il se porte toujours aux extremittez, & le plus souvent aux precipices. Vn Empereur parlant de l'ambition d'un grand de sa Cour qui auoit dessein sur l'Empire, & mesme sur sa personne, disoit, Donnez luy l'anneau Imperial, enuoyez luy la fortune dorée qui est en ma chambre, permettez luy de commander, s'il me reste le nom d'Empereur, il ne sera iamais content, l'enuie de regner ne finit point que par la mort ou par la iouissance. Dieu mercy iusques à cette heure il n'est rien esclos de tant de menées : le desir de regner en France aujourd'huy, c'est de faire ses affaires en la minorité du Roy. La mort de nostre grand Alexandre a fait naistre plusieurs Alexandres, chacun desquels possible voudroit auoir quelque pièce de la depouille du Lyon ; ils en redoutoient le courage & les ongles durant sa vie. C'est peu de chose que le bien, qu'ils fassent fortune & s'aident du temps, il le faut couler : mais si l'ambition, ou plustost leur propre malheur les portoit à la desobeissance, pratiquez les conseils qui ne sont honorables qu'en l'exécution. Vn ancien Conseiller d'Estat disoit, qu'il falloit desraciner la sedition dès sa naissance en depeschant les chefs & les auteurs de la rebellion. En vain on aura fait mourir vn Brutus, vn Cassie, vn Connestable saint Pol, vn Marschal de Biron, si l'on endure & souffre ceux qui taschent à les imiter. Vous ne serez iamais absoluë, & serez tous les iours trauersée si vous ne faites vostre profit

de ces exemples notables, imitez les vous releuerez les fautes passées si par trop de prudence on les doit nommer fautes, vous sçaurez lors ce que vous estes, tous les iours la fortune vous en ouure le chemin avec la iustice, vous ne suiuez point les voyes obliques dont beaucoup de gens se sont seruis pour se deffaire de ceux qui leur nuisoient. Quand Tibere vouloit perdre ceux qui meïsrisoient son autorité & se vouloient rendre trop necessaires, il les combloit de bien-faits pour les esblouir, les loüoit par tout pour leur seruir de pieges, souffroit d'eux quelque trait de vanité, afin de leur donner des ailles pour les esleuer plus haut que leur portée, & lors il les punissoit en gros & avec resolution, quelques intercesseurs & entremetteurs qu'ils eussent à parler & prier pour eux. Il faisoit en homme d'Estat, car à l'endroit de ces broüillons & entreteneurs de menées, c'est pieté d'estre cruel, & cruauté d'estre humain. Si vostre Majesté sçauoit avec quelle impatience toute la Cour porte les brauades que l'on vous fait tous les iours, si grandes qu'il faille que d'estre au Roy soit estre au moindre maistre, puis que l'on gourmande ses seruiteurs domestiques dedans son Louure en vostre presence, vous loüeriez leur bonne volonté, ils porteront leur vie par tout au simple commandement que vous ferez. Ceux qui voyent clair à ce qui se passe, iugent bien que leurs demandes & leurs entreprises ne se font que pour taster le poux, sonder le guay, & tenter la patience de vostre Majesté pour entreprendre choses plus grandes.

M 3

si vous leur souffrez & ne résistez à leurs demandes. L'on en blasme sur tous autres ceux que vous rendez depositaires de vos intentions, ces Conseillers lasches & sans courage qui se lairoient volontiers plumer la barbe pour faire passage à leur fortune & à leur avarice; ces Mercurès qui empruntent la qualité de toutes les planettes, ces herbes Camelionides qui prennent les couleurs du terroir où elles sont plantées, & qui abusent vostre Maesté, luy disant qu'il ne faut rien alterer, que vos ennemis peuvent beaucoup, & que Dieu & le temps où nous sommes deffend les vangeances. Le feu Roy n'a fait estat de leur conseil que pour le point d'honneur & pour les avoir mis où ils sont & en leurs charges, & disoit neantmoins que c'estoient des temples de Babylone qui n'auoient que l'apparence du dehors. Sa Maesté auoit raison, car entrez dedans & les sondez, vous trouuerez que l'on adore aussi bien en France le veau d'or qu'en Egypte. L'estime qu'il faisoit de Monsieur de Sully & du President Ieannin, vous oblige à les croire & vous seruir de leurs conseils. Ils sont des plus capables & des plus fermes en leurs résolutions, & connoissent les personnes & les moyens de les ranger. Ce changement de visage que ledit sieur de Sully a donné à la France necessiteuse, la rendant opulente par son mesnage & industrie, tesmoigne assez sa suffisance: les remonstrances qu'il faisoit aux volontez du Roy & les résistances à tous les grands demonstrent sa vertu, & s'estant maintenu entre tant d'ennemis sans ployer sous la

crainte & sous leurs menaces , il a fait voir quelle est sa prudence & quel son courage: les ennemis mesmes disent que luy seul est plus utile au public , & sçait mieux les affaires que tous les autres ensemble , & pourveu qu'il veuille relâcher vn peu de sa trop aigre procedure ce sera vn digne seruiteur à vostre Majesté. Il ne tient point à luy , encore que l'on tasche à le reculer des affaires , qu'il ne die librement ce qu'il pense du peu de respect que l'on porte à la memoire du deffunt Roy , & du peu d'estat que l'on fait de nostre ieune Prince, comme si nous estions moins obligez à l'honorer en l'âge où il est , que s'il estoit en sa majorité. Il ne laisse d'estre reputé le pere de ses sujets , comme les Romains ne laissoient d'appeller leur Empereur le pere de la patrie en quelque âge qu'il fût. Et si la dignité de Patriciat anciennement deliuroit le fils de la puissance du pere , à plus forte raison les Roys, qui sont nos peres, doiuent estre reputés majeurs en leur minorité. S'il est continué en son intendance generale , il luy sera plus aisé qu'à vn autre de conseruer les droits de sa M. & de regler les affaires qui s'en vont estre découuës s'il n'y met ordre sous vos commandemens. Il ne sera plus d'auis d'innouer rien aux places qui ont esté commises entre les mains de personnes choisies & fideles , si ce n'est par felonnie ou trahison commise. V. M. n'en doit gratifier aucun & les changer de main , estant tutrice & regente elle doit conseruer & ne point aliener : durant l'interregne tout demeueroit en mesme estat tant que

l'Empereur fut majeur ou estably. Il faut maintenir les anciens seruiteurs en leurs honneurs & recompenses pour donner courage de bien faire aux nouveaux : Il feroit beau voir Monsieur de Luffan & d'autres qui ont bien seruy hors de leurs gouuernemens , il leur seroit bien plus honorable de mourir sur vne bresche pour la deffendre & doubler les garnisons à leurs propres despens. L'on ne doit point permettre au Gouverneur de Valence de tirer recompense de la place si vous ne la mettez entre les mains d'un bon Catholique qui n'ait point d'intelligence avec ceux de la Religion ou autres partisans, elle importe à l'Estat & est en leur bien seance. Quand Monsieur le Comte de Soissons sera de retour, resmoignez luy en la reception que vous luy ferez, combien auront esté agreables au Roy & à vostre Majesté les actions heroïques & les protestations & resmoignages de fidelité qu'il vous a rendus aux Estats de Rouën. Ce grand Prince avec les grands auantages & qualitez naturelles & acquises qui le releuent par dessus tous les autres, a toujours eu cette belle partie en recommandation , qu'il n'a iamaïs trempé en aucune menée, encore que les enuieux de sa bonne fortune & ses ennemis ayent souuent tasché durant la vie du deffunt Roy de le trauerser & rendre sa puissance suspecte en l'accusant de desrober insensiblement les volontez & bien-veüillances de tout le monde. Les Princes doiuent prendre exemple sur luy , & rendre l'honneur & le respect dû au Roy, puis qu'ils ne peuvent rien sur sa Maie-

fé. L'on dit que Cesar en releuant les statues de Pompée aſſeuroit les ſiennes. De meſme les Princes en honorant le Roy ſont honorez & reſpectez des autres pour l'honneur qu'ils luy rendent. C'eſt l'entendement qui void, c'eſt l'entendement qui oit, tout le reſte eſt aueugle : auſſi les inferieures parties du corps politique, comme les Princes, ſont aueugles, & ne peuvent rien ſans le regime eminent de l'ame de ce corps, qui eſt certe ſupreme puiſſance que l'on reconnoiſt au Roy. Meſnagez avec prudence l'affaire du Cardinal Bel-
 larmin, & conſervez ſoigneuſement l'union & l'amitié que vous auez avec ſa Sainteté, mais que ce ſoit avec vn tel temperament que pour la conſerver, par faute de courage vous ne re-
 laſchiez aucune choſe de ce qui touche à l'honneur & autorité du Roy, & à la voſtre; meſme en vne affaire purement d'Eſtat, & non de doctrine. Le breuet de deux mille eſcus à Rochefort tient tout le monde en halaine, les grands ſeruices qu'il a rendus & peut rendre, diſpoſera beaucoup de monde à ſervir fidèlement. Vous faites comme le Roy Louys XI. qui acheproit le temps, & donnoit à ceux qui le pouuoient ſervir, & à ceux qui luy pouuoient nuire, comme les Romains ſacrifioient à Iupiter, afin qu'il leur fit du bien, & aux mauuais demons, afin qu'ils ne leur fiſſent du mal: mais faites mieux, MADAME, que vos liberalitez ſoient departies avec iugement & connoiſſance de cauſe, à gens de merite, fideles & de ſervice. Il n'y a rien qui faiſſe haïr le Prince & mettre la volonté des hommes courageux en compromis, que

quand ils voyent ceux qui ne seruent aupres du Prince que d'ombre & de nombre, estre auancez & pensionnaires, & ceux qui peuuent seruir estre mesprizez. Il y aura force mescontentement à ce premier iour de l'an : la plus grande consolation à vos seruiteurs est de n'esperer rien, & de ne desesperer pas aussi, & pour mon particulier, quelque chose qui m'aduienne, ie m'arrestteray tousiours à mes premiers vœux. Ie tiendray au milieu de mon naufrage le timon droict, & seray semblable en l'affection & seruice que i'ay vouë au Roy & à vostre Maiesté, à ce Iupiter Olympien, que façonna le Sculpteur Phidias, de telle façon qu'il demeuroit tousiours ferme & stable sans tourner sa veuë autre part, que où il l'auoit vne fois adreſſée.

TRES-HVMBLE REMONSTRANCE
*de la Cour de Parlement de Prouence
 au Roy, sur la poursuite faite au Con-
 seil de sa Maiesté, par Monsieur l'Ar-
 cheuesque d'Aix.*

SIRE,

Vostre Cour de Parlement de Prouence ayant eu cet heur durant les tendres années de vostre Minorité de conseruer la Prouince sous vostre obeyſſance, en plus de repos & tranquillité qu'aucune autre de ce Royau-

me , elle se croit maintenant à l'entrée de vostre Maiorité , obligée de veiller avec les mesmes soin & fidelité , à ce qu'il ne s'y entreprenne rien contre le bien de vostre Estat & droits de vostre Couronne.

D'autant que ce qui peut avoir esté fait sous l'infirmité de vostre bas aage , a aussi moins de force , & tire apres soy moins de consequence : ce qui seroit maintenant fait durant vostre pleine & legitime administration , pourroit sembler autorisé de vostre nom , & de vostre regne , & donner prise à ceux qui alleguent les exemples pour titres des entreprises qu'ils font sur les droits de vostre Couronne.

C'est ce qui la porte maintenant à vous adresser cette remonstration qui est la premiere qu'elle vous aye encore fait , laquelle elle vous presente avec autant d'humilité & sincerité , qu'elle vous souhaite de grandeur & de prospérité.

C'est, SIRE , sur vn sujet qui en apparence semblera peut estre leger , mais bien considéré, si graue , & de si grande importance qu'autre qui se puisse offrir , puis que l'on veut sous vn pretexte specieux de Religion, & avec la faueur mesme de vostre nom & de vostre autorité , saper les fondemens de l'Estat, & en renuerser les Loix sur lesquelles il est appuyé.

Vostre Cour , SIRE , ne vous donnera iamais auis de rien dénier à l'Eglise du respect qui luy est dû , ny diminuer aucune chose des droits qui luy appartiennent : au

contraire elle vous représentera toujours , que la pieté est le principal ornement de vostre Couronne , & qu'il faut que vostre grandeur Royale prenne sa iuste croissance dans le sein de cette sacrée mere, & soit comme nourrie & élevée du lait de ses vœux & prieres.

Aussi ne sera-il jamais dit qu'en l'administration que vous luy avez commise de vostre iustice Souveraine, elle manque en rien , ny au respect, ny à la protection de cét Ordre saint, mediateur entre Dieu & les hommes , elle croiroit en cela trop vous deservir.

Mais , S I R E , si quelque particulier , ou par zele inconsidéré , ou par ambitieux dessein se veut servir de ce pretexte , pour alterer la police du Royaume, ou entreprendre sur vostre autorité, on ne verra jamais que pour fuir , ou la hayne ou l'enuie dont on la voudroit charger , elle relasche rien de l'obligation qu'elle a aux Loix & au bien du Royaume.

Depuis l'heure infortunée qui priva le siege Archiepiscopal de cette ville de ce grand personnage Messire Gilbert de Genebrard , celebre en condition & pureté de vie , & qui est vne grande lumiere en l'Eglise, si elle n'eust esté offusquée par les vapeurs qui troubloient les esprits du temps. Vostre Cour de Parlement a toujours passionnement désiré de viure avec Messire Paul Huraut son successeur, en la paix , & concorde , scante en la Religion & la Iustice , & nourrir de sa part la charité qui doit estre le bien de ces

deux grandes puissances.

Elle ose assurer & protester à vostre Majesté, qu'il n'est iamaïs party d'elle aucune action, voire la moindre qu'on puisse coter, qui ait deû en rien déplaire audit sieur Archevesque, ny l'aliener de la charitable affection & dilection qu'il doit à ladite Cour.

Et toutefois non-seulement toute la France, mais quasi toutes les parties de l'Europe sont abreuvéés & scandalisées des aigreurs & animositez que ledit sieur Archevesque a fait éclater contre elle, en toutes les occasions, sans en avoir eu aucun autre sujet, sinon qu'il n'a pû supporter le chastiment qu'elle a fait de quelques crimes les plus horribles & épouvantables, que l'imagination de l'homme puisse concevoir, dont quelques Ecclesiastiques se sont trouvez conuaincus.

Il a creû que la dignité de l'Ordre estoit profanée par la peine de telles gens; & vostre Cour au contraire, que la pureté de l'Eglise, & sa splendeur luy estoit renduë par l'extermination d'iceux.

Tant y a qu'elle apporte beaucoup de regret, qu'un tel sujet ait causé la continuelle absence dudit sieur Archevesque de son troupeau, depuis treize ou quatorze ans.

Mais encore plus de déplaisir à elle qu'après un si long-temps estant retourné, lors qu'on esperoit qu'il voudroit par un excez de charité & demonstration de bien-veillance adoucir le regret de ce qui s'estoit passé, il

aye recherché vn nouveau sujet pour s'aliener de cette Compagnie.

Ce fut il y a environ deux ans vers Noël qu'ayant esté député par les Estats du pays qui s'y tenoient lors , pour venir faire quelques remerciemens à vostre dite Cour , les Huissiers qui en furent aduertis , dirent à vostre Procureur General , que combien que les Archeuesques ayent accoustumé de laisser leur Croix dans la Chapelle qui est à l'entrée de la salle de l'Audience , neantmoins aux Vacations , la derniere fois que ledit sieur Archeuesque estoit venu au Palais , il l'auoit fait entrer en ladite salle de l'Audience. En quoy ayant esté surpris ils n'auoient osé s'y opposer , luy demandant ce qu'ils auoient à faire.

Vostre Procureur General entra lors en la grande Chambre , & ayant proposé cela à la Compagnie seante , pour ve que c'est chose sans difficulté , que nul ne porte les marques de iurisdiction dans le Palais du Roy , aux lieux qui sont gardez par les Huissiers , il luy fut du commun vœu de la Compagnie répondu , qu'il falloit que la Croix demeurast dans la Chapelle , qui est entre les deux portes de la chambre de l'Audience , suiuant la coustume.

Ledit sieur Archeuesque ne vint pas ce iour là au Palais , & eut loisir estant aduerty de ce que la Cour auoit ordonné , d'en deliberer ; & de verité , il en prit l'aduis de personnes plus desireuses de fomentier sa passion , que curieuses de son honneur & de sa dignité.

De sorte que le lendemain, au lieu de s'abstenir de venir au Palais, s'il croyoit n'y pouuoir estre selon son desir, ou de s'accommoder à ce que la Cour auoit ordonné, il vint & voulut faire passer sa Croix dans la chambre de l'Audience, à quoy il fut empesché par les Huissiers, selon le commandement que vostre Procureur General leur auoit fait de la part de vostre diète Cour : qui fut cause qu'il ne voulut pas entrer en la chambre, ains s'en retourna avec vne manifeste indignation.

Toutesfois connoissant bien qu'il n'auoit point de raison en sa plainte, & que ceux qui l'auoient conseillé & animé à cette action, l'auoient trompé, il a demeuré pres de deux ans sans en parler, depuis il presenta sa requeste au Conseil de vostre Majesté, estant à Nantes en Bretagne, le 3. d'Aoust dernier, tendant afin qu'il pleut à vostre Majesté ordonner que son Procureur General en la Cour de Parlement d'Aix, soit appelé pour respondre des contrauentions & entreprises par luy faictes de son autorité priuée, contre ce qui a esté de tout temps obserué, & iamais contesté aux Archeuesques de la ville d'Aix, soit en l'exercice de sa iustice Ecclesiastique, ou autres droicts, & notamment pour faire porter la Croix deuant luy, comme marque de sa dignité, iusques à la porte du lieu où la Cour se trouue assemblée, ce que ledit Procureur General, à ce qu'il dit, auroit fait de force, & sans aucun commandement de ladiète Cour.

Surquoy vostre Conseil estant empesché & quasi comme plongé dans les confusions qui

alors enuelopoient tout vostre Estat, l'importunité des Agents du sieur Archeuesque arrachayn Decret que l'on creut n'estre pas de grande importance, qui fut que vostre Procureur General seroit assigné pour venir respondre à deux mois dans vostre dit Conseil, sur les fins de ladite requeste.

Ce qu'il ne fit exploicter que le penultiesme. Octobre quand il voulut partir pour s'en retourner à la Cour.

Vostre Cour en estant aduertie, ayant considéré l'importance de cette affaire mesmes si elle prenoit son cours selon le dessein dudit sieur Archeuesque elle a creu en deuoir preuenir le dangereux euenement par ceste remonstrance.

Et par icelle, SIRE, faire connoistre clairement à vostre M. deux choses, l'une que ledit sieur Archeuesque n'a nulle raison en sa plainte, l'autre que la procedure qu'il tient estant tolerée renuerseroit les loix du Royaume, supprimerait vostre Iustice Souueraine, esbranleroit les fondemens de l'Estat, exposerait la personne sacrée des Roys à l'enuie, à la haine des peuples & aux dangers qui suiuent telles passions.

Et pour commencer par sa plainte, elle est que l'on ne luy a pas voulu laisser entrer sa Croix dans la salle de l'Audience, pendant que vostre Parlement est seant, & lors que les Huissiers en gardent la porte.

Comme s'il ignoroit que sa Croix est la marque de sa iurisdiction Metropolitaine, laquelle il ne peut porter non seulement aux lieux,

où s'exerce la iustice Souueraine de vostre Majesté, mais par la disposition mesme du droict Canon, il ne la peut porter en presence d'aucun superieur à luy, & ayant iurisdiction spirituelle par dessus luy: de sorte qu'il faut qu'il la quitte en presence des Legats ou Vice-Legats de sa Saincteté.

Il y a bien plus qu'il ne la peut pas mesmes porter dans le Chapitre de son Eglise, pource qu'il n'y a pas seul la iurisdiction, mais conjointement avec son Chapitre. Tellement que ceste année mesme s'estant voulu ingerer de la faire entrer dans le Chapitre, il y en eut plainte, & a esté resolu par son Chapitre qu'on ne la luy souffriroit point.

Il allegue, SIRE, que de tout temps luy & ses predecesseurs en ont ainsi usé: il suffiroit à cela de respondre, qu'en ce Royaume on n'est point receuable à alleguer possession contre vostre Procureur General, il plaide, comme on dit, tousiours saisi, contre luy la possession sans tiltre ne sert de rien: ledit sieur Archeuesque qui a esté nourry dans vos Cours de Parlemens ne peut ignorer cela.

Mais tant s'en faut que cela soit veritable: Premièrement, pour son regard depuis quinze ans qu'il est Archeuesque, il n'a pas fait deux ans de residence en sondit Eueché, pendant lesquels il a esté continuellement en differens avec vostre Parlement, comment donc pourroit il pretendre ceste possession?

Pour le regard de ses predecesseurs, par la reformation du Parlement, l'entrée d'iceluy leur a esté ostée: de sorte qu'ils ne venoient

point audit Parlement que quand ils y estoient mandez.

Et lors de tant qu'il y a memoire d'homme, il n'y a eu vn seul d'eux, bien qu'il y en ait eu de Cardinaux, & de fort releuée qualité, qui n'ait laissé sa Croix à l'entrée de la salle de l'Audience dans la Chapelle qui y est.

Bien plus, Monsieur le Cardinal d'Armagnac étant Collegat d'Avignon, & ayant d'auantage la charge de commander pour le Roy en Prouence, venant dans le Parlement, en a usé de mesme façon: & ne se trouuera iamais que cette humeur soit entiere en l'esprit d'aucun des predecesseurs dudit sieur Archeuesque, ny qu'ils y ayent seulement iamais pensé.

Aussi en quel lieu plus decemment peut estre cette sacrée marque qu'en vn lieu saint, où se celebrent les hauts & profonds mysteres de la Religion?

Il se plaint que vostre Procureur General, de son autorité priuée a formé cet empeschement, & il n'y a nulle doute que quand il l'auroit fait, qu'il ne l'ait pû faire, non d'autorité priuée, car il n'est point personne de qui les actions se doivent mesurer de cette façon, mais comme vostre Procureur General il est obligé à s'opposer à tout ce qui s'entreprend au preiudice de vostre autorité, & des droits de vos Iurisdctions, voire tellement que s'il ne le faisoit il tomberoit en manifeste preuarication, & se rendroit indigne de sa charge.

Mais, S I R B, c'est chose que vostre Cour

vous assure n'estre nullement veritable, & au contraire que ce qu'il a fait a esté par l'expresse ordonnance d'icelle.

Et qui sçait l'ordre qui se doit tenir en telles choses que la Compagnie mesme qui l'a estably, & receu de main en main de ses predecesseurs, de qui doit dependre cela que d'elle.

C'est cecy, SIRE, qui est de consequence en cette affaire, le reste se pourroit dire vne chose friuole, indigne d'estre portée à vostre Majesté, & de luy estre enuoyée.

Mais on void qu'en toutes les entreprises que fait le sieur Archeuesque, s'il excommunique vos Parlemens, s'il fait des assemblées en la Prouince de tout le Clergé d'icelle sans vostre autorité, s'il entreprend sur vos droits de Iurisdiction sur la police, & que vostre Cour de Parlement y veuille toucher, aussi-tost par ses importunitéz & violentes poursuites, voila des euocations & interdictions.

Et en ce fait cy vostre Procureur General empesche par Ordonnance de vostre Cour, qu'il ne fasse entrer sa Croix en la chambre de l'Audience, le voila assigné pour venir defendre dans vostre Conseil : terme que vostre Cour n'auoit encore entendu, & dont mesme on ne peut comprendre la signification, laquelle ledit sieur Archeuesque a voulu faire croire estre, que ledit sieur Procureur General alla luy-mesme en personne en vostre dit Conseil estimant par là rendre vil & contemptible, celuy qui est le Censeur de tous les Ordres, à l'aspect duquel les Grands de vostre Royau-

& de vos droits entierement, & precipite-on vostre Estat & vostre personne à vn évident danger.

Tous les Estrangers qui ont considéré l'establiſſement de vostre Royaume, ont admiré plus que toute autre chose, la prudence des fondateurs d'iceluy, qui ont voulu que toutes les graces, faueurs, & bienfaits dépendissent de la seule personne du Prince, afin qu'il en eust tout le gré & toute la bienueillance.

Et au contraire que l'exercice de la iustice, dispensation des peines, & autres chefs, dépendissent tellement de vos Parlemens que vostre Maieſté mesme s'y soumit, & souffrist pour ses droits que l'on luy fist iustice comme à vn particulier.

En quoy faisant, vostre Maieſté demeure premierement déchargée enuers Dieu d'une chose où elle ne peut entendre pour l'empeschement que luy apporte le gouuernement de l'Estat. Outre ce, elle demeure déchargée en sa conscience de faire faire par personnes entendues, experimentez & instruits en la legislation, ce dont elle ne peut auoir la science, qui ne s'acquiert que par vn grand temps, vne grande estude & vn grand vsage.

Elle demeure d'auantage déchargée enuers ses peuples, & les parties interessées de l'opinion qu'on peut prendre que où il y va de ses droits elle ne fauorise son Fisc & son profit au preiudice d'autrui.

Mais ce qui est le plus utile en cela, elle se décharge de l'importunité des Grands & de ceux qu'elle fauorise, qui sans doute l'indui-

roient par leur importunité à leur octroyer des choses fort preiudiciables à l'Estat.

Or, SIRE, si cette maxime a esté saintement inspirée en l'esprit des fondateurs de l'Estat, il n'y a endroit où elle doive estre plus religieusement & inuolablement obseruée que où il y va des droits de vostre Couronne, que les Ecclesiastiques vous veulent rendre contentieux.

Il n'y a artifice par lequel on puisse plus aisement estouffer vostre autorité, ruiner vos droits, & renuerser vostre Estat, qu'en faisant que vostre Maiesté oste à ses Parlemens & retienne à soy & à son Conseil la connoissance de telles choses.

Car outre que vous l'ostez à ceux qui par longues successions d'années sont instruits de vos droits, en connoissent l'importance, à vn corps qui represente toute la force de l'Estat, qui ne peut estre ébranlé par l'enuie & par la haine, vous la rappelez à vn corps qui est composé pour la pluspart de Princes, Seigneurs & autres personnes non versées en telles choses, ceux de vostre Conseil qui ont la science & l'experience sont comme nez parmy le grand nombre de ceux qui n'y sont point versés.

De plus on sçait que les resolutions de vostre Conseil sont tousiours sous vostre bon plaisir, & dependent mesmement de vostre absoluë puissance.

De sorte, SIRE, que ceux qui poursuiuent choses preiudiciables à vostre autorité, mesmes quand il y a quelque pretexte ou faueur

de Religion , par importunité ou ambition emporteront ce qu'ils voudront , & pied à pied sapront vostre puissance.

Ou si vostre Majesté résiste à leurs instances & ambitieuses poursuites , ils rempliront comme on a fait autrefois & les chaires , & les places & les liures de leurs plaintes , difameront vostre nom d'irreligion & d'impicité, & par ce moyen effaçant & l'amour & le respect du cœur de vos sujets ébranleront vostre obéissance & produiront des effets semblables à ceux dont les histoires sont toutes pleines.

A quoy, S I R E, il est plus besoin de prendre garde maintenant que jamais, puisqu'une venimeuse ambition a saisi l'esprit de plusieurs, & les a tellement dénaturés de l'humeur François qu'ils estiment blasphème, ce que nos ancêtres ont cru droicts sacrés, & ne parlent des appellations comme d'abus & privilèges de l'Eglise Gallicane, que comme d'impietés & d'abominations, bien que ce soient droicts qui n'ont esté introduits principalement que pour les Ecclesiastiques, & pour leur soulagement.

S I R E, on ne peut pas ôter cette gloire à vostre Clergé qu'il ne soit composé pour la plupart des plus grands & illustres personnages de l'Europe, unis de grande piété & de beaucoup d'érudition : mais aussi ne peut-on pas dissimuler qu'il ne s'en trouve toujours quelqu'un qui poussé d'ambition pour se faire renommer & profiter de l'apparence de son zèle, foule aux pieds les loix de l'Estat & les

droits de vostre Couronne.

Puis les sages Princes ne doiuent pas seulement obseruer au gouuernement de leur Estat, ce qui est conuenable au present, mais tenir vne regle qui les ailleure en toute sorte d'accidens, & renferme la licence de tels esprits dans des barrieres si fortes qu'ils ne les puissent ny par la faueur de leur qualité, ny par la hardiesse de leur humeur, franchir.

Autrement il peut arriuer milles occasions où ayans desia prise sur vostre authorité, ny la grandeur de vos ancestres, ny vostre valeur, ny vostre vertu & pieté, ne vous en scauroient garentir.

La vertu, la pieté, la debonnaireté de Louis le Pieux de qui vostre Majesté porte le surnom : mais avec meilleure fortune ne pût pas empescher qu'il ne souffrît en sa propre personne les plus grandes hontes & indignitez qu'on puisse imaginer, & ce, de la main de plusieurs Prelats de son Royaume, sans que l'honneur & le respect de Charlemagne son pere, qui en auoit esleué & estably la pluspart, luy pût de rien seruir.

Ce qui vous apprend, SIRB, que vous les deuez tellement honorer & reuerer que comme en choses qui concernent la Religion, ils ne doiuent rien auoir au dessus : Ainsi en l'ordre, police & gouuernement de vostre Estat, ils doiuent estre entierement soumis à vos Loix & à vos Magistrats.

Et ne deuez souffrir en aucune occasion, pour si petite qu'elle soit, qu'ils entament vostre authorité, laquelle pour si peu qu'elle soit breschée,

breschée, est aïée à entrouvrir, ne plus ne moins que les digues & chaussées qui soustien-
nent la mer & les grosses rivières, lesquelles
ne se ruinent pas si tost par l'impetuosité des
flots ou poids de l'eau qu'elles soustiennent,
comme par quelque petite ouverture, qu'y fe-
ra vn rat d'eau ou autre petit animal, qui les
emportent.

Et pour ce, SIRE, laissez s'il vous plaist à
vos Parlemens la iurisdiction que les loix de
vostre Royaume leur donnét. Permettez qu'a-
uec peine, haine & enuie ils deffendent vostre
autorité.

Si l'on vous fait des plaintes d'eux, il est
raisonnable qu'ils vous rendent raison de leurs
actions, vostre Cour de Parlement sera tou-
siours preste de ce faire, & recevra à beaucoup
d'honneur de vous presenter l'esprit duquel
elle est menée & conduite en vous servant.

Mais ne permettez point, SIRE, que l'on la
faïe de iuge, partie, que sans l'auoir oïye, à la
moindre des parties interessées on luy lie les
mains, ceux qui par tels moyens font qu'ils
n'ont point de Iuges en vos Parlemens ne font
rien moins que Roys dans vos Prouinces, pou-
uans faire & entreprendre tout ce que bon leur
semble impunement.

Vostre Cour supplie donc tres-humblement
vostre Majesté en cette occasion luy laisser
libre la fonction de sa charge, reietter l'iniu-
ste plainte dudit sieur Archeuesque, ou luy en
renvoyer la connoissance & descharger vostre
Procureur general de l'assignation qui luy a
esté donnée à vostre Conseil pour ce sujet, &

pourvoir à ce qu'à l'aduenir le semblable ne se pratique en son endroit, afin que vostre regne reçoie les benedictions, & vostre Estat l'affermissement que la iustice a accoustumé d'apporter où elle s'est inuiolablement obseruée.

Pour extraict des Registres de la Cour de Parlement de Prouence, par moy Secretaire du Roy & Greffier Civil en ladite Cour.

ESTIENNE.

LETTRE DE FRIDERIC

Comte Palatin au Roy, sur sa nouvelle election de Roy de Boheme.

MONSIEUR & tres-honoré Cousin,
 Me ne doute point que vostre dignité Royale ne soit suffisamment informée du progres des fascheuses affaires arriuées tant au dedans de l'Empire, que notamment au Royaume de Boheme par le subit changement qui y est suruenu inopinément en la procédure qui s'est faicte en l'eslection d'un Roy; laquelle par vn commun concert de suffrage estant escheuë sur ma personne, contre mon attente & sans l'auoir pourpensé, ainsi que ie le puis verifier & dire en bonne conscience: Je n'ay peu ny deub la reietter & moins negliger pour plusieurs notables interets & considerations. J'ose cependant asséurer vostre dignité Royale, & par mesme moyen la supplier de vou-

loir prendre cette confiance de moy que mes bonnes & sinceres intentions ne seront pour cela de rien alterées à l'esgard du bien public, & que la verité ne dementira point mes actions, tout mon but & mes conseils ioins à ceux des Princes & Estats mes amis & allicz, ne tendans qu'à la conseruation de l'ancienne alliance avec vostre Couronne & manutention de la liberté commune. Que si vostre dignité Royale estoit informée au contraire de mes intentions & de celles de mes amis & allicz par la persuasion de ceux qui voudroient luy faire croire que nos desseins ne buttent à autre fin que pour opprimer ceux de contraire Religion à la nostre, ie la supplie derechef ne vouloir ajouster foy à tels faux rapports, & de croire plustost que nous mettrons peine d'empescher à nostre possible que ceux de ladite Religion ne receurent aucune foule ny oppression d'autre costé, ne doutant point que vostre dignité Royale n'en ait receu plus ample information de son Agent: à quoy me remettant ie ne faudray de donner aduis à vostre dignité Royale du progres des affaires, me promettant ce bien de sa faueur, qu'à l'exemple louable de ses predecesseurs, & notamment du feu Roy pere de vostre dignité Royale de tres-glorieuse memoire, elle m'assistera de son aide & bon conseil, & ne m'abandonnera au besoin ny mes amis & allicz. Pour mon particulier ie ne desire rien tant que de pouuoir luy témoigner aux occasions comme ie suis veritablement, Monsieur & tres-honoré Cousin, vostre tres-affectionné Cousin à

vous faire seruire, Frideric Eleéteur. Escrit à Amberg le deuxiesme Octobre 1619. & à la suscription, Au Roy tres-Chrestien.

LETTRE DV DIT SIEVR
Comte Palatin à Monsieur le Duc de
Boüillon.

MON SIEVR mon pere, Estant sur mon partement vers le haut Palatinat, & ayant cette seure commodité, ie m'en ay voulu seruir pour le vous faire sçauoir, & que mon sejour ne sera que de peu de iours, estant du tout resolu de me rendre au lieu où il a pleu à Dieu m'appeller, & où ie suis fort desiré & sollicité de haïter ma venuë. Je vous supplie croire que cette mesme resolution ne procede d'ambition ou desir d'agrandir ma maison, mais que mon vnique but est de seruir à Dieu & à son Eglise. Je peux dire avec verité de n'y auoir aspiré, mais tousiours cherché mon contentement en ce que Dieu m'a donné, & plustost tasché d'empescher cet eslection que de l'aduancer. Cela me faiét estre tant plus asseuré que c'est vne vocation diuine, laquelle ie ne dois reietter, ie voy bien force incommoditez & trauerses, deuant les yeux, & que tous ceux de la maison d'Austriche s'employeront avec leurs adherans à ma ruine, ne pouuans avec leur bon gré quitter ce Royaume, si veux-je esperer qu'ils ne viendront iamais à le r'auoir, il faut cōnoistre que c'est vne ceuvre de Dieu qui veut abaisser la maison qui

à tousiours tasché d'opprimer son Eglise, iceluy la maintiendra. Et ie me promets aussi vne assistance du Roy d'Angleterre, duquel ie n'ay encores aucune response : Mais tous les Seigneurs & le peuple me tesmoignent beaucoup d'affection, comme font aussi les Princes de l'Vnion qui me sont venus dire à Dieu. Je suis fort asseuré de leur amitié & qu'ils ne m'abandonneront. Il faut aussi que ie vous die le progres que le Prince de Transylvanie fait en Hongrie, estant desia à Presbourg où il se fera Couronner. C'est vn Prince de nostre Religion, & qui m'a tousiours tesmoigné beaucoup d'amitié, son neveu estudie en cette ville, c'est vn secours qui vient du Ciel, & qui n'a pas esté sollicité, & il n'estonne pas peu les ennemis. L'Empereur en a eu les nouvelles estant à Changée : Je vous supplie aussi me donner aduis par quel moyen l'on pourroit tirer du Roy de France quelque assistance, sinon pour le moins qu'il demeurast neutre. J'ay laissé en mon absence gouverneur du bas Palatinat Monsieur le Duc des deux Ponts, de l'affection & fidelité duquel ie suis bien asseuré, ie vous supplie me faire sçauoir quand se feront des leuées en Lorraine. J'ay supplié Madame ma mere de demeurer en ce lieu, sa maladie ne me met pas peu en peine, Dieu la veuille conseruer longuement & luy rendre sa santé. Je luy laisse mes deux plus ieunes enfans : ie mène ma femme & mon fils avec moy, comme aussi mon frere, Madame ma mere l'ayant desiré, ie ne vous tiendray plus long-temps :

mais ie vous assure ray qu'en quelque lieu où ie seray mon affection ne sera iamais esloignée de vous , ny la memoire des obligations que ie vous ay, que ie tascheray de vous témoigner par mes humbles ser uices, comme ie fais, Monsieur mon pere, vostre bien humble & obeissant fils ,

FRIDERIC.

De Heildelberg à l'heure de mon parlement ce vingt-septiesme Octobre mil six cens dix-neuf.

LETTRE DV DIT SIEVR

Comte Palatin écrite au Roy

le 24. Mars 1620.

TRÈS-HAUT, tres-puissant & tres-excellent Prince, mon tres-cher & bien aimé frere.

Comme l'estime singuliere & l'estat assuré que ie fais de vostre sincerité & bien-veillances envers moy, de laquelle il vous a plu me rendre iusques icy plusieurs témoignages foreuidens , fut le principal motif du soin que i'eus à mon aduènement à ceste Couronne de vous en donner aduis particulier, & vous informer des causes qui m'ont conuie à accepter l'eslection faite vnauniment de ma personne par les Estats de mon Royaume de Bohé-

me & approuvée d'un commun consentement par tous les Estats des pays incorporez : aussi penserois - ie maintenant ne satisfaire à moy mesme si ie ne vous signifiois que ie fis n'agueres vn voyage en mesdits pays pour y recevoir l'hommage de mesdits Estats & sujets, lesquels se sont portez à me le rendre avec toute la promptitude & applaudissement que i'eusse peu attendre d'eux, iusques là que la pluspart de ceux d'entre ceux qui font profession de la Religion Catholique, Apostolique & Romaine, de leur propre mouvement & franche volonté, sans entrejet d'aucune difficulté m'ont presté le serment de fidelité avec toute sorte de congratulation. En quoy ie reconnois de plus en plus l'œuvre du Roy des cieux, qui donne les sceptres & les Couronnes à qui luy plaist, & que ie m'assure la maintiendra puissamment à l'encontre de tous efforts contraires. Et ce qui me confirme en cette esperance, est le tesmoignage que ma conscience me rend de n'y auoir aspiré ny par souhaits, ny par brigues, moins encores par moyens illicites, & sur tout de n'auoir en toute cette affaire eu autre visée (apres la gloire de Dieu & la consideration de cette mienne vocation legitime) qu'à l'aduancement du bien public, au soulagement de tant de milliers d'ames innocentes exposées aux extremittez du feu & du glaue, & à la conseruation de cedit Royaume, qui est l'une des principales & plus notables parties du Saint Empire, laquelle s'est trouuée à la veille de sa totale ruine, & au danger d'estre redui-

te sous le ioug d'une domination estrangere pour aider à bastir & accroistre la Monarchie qu'on a dès si long temps affectée au grand desadvantage de toute la Chrestienté, & principalement de la vostre, dont il n'en eût sçeu ensuiure autre chose que la destruction de tout le corps dudit Empire, me sentant obligé tres-étroitement & indissolublement par la foy & ferment que ie dois audit Empire, de prevenir & destourner au possible vn mal si pernicieux.

Ie sçay fort bien que tous ceux qui par cy-devant ne se sont rien moins imaginé que ce changement, ains ont iusques icy employé tout leur travail en faueur de ladite Monarchie aux despens de tant de sang Chrestien prodigalement respandu en ces derniers siècles par tout l'Vniuers, ne peuuent pour estre preoccupez & aveuglez de passion, voir de bon œil ledit changement : & s'est aussi avec la mesme passion qu'on crie à l'encontre, & qu'on tasche de descrire en diuers endroits mes actions, comme si elles tendoient directement à l'oppression de la Religion Catholique & de ceux qui en font profession en mon Royaume & pays, qui est ce leur semble vn précieux pretexte pour conuertir l'interest particulier que la maison d'Autriche & d'Espagne pretend, en vn interest public de toute la Chrestienté, & par ce moyen rendre mes deportemens odieux aux autres Roys & Potentats, & les animer contre moy au preiudice mesme de la paix & tranquillité commune. Mais la verité ne peut estre tant eclipsée par la force de la

calomnie qu'elle ne se fasse paroistre à la fin, car mes actions aussi bien que mes declarations monstrent assez que ie n'eus oncques la pensée, encore moins la volonté, de faire, ou permettre estre fait aucun desplaisir à mesdits sujets de la Religion Catholique & Romaine, à cause de ladite Religion, qu'au contraire i'ay & auray tousiours vn soin singulier de les proteger esgalement avec les autres sans distinction, pourueu qu'ils se conforment aux loix fondamentales, & aux concessions des Roys mes predecesseurs, octroyées indifferemment aux vns & aux autres. I'aduoue bien que quelques vns de mon Marquisat de Morauie, & autres de ce Royaume, ont esté degradez & esloignez depuis mon Couronnement, mais ce n'a pas esté à l'esgard de leur Religion, ains à cause de la profession d'adherer & prester couuertement & ouuertement toute faueur & assistance aux ennemis de leur patrie, à la ruine de leurs compatriotes, ce que nul Prince ny Souuerain, quel qu'il soit, ne souffre de ses sujets de quelque Religion qu'ils soient, & ceux qui par telles & semblables felonies & infidelités attirent sur eux quelques incommoditez ne peuvent & ne doiuent s'en plaindre qu'à eux mesmes. Quant à la reformation faicte depuis peu au Temple de mon Chasteau de Prague, reserué à moy & à mes domestiques pour y exercer le seruice diuin, que ie professe, ie m'assure que permettant iusqu'au au moindre de mes suiets liberté de conscience, nul viuant exempt de passion, ne pourra trouuer mauuais que i'vse de la mesme liberté.

N. 5.

en mon propre endroit, ne s'estant fait aucun changement en pas vn des autres Temples de ce Royaume qui soit venu à ma connoissance. Ce m'est bien vn grand contentement parmy cette diuersité d'esprits, & en vne saison si tempestueuse d'estre certain que nonobstant les instances que l'on vous voudroit faire sur le mesme pretexte, vostre prudence, magnanimité & equité, ne permettront d'y deferrer, que prealablement vous ne soyiez suffisamment informé de mes actions. Je me promets aussi de vostre sincere volonté enuers moy, qu'il vous plaira auoir égard à l'ancienne amitié qui a esté de tout temps entre vostre Couronne & la Maison Palatine, & à la confederation & bonne intelligence, qui mesme a esté autrefois entre vostre Couronne & cette-cy : c'est dequoy ie vous prie tres-affectueusement, & qu'il vous plaise me faire sentir en ces occasions, par vne reconnoissance effectuelle les fruits des bons & vtiles seruices que mes progeniteurs ont rendus à feu le Roy Henry le Grand vostre pere, de glorieuse memoire, en ses plus vigentes affaires à l'encontre de ceux qui luy enuioient sa grandeur, conseruation & bon-heur. Au surplus vous aurez sans doute esté aduertý d'ailleurs du traité de tréue, arresté entre l'Empereur, & le Princes de Hongrie, par où sa Majesté Imperiale a receu satisfaction de luy, ce qui à bon droit doit faire cesser & arrester le cours des alarmes & mauuaises impressions qu'on a voulu faire prendre de luy, comme si son dessein estoit d'introduire les armes Turquesques.

audit Royaume, & encores plus auant dans l'Europe, là où tout au rebours l'on auoit par cy-deuant tasché d'irriter le Turc contre luy, & par le denuement des places frontieres de Hongrie, donné suiet aux Estats dudit Royaume de prendre garde à eux. Et par ce que ledit Prince pour tesmoigner encores d'auantage son inclination à la paix, a offert son entremise pour faire iouyr ce Royaume, & les pays incorporez, de ladicte trefue, pour par ce moyen frayer tant plus facilement de part & d'autre le chemin à vn accord de paix; & qu'il a pour maintenant cette affaire en main: ie croy qu'il ne sera besoin pour maintenant de molester aucun Potentat ou Prince de dehors pour ce sujet, par la recherche de leur entremise, autre que pour exciter l'Empereur (ainsi que ie vous en prie tres-affectueusement) de ne permettre que le feu que l'on attise de plus en plus souz son nom & autorité, s'embrase plus auant, veu que les flammes de quel costé que le vent de la guerre les porte, ne peuuent estre que tres-dommageables. Quant à moy lors qu'il plaira à Dieu de faire ouuerture, & monstrier le chemin pour paruenir à vne paix asseurée & honorable, la disposition que i'y feray paroistre (pourueu que d'autre part on y marche de pareil pied) ne dementira iamais la verité de mes sinceres & pacifiques intentions: mais si au contraire on continuoit, comme on a fait iusques icy contre mes Estats & suiets, les excès des meurtres, effusion de tant de sang innocent, embrasement, rauagement, & semblables cruau-

de milliers d'ames innocentes exposées aux extremitez du feu & du glaiue, & la conseruation de ce Royaume, qui est l'une des plus nobles & principales parties du saint Empire, laquelle s'est trouuée à la veille de sa totale ruine, & au danger d'estre reduite sous le ioug d'une domination Estrangere, pour aider à bastir & accroistre la Monarchie qu'on a dès si long-temps affectée, au grand desaduantage de toutes les autres Couronnes de la Chrestienté, & principalement de celle de France, dont il ne s'en eût sceu ensuiure autre chose que la destruction de tout le corps dudit Empire, & partant ie me suis trouué obligé tres-estroitement & ineuitablement par la foy & serment que ie dois audit Empire, de destourner au possible vn mal si pernicieux, ainsi que ie l'ay représenté au Roy tres-Chrestien par mes lettres iteratiues, & l'ay esclaircy bien particulièrement de ce qui s'est passé en cesdictes affaires depuis mon Couronnement, sous l'assurance tres-ferme que ie prends de sa prudence, bienueillance & equité, qu'il ne deferera aux sinistres rapports qu'on luy pourroit faire de mes actions, ains donnera lieu à la verité, & non aux passions effrenées, de ceux lesquels pour le mal talent qu'ils ont de voir vn changement à eux si inopiné, taschent de remuer ciel & terre pour l'empescher, ce que ne pouuant bonnement par voye legitime se seruent de celle de la calomnie, & se traouillent de conuertir l'interest particulier que pretend la maison d'Autriche & d'Espagne, en vn interest commun de Religion, afin d'ani-

bon pied, & que ce fût vne paix fondée sur des conditions equitables, honorables & assurées : mais il seroit difficile, voire impossible, de paruenir à vn si bon but, si le Roy tres-Chrestien- vouloit par preoccupation adherer à l'vne des parties, luy prestier secours, & quant & quant employer son entremise enuers l'autre, qui seroient choses directement contraires. Et ar- tant avant que d'employer & d'admettre ladi- dicte entremise, ie desirerois scauoir le temps, auquel on voudroit enuoyer la dicte Ambassa- de, & la procedure qu'elle auroit à obseruer. afin de m'y preparer de mon costé, & d'éuiter que ladicte Ambassade arriuant à l'impourueu, & sans frayer premierelement le chemin, elle fut contrainte de s'en retourner sans fruit, ce qui pourroit faire breche à la reputatiō dudit Roy, dont ie serois infiniment marry : voire il seroit inenitablement necessaire qu'en ce cas d'enuoy i'en fuisse preaduerty de bonne heure, consideré qu'ayant vne confederation avec autres Royau- mes & pays, ie ne pourrois entrer en tel traicté, sans les sceu & consentement d'iceux, aussi ne le voudrois ie faire, sans l'aduis & admission de cette Couronne, & des pays incorporez, non plus qu'il ne leur seroit licite d'y condescendre d'eux-mesmes, sans mon autorité & approba- tion. Et outre ce, comme ainsi soit que tous mesdits Estats & sujets m'ayent presté hom- mage & serment de fidelité, & que mesme avant mon election ils ayent pris vne con- stante resolution d'exposer plustost leurs vies & fortunes à toutes sortes d'extremitez que de subit derechef le ioug du passé, la me-

moire duquel estant de plus en plus vlcérée, & les actes de cruautéz qu'on continuë d'exercer contre eux, il est aisé de considerer qu'il y auroit peu d'apparence d'un bon succez, si par vne espeece de traité de paix on leur venoit proposer vne chose contraire à leur resolution, qui est de maintenir leur Roy en la legitime possession de sa Couronne. A quoy se peut encore adjouster que pour admettre ladite Ambassade, il faudroit sçauoir si elle me voudroit donner le titre de Roy de Boheme, tel qu'il m'appartient par droit de legitime election & possession. Je serois aussi bien-aise d'entendre si on ne voudroit pas comprendre audit traité les Princes & Estats de l'Empire vnis, afin d'en communiquer avec eux & de conclure avec plus d'effet, & avec la reputation du Roy vostre maistre, lequel a sujet auant tous autres d'entretenir les anciennes alliances avec lesdits Princes & Estats, plustost que de fauoriser l'aduancement de la Monarchie qu'on affecte tant au grand preiudice & desauantage de sa Couronne, & de toute sa prosperité. Je me suis estendu vers vous sur cette affaire, fondé sur la confiance que ie prens de vostre bonne affection au bien commun, & au seruice du Roy vostre maistre, dont vous auez cy-deuant rendu des preuves bien euidentes. Vous priant de représenter tout au plustost ce que dessus audit Roy & à son Conseil, afin qu'on ne se precipite, & leur signifier que ledit Prince de Hongrie & de Transylvanie, ayant avec le consentement des Estats dudit Royaume, contracté vne Trêue, il s'est chargé de son propre

mouvement de preparer le chemin pour par-
 venir à vn traité, & delà à vne paix: ce que
 j'ay remis à sa discretion, & attends quelle re-
 solution l'Empereur departira audit Prince
 pour ce sujet, pour selon ce me regler: de sor-
 te que ledit Prince ayant cetté affaire en main,
 ie ne pourrois donner lieu à quelque autre trai-
 té sans le mécontenter. Vous me ferez vn sin-
 gulier plaisir de tenir de vostre costé la main
 à cecy. A Prague ce 30. Mars 1620.

*Instruction donnée à Messieurs les Duc
 d'Angoulesme, de Bethune & de
 Preaux, Ambassadeurs extraordinai-
 res pour sa Maiesté vers l'Empereur,
 Princes & Potentats d'Allemagne, en
 l'année 1620.*

AYANT plû à Dieu benir le regne du Roy
 d'un soin continuel que sa Maiesté a
 heureusement employé pour bien faire au pu-
 blic, & à ses amis & alliez en diuerses occur-
 rences qui se sont présentées en la Chrestien-
 té, nonobstant celles qui sont suruenues dans
 ledit Royaume, au grand déplaisir de sadite
 Maiesté que la bonté diuine luy a fait la grace
 de surmonter avec la fidelle assistance de ses
 bons seruiteurs & sujets, iouyssant à present
 d'un repos en apparence aussi certain & pro-
 fond qu'aucun autre de ses voisins. Elle a esti-

mé ne pouuoir mieux reconnoistre vn benefice tant signalé du Ciel, qu'au sujet vrgent & important qui s'offre aujourdhuy en Allemagne, où il s'agit non-seulement de la tranquillité & seureté publique, mais bien auant de la Religion Catholique, & par consequent du seruice & de la gloire de Dieu, que sa Maiesté, comme Roy tres-Chrestien, premier Fils de l'Eglise, digne imitateur de ses glorieux ancestres, nay, nourry, & zélé à la vraye pieté, desire maintenir, & accroistre par les moyens de la creance & puissance qu'il luy a mise en main. Sadite Maiesté a rendu preuue de cette sienne affection & sollicitude royale au fait qui se presente au mesme temps qu'elle a preuë dès le commencement qu'il en étoit besoin, ayant fait toutes sortes d'offices, & d'efforts enuers les anciens alliez de sa Couronne pour preuenir les accidens diuers que les apparences donnent iuste cause d'apprehender, leur faisant remonter à tous, comme pareillement à leurs fauteurs & adherans l'interest notable qu'ils auoient d'estouffer le mal à sa naissance, dans lequel ceux mesmes qui sous des esperances vaines de profit se laissoient emporter à la passion des autres, se trouueroient enfin enuelopez & compris au grand regret de sadite Maiesté pour la consideration de la concorde generale, & le benefice de ses amis & confederez.

Mais les affaires ont esté poussées si auant, & la ialousie & alteration des esprits cultiuées & accreuës de l'artifice d'aucuns, que iusques icy toutes raisons & remonstrances ont esté peu

fructueuses. Toutefois la Maieſté pour ſatisfaire à elle meſme, & à la cauſe commune, ne ſe contente pas de n'y auoir obmis aucun ſoin & deuoir par la voye de ſes amis & ſeruiteurs ordinaires, reſidans ſur les lieux ; elle a deſiré auſſi ſagement que charitablement d'y employer encore l'entremiſe de ſon nom Royal, par des Ambaſſadeurs extraordinaires pour faire comprendre à tous avec plus d'efficace le trouble & peril certain & ineuitable, auquel le païs de Germanie eſt preſt à tomber, ſi par vne preuoyance generale, vn concert prompt & vnanime, les intereſſez ne s'efforcent de pouruoir à ce deſordre, & depofans les conſiderations priuées, n'embracent viuement les publiques, pour éuiter de bonne heure vn ſi grand deſordre & mal-heur.

C'eſt le ſujet qui meut le Roy d'enuoyer preſentement en Allemagne le ſieur d'Angoulême, Colonel General de ſa cauallerie legere, & les ſieurs de Bethune & de Preaux, qui l'ont ia vtilement ſeruy en pluſieurs occasions où ils ont eſté honorablement employez pour y faire entendre à tous en general, & à chaque Electeur & Prince en particulier Catholiques, & Proteſtans, les bonnes & droictes intentions de ſa Maieſté, à leur commun aduantage, & bien, & à la conſeruation de leur repos & liberté; leur repreſenter les diſgraces infaillibles qu'ils encourent tous par la durée de ces diſſentions ; aux Cath. que la Religion eſt en d'anger de s'y perdre ſ'ils ne ſecourent la cauſe avec l'ardeur, l'vniou & la puiſſance qui ſont iugées neceſſaires : aux autres, qu'ils don-

neront occasion ausdits Catholiques, tant dedans que dehors l'Empire par la continuation de ce dessein, de contribuer avec leurs volontez & courages, leurs forces & moyens pour garentir & deffendre l'Estat & la Religion ensemble : que tout le ieu se iouera sur le theatre de leur parterre, à leur dommage & confusion, qui les iettera en misere, & en mespris avec leurs voisins & amis : qu'il ne faut douter qu'aucuns d'iceux portez de considerations differentes ne prennent part à l'affaire ; les vns par amitié, les autres par creance, plusieurs par interest qui les conserue, ce qui fera tousiours accroistre leur calamité au lieu d'y mettre fin ; que l'ennemy du nom Chrestien profitera seul de cette diuision, lequel sa Majesté est desia bien aduertie se resiouyr d'icelle ; y conforter le Prince de Transylvanie pour faire plus grand progres, que s'il est tel, qu'il y puisse laisser espoir au grand Seigneur d'y aduancer ses affaires, tous concourent en ce iugement qu'il n'en laissera perdre l'opportunité, luy estant si aduantageuse pour l'assurance qu'il a du costé de Perse, que non seulement en cela la cause de Dieu les doit recueillir, & faire penser a vn accord raisonnable, mais leur propre fait & l'esgard qu'ils doivent auoir singulier à leurs biens, estats, & fortunes qu'ils partiront egaleement, soit par vne dissention ciuile, ou par la fureur d'un si puissant aduersaire si Dieu afflige tant la Germanie, & les Potentats d'icelle, que de persister en cet auenglement. Que la Majesté ne doute point que tout cecy ne procede d'une mesin-

telligence plustost que de cause aucune qui ait fondement certain, mais laquelle volontiers est accreuë & fomentée de ceux qui prennent plaisir & cuident profiter de leur affoiblissement ; que c'est à eux tous de se releuer eux mesmes, & de considerer fort atentiuellement sans estre guidez de la passion d'autrui, le fonds & la verité de l'affaire, y apportant leur prudence & equanimité; essayer par le moyen de leurs vrais amis & les expediens qui seront proposez de se retirer de cét embaras, qu'aussi bien la necessité fera vn iour ce que la raison & l'utilite publique doiuent maintenant operer; qu'il en faudra venir à l'accord apres que les parties auront esté affoiblies, leurs moyens épuisez, leur creance décheuë & leurs peuples las & recrues de la longueur & misere d'une guerre civile, que toutes considerations diuines & humaines doiuent à present déconseiller: que s'ils souffrent les choses passer plus auant, il y a danger que les remedes qui sont iugez salutaires deuiennent inutilles par l'aigreur des esprits & la condition des affaires; qu'il semble qu'elles ayent esté plustost portées à ces termes par malheur & imperuosité, que par iugement ou consideration des motifs de ce trouble, que plusieurs se voyans par exemple se laissent engager à des effets qui peuvent auoir vne suite perilleuse, partant qu'il est besoin d'entrer en connoissance du fait, & l'examinant d'un sens rassis embrasser volontiers les moyens raisonnables, qui peuvent conduire à l'accommodement, en faisant que chacun se contentant de la raison, y donne ses presentations, & interests à la paix publique de la

Chrestienté, ce qui ne doit & ne peut estre connu & considéré plus équitablement que par eux tous, exhortez & aidez à ce faire par leurs sinceres amis, non interrellez qu'à leur bien, repos & conseruation, pour leur deffiler les yeux, de ce que l'interest & l'artifice d'aucuns peuvent auoir imprimé en leurs esprits, qu'en la cause dont ils s'agit, il sera difficile à persuader que la Religion & l'Estat ne soient conjointes, quoy que plusieurs pour déguiser leur dessein ne touchent que du dernier, deux puissans ressorts pour remuer la machine de l'Empire, & luy faire éprouuer des accidens calamiteux, dont l'experience en peut estre frequente: Que sa Maiesté qui a tousiours eu soin de la cause publique, & apporté ses vœux & conseils, pour appaiser le trouble par tout où son credit a pû estre employé, les prie & exhorte pour eux-mesmes, de rechercher avec autant de candeur que d'affection & celerité, les voyes d'accord qu'ils aduiseront ensemble les plus conuenables, où leur seront proposées par ceux qui interuiennent en leurs differens, avec cette seule intention de les pacifier.

Mais d'autant que le plus assuré moyen pour paruenir à cette heureuse fin, est la surseance d'armes, & la cessation de tous actes d'hostilité, pour diminuer les occasions d'aigreur, & donner loisir aux vns & aux autres, de reconnoistre avec plus de maturité, le sujet de cet discord, en preuoyant les douteux euénemens, y rechercher les remedes plus certains & propres, ce qui sera facile par le moyen d'une conference amiable de Deputez des parties

principales, avec autres interellez & amis communs qui s'entremettent à leurs contentions. Lesdits sieurs Ambassadeurs apres auoir déduit où il y aura lieu les inconueniens du contraire, leur feront ouuerture de cét expedient, tant aux Catholiques qu'aux Protestans, mettront peine de la bien faire receuoir, & aduancer le plustost qu'il leur sera possible conféreront avec eux des moyens de la faciliter & faire reüssir, afin que la disposition se trouuant en chaque particulier elle soit plus aisée à moyenner pour le general: ce qui sera vn grand préiugé & acheminement à l'accord desiré, d'autant que si les parties, comme elles doiuent par interests, y peuuent estre induites par raison fortifiée & conseillée de leurs allicz, il y a esperance d'en esperer vn bon succès; car non-seulement la chaleur des courages sera alentie, & cette premiere pointe de leurs animositez émoullée durant ladite suspension, partant plus susceptibles de leur propre aduantage, mais les moyens avec la volonté de se nuire seront retranchez, que confortera celle-cy à receuoir plus volontiers les propositions qui seront mises en auant.

Au moyen dequoy lesdits Ambassadeurs essayeront de toute leur industrie & pouuoir de faire agréer & iuger par les parties ce remede utile, voire quasi necessaire pour porter les choses à l'accommodement, à quoy faire ils s'aideront des autres entremetteurs en la cause qui se ont le deuoir d'amis, les rendant capables eux-mesmes du merite de cet expedient, tant pour par cette confiance les retenir de tr-

uerfer ladite ouuerture comme ils pourroient faire, autrement poussez de ialousie que le Roy acquist trop de gloire en cette occasion, que pour aduancer plus commodement l'effect de ce dessein en le rendant agreable & commun aux mediateurs de ce differend, car tant que les parties disputeront par armes leurs droicts & griefs ne pourront estre esclaircis; les affaires empirent, & ceux qui par exemple ou amitié se ioignent à la cause sans estre informez du merite d'icelle, estiment par honneur deuoir continuer: Et ainsi se trouuent engagez & interessez à pousser les choses à l'extrémité, dont ensuiuent les accidents difficiles à reparer d'ailleurs, encores que le moyen d'assembler d'amis soit iugé propre par l'vne des parties, & qu'elle ait bonne volonté par cette voye de sortir d'affaires, souuent elles sont retenues par reputation & autres considerations qui accompagnent les querelles de lemettre en auant, voir l'approuuer si la proposition n'en est faite par vn tiers non interesse qu'au bien des parties.

C'est pourquoy sadite Majesté se persuade volontiers qu'estant reconnuë auoir les qualitez susdites enuers le public, pour en auoir rendu tesmoignages frequents, & notables, le party, comme il est raisonnable & salutaire, sera receu & agreable à plusieurs de la disposition desquels lesdits Ambassadeurs se seruiron pour y porter les autres, afin que les faisant vnir & rencontrer en ce mesme dessein, ils soient aussi plus preparez & enclins à l'accord que sa Majesté recherche avec tant de sollicitude.

Mais

Mais d'autant que la diuersité de Religion, outre les raisons susdites qui peuvent estre appliquées à tous, requiert des considerations plus speciales pour ceux qui font profession de la Religion Catholique, ils auront soin pour les échauffer d'auantage, de leurs faire comprendre le preiudice & danger qu'encourt ladite Religion Catholique, par l'entremise & le progres trop prompt & heureux desdits Protestans, dont l'usage est commun, apres auoir renuersé le temporel, s'adresser au spirituel, qu'ils ne peuvent maintenir & deffendre qu'en faisant contenance suiue d'effet, s'il en sera besoin de repousser la violence par la force secondez des autres amis interellez en l'affaire, au cas que lesdits Protestans conuiez d'en venir à ladite conference, fissent refus de s'y ranger, ou y estans de s'accommoder à vn party raisonnable: & toutesfois ils leur declareront franchement que tant s'en fant que l'intention de sa Maiesté soit de les engager à la guerre, comme possible aucuns voudroient malicieusement soupçonner & leur faire croire, tant pour diminuer la creance de sa Maiesté que pour les tenir par ce moyen plus longuement en troubles, qu'elle recherche par cette voye le vray expedient de la faire cesser, n'y ayant aucun doute, tant que leurs aduersaires les verront desarmez, irresolus ou foibles, qu'ils ne poursuiuent leur pointe avec plus de chaleur, & ne feront rien en cela que sadite Majesté, ores que moins proche du peril & des accidens apprehendez, ne face le chemin, & ne leur en monstre

l'exemple , comme il paroist desja , pour la consideration de la Religion Catholique : surquoy ils leurs feront valoir la fauorable declaration du Roy, en benefice de l'Empereur , & de la cause des Catholiques en l'Empire , de laquelle ils leur conseilleront de se preualoir comme des offices que sa Majesté employe pour auancer l'effet desiré par le moyen de ladite conference, laquelle sera d'autant plus aisement embrassée des autres que ceux-cy sont en estat de se deffendre , & d'empescher leurs attentats.

Ils y adiousteront aussi comme elle ne s'est pas contentée de cooperer de soin & de fait, mais sollicitée encore par le Pape & les autres Princes d'Italie d'accourir viuement à la cause , elle y exhorte pareillement le Roy d'Espagne & les autres Potentats Catholiques d'accelerer leur aide & assistance pour par telles demonstrations remettre au plustost les choses en vne paisible assiette ou estre en puissance non seulement de retenir lesdits Protestans & ceux qui leur adherent , ains de rompre les entreprises d'iceux à leur dommage s'ils refusent d'accepter les conditions equitables.

Mais sa Majesté qui ne veut rien oublier qui puisse seruir à l'affaire, ayant eu auis que les Lutheriens ne sont pas tous d'accord avec les Calvinistes ; ceux - cy estant poussez avec plus de violences, & qui ont porté les choses aux termes qu'elles se retrouuent , meisme que l'Electeur de Saxe, duquel les Estats & la personne sont considerez en l'Empire , fait plu-

tost contenance d'estre fauorable à l'Empe-
 reur , que ses aduersaires , estime que telle
 occasion peut estre vtilement mesnagée, tant
 enuers ledit Eleſteur qu'à l'endroit de ceux
 qui profeſſent la Religion Lutherienne , &
 eſſayant de les ſeparer de l'vnion & concert
 deſdits Caluinistes, par les raisons de leur pro-
 pre intereſt (ceux-cy en tout le reſte leurs
 eſtant contraires) & de la concorde publique,
 qu'ils ſe trouueront engagez inſenſiblement &
 ſans deſſein en vne guerre ciuile , dont les
 malheurs ne laiſſeront de leur eſtre communs,
 avec les principaux auteurs & fauteurs de ce
 deſordre ; c'eſt pourquoy ſa Maieſté eſtime
 les deuoir preuenir par amitié , non pour laiſ-
 ſer les autres en proye par ladite ſeparation ,
 qui ſeroit contre la bonne intention de ſa Ma-
 ieſté qui tend à les reünir tous pour leur com-
 mun benefice , ains pour faciliter l'auance-
 ment de la paix qui leur eſt vtile, & conditions
 qui ſoient trouuées raisonnables , auſſi ſ'aide-
 ront-ils du credit deſdits Lutheriens , apres
 qu'ils leurs auront representé ce qui concerne
 leur intereſt, pour induire leſdits Caluinistes
 d'agréeſſer ladite conference , laquelle vne fois
 accordée , peut produire le fruit qui eſt ſou-
 haité , au bien & ſoulagement des vns & des
 autres , mais auant que ſ'adreſſer à aucuns
 deſdits Princes Caluinistes ou Lutheriens , ils
 mettront peine d'eſtre eſclaircis de ſa Reli-
 gion , comme de ſes ſentimens ſur les affaires
 preſentes, afin de mieux regler & faire rece-
 uoir les auis & conſeils de ſa Maieſté, laquel-
 le a entretenu ſa creance avec les Princes de

l'union, expres pour és occurrences generales, pouuoir estre plus vtile à elle & à ses amis, comme à la cause publique, lesdits sieurs Duc & Ambassadeurs, seront chargez de lettres pour eux, & seront quasi les premiers qui se rencontreront en leur chemin, dont les noms leur seront baillez en vn memoire à part, aussi bien que le chemin qu'ils doiuent faire deuant que visiter l'Empereur, lesquels par la confiance que sa Maiesté a en leur affection & prudence, elle se persuade qu'ils seront portez à la douceur, à terminer ces fascheuses contentions par la voye d'amiable communication, toute autre estant douteuse & dommageable à eux & à leur patrie, que sa Maiesté affectionne à l'exemple loüable des Roys ses predecesseurs, & specialement du feu Roy, son tres honoré Seigneur & pere, qui a grandement trauaillé pour les vnir ensemble, en intention d'empescher, & non pour nourrir le trouble, & faire en sorte que chacun demeure en possession de ce qui luy peut appartenir, avec iustice & raison, y aioustant les autres considerations cy dessus desduites, pour les rendre capables en cela de leur propre auantage.

Ils commenceront leur visite par M. de Lorraine, auquel en luy presentant la lettre que le Roy luy escrit, & pareillement à Monsieur de Vaudemont, ils diront le suiet de leur enuoy, sçauront d'eux s'ils sont recherchez par la ligue Catholique, ce qu'ils pretendent y contribuer, & leur exposant les declarations favorables de sa Maiesté, pour la cause d'icelle

prendront leurs bons amis, & les inviteront à y apporter des effets avec leur credit, & offices pour le dessein projecté.

Ils continueront leur chemin, & s'il y a peu de distance pour visiter quelque autre Prince en passant, ils le feront ensemble, s'il est de telle consideration, sinon l'un d'eux accomplira seul cet office, en la maniere prescrite par sa Maiesté & qu'eux mêmes sur les lieux iugeront estre la meilleure, afin que par cét honorable souuenir de la part de sa Maiesté ils prennent plus de creance en elle & aux siens, pour faciliter l'execution de ladite Ambassade.

Ils n'obmettront semblablement, passant par les villes Imperiales, qui fauorisent le party des Protestans, & ont pouuoir à cause de leurs moyens & contributions, de les visiter au nom de sa Maiesté, & les assurant de sa Royale bien-veillance, leur remontreront les inconueniens de cette dissention, pour les comuier de porter leurs vœux & pouuoir, au benefice de leur pays, que sa Maiesté essaye de moyenner avec toute sorte de vigilance.

Le Roy de Danemarc non plus que les villes Anscatiques, ne se sont declarées iusques à present, & non seulement peuvent estre retenues de ce faire, mais il y a apparence que recherchées par leur interest, elles voudront aider à ce dessein d'accord, par ladite Conference, pour n'auoir part au danger, ou à ce qui leur conuiendra donner pour leur propre conseruation : mais d'autant qu'en peu de temps, ou semblable occurrence, les affections &

affaires peuvent facilement, changer lesdits sieurs en prendront lumiere plus particuliere, à mesure qu'il escherra, des sieurs de Baugy & de Sainte Catherine, residans en Allemagne, pour le service du Roy, de la constitution d'icelles, & de leurs presentes inclinations, afin de mieux conduire les conseils & intentions de sa Majesté avec plus de reputation pour elle, & de fruit pour ses amis.

Sa Majesté entend, apres qu'ils auront accompli les offices requis, és lieux où leur passage s'adonnera, & à l'endroit des personnes qu'ils trouueront plus propres, pour aduancer ce dessein, afin de les disposer, quand ils en seront recherchez, à y condescendre, qu'ils s'acheminent en la Cour de l'Empereur, pour en premier lieu, se conjoûir au nom de sa Majesté, de son heureuse adomption à l'Empire, laquelle bien qu'à present accompagnée d'épines & difficultez, elle espere deuoir estre conuerties en contentemens, quand Dieu avec l'aide de ses amis, dedans & dehors la Germanie, luy aura fait la grace de terminer cette contention par voix d'amiable & d'honorable composition, que sa Majesté propose, pour le moyen plus propre & prompt, & à son auantage qu'ils ont charge de luy faire agréer & faciliter l'aduancement expedient, qu'il fera conseillé d'embrasser & poursuiure, pour se seruir plus vtilement, tant de la demonstration de bonne volonté & forces de sa Majesté, que de celles des autres amis qui l'assistent en la cause, lesquels auroient quelque occasion de degoust, & refroidissement, si sa Ma-

jesté Imperiale resistoit à cette ouuerture, & perdrait par conséquent le temps opportun, de s'aduantager par vne voye aussi commune en telles occurrences, qu'utile à ceux qui en sçauent sagement ménager les effets pour l'aduenir.

Sa Maiesté estime deuoir vser de cette precaution, & conseiller cette sage preuoyance, sur ce qu'il peut aduenir, que les Ministres d'Espagne qui ont grand pouuoir, éloignez de leur Maistre, ou autre de sa Maison, mesme aucun des Princes Ecclesiastiques & Catholiques d'Allemagne, cuidans par le concours de leurs allociez, estre puissans assez, pour assaillir lesdits Protestans, se ressentir des choses passées, & refrener leur audace, pour n'estre plus sujets à telles entreprises, voudroient employer lesdites forces, avec celles de leurs amis, & en rejetant les ouuertes de la douceur, ils feroient connoistre comme tels conseils seroient hazardeux & dommageables à la cause publique, aussi bien qu'à la sienne, que sa M. en est aussi alienée, & qu'elle le conforte à se preualoir de si fauorables apparences, pour moyenner vn accord par la voye de ladite surseance & Conference, le but principal duquel sera toujours que deliuré de tant d'anxietez & peines, il pourra apres auoir restably son autorité, & remis les affaires en l'assiette qu'il contient, prédre avec plus de loisir & maturité les conseils, sur le sujet qui se presente, que la quantité du temps & des rencontres luy dictera.

Lesdits sieurs Duc & Ambassadeurs, s'informeront de la disposition en laquelle ils

auront trouué lesdits Electeurs & Princes , pour ce regard , & concerteront avec sadite Maieſté Imperiale , ou les ſiens , comme ils auront fait auparavant avec les autres Princes Catholiques & Proteſtans, des moyens de paruenir à la ceſſation d'armes , pour donner lieu à ladite aſſemblée deuant la tenuë de laquelle le Roy ſera auerty par eux de l'inclination dudit Empereur & de celle des autres Princes , comme ſ'il ſe peut des experiences que l'on entend propoſer , pour plus facilement & iuſtement pouuoir regler les bons Conſeils que ſa Maieſté leur veut departir en cette occurrence , ſinon elle aura toujours agreable ceux qui connoiſtront avec les autres amis, les pouuoir mettre en paix , & ſeront approuuez & bien receus des parties , puis qu'elle entreprend cette affaire ſimplement, pour leur bien faire à tous.

Il eſt vray qu'elle preuoit qu'il ſera difficile par douceur de faire deſiſter Monsieur l'Electeur Palatin , de la poſſeſſion qu'il a priſe du Royaume de Boheme , accompagnée des honneurs & marques ſouueraines de la Royauté, auſſi lesdits Ambaſſadeurs n'entreronſt en ce particulier deuant la Conference , crainte que les obſtacles qui ſ'y rencontreroient ſoient cauſe de retarder cette action : ainſi ſi l'Empereur ou ſes Miniſtres refulent d'entrer en pourparler deuant que ledit Electeur ait remis toutes choſes en leur premier eſtat, pretendans ſes droits & ſa dignité y auoir eſté notoirement bleſſée, ils luy en remonſtreront les inconueniens , & le priant de donner cela au

public , & à luy meſme , luy feront connoiſtre l'avantage qu'il en recueillera , tant par l'aſſiſtance des aſſociez , que par ce qu'il juſtifiera ſes intentions & deſſeins , à la confuſion de ſes aduerſaires.

Et d'autant que ſa Maieſté a fait refus de donner le titre de Roy audit ſieur Eleſteur , nonobſtant qu'il luy ait eſcrit pluſieurs fois en cette qualité , & que d'autres de la Religion Catholique n'ont pas eſté ſi conſiderez à l'endroit de l'Empereur , & par conſequent qu'elle ne peut trouver bon qu'ils l'aillent viſiter , pour ne luy laiſſer ce degouſt ne luy donnant ce titre , & d'ailleurs ne faire ce deſplaiſir & preiudice à ſa Maieſté Imperiale, dequoy ſainte Catherine a eu charge d'expoſer les raiſons aux Conſeillers dudit Eleſteur, ils ſe feront informer de luy de l'Eſtat des affaires de Bohême , de la diſpoſition dudit Palatin , & par ſon organe luy feront porter ce qu'ils eſtimeront devoir eſtre représenté ſur le ſujet de leur commiſſion , pour en avancer les eſſets , ou ainſi qu'ils iugeront convenir.

Sa Maieſté ſe perſuade facilement que pluſieurs Princes de la Religion Proteſtante , ne prendront plaisir à l'accroissement dudit Eleſteur , celuy de Saxe en eſt des premiers , & d'autres qui comme Eleſteurs favoriſent ces deſſeins , pour tenir les affaires en balance ne le feront ſi volontiers en qualité de Roy , tant par emulation & jalouſie de ſon pouvoir, que pour crainte que la creance des Calviniſtes odieuſe à aucuns s'eſtende à leur deſſerment , ce qu'eſtant reconnu dudit Eleſteur, comme il

a ia quelque suiet de s'en deffier, le rendra plus enclin à consentir ladite communication, & aux conditions qui seront en icelles trouuées raisonnables. Il ne faut douter pareillement que les apprests des Princes & Estats Catholiques en mesme temps dedans & dehors l'Empire, la trefue faite n'agueres avec le Prince de Transiluanie & les Estats du Royaume de Hongrie, la declaration de sa Maiesté, de laquelle ils ont desia le vent sinon l'entiere asseurance avec la monstre de ses forces, ne soit vn bon argument pour le persuader, ioint qu'il ne reconnoist point encore par effect, que tous ceux qui pour l'embarquer à cette entreprise luy auoient promis assistance, l'ayent de partie telle qu'il en a besoin pour soustenir l'effort, & la durée d'vne guerre contre le pouuoir, & les armes de ceux qui se tiennent offencez.

Celuy sur lequel il auoit fait son fondement principal est le Roy de la grande Bretagne, son beau-pere; lequel plus ouuertement qu'aucun autre a blasmé son dessein, mesme n'agueres au Baron d'Aune que ledit Electeur luy a député pour le rendre fauorable, soit qu'il ne le trouue iuste, ou que par l'approbation d'iceluy il craigne d'estre engagé d'honneur à la seconder, & prendre sa part des peines & depenses qu'il en preuoid sagement; tant y a que iusques à present quelques efforts d'industrie qu'il ait employez il n'a pû l'induire à aucune declaration en sa faueur. Sa Maiesté d'ailleurs luy fait donner part de cette sienne deliberation, de porter les

choses à vn traité amiable, ce qu'elle estime qu'il fera contenance d'approuuer, comme il s'en est laissé aucunement entendre, tant pour auoir ce pretexte honnesté & specieux de n'y engager sa reputation, & moyens, que pour l'apprehension qu'il aura quand il feroit le contraire de n'estre puissant assez pour empescher les bonnes & sages deliberations de sa Maiesté & par consequent de l'honneur & auantage beaucoup qui luy en reuiendront.

Ce n'est pas que le Roy pour cause de Religion & l'interest de son gendre, n'eust bien agreable la prosperité dudit Electeur, & qu'en ce cas il ne luy donne la main courtoisement, & possible à descouuert s'il est inquieté par d'autres en sa nouuelle possession, mais d'ailleurs il y a apparence pour les considerations susdites, qu'il embrassera plustost l'expedient d'un accord amiable.

Les autres Princes, Estats, & Republiques de la Germanie, dont plusieurs ont à desplaisir de voir leur repos troublé, comme aucuns ont ia publié, pour contenter les interests priuez, seront bien aises qu'un tiers puissant en dignité & creance, s'entremette d'accorder ces differens, & luy presteront plus volontiers la main qu'ils ne trauerferont son entreprise, quand avec cela ils seront rendus capables par raisons publiques, & celle de leur interest, comme lesdits Ambassadeurs s'estudieront de faire avec soin & vigilance pour les destromper des impressions malignes, que les factieux & malins s'efforcent de leur donner du dessein.

des Catholiques comme si c'estoient eux qui eussent mené la noise pour attaquer lesdits Protestans & procurer leur ruine.

Que s'ils peuvent estre persuadez d'approuver ladite suspension, & la Conférence en suite, ceux dehors l'empire portés maintenant à la desfiance des affaires de Bohême s'en pourront retirer doucement, tant pour ne pouvoir soutenir seuls tout le faix de la guerre, que pour ne s'exposer à la haine publique, & à la reuanche que la maison d'Autriche & ses adherans pourroient prendre avec importunité de ladite assistance.

Et comme lesdits Princes vnissent ia pris alarme des preparatifs de guerre que fait sa M. & qu'ils pourront comme ils ont fait déjà, par leur dernier enuoy, s'enquerir desdits sieurs Ambassadeurs, la cause de cét amas de forces, ils pourront leur faire entendre qu'il est decent & vtile à vn grand Roy d'armer quand ses voisins sont en armes, en intention de les employer où la justice & l'interest public luy conseilleront & sans leur declarer que ce n'est contr'eux, pour rendre plus profitable son entremise: ne se mettront aussi en peine de leur en leuer le soupçon, afin de les conduire plus facilement par quelque sorte d'aprehension au but que sa Maesté se propose de leur propre bien.

Monsieur le Duc de Sauoye a fait proposer au Roy sa deliberation de servir l'Empereur de ses forces, même de sa personne, pouruen que sa Maesté Imperiale le vueille honorer du titre de Roy, & encor de son alliance.

priant sa Maieſté de fauoriſer ſon deſir & deſſein enuers ledit Empereur. Elle le conforte en cette reſolution, & aſſeure que pour ce qu'il la fait requerrir, elle y employera volontiers ſes offices par ſes Ambaſſadeurs. Partant ſi ceux dudit ſieur Duc ſ'adreſſent à ceux de ſa Maieſté, ils luy departiront avec diſcretion telle qu'il conuient, toute bonne aſſiſtance, principalement au fait dudit mariage, ſ'ils reconnoiſſent ledit Empereur, en l'eſtat qu'il ſe retrouve, auoir inclination à ſe marier, & que ladite ouuerture ne luy ſoit deſagréable, & pour le regard du titre de Roy, ils ſe rendront plus confiderez, ſans toutesſois que les autres ayent ſuier de ſe doulair en cela de leur retenuë.

Le ſieur de Baugy eſt employé depuis vingt ans en Allemagne, pour le ſeruice du Roy, y à acquis bonne connoiſſance des affaires en l'Empire, & pourra vtilement aſſiſter de ſes bons auis & conſeils leſdits ſieurs Ambaſſadeurs en toutes occurrences qui ſe preſenteront, auſſi qu'ad il ſe trouuera en lieu avec eux, où ils négocient ſuiuant leur pouuoir & commission, il y ſera admis, & pour la confiance que ſa Maieſté a en ſa loyauté & capacité ils luy communiqueront ſes intentions & commandemens, deſquels ils ſont chargez afin qu'il les ſçache mieux & plus ſeurement ſecourir de ce qui eſt de ſon intelligence. Car comme ſa Maieſté a entrepris cét ouurage ſous l'eſpoir que Dieu, qui connoiſt ſon cœur & ſon zele auſſi ardent que ſincere, en benira le ſucces: auſſi ſe repoſe elle fidèlement ſur

l'affection , vigilance & sage conduite de ceux qu'elle a choisis pour la servir en cette occasion aussi importante à la gloire du tout Puissant , & au repos public de toute la Chrestienté , comme à la grandeur & reputation de sa Maiesté , & qu'ils sçauront tellement mesnager avec iugement & adresse les saintes intentions & conseils salutaires de sa Maiesté, que le public luy sera redevable de ce devoir Chrestien , ses amis & alliez d'un office aussi cordial que vtile à eux de l'honneur & de la grace qu'ils en auront receus sous son nom & autorité , qu'elle accompagnera encore volontiers où ils escherra d'une favorable reconnoissance digne de leur qualité & services.

Fait à Fontaine-Bleau le huitiesme iour d'Auril 1620. Signé Louys , & plus bas , Brulart.

E N V I V E N T L E S
lettres écrites par le Roy, à
l'Empereur, Princes, & Poten-
tats d'Allemagne, desquelles sa
Majesté a chargé lesdits sieurs
Ambassadeurs.

A L' E M P E R E U R,

TR E S - H A V T , tres - puissant , & tres-
excellent Prince nostre tres-cher & tres-
amé bon frere & Cousin : Nous vous auons
cy-deuant fait entendre par nos lettres, & par
ce que le sieur de Baugy nostre Resident vous
en aura représenté de nostre part, le conten-
tement que nous auons receu de l'assomption
de vostre Maiesté à la dignité Imperiale, &
auons encore donné charge à nostre tres-cher
Cousin le Duc d'Angoulême, Colonel Ge-
neral de nostre Caualerie legere, & aux sieurs
de Bethune, Cheualier de nos Ordres, Con-
seiller en nostre Conseil d'Estat, & de Preaux
Chancelier de nosdites Ordres, & Conseiller
en nostredit Conseil d'Estat, que nous enuoyés
presentement nos Ambassadeurs extraordi-
naires en Allemagne, d'accomplir plus par-
ticulierement en nostre nom, l'office de con-
iourance avec vous sur ce suiet, luy renou-
uelant les assurances de nostre sincere & cordia-
le amitié & affection en son endroit, dont

nous auons à plaisir de luy rendre preuue aux occasions importantes qui s'offrent par les moyens qui luy en seront proposez , & choisirez meilleurs & plus conuenables , pour appaiser les troubles & mouuemens suruenus par delà. A quoy nous ne doutons point , que selon sa pieté & prudence , elle ne contribue volontiers à cette bonne œuvre, ce qu'elle a tousiours fait au bien & repos public , pour lequel nous remettons à nosdits Ambassadeurs , de luy faire entendre ce qui est de nos bonnes intentions , la priant leur aiouster foy & creance. Et nostre Seigneur , tres-haut , tres-excellent, & tres-puissant Prince, nostre tres-cher , & tres-amié bon frere & cousin ; qu'il vous ait en sa sainte & digne garde. Escrit à Orleans le 13. Avril 1620.

Vostre bon frere & cousin Louys , & plus bas, Brolet.

A tres-haut , tres-puissant , & tres-excellent Prince , tres - amié , bon frere & cousin l'Empereur.

AV ROY DE POLOGNE.

TRES-HAUT, tres-excellent , & tres-puissant Prince, nostre tres-cher, & tres-amié frere & cousin: enuoyant presentement nostre tres-cher , le Cousin d'Angoulême , Colonel General de nostre Cavallerie legere ,

& les sieurs de Bethune , Cheualier de nos Ordres , & de Preaux , Chancelier de nosdits Ordres , Conseiller en nostre Conseil d'Etat , nos Ambassadeurs extraordinaires en Allemagne , pour les affaires qui y passent , pour essayer par nos offices de preuenir le mal dont le public est menacé : Nous leurs auons donné charge de vous visiter de nostre part , & vous faire entendre ce qui est de nos bonnes intentions sur ce sujet , esperant qu'elles seront tousiours secondées & appuyées de vous , par l'affection que vous auez tousiours tesmoigné au bien & repos public de la Chrestienté , & nous aurons tousiours à plaisir de vous faire paroistre ce que nous vous portons , dont nous auons commandé ausdits Ambassadeurs de vous renouveler les assurances , sur lesquelles nous remerciant , nous prions Dieu , tres-haut , tres-excellent , & tres-puissant Prince , nostre tres-cher , & tres-ami frere & cousin , qu'il vous ait en sainte & digne garde. Escrit à Orleans le 13. Avril 1620.

Vostre bon frere & cousin Louys , & plus bas , Brulart.

A tres-haut , tres-excellent , & tres-puissant Prince , nostre tres-cher & tres-ami bon frere & cousin , le Roy de Pologne.

AV ROY DE DANNEMARC.

TR E S-H A V T, tres-excellent, & tres-puissant Prince, nostre tres-cher & tres-amié frere & Cousin, allié & confederé : Enuoyant presentement nostre Cousin le Duc d'Angoulesme, Colonel general de nostre cavalerie legere, & les sieurs de Bethune, Chevalier de nos Ordres, & Conseiller en nostre Conseil d'Estat, & de Preaux aussi Conseiller en nostredit Conseil d'Estat, & Chancelier de nosdits Ordres, nos Ambassadeurs extraordinaires en Allemagne, sur les affaires qui s'y passent, pour eslayer par nos offices & nostre affection au bien general de la Germanie, de porter les choses à vne amiable & raisonnable composition qui assure le repos & la tranquillité publique que nous auons en singuliere recommandation. Nous leur auons donné charge de vous visiter de nostre part, & vous faire entendre ce qui est de nos intentions sur ce sujet, esperant que vous y contribuerez volontiers aussi par vostre prudence les effets de vostre credit & pouuoir où il sera besoin, pour preuenir les maux que la durée de ces troubles pourroient causer. Et nous remettant sur ce que nosdits Ambassadeurs vous en exposeront plus particulièrement de nostre part, comme des assurances qu'ils vous renouelleront de nostre sincere & cordiale affection en vostre endroit ; nous prierons Dieu, tres-haut

MEMOIRES D'ESTAT. 331

tres-excellent & tres-puissant Prince, nostre
tres-cher & tres-amé frere & cousin, allié &
confederé, qu'il vous ait en sa sainte & digne
garde. Escrit à Orleans le 13. Avril 1620.

Vostre bon frere, Cousin, allié & confederé,
Louys, & plus bas, Brulart.

A tres-haut, tres-excellent, & tres-puissant
Prince, nostre tres-cher, & tres-amé bon fre-
re, cousin, allié & confederé, le Roy de
Dannemarc.

AV ROY DE SVEDE.

TRES-HAUT, & tres-excellent Prin-
ce, nostre tres-cher & tres-amé cousin
& allié, enuoyant presentement nostre tres-
cher & cousin le Duc d'Angoulesme, Colonel
general de nostre caualerie legere, & les sieurs
de Bethune, Conseiller en nostre Conseil d'E-
stat, & Cheualier de nos Ordres, & de Preaux
aussi Conseiller en nostredit Conseil d'Etat,
& Chancelier de nosdits Ordres; nos Ambas-
sadeurs extraordinaires en Allemagne, sur les
affaires qui s'y passent pour eslayer par nos of-
fices & affection au bien general de la Germa-
nie, de porter les choses à vne amiable & rai-
sonnable composition qui assure le repos & la
tranquillité publique que nous auons en singu-
liere recómandation: Nous leur auons donné
charge de vous visiter de nostre part, & vous

faire entendre ce qui est de nos bonnes intentions sur ce faict , esperant que vous contribuerez aussi volontiers , par vostre prudence les effets de vostre credit , & pouuoir , où il sera besoin , & nous remettans sur ce que nosdits Ambassadeurs vous en exposeront plus particulièrement de nostre part , comme des assurances qu'ils vous renouelleront de nostre sincere & cordiale affection en vostre endroit. Nous prions Dieu , tres-haut , & tres-excellent Prince , nostre tres-cher , & tres-amié cousin & allié qu'il vous ait en sa sainte & digne garde. Escrit à Orleans le treiziesme Avril 1620.

Vostre bon cousin & allié Louys , & plus bas , Brulart.

A tres-haut , & tres-excellent Prince , nostre tres-cher cousin , le Roy de Suede.

AL' ARCHEVESQUE DE COLOGNE.

MON Cousin , enuoyant presentement mon cousin le Duc d'Angoulesme , Colonel general de ma Cauallerie legere , le sieur de Bethune , Cheualier de mes Ordres , Conseiller en mon Conseil d'Estat , & le sieur de Preaux aussi Conseiller en mondit Conseil d'Estat , & Chancelier de mesdits Ordres , mes Ambassadeurs extraordinaires en Allemagne , ie leur ay commandé de vous

visiter de ma part , & vous confirmer les assurances de la bonne volonté que ie vous porte , comme au repos & benefice public de l'Empire. Ils vous diront aussi ce qui est de mes bonnes intentions sur les affaires qui se passent par delà , que j'aurois à plaisir de pouvoir avec vostre bonne assistance , reduire en terme d'un iuste accommodement , faisant cesser les troubles qui travaillent la Germanie , & peuvent grandement alterer la tranquillité generale de la Chrestienté , & faire prejudice à la Religion Catholique , laquelle m'estant en singuliere recommandation j'employe tres-volontiers mes offices , pour eslayer de maintenir toutes choses en bon estat , & me promets de vostre affection , interest & prudence , que vous y contribuerez de mesme les vostres , & ajouterez foy & creance à ce que vous feront plus particulièrement entendre de ma part mesdits Ambassadeurs , sur lesquels me remettant, ie prie Dieu mon Cousin , qu'il vous ait en sa sainte & digne garde : Escrit d'Orleans , le 23. Avril 1620. signé Louys, & plus bas , Brulart, & la suscription , A mon Cousin l'Archevesque de Cologne , Prince & Electeur du saint Empire.

Il y en a deux pareilles pour les Archevesques de Mayence & de Treves , avec pareille suscription.

AV COMTE PALATIN.

MON Cousin , enuoyant presentement en Allemagne , mon Cousin le Duc d'An-

goulesme, Colonel general de ma caualerie legere, & les sieurs de Bethune, & de Préaux Cheualier & Chancelier de mes Ordres, Conseiller en mon Conseil d'Etat, mes Ambassadeurs extraordinaires, sur les occasions qui se presentent, ie leur ay particulierement commandé de vous voir & visiter de ma part, vous renouueller les assurances de mon amitié & bonne volonté, vous faire entendre ce qui est de mes bonnes intentions, dequoy ie vous prie les croire & apporter ce qui dependra de vous; pour paruenir à vne amiable composition des troubles qui agitent maintenant la Germanie, y rendant les preuves accoustumées de vostre affection, au bien & repos public: & me remettant sur ce que vous exposeront plus amplement mesdits Ambassadeurs sur ce suiet, ie prie Dieu, mon Cousin, qu'il vous ait en sa sainte & digne garde: Escrit à Orleans le 23. Avril 1620. signé Loyys, & plus bas, Brulart, & la suscription, A mon Cousin le Comte Palatin du Rhin, Prince & Electeur du saint Empire.

Ladite lettre a esté présentée à l'assemblée d'Ulme, deux semblables ont esté écrites aux Ducs de Saxe, & Marquis de Brandebourg avec pareille suscription.

Il y a encore vne autre semblable, pour les Electeurs, Princes & Estats vnis de l'Empire.

AV DVC DE LORRAINE.

MON Oncle, ie sçay le desir qu'auez de voir les mouvemens d'Allemagne composez, c'est pourquoy ie ne doute point que vous ne secondiez volontiers les bons offices que i'employe à cét effet, par l'enuoy de mon Cousin le Duc d'Angoulême, Colonel general de ma caualerie legere, du sieur de Bethune, Conseiller en mon Conseil d'Estat, Chevalier de mes Ordres, & du sieur de Preaux, aussi Conseiller en mondit Conseil d'Estat, & Chancelier de mesdits Ordres, mes Ambassadeurs extraordinaires audit pays, pour vous visiter de ma part, & vous confirmer les assurances de mon affection & bien-veillance en vostre endroit, & de toute vostre maison: ils vous feront part aussi de mes bonnes intentions, sur le suiet de la charge que ie leur ay donnée, comme ie vous prie de leur faire de vos bons auis, afin de rendre le voyage plus fructueux pour le public, & prie Dieu, mon Oncle, qu'il vous ait en sa sainte & digne garde: Escrit à Orleans le 23. Avril 1620.

Vostre bon neveu Louys.
A mon Oncle le Duc de Lorraine & de Bar.

AV COMTE DE
Vaudemont.

MON Cousin, ayant donné charge à mon Cousin le Duc d'Angoulême, Colonel general de ma caualerie legere, & aux sieurs de Bethune Cheualier de mes Ordres, Conseiller en mon Conseil d'Estat, & de Preaux aussi Conseiller en mondit Conseil d'Estat; & Chancelier de mesdits Ordres, que j'en-uoie presentement mes Ambassadeurs extraordinaires en Allemagne, de visiter mon Oncle le Duc de Lorraine, & luy faire part de mes bonnes intentions, sur le suiet de leur voyage: ie leur ay pareillement commandé de faire le mesme office pres de vous, & vous renouveler les assurances de ma bonne volonté, en vostre endroit, dont vous esprouerez tousiours les effets en toutes les occasions qui s'offriront pour vostre contentement, ainsi que vous diront plus particulierement mesdits Ambassadeurs, sur lesquels me remettant, ie prie Dieu, mon Cousin, qu'il vous ait en sa sainte garde: Escrit d'Orleans, le 23. Avril 1620. signé Louys, & plus bas, Brulart, & la suscription, A mon Cousin le Comte de Vaudemont.

ALL' ARCHI.

A L'ARCHIDUC LEOPOLD.

MON Cousin, enuoyant presentement en Allemagne mon Cousin le Duc d'Angoulême, Colonel general de ma caualerie legere, & les sieurs de Bethune, Cheualier de mes Ordres, Conseiller en mon Conseil d'Estat; & de Preaux, aussi Conseiller en mon Conseil d'Estat & Chancelier de mesdits Ordres, mes Ambassadeurs extraordinaires; ie leur ay donné charge de vous visiter de ma part, & vous asseurer de l'affection & bonne volonté que ie vous porte, vous faisant entendre ce qui est de mes bonnes intentions, sur les affaires qui se passent par delà, que i'aurois à plaisir de pouuoir par mes offices, conduire aux termes d'un bon accommodement. A quoy ie m'asseure que vous contribuerez aussi volontiers ce qui dependra de vous, comme pour un benefice public, & un interest notable de la Religion Catholique, qui m'est en singuliere recommandation, avec ce qui concerne le bien & contentement de vostre Maison, comme vous diront plus particulierement mesdits Ambassadeurs, sur lesquels me remettant, ie prie Dieu, mon Cousin, qu'il vous ait en sa sainte garde. Ecrit à Orleans le 13. Avril 1620. Signé Louys, & plus bas Brulart. Et la suscription, A mon Cousin l'Archiduc Leopold d'Austriche.

Il y en a vne pareille pour l'Archiduc Charles d'Austriche, avec pareille suscription.

AV DUC DE BAVIERE.

MON Cousin, enuoyant presentement mes Ambassadeurs extraordinaires en Allemagne, mon Cousin le Duc d'Angoulesme, Colonel general de ma caualerie legere, le sieur de Bethune Cheualier de mes Ordres, Conseiller en mon Conseil d'Estat, & le sieur de Preaux, aussi Conseiller en mondit Conseil d'Estat, & Chancelier de mesdits Ordres, ie leur ay commandé de vous voir, & vous assurer de ma part de la continuation de la bonne volonté que ie vous porte, vous informant de mes bonnes intentions sur les affaires presentes de la Germanie, que ie souhaitteroïs pouuoir estre reduites en termes d'vn amiable & iuste accommodement, qui fut vtile & agreable à tous, à quoy selon la connoissance que i'ay de vostre affection enuers le public, ie m'assure que vous contribuerez volontiers ce qui peut dependre de vostre creance, enuers les vns & les autres, secondant les bons offices que i'ay chargé mesdits Ambassadeurs, de faire ainsi qu'ils vous diront plus particulierement, sur lesquels me remettant, ie prie Dieu, mon Cousin, qu'il vous ait en sa sainte & digne garde, escrit à Orleans le xiiij. Avril. 1620. signé Loyys, & plus bas Brulart, & à la suscription. A mon Cousin le Duc de Baviere.

Il y a seize autres pareilles lettres, avec les suscriptions qui ensuiuent,

A mon Cousin Ioachin Ernest, Marquis de

Brandebourg & d'Ansbak.

A mon Cousin le Duc de Vvittemberg.

A mon Cousin Georges Frideric, Marquis de Baden.

A mon Cousin le Duc de Saxe, & de Vveimar.

A mon Cousin Jean, Comte Palatin du Rhin, Duc des deux Ponts.

A mon Cousin Christian, Marquis de Brandebourg & de Culuback.

A mon Cousin le Duc de Saustin.

A mon Cousin le Duc de Brunswick.

A mon Cousin le Duc de Saxe, & de Cobourg.

A mon Cousin le Prince Christian d'Anhalt.

A mon Cousin le Land-graue Maurice de Hesse.

A mon Cousin le Duc de Neubourg.

A mon Cousin le Duc de Lunebourg.

A mon Cousin le Duc de Pomeranie.

A mon Cousin le Duc de Mekelbourg.

A mon Cousin le Comte de Hanau.

AV PRINCE DE TRANSYLVANIE.

MOn Cousin, les troubles & mouvemens survenus en Allemagne, m'ayans conuié d'y enuoyer mon Cousin le Duc d'Angoulême, Colonel general de ma cavalerie legere, & les sieurs de Bethune, Cheualier de mes Ordres, Conseiller en mon Conseil d'Estat, & de Preaux aussi Conseiller en mondit Conseil d'Estat & Chancelier de mesdits Ordres, mes Ambassadeurs extraordinaires, pour eslayer de porter les affaires & differens, à quelque amiac

ble & iuste accommodement , par l'interest & affection que ie porte au bien & repos de la Germanie : ie leur ay par mesme moyen commandé de vous visiter de ma part, & vous asseurer de l'estime que ie fais de vostre personne, comme de la bonne volonté que ie vous porte, de laquelle ie souhaite qu'il s'offre occasion de vous faire paroistre les effects, ainsi que vous diront plus particulièrement mesdits Ambassadeurs, vous declarans aussi ce qui est de mes bonnes intentions, sur le sujet desdictes affaires, qui se presentent, à quoy ie me promets de vostre affection enuers le bien public, que vous contribuerez aussi ce qui dependra de vous , adioustant foy & creance à tout ce que mesdits Ambassadeurs vous representeront sur ce sujet, & que ie prie Dieu, mon Cousin, qu'il vous ait en sa sainte & digne garde, escrit à Orleans le 13. Avril 1620. signé Louys, & plus bas Brulart, & la suscription, A mon Cousin le Prince de Transylvanie.

Pour les autres Princes d'Allemagne.

MOn Cousin, vous receurez cette lettre par les mains de mon Cousin le Duc d'Angoulesme, Colonel general de ma caualerie legere, & des sieurs de Bethune Conseiller en mon Conseil d'Estat, & Cheualier de mes Ordres, & de Preaux aussi Conseiller en mondit Conseil d'Estat & Chancelier de mesdits Ordres, que i'enuoye presentement mes Am-

baſſadeurs extraordinaires en Allemagne, ſur les affaires qui ſe preſentent, ſouhaittant qu'elles y peuſſent eſtre portées aux termes de quelque bon accommodement agreable & vtile à vn chacun, ainſi que vous diront plus particulièrement meſdits Ambaſſadeurs, vous expoſans ce qui eſt de mes bonnes & ſainctes intentions ſur ce ſujet, & vous confirmans les aſſeurances de la bonne volonté que ie vous porte, dont ie vous prie faire toujours eſtat, & noſtre Seigneur, mon Couſin, qu'il vous ait en ſa ſaincte & digne garde. Eſcrit à Orléans le 13. Avril mil ſix cens vingt, ſigné Louys, & plus bas, Brulart.

Il y a ſix lettres pareilles en blanc pour remplir du nom des Princes d'Allemagne qui ſe trouveront ſur les chemins.

Aux Villes Imperiales.

TRes-chers & bons amis, l'affection que nous portons au bien & repos de la Germanie, nous fait enuoyer preſentement par de là noſtre tres-cher Couſin le Duc d'Angoulême Colonel general de noſtre caualerie legere, & les ſieurs de Bethune Cheualier de nos Ordres, & de Preaux Chancelier de noſdits Ordres, Conſeillers en noſtre Conſeil d'Eſtat, nos Ambaſſadeurs extraordinaires, pour aduiſer aux moyens de faire ceſſer les troubles qui agitent non ſeulement l'Allemagne, mais encores peuuent donner atteinte à la tranquillité generale de la Chreſtienté, en laquelle com-

me nous tenons vn des premiers rangs , nous auons aussi eſtimé à propos de contribuer nos offices, & rendre preuue de nos bonnes & ſainctes intentions enuers le public, deſquelles ayant chargé noſdits Ambaſſadeurs, nous nous remettons ſur eux de vous les faire entendre, & de la bonne volonté que nous portons à voſtre Republique, ſuiuant le commandement que nous leur auons donné de vous viſiter de noſtre part, auxquels vous adiouſterez donc toute foy & creance. à tous. Nous prions Dieu, tres-chers & bons amis, qu'il vous ait en ſa ſainte & digne garde, eſcrit à Orleans le 13. Auiil 1620. ſigné Louys, & plus bas Brulart.

Il y en a ſix pareilles pour les villes Imperiales, auxquelles faut mettre les ſuſcriptions, à meſure qu'on ſ'en voudra ſeruir, ſelon les qualitez, rang & dignitez de ceux qui gouuernent leſdites villes.

A nos tres-chers & bons amis.

Straſbourg.

Nuremberg.

Vlme.

Spire.

Vvorme.

Rotembourg.

Outre autres qu'il ſera aduiſé, pour eſtendre la creance conformement à celle-cy.

Aux Villes Anseatiques.

TRes-chers & bons amis , enuoyant presentement nostre tres-cher Cousin le Duc d'Angoulême, Colonel general de nostre cavalerie legere, & les sieurs de Bethune, Chevalier de nos Ordres, Conseiller en nostre Conseil d'Estat , & de Preaux Conseiller & Chancelier de nosdits Ordres, nos Ambassadeurs extraordinaires en Allemagne, sur les occasions qui s'y passent, nous leur auons commandé de vous aßeurer de la continuation de nostre bonne volonté en vostre endroit, tant en general qu'en particulier, vous faisant entendre ce qui est de nos bonnes intentions, pour eslayer de composer les troubles & mouuemens qui agitent presentement la Germanie, dont la suite peut causer des inconueniens tres-perilleux à vostre commun bien & repos, à quoy comme vous auez vn notable interest, nous ne doutons point que vous ne contribuiez par vos prudences ce qui dependra de vous, & ne secondiez volontiers les offices dont nous auons chargé nosdits Ambassadeurs d'y employer, ainsi qu'ils vous l'exposeront plus particulierement de nostre part, de quoy nous remettans sur eux, nous priõs Dieu tres-chers & bons amis, qu'il vous ait en sa sainte & digne garde. Ecrit à Orleans le 13. Aueil 2620. Signé Louys , & plus bas, Brulart.

Faut mettre la suscription selon la qualité & rang que prennent les Recteurs desdites villes.

A nos tres-chers & bons amis les, &c.

*Lettre écrite à Monsieur d'Angoulesme
par Messieurs les Marquis d'Ansbac
& Duc de Vvittemberg, enuoyée par
le sieur de Spinoza, receüe à Châlons
le 12. May 1620.*

Monsieur mon Cousin , incontinent à la venue du sieur de Brunch-Hausen , nous nous sommes rendus en ce lieu, pour auiser ensemble sur le sujet de l'Assemblée des Estats de l'Vnion, que sa Majesté desire, pour vous y recevoir en Corps & ceux de son Conseil qui sont avec vous , & entendre ses commandemens, dont elle nous veut honorer par vostre moyen. Et ayant trouué que pour ce faire, mesme pour la commodité de vostre voyage plus auant, il n'y a lieu plus propre que la ville de Heilbron ; nous auons donné auis à tous ceux de nostre alliance que nous auons iugé y pouuoir arriuer à temps , de vostre dite venue, & les auons priez de s'y vouloir rendre le 21. May prochain venant , style vieux , qui est d'aujourd'huy en quatre Semaines ou les premiers iours d'apres : à quoy nous assurant qu'ils ne voudront manquer nullement, auons depesché ce Gentilhomme, present porteur , pour apres auoir deliuré la presente pour vostre éclaircissement susdit, ensuite de ce qu'il vous auoit pleü concerter avec ledit sieur de Brunc-Hausen, & receu sur ce vostre resolution plus particuliere du temps au vray que pour-

rez arriuer au lieu susdit , & du chemin qu'auez resolu de prendre, vous asseurant que de nostre part vous serez les bien-venus , & que nous ne manquerons si jamais à chose dont nous nous pourrons aduiser , qui puisse tendre au contentement de sa Maiesté , & vostre particulier, & nous rendra d'autant plus dignes de l'honneur que sa Maiesté & vous nous voulez faire, & ce attendant le bon-heur que vous en puissions donner les asseurances nous mesmes, & cependant auons iugé expedient de vous auertir quant & quant par ce mot, que ce seroit vn grand bien & auancement, pour l'effet qui vous fait prendre cette peine, s'il vous plaisoit procurer que les troupes qui sont au delà du Rhin en Alsace & Lorraine , ou bien qui sont encore en chemin pour s'y rendre, n'entreprissent le passage, qui ne leur peut estre donné aucunement, ny à autres , qu'à celles qui iusques à present ont esté auoüées , & notoirement leuées pour le seruice de sa Maiesté Imperiale , auxquelles seules, & à condition qu'elles s'aduancent ensuiuant , sans retardement, leur chemin & non autrement, comme pour témoignage du très - humble respect que luy porte nostre Vnion, & pour vous faire connoistre, que seulement sur le bruit de vostre venuë, nonobstant toutes autres considerations, nous desirons nous accommoder à tout ce que par raison aucune peut estre demandé. Ainsi serions nous marris, si autres voulans presumer le mesme , & lesquels depuis n'aguères nous donnent encor nouveau sujet de n'y pouuoir entendre nullement, nous fussions forcez d'em-

P;

ployer à l'encontre les forces que Dieu nous a mis en main, & les en empescher ainſi que toute raiſon le commande, & comme il a eſté reſolu : ce que par voſtre prudence preuenant, & par conſequent les factions qui autrement ne peuuent eſtre éuitées, vous vous frayeriez avec beaucoup d'honneur & de reputation, à ce commencement le chemin à l'heureuſe iſſuë de voſtre negociation, laquelle priant le bon Dieu qu'il veuille benir, & de nous donner les moyens de vous pouuoir recevoir dignement, & ceux qui ſont avec vous, & honorer comme nous deſirons : Nous demurerons Monsieur mon couſin, tres-affectiionnez couſins & ſeruiteurs, Ioachin Erneſt Marquis de Brandebourg, & le Duc de Vvitemberg. De Halle en Svabe, ce 23. Avril 1620.

Lettre écrite par Meſſieurs les Ambaſſadeurs au Comte de Tornielle, grand Maiſtre de Lorraine.

Monsieur eſtans arrivez icy, nous auons iugé à propos de vous enuoyer ce Gentil-homme, pour vous en donner auiſ, & de recevoir de vous l'ordre que auons à tenir entrans dans les Eſtats de ſon Alteſſe, à laquelle nous eſperons auoir l'honneur de baiſer les mains Dimanche, temps ſi court, qu'il nous empeschera de plus long diſcours, ſi ce n'eſt pour vous aſſeurer que nous ſommes, Mon-

sieur, vos bien humbles à vous faire service,
 signez Charles de Valois, Bethune & Preaux.
 A Thoul le 16. May. 1620.

*Responce dudit sieur de Tornielle, receüe
 à Thoul le 17. May 1620.*

MESSIEURS,

Son Altesse a tant de contentement de vous
 sçavoir près d'elle, qu'elle attend avec beaucoup
 d'impatience celuy de pouvoir vous voir &
 embrasser demain, & sur tout de vous servir en
 toutes les occasions où vous la voudrez em-
 ployer. En mon particulier, Messieurs, ie vous
 supplie très-humblement croire, que ie tien-
 dray toujours à beaucoup d'honneur de rece-
 voir vos commandemens, & que ne m'en de-
 partiray jamais d'aucun, auquel ie n'y obeyse,
 avec le respect que ie dois, ainsi que i'ay requis
 ce Gentilhomme qu'il vous a pleu me depes-
 cher, de vous en asseurer, & de mon très-hum-
 ble service que ie veux vous rendre en tous
 lieux, desireux que ie suis de me conserver la
 qualité, Messieurs, de vostre très-humble ser-
 viteur Charles de Tornielle. De Nancy ce Sa-
 medy 16. May 1620.

Lettre à Monsieur le Duc de Vvitemberg, par Messieurs les Ambassadeurs, enuoyée par le sieur de Spinoza.

MONSIEUR, Le sieur de Spinoza assureurera vostre Altesse, comme nous sommes à Nancy avec dessein de nous mettre en chemin, pour nous rendre à l'Assemblée des Princes vnis, qui fut proposée au Roy par le sieur de Brunc-Hausen, & à laquelle sa Maiesté nous a commandé de nous trouuer pour vous faire entendre, & à tous les Princes & Villes de l'Vnion, ses bonnes & saintes intentions, au bien & repos de toute la Germanie, & attendions nouuelles du lieu où elle seroit indiète. Ayant donc appris qu'elle doit estre à Heilbron nous nous y rendrons au temps prescrit par la vostre, & remettans à vous dire ce que nous aurons peu apprendre sur les autres chefs de vostre lettre, lors que nous aurons l'honneur de vous voir, & vous presenter les lettres de sa Maiesté, comme à Monsieur le Marquis d'Ansbach, auquel nous n'écriuons pour l'incertitude du lieu où il est: Nous assureurons vostre Altesse de rechercher toutes occasions de luy rendre bien-humble seruice, comme estans Monsieur, vos plus humbles seruiteurs Charles de Valois, Bethune & Preaux. De Nancy ce 19. May 1620. Et à costé,

Monsieur, si vous trouuez à propos vous ferez participant Monsieur le Marquis d'Ansbach de la presente.

Premiere Lettre écrite au Roy par Messieurs les Ambassadeurs, de Luneuille, entre Nancy & Strasbourg, mise és mains d'un Gentil-homme du sieur de Vannes, Gouverneur de Thoul, enuoyé expres par ledit sieur de Vannes audit Luneuille.

SIRE,

Nous auons estimé deuoir rendre compte à vostre Maiesté du commencement de nostre voyage, & luy faire entendre comme nous arriuasmes à Nancy, Dimanche dernier dix-huitième du mois, & le bon accueil & reception qui nous a esté faite par Monsieur le Duc de Lorraine, comme il a accoustumé faire à ceux qui le visitent de vostre part, faisant tousiours paroistre vne affection tres-particuliere au service de vostre Maiesté. Le lendemain il nous donna audience, & apres luy auoir fait les complimens ordinaires, & l'auoir asseuré de la bien-veillance de vostre Maiesté en son endroit, & luy auoir présenté la lettre qu'il vous a pleû luy écrire, nous luy fismes entendre le sujet de nostre legation, & vos bonnes intentions, au commun aduantage, conseruation, & repos de la Chrestienté, avec priere de nous assister de ses bons auis & conseils, & y contribuer de sa part, ce qui peut dependre de luy, comme en vne affaire qui le regarde, & tous

les Princes Chrestiens. Ledit sieur Duc s'excusa du commencement par modestie, disant qu'il ne pouuoit rien ajouster au commandement que nous auions de vostre Maiesté : ce neantmoins comme nous entraâmes en conference, il témoigna approuuer grandement l'Assemblée des Princes vnis. Et pour ce que nous auions iugé qu'en suite de ladite Assemblée, il seroit bon d'en moyenner vne des trois Electeurs Ecclesiastiques ; nous luy en fîmes ouerture, ce qu'il approuua pareillement : & estimant estre plus à propos que la proposition en fut faite ausdits Electeurs Ecclesiastiques par ledit sieur Duc, il s'offrit d'enuoyer vers eux, & de fait y a enuoyé vn Gentil-homme, lequel nous doit apporter la resolution desdits Electeurs dans le huitième du mois prochain à Heilbron, ville Imperiale, où nous serons pour l'Assemblée desdits Princes vnis ; & si l'Assemblée desdits Electeurs Ecclesiastiques se resoult, cela apportera vn grand contentement à nostre negociation, parce que les trouuans tous ensemble, nous serons déchargez du temps qu'ils nous faudroit employer pour les aller trouuer en particulier. Nous auons trouué audit Nancy vn Gentil-homme qui nous estoit enuoyé de la part dudit Duc de Vvitemberg & Marquis d'Ansbach, pour nous faire sçauoir que l'Assemblée desdits Princes vnis est au premier du mois prochain audit Heilbron, & nous aileurer que le Duc des Deux-Ponts, le Landgraue de Hessen, ledit Marquis d'Ansbach, ledit Duc de Vvitemberg & autres Comtes, Barons, & Deputéz des Villes de l'Vnion

s'y trouueront, qui sera vn moyen pour auancer le fruit de nostre negociation, d'autant que nous pourrons beaucoup plus vtilement concerter avec eux ainsi assemblez, & prendre leur sentiment, & connoistre mieux leurs inclinations au fait qui se presente, que si nous les eussions veus en particulier. Nostre plus grande diligence, SIRE, auroit esté iusques icy inutile, pour ce que le Gentil-homme venu de la part dudit Duc de Vvitemberg, a fait connoistre que ces Princes qui s'assemblent, desireroient bien que nous ne nous rendissions audit Heilbron, que le trois ou quatre du mois prochain, afin qu'ils eussent le loisir de se voir deuant que nous fussions arriuez à eux, tellement que nous serons contrains de séjourner deux ou trois iours à Strasbourg. Nous eussions desiré employer ce temps à visiter l'Archiduc Leopold, n'estoit que nous apprenons qu'il est party depuis quelques iours de Sauerne, pour s'acheminer vers le Pont de Brissac, pour faire faire montre generale à ses troupes le 25. ou 26. de ce mois: & ainsi nous estimons qu'il suffira de luy enuoyer vn Gentil-homme avec celle qu'il a plect à vostre Maiesté luy écrire: n'estant pas une des personnes des plus necessaires à nostre negociation. Messieurs les Duc de Lorraine, & de Vaudemont, comme plusieurs Capitaines que nous auons rencontréz qui vont au service de l'Empercur, nous ont parlé assez diuersement du passage des troupes à Brissac, les vns trouuans que lesdites troupes ne peuuent passer sans venir aux mains avec le sieur Marquis de Durlach; &

les autres au contraire croient que les Forts que ledit Marquis à faits étant à vn quart de lieuë dudit pont, ils pourront passer sans se battre, si ce n'est que d'eux mesmes ils se portent volontairement au combat, ce qui n'est à presumer, dautant que nous voyons les vns & les autres fort retenus à ne vouloir estre les premiers auteurs de la guerre ciuile dans leur pais, & mesmes, quand ledit Marquis de Durlach pourroit empescher le passage desdites troupes, il laissera tousiours passer celles qui s'auouëront pour l'Empereur en Boheme. Et pour ce qui regarde les leuées du Duc de Bauiere, qu'on dit estre de vingt-mille hommes de pied, & quatre mille cheuaux (ce que difficilement nous croyons.) Nous n'auons pû, **SIRE**, certainement apprendre dudit sieur de Vaudemont où il les veut employer, & sur ce que nous l'auons pressé pour essayer de penetrer ce qui estoit de leur dessein, il nous a dit lesdites leuées se faire pour la conseruation du pays dudit Duc de Bauiere au mouuement general qui se prepare. Toutesfois nous auons reconnu qu'il n'est pas marry qu'on croie que lesdictes troupes se leuent pour l'execution du ban Imperial, qui semble deuoir interuenir contre l'Electeur Palatin, pour l'auancement duquel on luy mande de Vienne qu'on a ia enuoié quelques monitoires audit Electeur, dont ledit sieur de Vaudemont receut aussi nouuelles le iour de nostre parlement de Nancy, qu'en la diette qui se doit faire en Hongrie, Betlehem Gabor pretend s'en faire eslire Roy, & pour y paruenir y a pratiqué les

plus grands, & mesmes beaucoup de Catholiques, qui iusqu'icy estoient demeurez fermes pour l'Empereur, & qui maintenant inclinent au desir dudit Betlehem, lequel trauaille à s'affermir en cette Couronne, par le moyen mesme du Turc, & empescher qu'il ne vienne secours à l'Empereur du costé de Pologne par la menace qu'il fait d'y faire entrer les Tartares, dequoy les Polonnois semblent estre refroidis d'enuoyer leurs troupes en Silesie, comme ils auoient promis à sa Majesté Imperiale, ce que vostre Majesté pourra auoir desia appris par les aduis du sieur de Baugy : Toutesfois nous n'auons pas voulu manquer de luy en mander ce qui nous a esté dit sur ce sujet, comme nous ferons tousiours en ce que iugerons importer à son seruice, estant de vostre Maiesté, SIRE, tres-obeyssans & tres-fideles sujets & seruiteurs, Charles de Valois, Bethune & Preaux. De Luneuille ce 22. May 1620.

Lettre à Monsieur de Puyzieux accompagnant celle du Roy.

MONSIEUR,

Nous escriuons au Roy pour faire entendre à sa Majesté ce que nous auons fait iusques icy au fait de nostre negociation : & bien que par là vous soyiez assez informé, nous auons iugé vous deuoir faire cellecy, en particulier pour vous dire que nous auons esté fauorablement

recueillis de Monsieur le Duc de Lorraine, lequel mesmes a voulu prendre la peine de nous venir recevoir & remener hors la ville, aussi nous nous sommes enuers luy, avec le plus de soin & d'affection que nous auons pû, acquittez de nostre commission. Nous auons trouué à Nancy vn Gentil-homme enuoyé vers nous de la part du Duc de Vvtemberg, pour nous asseurer que l'assemblée des Princes vnis est resoluë à Heilbron, ville Imperiale, au premier iour du mois prochain, mais il nous a fait connoistre que ces Princes seroient bien-aïses que nous differassions à nous y rendre iusques au sixiesme pour se pouuoir voir, & concerter entr'eux de leurs affaires, ce qui nous contraindra à sejourner trois iours à Strasbourg. Et d'autant que nous auons iugé grandement necessaire à l'aduancement de nostre voyage, que les Electeurs Ecclesiastiques se voulussent assembler pour nous donner moyen de les voir en vn mesme lieu aussi bien que les Princes vnis; nous auons fait en sorte que ledit sieur Duc de Lorraine, a comme de luy-mesme enuoyé vn Gentil-homme vers eux pour moyenner ladite Assemblée, & nous doit reuenir trouuer dans le huitième du mois prochain audit Heilbron, avec la resolution qu'auront prise lesdits sieurs Electeurs, & le iour & lieu qu'ils auront choisi: delà nous donnerons auis de tout au Roy & à vous, qui sçaurez aussi que nous auons appris que le Reingraue est destiné pour demeurer avec ses troupes en Alsace, à la conseruation du païs, en cas que la guerre ciuile soit en toute l'Allemagne. Cc.

pendant nous vous dirons qu'ayant de Thoul enuoyé à Mets les lettres du Roy au sieur de Flauigny & Praillon, ledit Flauigny nous est venu trouuer à Nancy, ainsi que nous luy auions mandé, qui nous a dit ledit Praillon estre à Paris, il y a six Semaines. De plus nous auons sceu que ledit Praillon ne peut seruir d'interprete, & que son pere estoit bien versé aux langues Germaniques, mais que cestuy-cy n'a esté conserué en la charge d'interprete, qu'en consideration des seruices du pere. Nous pourrons prendre vn nommé Bernard passant à Strasbourg, pour nous seruir iusques à la fin de l'assemblée des Princes vnis, mais n'estant Catholique, nous le renuoyons de là, & nous seruirons des occasions qui se pourront offrir, & que nostre soin & affection pourront rencontrer à cet effet. Au reste nous vous supplions de vous souuenir que par obéissance, nous sommes partis sans que nostre estat fust signé, mais que maintenant nous le demandons par raison à commencer dès le premier Aueil, ainsi que nous deuons attendre des promesses qui nous ont esté faites & des seruices que nous rendōs & espérons rendre de iour à autre, croyans qu'il vous plaira d'en prendre soin, comme de ceux qui sont absens, & employez au seruice du Roy avec beaucoup plus de dépence que nous ne pensions nous-mesmes, & attendant cela de vostre bien-veillance, nous demeurerons Monsieur, vos tres-humbles seruiteurs, Charles de Valois, Bethune, & Preaux, De Luneuille ce 22. May 1620.

Instruction donnée au sieur de Sigongne , enuoyé de Blamont vers l'Archiduc Leopold , sur l'avis qu'on eut qu'il estoit à Sauerne.

LE sieur de Sigongne s'en allant trouver l'Archiduc Leopold de la part de Messieurs les Ambassadeurs, luy fera entendre qu'ils s'estoiēt acheminez expres par ce chemin icy, esperant ce bien de le voir, mesmes sur vn bruit qui estoit arriué à Nancy de son prompt retour à Sauerne, sans laquelle nouvelle ils luy eussent depesché pour apprendre au vray le lieu de son seiour en rendant la lettre que le Roy luy escrit ; resmoignera que sa Majesté auoit desiré continuer les assurances de sa bonne volonté en son endroit, que pour luy communiquer les principaux poincts de leur legation, laquelle estant toute entiere, à l'auantage de sa Maiesté Imperiale, sa Majesté croit que mondit sieur l'Archiduc y contribuera ses aduis & conseils tres-bons, comme il en est prié par mesdits sieurs les Ambassadeurs, lesquels eussent esté iusques à Ruffac, pour luy aileurer de viue voix ce qui estoit des bonnes intentions du Roy, tant en son endroit qu'en general de toute sa maison , mais l'Assemblée des Princes vnis & de leurs confederrez, estant resoluë au premier de Iuin , ils eussent semblé vser de negligence de ne s'y rencontrer pas ; c'est pourquoy ledit Sigongne priera mondit sieur l'Archiduc de nous en ex-

cufer, luy faifant toutefois entendre difcrettement que tiendrions à beaucoup d'honneur, fi fa commodité permettoit de venir à Sauerne, ou tel lieu commode que fon Alteffe iugeroit à propos, & pour le temps & pour noſtre chemin, afin qu'euffions le bien de l'y viſiter. Fait à Blamont le 23. May 1620.

*Lettre écrite audit ſieur Archiduc
Leopold.*

MON SIEVR, La creance que nous auions de trouuer voſtre Alteffe à Saucogne, nous auoit obligez à prendre ce chemin, tant pour auoir ce bien de vous rencontrer & viſiter de la part du Roy, que pour rendre la lettre que ſa Maieſté vous écrit, & faire entendre ſes intentions ſur le ſuiet de noſtre legation, laquelle eſtant attenduë à iour prefix par Meſſieurs les Princes vnis & leurs confederez à Heilbron, & le temps eſtant ſi court que nous ne le pouuons differer, nous nous ſommes aſſez excuſez que voſtre Alteffe receura nos excuſes de ne l'aller trouuer, puis qu'elles ſont fondées ſur vn ſujet qui regarde le bien general & le repos de toute la Germanie, enſemble le ſeruiſſe de ſa Maieſté Imperiale, comme ce Gentilhomme a plus particuliere charge de faire entendre à voſtre Alteffe de noſtre part, de laquelle nous ſommes, Monſieur, vos plus humbles ſeruiteurs, Charles de Valois, Bethune & Preaux. De Blamont le 23. May 1620.

*Lettre de Monsieur de Puyzieux receüe à
Salsbourg par le Laquais de Monsieur
de sainte Catherine.*

MESSIEURS,

M Vous sçavez le commandement qu'a eu le sieur de sainte Catherine de s'acheminer vers Monsieur l'Electeur Palatin pour y continuer sa residence & services ordinaires sur les occasions qui s'offrent : mais ledit sieur de sainte Catherine nous a fait sçavoir par le Laquais qu'il nous a depesché exprés, que ledit Electeur, ainsi qu'il a déjà compris de ce qui luy a esté mandé, desire & pretend que le tiltre de Roy luy soit donné par les Ambassadeurs & ministres des Roys & Princes qui l'iront trouver, sinon les siens se font entendre assez clairement qu'il n'est pas pour les admettre, & que c'est vne resolution prise en l'assemblée des Estats de Bohême lors de son couronnement. Sa Majesté pour bonnes raisons & considerations n'a pas jugé luy devoir donner la qualité de Roy, ainsi qu'il est porté par vostre instruction, partant ordonne sur cela audit sieur de sainte Catherine, si le grand Maistre dudit Electeur, auquel il s'est adressé par lettres pour estre mieux éclaircy de l'intention dudit Palatin, ne la luy fait sçavoir plus favorable, qu'il se rende au plustost pres de vous Messieurs pour vous informer de bouche & à plein de tout ce qui est de sa connoissance & puisse

seruir à vostre legation. Il demeurera près de vous comme personne priuée, sa charge auprès dudit Electeur estant par là expirée iusques à ce que le Roy en ait autrement ordonné : Il est assez duit & instruit des ceremonies Allemandes, & ipecialement en ce qui concerne les Princes de l'Vnion que vous auez à voir ensemble : aussi ie luy mande de la part de sa Majesté s'il peut qu'il soit auprès de vous avant ladite assemblée, que Monsieur le Duc de Vvitemberg a deû moyenner sur ce que le sieur de Bunichausen luy aura porté. Ledit sieur de sainte Catherine est de la Religion pretenduë Reformée, vous en userez avec luy sur cette connoissance : du reste, bon homme, il est bien connu de Monsieur de Preaux, auquel ie m'en remets, les affaires & les esprits s'eschauffent en Allemagne. Le dernier exploit du Comte de Bucquoy a releué aucunement les affaires de l'Empereur & peut seruir à mieux disposer lesdits de l'Vnion à faciliter vn accommodement. Il nous semble que ledit Palatin prend mauuais conseil venir & demeurer auprès de luy l'homme du Roy, qui seroit tousiours donner quelque lustre & force à son party, lequel faute de cette admission demeurera affoibly & descrié, ses aduersaires en sçauront bien profiter : & si sa Majesté n'estoit plus considérée pour le public, elle y procederoit plus hardiment sur cette conduite dudit Electeur, qu'il regle plus à la passion d'autrui qu'à la raison & à son benefice, dequoy toutefois il ne faut faire demonstration à present enuers lesdits Princes de l'vnion, pour ne leur faire croire que

cette action rende sa Maieſté parziale & & moins affectionnée à la cauſe generale. Le Roy eſt en bonne ſanté, & depuis voſtre depart a couru deux fois la bague, & le fait encor demain ſolennellement à la Place-royale. Ce qui ſert à ſes affaires & à ce faire par tels exercices eſtimer des vns & redouter des autres. L'affaire des Princes va eſtre terminée, Monsieur le Mareſchal Deſdiguieres ſ'en retourne en Dauphiné: ſ'il y reſte quelque choſe en ce qui ſera de luy, il ſervira volontiers. Les Cahiers ont eſté bien & juſtement répoſdus à ceux de la Religion pretenduë Reformée, de ſorte qu'ils ont occaſion de contentement. Monsieur de Blainville eſt allé trouver la Reine mere pour luy porter ſatisfaction ſur aucuns poincts qu'elle a demandez, non pour l'inuiter de venir, le Roy laiſſant cela à ſa commodité, ce que ſa Maieſté auroit toutefois tres-agreable, & moy les occaſions de vous témoigner que ie ſuis, Meſſieurs, voſtre tres-humble & tres affectionné ſerviteur, Puyſieux. Et à coſté: Meſſieurs j'apprens encore que les Catholiques & l'Electeur de Saxe n'aguères aſſemblez à Milauſes, ont auſé d'écrire aux Princes vnis pour les inuiter à la paix, & d'exhorter encore l'Electeur Palatin, ce qui vous pourra ſervir, Ecrit à Paris le 17. May 1620.

Lettre

*Lettre écrite par Monsieur l'Archiduc
Leopold à Messieurs les Ambassa-
deurs, receüe à Sauerne, le vingt-
quatrième May 1620.*

Excellentissimo & Illustrissimo Signori.

Horicento la lettera di V. Eccellenza & V.
Signorie Illustrissime & con particolar mio
contento da quella inteso il felice loro arrivo
nelle parti di Germania con desiderio grandis-
simo che per riceverle conforme
potuto ritrouarmi alla solita mia residenza del-
la città di Sauerna: si per causa de i presenti
comori & moti, & continue occorense de ne-
gotij urgenti haueste potuto allontanarmi hora
da quei contorni per releuar tutauio V. Excel-
lenza & SS. VV. Illustrissime dal comodo
darriuar sino qua ho risoluto di trasferirmi sin
alla città de benfelt douemartedì prossinio la
matina penso di ritrouarmi de intender iui de
quanto da parte dall Magestate Christianissima
lepiaccea espormi mentre per fine di questa lau-
garo da dio l. o ogni prospero auenimento di
Ruffac li 24. di Maggio 1620. di V. Eccellenza
& VV. Signorie Illustrissime affirmissimo per
seruila Leopold.

*LETTRE ECRITE AV COMTE
de Hanau, & enuoyée de Strasbourg
par le sieur de Courlants.*

Monsieur, estant sur nostre partement de cette ville de Strasbourg pour nous acheminer à Heilbron, nous auons sçeu que nostre chemin s'adonne à passer sur quelques vnes de vos terres, ce qui nous fait vous enuoyer ce Gentil-homme pour vous prier de nous y faire donner logement pour nous & nostre suite, & si nous auons le bien de vous y rencontrer, nous nous acquitterons du commandement que le Roy nous a fait & vous rendrons la lettre, & en nos particuliers tiendrons à honneur de rencontrer les occasions de vous pouoir témoigner que nous sommes, Monsieur, vos tres-affectionnez seruiteurs Charles de Valois, Bethune & Preaux. De Strasbourg le 28. May 1620.

A Monsieur, Monsieur le Comte de Hanau.

Lettres aux Duc de Vvitemberg & Marquis de Baden, par le sieur de Sigongne enuoyé expres vers eux.

Monsieur, Nous esperons nous rendre à Heilbron le 4. du mois prochain, & ayant sçeu que nous auons à passer sur vos terres, nous n'auons voulu manquer d'enuoyer

ce Gentil-homme vers vostre Altesse pour la supplier de nous y faire donner logement commode pour nous & pour nostre suite, & esperant auoir le bien de vous voir audit Heilbron & vous rendre les lettres que le Roy vous écrit, & vous faire entendre ses bonnes & saintes intentions pour le bien & repos de la Germanie: nous asseurerons vostre Altesse qu'en nostre particulier nous rechercherons tousiours les occasions de vous faire paroistre que nous sommes, Monsieur, vos humbles seruiteurs Charles de Valois, Bethune & Preaux. De Strasbourg ce 28. May 1620. Et à la suscription A Monsieur, Monsieur le Duc de Vvitemberg.

MONSIEUR,

Nous estimons que vous estes assez informé du iour qu'on nous a donné pour nous rendre à Heilbron en l'assemblée des Princes vnis où nous esperons auoir le bien de vous voir & vous rendre les lettres de sa Majesté: mais ayans à passer sur vos terres, nous auons estimé vous deuoir enuoyer ce Gentilhomme pour vous prier de nous y faire donner des logements commodes pour nous & nostre train. Ce qu'attendant de vostre courtoisie, nous vous asseurerons qu'en nostre particulier nous sommes, Monsieur, vos tres-humbles seruiteurs, Charles de Valois, Bethune & Preaux. De Strasbourg ce vingt-huictiesme May mil six cens vingt.

Et la suscription, A Monsieur, Monsieur, le Marquis de Dourlac & de Baden.

*Lettre du Comte de Hanau à Messieurs
les Ambassadeurs, receüe à Lichtenau
le 29. May 1620.*

MESSIEURS,

Je serois fort content d'auoir l'honneur de vous presenter mes seruices en personne, mais puis que ie suis allicté d'une mal-heureuse maladie, ie n'ay pas voulu manquer d'enuoyer vers vous deux de mes Gentils-hommes pour faire mes excuses & vous baiser les mains, vous priant de leur faire entendre ce qu'avez eu charge de sa Maicsté touchant ma part. Ce faisant vous m'obligerez de demeurer, Messieurs, vostre tres-humble seruiteur. De VVord
Ce 29. May 1620,

Réponse desdits sieurs Ambassadeurs.

MONSIEUR,

Nous eussions bien desiré vous rendre nous mesmes la lettre que le Roy vous écrit, mais puis que vostre indisposition vous retient, & que nous ne pouuons auoir le bien de vous voir, nous l'auons mise és mains du Gentil-homme qu'il vous a pleû nous enuoyer, à laquelle nous ajousterons que sa Maicsté pleine de bonté, d'affection & de bonne volonté envers tous ses voisins, iugeant que le trouble qui

se prepare en la Germanie touche toute la Chrestienté, nous a enuoyé pour y procurer le repos & eslayer d'y moyenner vne bonne paix, avec commandement de visiter les Princes ses amis de sa part, pour les conuier de nous y assister, & contribuër ce qu'ils pourront : & particulièrement nous estions chargez de vous renouveler les asseurances de sa bonne volonté, ce que celle-cy fera, puisque nous ne le pouvons de viue voix, nous nous acheminons à Heilbron pour y trouuer les Princes vnis assemblez, delà nous continuërons pour auancer en ce que nous pourrons le fruit de nostre legation, & suiure les bonnes & saintes intentions du Roy. Cependant nous vous rendons bien-humbles graces de l'ordre que vous avez donné pour nostre logement en ce lieu, & desirerions que les occurrences nous peussent donner moyen de vous témoigner que nous sommes, Monsieur, vos tres-affectionnez seruiteurs, Charles de Valois, Bethune & Preaux. De Lichtenau ce 30. May 1620.

Et la suscription, à Monsieur Monsieur le Comte de Hanau.

Lettre au Duc des Deux-Ponts.

MONSIEUR,
Estans sur le point de nous acheminer à Heilbron, nous auons sçeu que nous auions à passer à Brethin qui est du Palatinat, & sçachant la charge que vous y avez, nous vous enuoyons ce Gentilhomme pour vous en don-

Q₃

ner auis, & vous prier de nous y faire donner logement : & esperant auoir le bien de vous voir audit Heilbron, nous remettons à vous y rendre les lettres que le Roy vous écrit, & faire entendre ses intentions sur le fait de nostre legation. Et cependant demeurerons, Monsieur, vos bien-humbles seruiteurs, Charles de Valois, Bethune & Preaux. De Lichtenau le 30. May 1620.

Et la suscription, A Monsieur Monsieur le Duc des Deux-Ponts,

*Lettre du Duc de Vvitemberg receüe à
l'entrée de ses Terres le
premier Iuin 1620.*

MONSIEUR mon Cousin, J'ay entendu avec beaucoup de contentement de la bouche de ce Gentilhomme, & par la vostre qu'il m'a deliurée, que vous estes déjà si proche avec les autres Messieurs les Ambassadeurs, bien fasché toutefois qu'à cause de l'assignation qui vous a esté donnée pour Heilbron, ie ne vous puis pour cette heure receuoir, traiter & honorer en ma maison, comme ie voudrois bien, il vous dira l'ordre que j'ay donné pour vostre reception sur mes terres, & ce que j'ay iugé bon vous faire scauoir : surquoy me remettant & vous priant qu'avec vostre permission lesdits Seigneurs trouuent icy mes tres-affectionnées recommandations. Je demeure en attendant vostre entreueüe, Mon-

fieur mon Cousin, vostre tres - affectionné
Cousin à vous faire service, Frederic.

De Stuttgart, ce

*Lettre du Duc des Deux - Ponts à Mes-
sieurs les Ambassadeurs, receuë en ar-
riuant à Fanigen le premier Iuin mil
six cens vingt.*

MESSIEURS,

I'ay esté bien-aïse d'apprendre vostre ache-
minement vers Heilbron par celle que ce Gen-
tilhomme m'a renduë de vostre part, par la-
quelle ayant aussi entendu que vous vouliez
passer par Brethin petite ville de la Iurisdiction
du Palatinat Electoral, i'ay incontinent fait
commander aux Officiers dudit lieu de se
mettre en deuoir pour vous faire auoir les logis
les plus commodes que la capacité du lieu le
pourra permettre : ce me seroit beaucoup de
contentement d'auoir le bien de vous voir au-
dit Heilbron, mais ie ne le puis pas encore
promettre pour les occurrences d'à présent qui
m'empeschent de quitter ce lieu icy. Cepen-
dant i'espere que pour l'absence il ne sera rien
négligé qui puisse apporter du preiudice aux
affaires publiques qui seront à y traicter. Sur
ce, ie demeure, Messieurs, vostre bien-humble
& tres-affectionné à vous faire service, Iean
Comte Palatin du Rhin, Duc des Deux-Ponts.
A Heildeberg le 21. May 1620.

Q 4

LETTRE DV DVC DE
Vvitemberg, portant avis du chan-
gement de l'Assemblée des Princes
unis de Heilbron à Vlme, receuë à
Zcinigen le 2. Iuin 1620.

MESSIEURS,

Je vous enuoye mon Conseiller le Seigneur Comte de Linanges, pour vous bien-veignir de ma part, & vous dire en premier lieu ce qui est cause de ne l'auoir peu faire moy mesme, ny vous attendre & receuoir en mes maisons, & pour vous prier de ma part & des autres Princes & Estats de l'Vnion de prendre vostre chemin vers Vlme au lieu de Heilbron: les changemens suruenus és presentes occurrences exigeans que nous nous tenions là où nostre presence, & particulièrement la mienne est par trop requise, la cause de ce changement venant d'ailleurs, & cela mesme ne vous destournant pas de vostre voyage, ie veux esperer que ne prendrez cela autrement qu'en bien, comme venant Messieurs de vostre tres-affectionné Cousin & amy pour vous faire seruire le Duc de Vvitemberg. De Stuttgart ce 22. May mil six cens vingt.

REPONSE DE MESSIEURS
les Ambassadeurs à la precedente.

MONSIEUR,

La venuë de Monsieur le Comte de Linanges nous ayant témoigné le soin que vostre Altesse prend de nous bien-veigner en ses terres, nous oblige de nouveau à l'en remercier, & asseurer que vous ne pouuez faire part de vostre bonne volonté à personnes qui desirent plus que nous rencontrer des occasions où puissions nous en reuancher. Et quant au changement de l'assemblée de Heilbron à Ulme, quoy qu'elle nous tourne à grande incommodité pour les raisons qu'auons dictes audit sieur Comte, toutefois puisque ce qui nous a esté dit de vostre part, vous oblige de vous y acheminer: nous y auons tres-volontiers consenty pour nous y rendre au iour qu'auons dit, & faire paroistre en nostre particulier que nous formes, Monsieur, vos tres-affectionnez seruiteurs, Charles de Valois, Bethune, & Preaux.
De Fanigen le 2. Iuin 1620.

Et à la suscription, A Monsieur, Monsieur le Duc de Vvitemberg.

Q

*Seconde lettre écrite au Roy, de Fani-
gen, le troisième Juin 1620. enuoyée
par le Petit-Antoine, Messager ordi-
naire du Roy, à Monsieur de Flani-
gny à Mets, pour la faire tenir par
la Poste.*

SIRE,

En suite de la resolution que nous auions prise à Lunecille, & dont nous auions tenu vostre Majesté aduertie, nous enuoyasmes vn Gentil-homme vers l'Archiduc Leopold à Ruffac où estoit le rendez-vous de toutes ses troupes pour luy porter la lettre de vostre Majesté, & vne de nous, pour nous excuser si nous n'y allions nous mesmes, estans pressés de nous rendre dans le premier du mois prochain à Heilbron où s'assembloient les Princes vnis ; aussi-tost il nous renuoya le Gentil-homme à Sauerne avec vn des siens, pour nous rendre le lendemain à Benselt, petite ville qui est à luy à quatre lieuës de Strasbourg, & qu'il s'y trouueroit. Apres l'auoir salué & fait les complimens ordinaires, il nous tesmoigna vn grand contentement de l'honneur que vostre Majesté luy faisoit, & du soin particulier qu'elle auoit de l'Empereur & de toute leur maison & bien & repos de l'Allemagne, auquel de sa part il contribueroit tout ce qui dependroit de luy, pour seconder les bonnes intentions de vostre

Majesté, encores que le tout dependist de l'Empereur, comme chef de la maison & le plus interellé en ces differens, & neantmoins il ne doutoit pas qu'il ne voulust en cette affaire deferer beaucoup aux aduis & conseils de vostre Maieité, laquelle il supplieroit aussi de considerer combien le temps luy estoit cher, & qu'estant despoüillé & ses ennemis en possession de son bien, ils entendraient volontiers à vne surseance & cessation d'armes, tant pour s'affermir par le temps en leur iniuste possession, comme aussi pour eluder les forces presentes de l'Empereur, & de la ligue Catholique qui estoient grandes, les laissant consommer en de grandes despences, & laisser de la guerre, mais que les forces de l'Empereur, & de ladite ligue estans prestes elles deuoient faire leur effort dedans le mois d'Aoust, ce qui autrement luy tourneroit à grand preiudice, monstrant qu'il ne pouuoit plus long-temps continuer vne si grande despence, & que le Palatin, non plus que ceux de la ligue des Princes vnis, n'auoient forces bastantes pour leur resister presentement, n'estoit qu'ils recherchaient l'assistance du Turc, comme il auoit aduis qu'ils faisoient, à condition mesme de luy payer tribut, & faire reconnoissance de la Boheme, lequel quelque diligence qu'il peut faire, ne pouuoit les secourir auant la my-Aoust, ce qui obligeoit l'Empereur & lesdits Princes Catholiques d'auancer les armes, avec toute la diligence possible, ledit Empereur luy ayant mesme escrit qu'il eust à faire passer droit en Bauiere toutes les troupes qui sont

levées en Alsace, tant sous son nom, que sous
 celuy de Monsieur de Vaudemont, & que s'il
 trouuoit resistance apres auoir passé le pont de
 Brislac, qu'il eust à combattre & s'ouurer le che-
 min par les armes de sa Majesté Imperiale, de-
 clarant toutes lesdits troupes siennes, comme
 celles de la ligue Catholique, & que si elles
 estoient attaquées ou empeschées de passer
 par aucuns Princes, il les tenoit pour auteurs de
 la rupture de la paix en Allemagne. Nous disant
 qu'il auoit enuoyé la copie de cette lettre que
 luy escriuoit l'Empereur, au Marquis de Dour-
 lac, afin qu'il voulust considerer ce qu'il feroit
 auparauant que s'opposer à son passage, lequel
 luy auoit fait responce en termes assez ambi-
 guis, qu'il y auoit quelques vns qui auoient leué
 des troupes pour l'Empereur, que si elles s'of-
 froient pour passer qu'il les laisseroit passer,
 mais que s'il y en auoit pour le seruice du Duc
 de Bauiere, qu'ils s'opposeroit à leur passage, de
 laquelle opposition ledit Archiduc nous tes-
 moigne ne faire grand compte, se confiant sur
 ses forces qu'il nous dit estre de plus de qua-
 tre mille cheuaux, & neuf mille hommes de
 pied que ledit Duc de Bauiere auoit desia en
 son pays, & que le Marquis de Dourlac avec
 toute la ligue des Princes vnis n'auoit pas
 plus de trois mille hommes de pied, & sept
 cens cheuaux. Au sortir de cette audience il
 nous voulut faire conduire en son Chasteau
 qu'il auoit quitté pour nous loger, luy s'estant
 logé chez son Chastelain, toutesfois desirant
 le iour mesme aller à Strasbourg nous priasmes
 Monsieur le Reingraue, qui nous conduisoit,

de nous excuser, lequel nous fit entrer dans vne sale attendant l'heure du disner, où nous vint trouver le principal Conseiller dudit Archiduc qui nous repeta les choses qu'auoit dit son maistre, y adioustant l'obligation que toute la Chrestienté & la maison d'Auſtri he auoient à vostre Majesté, du soin qu'elle prenoit de la Religion Catholique, & de leurs intereſts particuliers, les effets duquel reüssiroient avec plus de poids & d'autorité, si en mesme temps les forces que V.M. a sur la frontiere de Lorraine commençoient à marcher de deça, surquoy nous luy répondismes que V.M. estoit si desiruse du bien & du repos de l'Allemagne, comme elle tesmoignoit assez par le soin qu'elle prenoit de nous enuoyer vers l'Empereur & tous les Princes interessez en cette guerre, qu'il deuoit croire qu'elle ne defaudoit à aucun office necessaire pour aduancer le bien de la paix, sans luy respondre particulierement sur ce poinct. Aussi quel'Archiduc nous vint incontinent prendre à l'entrée de ladite sale pour nous mener disner avec luy. Apres auoir disné il nous pria de vouloir entrer dans son cabinet, & là nous remercia encore des bonnes paroles que nous auions dites à son Conseiller pleines d'assurance de l'affection & bonne volonté de vostre Maieſté, de la santé & des exercices ordinaires de laquelle il s'informa fort particulièrement, & nous pria d'aleurer vostre Maieſté, qu'il estoit son tres-humble seruiteur, & qu'il esperoit vn iour de l'aller seruir, ou de son épée s'il en auoit besoin, ou de sa trompe

pour l'accôpagner à la chassé, & au cas qu'il luy fut inutil ou à l'un ou à l'autre, il l'iroit seruir de son mestier de Prestre. Ce sont les mesmes paroles qu'il nous dit pour les mener à vostre Maieité, prenans congé de luy, nous conduisant iusques à la cour de son logis comme il nous y auoit receus en arriuant fit tirer à Bale; tant à nostre arriuée que sortie, tout le canon de la ville qui est bien fournie, avec vne salue de toute sa mousqueterie, c'est la principale forteresse qu'il tient dependant de son Euesché de Strasbourg à l'Alsace, laquelle il auoit fait fortifier de sept bastions depuis deux ans. Le mesme iour nous allasmes coucher à Strasbourg, nous fusmes fort bien receuz, ainsi qu'ont accoustumé faire les villes Imperiales, & de pareil gouuernement: nous y seiournasmes deux iours pour attendre le temps de l'assemblée des Princes vnis à Heilbron, où nous acheminant nous sommes passez par les terres du Comte de Hanau, du Marquis de Baden, & du Duc de Vvitemberg, lesquels nous ont tres-bien fait receuoir: & comme nous estions aduancez iusques en ce lieu quatre lieuës pres de Heilbron, le Duc de Vvitemberg nous a enuoye le Comte de Linanges, l'un des principaux Conseillers de son Estat, pour nous aduertir que l'Assemblée desdits Princes vnis estoit transferée à Ulme, à cause qu'ils auoient eu aduis que les troupes du Duc de Bauiere s'estoient aduancées, & que quelques compagnies mesmes estoient logées dans les Estats du Duc de Vvitemberg pres ladite ville d'Ulme, ce qui les obligeoit à s'en approcher, pour em-

pescher le progres des troupes dudit Duc de Bauiere : mais nous auons pressenty que ce changement vient plustost d'une crainte & méfiance qu'ils ont eüe de quelque surprise en ladite ville de Heilbron, qui est petite & assez foible : de façon qu'à leur priere nous estans accommodez, nous nous sommes résolus de nous acheminer à Ulme dès demain pour nous y rendre Samedy, d'où nous auertirons vostre Maiesté de ce qui s'y sera passé, & des nouuelles que nous pourrons apprendre des Electeurs Ecclesiastiques, desquels nous n'auons point encores eu aduis par celuy qui auoit esté depesché de Nancy par Monsieur le Duc de Lorraine, comme nous auons desia fait entendre à vostre Majesté, de laquelle nous sommes, S I R B, tres-humbles, tres-obeyssans, & tres-fidelles suiets & seruiteurs, Charles de Valois, Berhune, & Preaux. De Fanigen, ce 3. Iuin 1620.

*LETTRE DV DIT IOVR A
Monsieur de Puyzieux en suite
de celle du Roy.*

MONSIEUR,

Depuis la despesche que nous vous fismes de Luncuille, nous auons receu vne lettre de vous du dix-huictiesme, par le Laquais du sieur de sainte Catherine, à Falsbourg, auquel nous auons escrit conformement à vostre in-

tention. Vous verrez comme nous auons veu l'Archiduc Leopold paſſé à Strasbourg, & le changement de l'aſſemblée de Heilbron transférée à Ulme par la lettre que nous eſcriuons au Roy, dans laquelle tout eſtant deduit fort particulièrement, nous ne vous en ferons plus ample diſcours par celle-cy, ſi ce n'eſt que nous auons iugé à propos de nous ſeruir du ſieur Bernard pour interprete, lequel nous a eſté reſcommmandé par Monſieur de Vic & Miron : car encores que ledit Bernard ſoit de la Religion pretenduë reformée, toutesſois il nous ſert à reſpondre à tant de Harangues qui nous ſont faiſtes par ceux que les Princes enuoyent au deuant de nous pour nous bienveignier en leurs terres, ſans qu'il ſoit appellé en d'autres affaires plus particulieres, croyans qu'apres Ulme, nous nous pourrons paſſer de luy, ioinct que nous eſtimons auoir le ſieur de ſainte Catherine. Au reſte les lieux de ce pays ſont tels, que pour conſeruer nos equipages, il eſt beſoin qu'apres trois iournées de trauail nous ſeiournions vn iour, auſſi que ces Princes nous teſmoignent vouloir demeurer enſemble deux iours à l'aduanee de noſtre arriuée : vous priant de nous donner de vos nouuelles le plus ſouuent qu'il vous ſera poſſible. A quoy nous vous coniurons par noſtre exemple en vous donnant à toutes occasions part des noſtres, avec aſſurance de demeurer, Monſieur, vos plus humbles ſeruiteurs, Charles de Valois, Bethune, & Preaux, & à coſté : Monſieur la preſente eſcrite le Gentil-homme que nous auons enuoyé à Heilbron donner

aduis de nostre arriuée, & demander logement, nous a rapporté que le Duc de Bauiere ayant logé quelques troupes en vn village qui luy appartient en propre, & qui neantmoins releue dudit Duc de Vvitemberg, a seruy de pretexte pour le changement du lieu de l'assemblée des Princes vnis.

*A MESSIEURS D'ESLINGEN
ville Imperiale.*

MESSIEURS,

Ayant eu aduis par Monsieur le Duc de Vvitemberg, & Messieurs les Princes de l'union, que leur assemblée doit estre à Vlme au lieu de Heilbron : nous changeons de chemin, & sommes conseillez par ledit sieur Duc de le prendre par vostre ville, ce qui nous fait vous prier de nous donner demain logis necessaire pour nous & nostre suite, ainsi qu'il vous sera donné à entendre par nos Mareschaux des logis, & en toutes occasions où nous aurons moyen de vous seruir nous le ferons d'aussi bon cœur que nous desirons demeurer, MESSIEURS, vos plus affectionnez à vous seruir, Charles de Valois, Bethune, & Preaux. De Faginen, le 3. Iuin. 1620.

Et la suscription, à Messieurs Messieurs de la ville d'Eslingen.

*A Messieurs de la Ville d'Ulme, par
mesdits sieurs les Ambassadeurs.*

MESSIEURS,

Nous faisons estat de vous voir, & vous rendre les lettres que le Roy vous écrit apres l'Assemblée des Princes vnis que nous croyons de uoir estre à Heilbron, mais les occurrences ayans transferé ladite Assemblée dans vostre ville d'Ulme, comme nous auons esté depuis peu auertis par Monsieur le Duc de Vvitemberg, nous nous y acheminons en esperance de nous y rendre Samedy au soir: & nostre chemin estant de passer Vendredy à Gerlingen qui vous appartient, nous vous auons voulu enuoyer ce Gentilhomme pour vous en donner aduis, & vous prier de donner ordre tant audit Gerlingen, que à Ulme à nos logemens commodes & necessaires, selon le memoire qui vous en sera baillé. Cependant nous auons retenu les lettres de sa Majesté pour vous les rendre nous mesmes, & vous dire nostre creance: & de la courtoisie que nous receuons de vous, le Roy vous en tesmoignera sa bonne volonté, & nous en particulier rechercherons des occasions de nous en reuencher, & vous témoigner que nous sommes, Messieurs, vos tres affectionnez à vous faire seruice, Charles de Valois, Bethune & Preaux. d'Eslingen le 4. Iuin. 1620.

Et la suscription, à Messieurs Messieurs les

*Lettre de l'Electeur de Ternes à celuy
de Cologne, apportée à Messieurs les
Ambassadeurs, à Eslingen le 4. Juin.*

MONSIEUR,

Nous auons entendu par la bouche de nostre bien amé le Duc de Lorraine, & aussi des lettres du Duc de Vaudemont, comme depuis peu de iours les Ambassadeurs du Roy de France sont arriuez à Nancy, lesquels ont commandement de s'entremettre és affaires qui cōcernent l'Estat calamiteux du saint Empire, & à cet effect se transporter vers sa Majesté Imperiale, autres membres de l'Empire, & en particulier vers nous autres Electeurs Ecclesiastiques, ainsi que vous reconnoistrez par ses autres lettres incluses. Ayant donc appris, tant par lesdites lettres, comme de la relation du sieur Datel, qu'il seroit besoin que nous autres Electeurs Ecclesiastiques voulussions designer vn lieu certain & asseuré pour ouyr & respondre aux demandes des Ambassadeurs, & ce pour euitier au temps qui se pourroit inutilement consommer és particulieres visites. Nous aurions iusques là donné à entendre audit sieur Datel que nous ne pouuions là dessus nous declarer particulièrement, mais qu'il s'en falloit adresser à vous, & à l'Electeur de Mayen-

ce. Partant nous n'auons voulu obmettre fraternellement, & paternellement vous en aduertir, & en remettre la conduite à vostre grand iugement. Et ores que vous & l'Electeur de Mayence, iugiez qu'il soit besoin d'une assemblée, il ne nous seroit desagreable d'y assister en personne, n'estoit l'indisposition de nostre corps, laquelle vous est bien connuë qui m'en empesche, toutesfois nous vous l'offrons en cas que le trouuiez necessaire, & que vous nous indicquiez le temps & lieu d'y enuoyer de nostre part, avec ample procuration & pouuoir pour s'accommoder tant avec vous que l'Electeur de Mayence. Donnée à Treues le 22. May 1620. Signé Leturuis.

Lettre de l'Electeur de Cologne à celui de Mayence, receuë le dit iour 4. Iuin.

MONSIEUR,

Nous n'auons peu obmettre de vous faire sçauoir ce que le Duc de Lorraine nous a fait entendre par son Conseiller & Deputé Thierry Datel, que les Ambassadeurs que le Roy de France enuoye en Allemagne sont arriuez en sa Cour, lesquels luy ont donné à entendre qu'apres qu'ils ont eu aduis que les Princes vnis auoient resolu vne assemblée en la ville de Heilbron, ils estoient en deliberation de s'y porter pareillement, aussi qu'ils auoient en

volonté qu'au precedent que de voir sa Majesté Imperiale, de visiter nous autres Electeurs Ecclesiastiques & autres membres de l'Empire, pour nous faire entendre le contenu de leur legation. Il nous auroit de plus donné à entendre que pour gagner le temps le Duc son Maistre trouuoit bon que nous Electeurs Ecclesiastiques accordassions d'un lieu & temps pour pouuoir y receuoir & entendre les Ambassadeurs, & respondre plus promptement sur la proposition de leur commission. Nous auons donc sur cela meurement considéré & n'est hors de la raison que par l'assemblée de nous autres Electeurs Ecclesiastiques beaucoup de temps ne soit espargné, mais nous doutons que la proposition pourroit estre telle qu'il ne nous seroit possible d'en pouuoir presentement en personne resoudre, & que paruenant à la connoissance des autres membres Ecclesiastiques que l'effect désiré ne réussiroit, qui est de gagner du temps, mais plustost desaduantageux que nous autres Electeurs Catholiques ne nous eussions peu accorder estans presens, mais qu'il falloit donner aduis & communiquer à d'autres la proposition des Ambassadeurs. Nous reconnoissons d'abondant que nostre Electeur de Treues à cause de l'indisposition de sa personne n'y pourroit commodement assister, mais qu'il s'offre seulement d'y enuoyer de sa part. Il nous seroit aussi difficile de pouuoir assister personnellement à telle assemblée, d'autant que nous auons ordonné vne diette des Estats de nos pays vers la feste de Pentecoste, à laquelle necessairement il

nous faut assister. Or afin que rien ne soit omis, quant à ce qui concerne le bien & utilité publique, mais plustost aduancé, puisque mesmes les Ambassadeurs du Roy se sont proposez de s'acheminer tout premier vers vous, comme le plus proche, nous remettons cela à vostre haut iugement s'il ne seroit point faisable que l'Electeur de Treues & nous enuoyassions en vostre Cour, ou en la ville de Francfort, pour entendre la proposition ; si elle estoit telle qu'elle ne puisse estre resoluë sur le champ sans la communiquer aux autres Catholiques, alors vous en aduiserez avec les Deputez de l'Electeur de Treues & les nostres, & en cas qu'il fallust auoir quelque aduis des autres Catholiques, cela ne seroit aussi inutile, mais il se feroit plus à propos par les mesmes Deputez, que si nous autres Electeurs eussions esté presens, ce qui peut plus apporter d'acceleration & seruir au sujet present ; si vostre frere Maximilian Duc de Bauiere se contentoit d'enuoyer pareillement quelqu'un des siens vers vous. Nous vous prions amiablement de nous aduiser de sa volonté, remettant toutesfois le tout à vostre bonne disposition. Donnée en nostre Ville de Bonn, le 20. May 1620. signé Ferdinand.

Lettre de l'Eleſteur de Mayence au Duc de Lorraine, apportée à meſdits ſieurs les Ambaſſadeurs ledit jour 4. Iuin.

MONSIEUR,

Vostre Conſeiller & Deputé Thierry Dattel, nous ayant donné ſes lettres de creance, a eu ce iourd'huy audience, où il s'eſt fait paroistre avec toute ſorte d'addreſſe, & auons ſuffiſamment appris que l'illuſtre Ambaſſade que le Roy de France enuoyoit en Allemagne pour appaiſer & éteindre les ſouleuemens & émotions de guerre qui y regnent à preſent, eſtoit arriuée vers vous, & qu'ils auoient eu volonté, non ſeulement de ſe transporter vers les Eſtats des Proteſtans en la ville de Heilbron, mais auſſi qu'auparauant que ſ'acheminer vers ſa Majeſté Imperiale, ils deuoient voir nous autres Eleſteurs Eccleſiaſtiques. Et apres que vous nous auez propoſé, que ſi pour gagner du temps il ne ſeroit pas à propos de nous aſſembler en perſonne & faire eſlection du temps & lieu aſſeuré pour pouuoir entendre la propoſition des Ambaſſadeurs & leurs donner reſolution. Nous entendons avec grand contentement & ioye indicible que le Roy de France prenne ſoin du ſaint Empire, & qu'avec vn ſi grand zele il deſire y voir la paix, repos & vnion, & que les troubles qui à preſent y regnent ſoient

appaifez. Et combien que de noſtre part nous ne voudrions rien laiſſer paſſer qui ne retourne à la loüange & intention du Roy, ſi eſt ce que nous ſommes en ce doute, que quand bien nous, Treues & Cologne ordonnerions quelque aſſemblée, que non ſeulement ſa Majeſté, mais meſme auſſi l'Eleſteur de Saxe & Duc de Bauiere le trouueroient fort eſtrange, & auroient comme apparence ſi nous voulions attirer à nous l'affaire de Boheme, qui ſemble concerner ſeulement ſa Majeſté Imperiale & la maiſon d'Autriche, & dont l'on s'eſt remis au commencement à l'Eleſteur de Saxe & Duc de Bauiere, leſquels y ont contribué beaucoup de peines & trauaux: ce qui ne tourneroit ſeulement à vn grand reſſentiment & offenſe, mais meſmes ne nous en pourrions iamais excuſer vers ſa Majeſté Imperiale, & qu'auſſi le temps qu'il conuiendroît pour aduertir nos autres co-Eleſteurs ſeroit trop bref, veu qu'il faut que tous ſoient d'accord: mais que ſi les Ambaſſadeurs du Roy ont deſiré de nous voir en particulier; ils ne feront non ſeulement les bien-venus, mais nous mettrons peine d'exécuter ce qu'ils nous propoſeront ſelon l'exigence de l'affaire. Apres donc que nous auons plus à plein donné à entendre noſtre reſolution à voſtre Deputé, nous vſerons de briueeté, vous priant d'ajouter en ſa relation pareille creance qu'à nous meſmes, demeurant, &c. Donné à S. Martin Burg en noſtre ville de Mayence, ce 30. May 1620. ſigné Iohann.

Lettre

*LETTRE A MESSIEURS
les Ambassadeurs par Monsieur de
Baugy resident près l'Empereur re-
ceüe à Vlme ce sixiesme Iuin mil six
cens vingt.*

MESSIEURS,

L'Empereur ayant esté auerty , comme i'ay
esté aussi de diuers endroits , qu'au partir de
Nancy vous vouliez prendre le chemin de
Heilbron pour vous trouuer avec Messieurs de
Bethune & de Preaux , en vne assemblée des
Princes & Estats de l'Vnion qui estoit assignée
au 30. de May , s'est resolu d'enuoyer ce cou-
rier vers vous exprés , & de me commander
de vous escrire qu'il aura fort à plaisir inconti-
nent qu'elle fera finie , que vous tiriez droit
à Vlme pour vous y embarquer sur le Danu-
be , & venir icy en toute diligence pour des
considerations de bien grande consequence ,
& qui importent à l'execution des bonnes in-
tentions du Roy , & des commissions dont
vous estes chargés pour le bien vniuersel de la
Chrestienté, celui de la Germanie , & le par-
ticulier de sa Majesté Imperiale, elle desire le
mesme , encore que vous soyez party de Heil-
bron, & que vous rapprochiez le plustost que
vous pourrez du Danube à ce mesme effet ,
en quelque lieu que vous rencontre ce courier,
remettant vos autres visites & specialement

Tome III.

R

celles des Princes Electeurs Catholiques pour le delay desquelles elle est certaine que vostre negociation ne partira point apres que vous aurez esté en cette Cour , ou bien mesdits sieurs de Bethune & de Preaux , ou l'un d'eux se separant de vous s'en aquiter , si vous iugez par ensemble que les affaires le requierent ainsi, & puis vous resioindre où bon vous semblera. Cette declaration du desir de sa Majesté Imperiale qui m'a esté faite avec toute l'efficace que vous pouuez imaginer conjointe avec celuy que ie m'asseure que vous avez de faire chose qui luy soit agreable , auront sans doute tels poids auprès de vous & de mesdits sieurs de Bethune & de Preaux , qu'il suffit de vous la re presenter sans y aiouster des autres offices , pour vous conuier d'y satisfaire autant que les ordres que vous avez le peuuent comporter. Et pourtant ie ne m'estendray d'auantage que pour m'excuser enuers mesdits sieurs de Bethune & de Preaux , de ce que la haste avec laquelle on depesche ce courier , afin que vous le depeschiez aussi le plus viste que faire se pourra , avec vostre response & resolution, ne me permet de leur escrire separement. Et pour vous resinoigner, Monseigneur, que vous & eux estes attendus en bonne deuotion , & que ledit Seigneur Empereur vous receura , honorera & traitera , comme il conuient à la singuliere affection qu'il porte au Roy & à l'estime qu'il fait de vos personnes & merites, pour mon regard ie me reputeray tres-heureux d'aquerir avec l'occasion de cette vostre Ambassade , l'honneur de vostre bien-

veillance , en vous rendant tout le service qu'il me sera possible. Cependant ie vous baise humblement les mains, vous demandant congé de m'aquiter du mesme deuoir enuers mesdits sieurs de Bethune & de Preaux quand ils auront communication de la presente , & ie demeureray , Monseigneur , vostre tres-humble & obeissant seruiteur de Baugy. De Vienne le premier Iuin 1620.

RESPONSE A LA PRECEDENTE

MONSIEUR,

L'auis que l'Empereur a eu , & vous aussi de nostre acheminement vers Heilbron pour nous trouuer à l'assemblée des Princes & Estats de l'Vnion , est fort veritable , mais comme nous estions à Fanigen quatre lieuës proche , nous fumes priez par Monsieur le Duc de Vvittemberg, de trouuer bon qu'elle fut transférée en cette ville , ce qui nous y auroit fait acheminer , pour delà visiter les Princes & Electeurs Catholiques , selon qu'il nous estoit ordonné. Toutesfois ce courier nous ayant rencontré comme nous arriuions avec vostre lettre du premier de ce mois, de laquelle nous apprenons l'intention de sa Maiesté Imperiale , sçachant que nostre legation regarde principalement l'adite Maiesté Imperiale pour luy tesmoigner l'affection & bonne volonté du Roy : Nous nous resoluons cette assemblée fi-

nie sans visiter autre Prince, de partir sans delay pour nous rendre près sadite Maieſté Imperiale le plutoſt qu'il nous ſera poſſible: c'eſt pourquoy nous vous prions de vouloir cependant donner ordre pour nos logemens tels que les pouuez iuger conuenables & à nos perſonnes & à noſtre ſuite, ſelon les memoires qui vous en ſont enuoyez avec celle-cy, vous aſſeurant de noſtre affection, laquelle vous ſera plus connuë lors que l'occaſion ſ'en offrira, & que nous vous verrons pour dire de viue voix que ſommes, MONSIEVR, vos plus affectionnez à vous faire ſeruice, Charles de Valois, Bethune & Preaux. d'Vlme ce ſeptieſme iour de Iuin mil ſix cens vingt.

LETTRE DE MONSIEVR DE
*Puiſieux à Meſſieurs les Ambaſſadeurs,
receuë à Vlme le 7. Iuin 1620.*

MESSIEURS,

Vous auez eu ma depeſche par ce Laquais du ſieur de ſainte Catherine, auquel le Roy a commandé de vous aller trouuer, nonobſtant que l'Eleſteur Palatin aye fait ſentir depuis qu'il euſt bien deſiré qu'il ſe fuſt acheminé vers luy, mais avec certaines conditions pour les titres & de la forme de traiter qui n'eſtoient de l'intention ny de l'honneur du nom de ſa Maieſté. Enquoy il nous ſemble que ledit Eleſteur Palatin a pû conſiderer l'intereſt

qu'il a en cette affaire , car cét esloignement du sieur de sainte Catherine si bien fondé, n'est pas pour le fauoriser dans la creance du monde. Vous aurez sceu depuis comme l'Empereur a enuoyé ses lettres patentes contre luy & ceux qui luy adherent , meü & fortifié à ce faire par les resolutions de l'assemblée de Mulhausen composée des Electeurs Catholiques Ecclesiastiques, & autres Princes Catholiques, l'Electeur de Saxe y estant associé, laquelle l'Empereur a fait sçauoir confidemment au Roÿ citre pour luy tres auantageuse , l'importance est s'il aura dequoy mettre à execution ladite declaration contre le Palatin , qu'il eust peut estre aussi bien fait de differer encore. Les dernier exploits des Comtes de Bucquoy & Dampierre assez heureux , ont aidé à l'y faire resoudre , ce sont argumens , desquels vous pouuez , Messieurs , vous preualoir enuers les Protestans pour les exciter d'entendre & porter le dir Palatin & les choses , à vn amiable accommodement , afin de preuenir tant de malheurs desquels leur patrie & ceux de la Religion spécialement sont menacez , car si vne fois les troupes qui viennent encore d'Italie avec les prouisions nouvelles qui sont attendues à mesme fin d'Espagne se peuuent ioindre ensemble ; ils auront peine à couvrir le mommon , & possible qu'à present il y auroit lieu d'accord, lequel apres se rendra plus difficile , ou les conditions d'iccluy pour eux plus desauantageuses : ce qu'ils doiuent mettre par leur prudence en toute bonne consideration , & faire profit de ce conseil salutaire

R ;

& affectionné de la part de sa Maieſté. L'on nous dit icy que leſdits Princes vous ont donné iour au commencement du prochain à Heilbron, ce que nous ſommes bien eſtonnez apprendre du bruit commun, ſans auoir ſur cela de vos nouuelles ny de ce que vous eſtes deuenus depuis voſtre partement. Aucuns particuliers m'ont fait voir des lettres qu'aucuns de vous autres Meſſieurs leur auez eſcrites de Luneuille. Exculez moy Meſſieurs, ſçauans comme vous eſtes en affaires & aux formes ; Je vous dis que celle cy ne ſera pas trouuée bonne, n'ayant rien eu de vous dequoy le Roy & autres ſe ſont enquis de moy : Je couriray la choſe le mieux que ie pourray, mais ie vous ſupplie prendre en bonne part ce mien tres-affectionné auertiffement pour le ſeruice du Roy, & qui vous concerne. Sa Maieſté eſt en bonne ſanté & la Reyne pareillement, les Provinces du Royaume paiſibles. Depuis mes dernieres, il n'eſt rien ſuruenü de nouveau, qui eſt beaucoup en France. Sadite Maieſté ne parle point encore de ſortir de cette ville où les affaires ſe font mieux qu'en tout autre lieu. Par tout ie ſuis, Meſſieurs, voſtre tres-humble & tres-affectionné ſeruiteur de Puiſieux. De Paris ce vingt-huiſtième May 1620.

*RESPONSE DE MESSIEURS
les Ambassadeurs à la precedente en-
uoyée à Monsieur de Flauigny à Metz,
par Pierre Richard Messager ordinaire
du Roy.*

MONSIEUR,

Nous ne commencerons point nostre depesche par des excuses, mais par vn estonnement d'auoir veu la vostre du vingt-huictiesme, par laquelle il semble que vous croyez que nous ayons failly iusques là, que d'auoir escript à des particuliers sans auoir rendu compte au Roy de ce qui s'estoit passé depuis nostre sortie de France, cela deuoit estre hors de vostre opinion plus qu'à nul autre, puis qu'en la connoissance qu'auiez de nos procedez, il seroit impossible que ne nous separant point de chemin ny de conseils, l'un de nous n'estant pas excusable d'auoir failly, ce seroit sans exemple que tous trois l'eussions pû faire, toutesfois pour les offices qu'il a plû nous rendre sur ce sujet, vous apprendrez la verité de nostre conduite, laquelle est, qu'au sortir de Nancy nous vinsmes coucher à Luneuille, où exprés pour auoir loisir de former nostre depesche vers le Roy, nous seiournasmes vn iour, ayant amené avec nous vn des Gentils-hommes de Monsieur de Vannes Gouverneur de Thoul, pour rapporter nostredite depesche

audit de Vannes, lequel nous promet qu'il la feroit tenir en diligence par la poste droit à vous à qui la suscription s'adressoit, sans qu'il y eust autre paquet que celuy là, dans lequel toutesfois estoient les lettres que vous nous marquez avoir veuës de nous à quelque personne particuliere. Ce que nous en disons n'est pas pour nous descharger, car nous n'avons pas failly, mais bien afin que s'il vous plaist il soit fait tres-exacte recherche de ce manquement, lequel vient ou d'obmission ou de commission, le premier pouuant estre du Bureau du Controleur general des Postes où le paquet a esté ouuert & le reste des depesches deliurées où elles s'adressoient; l'autre de Monsieur de Vannes, duquel si la curiosité l'auoit porté à l'ouuerture (ce que ie ne croy pas) il seroit grandement coupable. Et quoy que nous estimions maintenant la depesche estre retrouvée, toutes-fois nous vous en enuoyons vn duplicata: du depuis nous auons escrit au Roy & à vous de Fanigen, le 3. Iuin, par là vous apprenez la visite de l'Archiduc Leopold & ce qui s'y est passé, & de nostre arriuée à Strasbourg, le chemin qu'auons tenu, & le contre mandement de l'assemblée de Heilbron remise en cette ville. Celuy que Monsieur le Duc de Lorraine auoit enuoyé vers Messieurs les Electeurs Catholiques, nous rencontra à Elingen, par lequel nous apprismes qu'à cause de l'indisposition & vieil aage de l'Archeuesque de Treues, & les voyages de celuy de Cologne en Vvestphalie, ils ne pouuoient se

trouver avec celui de Mayence , auquel toutesfois ils escriuoient les lettres dont vous enuoyons les copies , par lesquelles ils luy donnoient toutes charges de nous venir recevoir , & entendre les intentions de sa Maiesté : mais celui de Mayence s'expliquant d'avantage , fit response de vive voix à l'enuoyé , & par la lettre à Monsieur le Duc de Lorraine , comme vous verrez , qu'il ne pouuoit s'assembler sans l'avis des Ducs de Saxe & de Bauiere, joint que la resolution de Milhausen estant tres constante , il ne la pouuoit en rien innouer. Que le tout dependant maintenant de sa Maiesté Imperiale , il nous conseilloit d'aller sans autre visite , droit à elle , puis que l'effet de nostre legation dependoit entierement de sa volonté. Sur cela nous auons esté d'avis de luy renvoyer le mesme homme , & le tout sans lettre , pour luy faire entendre que ce que le Duc de Lorraine auoit désiré que les vissions ensemble, estoit tant pour accourcir nostre voyage , que à l'instar de l'assemblée des Princes vnis , tesmoigner vne pareille correspondance entr'eux & le soin particulier de les rendre participans des bonnes intentions du Roy pour le bien , & repos de toute la Germanie , avec asseurance que sa Maiesté leur donnoit de sa bonne volonté , de laquelle nous estimons les rendre plus informez en leur rendant les lettres du Roy apres l'assemblée dudit Vlme : mais il semble qu'ils ayent concerté ensemble & eu avis de la volonté de l'Empereur : car aussi - tost que nous fusmes arriuez en ce lieu , il nous est

R s

venu un Courier de l'Empereur depesché en diligence par son commandement avec lettre de Monsieur de Baugy, dont nous vous enuoyons la coppie plus que suffisante de vous en instruire. C'est pourquoy ayans iugé qu'il y falloit deferer, nous auons resolu de nous y acheminer apres cette assemblée, laquelle pourra durer sept ou huit iours, n'y estans encore arriuez que Messieurs les Princes d'Ansbach, & de Vvitemberg avec les Deputez de Strasbourg, lesdits Princes y attendans les autres Deputez & particulierement le fils du Landgraue de Hessen, le pere duquel est allé à la Haye, & seroit bon s'il se pouoit, de descouurir le dessein de son voyage ayant reconnu en quelques particuliers d'icy qu'ils en estoient estonnez, comme aussi des Electeurs Catholiques qui nous ont mandé plusieurs voyages auoir esté faits par luy, dont ils ont soupçon. Lesdits d'Ansbach, & de Vvitemberg ont enuoyé vers nous deux fois, à la derniere, ils demanderent surseance d'assemblée & de visite en personne iusques à l'arriuée du fils dudit Landgraue : par là nous iugeons qu'ils ne veulent se donner ialousie, de laquelle nous auons trouué exempte toute cette Republique, tant par le tesmoignage qu'ils nous ont rendu à l'entrée de leurs terres & villes, qu'aux complimens ordinaires soit aux logemens, soit aux regales, qu'ils nous ont faits au partir d'icy. Nous vous tiendrons informé du succez entier de cette assemblée par Courier exprés, en esperance de voir allant droit à Vienne par le Danube

les Ducs de Bauiere & de Neubourg s'ils sont
comme nous apprenons en deux villes de leur
patrimoine assizes sur ladite riuere, bien mar-
ris de la perte de nostre premiere depesche, &
vous remercions tres-affectionnement de l'a-
uis qu'il vous a plu nous en donner comme
des nouuelles du Roy, & de la Reyne pour la
prosperité & santé desquels nous supplions la
bonté Diuine qu'il luy plaise la vouloir aug-
menter, & à vous Monsieur autant de conten-
tement que vous en souhaitent : Monsieur,
vos bien humbles seruiteurs, Charles de Va-
lois, Bethune, & Preaux. D'Vlme le hui-
tiesme Iuin 1620.

LISTE DES PRINCES ET DEPVTEZ
de l'assemblée d'Vlme.

**DE LA PART DE L'ELEC-
teur Palatin.**

MONSIEVR le Marquis d'Ansbach avec
assistance du Colonel.

De Helinstel, & deux Conseillers dudit
Electeur Palatin.

Ledit Marquis d'Ansbach pour luy & pour la
maison Electorale de Brandebourg.

Monsieur le Duc de Vvitemberg.

Le fils de Monsieur le Landgraue de Hes-
sen.

*De la part de Monsieur le Duc des deux
Ponts.*

Iean Frideric Scholer , D.
Georges Frideric Pastric , D.

*De la part de Monsieur le Marquis de
Culubach.*

Iean Baptiste Baume , D.

*De la part de Monsieur le Marquis de
Baden.*

Engelhard Goler de Rauenspurg.
Ernest Frederic Melinger , D.

De la part de Messieurs les Princes d'Anhalt.

Tobias Hubner.

De la part de Monsieur le Comte d'Ottigen.

Louys Mulet licentié és droits & Chancelier.
Frideric Godfrid Resler , D.

*De la part de la ville de Strasbourg avec
plein pouvoir des villes Unies du
cercle du Rhin.*

François Inglot.
Iean Heller.
Iean Frideric Chmid , D.

*De la part de la ville de Nuremberg avec
commission des villes du cercle de
Franconie.*

Andreas Im. Hoff.

Georg. Christoff. Volek Hammer.

Iean Christoff. Ohlaffen, D.

*De la part de la ville d'Ulme, avec
pouvoir des villes unies de
Suabe.*

Iean Schad.

Sigmund Chleicher.

Hieronimus Schleicher, D.

Matheus Sturtzel, D.

Constantinus Varrenbuller, D.

De la part de la ville de Rotembourg.

Iean Bezold.

Michaël Bezold, D.

De la part de la ville de Rempten.

Iacob Rleinhans.

Dauid Megerlin.

A B B R E G E' DES GRIEFS
des Princes & Estats Euange-
liques , baillé par escrit à
Messieurs les Ambassadeurs
par les Deputez de l'assem-
blée d'Vlme.

LA IUSTICE EST LA BAZE
de tous Estats , & le lien de la
société humaine.

Les Estats Euangeliques se
plaignent.

PREMIEREMENT , Que le Conseil Impe-
rial s'attribuë vne puissance non limitée
sur les Estats de l'Empire, tant és affaires con-
cernant la Religion , que és causes Politiques,
ce qui repugne directement aux Loix fonda-
mentales de l'Empire , & aux constitutions de
la chambre Imperiale , par lesquelles il est
pourueu deuant quel iuge chacune cause se
doit agir, les Empereurs , ensemble les Estats
de l'empire , s'estant obligez par voye de con-
vention de remettre le tout en matiere de iu-
stice en ladite chambre , sans que les Estats
soient tirez ailleurs , sinon en certain cas spe-
cifiez par lescdites conuentions : que le conseil

Imperial estant presque tout composé de personnes faisant profession de la Religion Catholique, & peu affectionnez à la Religion Evangelique, la partialité ou plustost l'iniustice se fait voir manifestement, en ce qu'en vertu de cette pretenduë puissance non limitée, il decerne ordinairement des mandemens sans clause, comme les Evangeliques de quelle qualité & condition qu'ils soyent, à la requisition des Estats Catholiques Romains ou autres, ce qui contrarie manifestement à la liberté des Estats, & aux loix fondamentales susdites, par où lesdits Evangeliques pourroient aisement estre depouilleez de tout ce qu'ils ont eu en ce monde : aussi ordonne-il des commissions mesme en affaires, qui regardent les constitutions & Edits faits en faueur de la Religion, iusques là que les Commissaires procedent iusques à la definition de cause, & puis renuoyent l'affaire audit Conseil, pour estre sententiée definitiuelement, ce qui oste aux Estats le benefice d'appel duquel iouyslent immediatement leurs suiets, la condition desquels est par ce moyen meilleure que celle des Princes, Estats & Superieurs, de sorte que par telles procedures ils sont deuestus de leurs biens, terres, & suiets.

Qu'il decerne bien souuent des inquisitions tres-preiudiciables és chambres des reuenus des Princes & Estats Evangeliques : & est aduenue quelques fois qu'on a cuoqué des causes pendantes en la chambre Imperiale, & en la Cour de Iustice de quelques Princes Evangeliques pour estre decidées au conseil Imperial.

Outre ce que les constitutions de l'Empire, lesquelles ne se peuvent esclaireir ou abolir que par sceu & consentement de l'Empereur, & de tous les Estats de l'Empire, sont interpretées à plaisir par ledit Conseil, le tout au grand preiudice des Euangeliques.

Que non content de tout cela on procede souuent contre les Estats Euangeliques par vne voye de prescription au rebours des capitulations Imperiales confirmées par serment contre les statuts, sans l'aueu des Estats generaux, & sans forme de droit, & passe on aux executions par la violence des armes sous le seul titre, ou plutoſt abus de l'autorité Imperiale & le masque de iustice, par où les Euangeliques sont precipitez en leurs ruines, les membres de l'Empire deschirez, retranchez de leur corps, & reduits sous vne puissance Estrangere, l'Empire affoibly de plus en plus, & son ancienne grandeur grandement eclipsée.

Que la chambre Imperiale estant composée la plus part d'Assesseurs Catholiques Romains, elle regorge de diuers desordres, & de partialitez à l'encontre des Euangeliques, tellement que les Catholiques Romains, tant par la pluralité des voix (veu que les trois parts ou enuiron des Assesseurs sont Catholiques) emportent gain de cause à leur premiere instance, sans fort peu d'exception, & sans que les Euangeliques trouuent le redressement d'aucune iustice, mesme on vient si auant que quand vn procez se conteste en ladite chambre, les Rapporteurs s'informent bien

souvent de quelle Religion sont les parties.

Les particularitez , & ce que depuis vn bon nombre d'années en ça s'est passé en ladite chambre au preiudice des Estats Euangeliques , furent representées plus au long à l'Empereur Matthias deffunt en la diette tenuë à Ratisbone l'an 1613. & seroit par trop long de les reiterer icy: aussi n'est il pas besoin, puis qu'elles se trouuent , tant és actes de ladite diette imprimez , qu'en la Chancellerie de sa Maiesté Imperiale moderne , mais bien reïtere - on icy en passant , que c'est contre les constitutions de l'Empire que l'on veut perpetuer en l'ordre Ecclesiastique Episcopal de Spire , la charge de iuge de ladite chambre qui luy fut deferée depuis l'an 1569. veü qu'il se trouue assez de personnes seculieres & plus capables des affaires politiques , & non pas vne personne Ecclesiastique. Aussi ne peut - on passer icy sous silence qu'on traaverse à toute reste lors qu'il eschet l'office des deux Vicaires de l'Empire , qui sont les Electeurs Palatin & Duc de Saxe , au grand preiudice de leurs droits acquis d'ancienneté en s'efforçant ou de mettre obstacle aux actes de cét office , ou bien de les annuler apres estre faits , & ce tant seulement en defaveur de la Religion Euangelique.

La Cour de Rotvveil anticipe pareillement contre droit & raison sur les suiets des Estats Euangeliques par de vaines formes de procedures induës.

On a voulu iusques à present preiudicier aux

Estats Euangeliques en la conuocation des diettes seculieres.

Mesme on dispute à quelques vns des Euangeliques leurs successions indubitables & diettes Imperiales sans aucun autre suiet que de la Religion Euangelique.

Les Euangeliques se plaignent en outre de ce que quelques mal affectionnez ne reputent que pour vne intermise tolerance, la constitution faite en faueur de la Religion, icelle estant neantmoins le seul & plus salutaire moyen pour entretenir la paix & concorde entre les Estats d'une & d'autre Religion, par où on ouvre la porte à toute sorte de mes-intelligences, & de pernicious euenemens.

Ils se plaignent aussi de ce que plusieurs Euangeliques postulez par voye ordinaire aux dignitez Ecclesiastiques sont empeschez de prendre leurs seances és bancs de leurs predecesseurs, és mesmes ordres ou Prelatures, & ce sous pretexte de la Religion Euangelique : voire les sermens és chapitres & ordres de Chevaliers & autres sont conceus en termes si forts que les Euangeliques n'y peuuent paruenir.

Quant aux autres exemples des trauerses & executions qui se donnent & commettent ça & là à l'encontre des Euangeliques en plusieurs sortes, puis qu'ils furent aussi monstrez avec les autres griefs susdits à l'Empereur Matthias defunt en ladite diette Imperiale de l'an 1613. pour euiter prolixité, on s'en remet aux actes de ladite diette. C'est pareillement vn grief fort important qu'és assemblées Im-

periales , & principalement au conseil des Princes , on fait prevaloir la pluralité des voix : de sorte que les Prelats l'emportent toujours par-dessus les Princes & Estats Evangeliques qui bien en moindre nombre : mais beaucoup plus releuez , tant par leur naissance, que par les moyens que Dieu leur a départis ; ce qui leur tourne à tres-grand prejudice en toutes choses mais principalement en ce qui concerne les contributions de l'Empire & de la Religion , veu que par la pluralité de voix, quelques Ecclesiastiques des ordres inferieurs , & qui ne contribuent que fort peu ou rien du tout, engagent les Princes & Estats à contribuer sans comparaison davantage , & à porter la pluspart du fardeau tous seuls, estant chose bien facile ausdits Prelats, mais de soy-mesme iniuste , de porter leur voix dans la bourse, & sur la Religion d'autrui , pour le faire contribuer , & le soumettre à vn ioug du tout insupportable.

Puis donc que lesdits griefs & plusieurs autres tirans leur origine de la mesme source , ont esté representez si souuent en toutes les diettes Imperiales , & que nonobstant toutes les tres-humbles requestes des Estats Evangeliques , leur tres-longue patience, comme aussi l'esperance que sa M. Imperiale derniere defunte auoit fait prendre d'y estre remedié, on n'y a pourueu , ains que tout au contraire on a passé par-dessus toutes considerations pour tascher d'executer contre les Princes & Estats Evangeliques , les decrets , mandemens & prescriptions par la force & violence, aux des-

BRIEF RECVEIL BAILLE' PAR

*escrit à Messieurs les Ambassadeurs ,
des raisons qui leur ont esté exposées
par les Princes & Estats Vnis , tou-
chant les inconueniens des prescriptiōs*

PREMIEREMENT, d'autant que le Prin-
ce Palatin presentement Roy de Boheme
en acceptant la Couronne qui luy a esté offer-
te par les Estats dudit Royaume , & à leur
tres-grande instance , n'a rien commis ne de-
linqué contre sa Maiesté Imperiale ne contre
l'Empire , veu qu'il a estimé & estime le
Royaume de Boheme auoir esté vaquant à
l'heure de l'acceptation par l'abdication faite
auparauant publiquement par tous lesdits
Estats & ceux des Prouinces incorporées en
vertu de leur droit de libre eslection, & pour
les causes deduites, avec leurdit droit de l'es-
lection fort amplement par la iustification &
deduction qu'ils en ont faite, laquelle s'im-
prime pour le iourd'huy à Prague avec les
actes & documens y seruans , & laquelle sera
bien-tost acheuée d'imprimer , par où se trou-
ue responce tres-pertinente à toutes les obie-
ctions, fondemens des informations données
& publiées au contraire, & aux presuppositions
apologetiques & choses semblables, imprimées
tant au dedans qu'au dehors de l'Empire.

Secondement, d'autant qu'en ladite accepta-

tion ledit Roy n'a visé ny à sa grandeur , ny à son profit particulier , ains tant seulement à la conseruation de ladite Couronne , laquelle par les extremittez excessiues estoit en danger de tomber en vne main estrangere , voire en celle de l'ennemy du nom Chrestien au grand preiudice de la Chrestienté , & principalement du saint Empire l'ayant obligé d'y auoir égard, attendu que lesdits Estats estoient portez par lesdites extremittez à vne entiere resolution de ne plus receuoir sadite M. Et finalement il a pour but, de garantir tant de milliers d'ames innocentes exposées à la mort : que si par ce moyen la guerre & l'effusion du sang Chrestien n'a pas cessé , cela ne luy peut pas estre imputé.

Tiercement , d'autant que sa Majesté Imperiale estant partie , elle ne peut estre iuge tout ensemble , ne comme Roy de Boheme , ne comme Empereur. Quant à la connoissance que quelques vns d'entre les Princes Electeurs voudroient prendre de ce differend , comme d'une chose qui concerne vn Electoral , les Estats de Boheme & des pays incorporez se plaignent & protestent deuant Dieu & deuant le monde , de ce qu'ayant enuoyé leurs Ambassadeurs à la diette de Franc-fort derniere , pour leur exposer lors que la chose estoit encore en son entier , ce qui se passoit audit Electoral , lesdits Seigneurs , Princes , Electeurs Ecclesiastiques contre l'avis des Ambassadeurs des Electeurs seculiers ne les voulurent point ouïr , ains que leur refusant le droit de toutes les nations , on les rebuta du tout , &

mesme de ce qu'on ne representa pas en pleine assemblée de tout le College Electoral les lettres de remonstrances de protestations qu'ils firent exhiber au seigneur Prince Electeur de Mayence, comme premier Chancelier de l'empire & directeur de ladite diete d'election.

En quatriesme lieu, parce que telle prescription repugne aux constitutions de l'Empire, & à la capitulation Imperiale confirmée par le serment de sa Maiesté.

Pour le cinquiesme, comme sa Maiesté Imperiale est tenuë de maintenir l'Empire en paix & repos, & de preferer le bien public de tout le corps dudit Empire à son vtilité particuliere, aussi fait elle asseurer les Princes & Estats vnis, ensemble leur correspondans en leur derniere assemblée de Nuremberg par la bouche du Comte de Zollern, qu'elle n'entendoit & ne vouloit qu'aucun desdits Princes & Estats de l'Empire sans aucune exception, soit incommodé ou patillé à cause de l'interest particulier de sadite Maiesté, lesdits Vnis se promettant de l'integrité dudit seigneur Comte qu'il le confessera, comme aussi cela est redigé & asseuré pour memoire desdites asseurances & protocoles de ladite assemblée.

Pour le sixiesme, quand bien sa Maiesté se voudroit prendre à l'innocence des suiets du Palatinat, elle ne remedieroit pas pourtant à l'affaire de Boheme, ains prendroit seulement vne partie du feu qui brusle audit Royaume, & le ietteroit dans le cœur de l'Empire en danger de le brusler & perdre du tout, ce qu'il

le ne pourroit faire en bonne conscience sans contreuenir à son serment , sans s'acquiescer vn mauuais renom, & sur tout sans attirer l'indignation diuine & se priuier soy mesme de tous heureux succez.

Pour le septiesme, les Princes & Estats vnis suiuant la resolution qu'ils en ont prise avec les Princes & Estats correspondans, ainsi qu'ils l'ont fait entendre ausdits Seigneurs Ambassadeurs , comme aussi à sa Maiesté Imperiale mesme ne pouuoient en façon quelconque euitier de s'interesser à la deffence dudit Palatinat à cause de l'vnion qu'ils ont avec iceluy, & laquelle est principalement erigée à l'esgard des procedures & indeuës executions du Conseil de la Cour Imperiale, dont ils se sont plaints si souuent comme d'un point & d'un grief qui leur oste leurs libertez , priuileges , terres & suiets , & qui les trouble en leur Religion , de sorte que ce seroit le grief des griefs si sa Maiesté Imperiale vouloit augurer les auspices de son regne par des procedures si violentes , si sanglantes sans forme d'aucun droit ny d'equité , & sans auoir esté ouïes les iustifications de l'autre partie.

Pour le huietieme , lesdits vnis & correspondans sont obligez par raison d'Estat & par la foy qu'ils doiuent au saint Empire, d'obuier de tout leur pouuoir à vne telle guerre intestine, veu qu'elle ne se peut faire contre le Palatinat sans les incommoder infiniment, voire ruiner leurs terres & suiets au desauantage irreparable de tout le corps de l'Empire, & par consequẽce necessaire à la totale ruine d'iceluy.

Pour

Pour le neufiesme, les Vnis y sont aussi obligez par raison de voisinage, tout ainsi qu'ils ne pourroient & ne voudroient souffrir qu'on vint faire la guerre aux Catholiques Romains qui sont entr'eux, veu que les pays, terres, iurisdctions, biens & reuenus, tant desdits Catholiques Romains, que des Euangeliques, estant comme enclaués les vns dans les autres, il est impossible de mettre le feu dans la maison de l'un sans exposer celle de l'autre au mesme danger, paroù il appert que les Catholiques Romains souffriroient avec lesdits Euangeliques, outre ce, que les extremités sont sujettes à de grands & dangereux changemens.

Pour le dixiesme, ce seroit pour engager & conuier les Potentats, amis & alliez de dehors, de venir porter les armes au cœur de l'Empire. La declaration du Roy de la grande Bretagne qu'il a faite à l'Archiduc Albert de sa resolution en vn tel cas, tesmoigne qu'il n'abandonnera par les biens patrimoniaux de ses enfans, aussi auoit-il le moyen d'en prendre sa reuanche sur les terres d'Autriche & ailleurs.

Tout ce que dessus montrant que la voye de prescription ne peut estre le chemin pour remettre & entretenir la paix dans l'Empire, & auancer son bon-heur selon & ainsi que sa Majesté Imperiale s'y est tres-estroitement obligée à son sacre par serment corporel.

*EXTRAIT DES LETTRES
estrites à l'Electeur Palatin par le
Duc de Baviere.*

ET par ainsi, Monsieur mon cousin, i'espere & vous prie qu'au cas qu'il vous pleust d'accepter ladite Couronne de Boheme, vous fassiez en telle sorte que ie sois hors de danger, & assuré pour les dommages qui pourroient redonder sur moy & sur mes pays, me promettant que pour la bonne affection, correspondance, proche parenté de tige & de nom & l'amitié qui est entre nous, vostre intention ne sera pas d'accepter vn Royaume ou pays en telle sorte qu'il m'en reuienne du dommage & peril, encore que par apres il se trouue des gens qui sous quelque vain pretexte (ainsi qu'il pourroit facilement arriuer) voulussent viser à mon desauantage, car ce ne seroit pas assez d'excogiter ou controuuer quelque suiet de ce faire, ains conuient considerer sincerement la condition de celuy qui est enclaué entre deux qui se font la guerre.

Mon desir, mes pensées & intentions sont portées à ce que par les voyes qui sont les moins suietes à prolixité & plus faciles à effectuer, on puisse paruenir à la paix & tranquillité.

Et par cette consideration ie ne vous puis celer, ains vous diray en vraye & constante confiance, que ie trouue fort estrange & con-

sidérable qu'on tasche de vous imaginer & à quelques Estats de l'Empire , ainsi qu'on fait au cercle de la baïlle Saxe , afin de tant plus fomentier & accroistre le feu en l'Empire & autres lieux , comme si les Estats Catholiques de l'Empire par le peu de levées qu'ils ont faites ne cherchoient que d'opprimer les Evangeliques, & que pour ce regard (car quant aux excursions , seditions & semblables , c'est vn autre fait) vous & vos confederes auriez esté contraincts de mener vn si grand nombre de gens de guerre & de munitions de toutes parts en vos pays du costé de Boheme , veu que moy & les autres Estats qui se sont mis avec moy en quelque deffence , vous auions aduertty du vray fondement de nostre armement & suffisamment asseuré , sincere qu'il estoit autrement ; & que les Catholiques ne visent qu'au repos & à leur seureté , & qu'en ledit armement il n'ont pour seul but que la deffence naturelle contre la violence , &c.

*AVTRE EXTRAICT DE
lettre du Duc de Baviere audit
Electeur Palatin.*

ET aussi ay-ie desia declaré par cy - deuant aux Estats de Boheme qu'on ne me deuoit ne pouuoit semondre bonnement de me rendre ennemy ouuert de sa Maïesté Imperiale & de toute la maison d'Autriche ; veu que si en ce faisant ie me departois ainsi de la neu-

tralité, ce seroit pour attirer les troupes des deux parties & mettre le siege de la guerre dans mes pays, en me chargeant de ce que les Estats craignent eux mesmes.

EXTRAICT DE LA DECLARATION des Electeurs Catholiques & autres Prelats, touchant leur neutralité és affaires de Boheme.

LEs Estats du Royaume de Boheme & des pays incorporez, ayant par vnanimité de volonte & de suffrages porté leur eslection sur la personne du Prince Electeur Palatin leur Roy moderne: Il notifia par ambassades expresse & par lettres sadite eslection, non seulement à ses alliez, mais aussi à ses co-Electeurs Ecclesiastiques, Euesques & Princes voisins, sçauoir de Mayence, de Treues, de Cologne, de Spire & de Vvormes, leur faisant entendre qu'il n'auoit en tout cecy autre obiet que la vocation diuine, & la conseruation de tant de nobles Prouinces miserablement déchirées & exposées à leur totale ruine.

Surquoy lesdits Seigneurs Electeurs & Euesques, apres auoir fait ouuerture de leurs pensées & exhorté de bien peser cette affaire auant que d'accepter la Couronne, remirent à la volonté de sa Maiesté de Boheme moderne de faire comme elle estimeroit, declarans tous de luy vouloir demeurer en tout cas

bons voisins , pourueu qu'il ne les pressast ny molestast en leur pays, & qu'ils n'entendoient de s'enueclopper en la cause de Boheme , ne pour le regard d'icelle alterer par aucun acte d'hostilité l'ancien & bon voisinage qu'ils ont avec le Palatinat , ains de se contenir és bornes de neutralité.

Ce qui se peut verifier par lettres de contre creance renduës ausdits Ambassadeurs , & par la relation d'iceux, là où entre autres propos & discours tenus avec l'Ambassadeur enuoyé vers l'Electeur de Treues on profera spécialement ceux-cy. Qu'ils se battent en Boheme tant qu'ils voudront, nous serons bons voisins en ces quartiers.

Quelque temps apres le Roy voyant qu'on vouloit employer les dixmes & reuenus Ecclesiastiques desdits Seigneurs Princes & Estats voisins , à vne contribution contre luy & contre la cause de Boheme , il y pourueut par le moyen d'un arrest sur lesdites dixmes & reuenus , lesquels iceux tirent annuellement du Palatinat, de sorte que s'il les leur eust fait deliurer pour les contribuer contre luy ; il leur eust fourny des armes pour le battre , ce que la raison ne requiert de personne, mais iceux en ayant demandé la relaxation , ils l'obtinrent tout aussi-tost & sans aucune difficulté sur la declaration qu'ils firent derechef , pareille à la premiere , ainsi que cela ne se peut nier sans faire tort à leur candeur, dignité & grandeur , cette leur derniere declaration se prouuant manifestement par leurs missiues mesmes.

Quant à la declaration faite par Monsieur le Duc de Bauiere , elle se peut voir par l'extrait de ses lettres cy- dessus,

LETTRE DV LANDGRAVE DE
Hessen à Messieurs les Ambassadeurs ,
receuë à Vime le 8. Juin.

MESSIEURS ,

Ayant esté certifié que par commandement de sa Maiesté tres - Chrestienne vous avez commission de trouuer Messieurs les Princes & Estats de l'Vnion mes honorez cousins & allicz , maintenant assemblez à Heilbron , pour y proposer de la part d'icelle certains points touchant les troubles d'Allemagne , & principalement de la Boheme ; J'ay trouué bon de donner charge à M. mon fils le sieur administrateur de Hirsfer , de vous saluer de ma part , & de s'informer de la bonne disposition & des affaires de sadite Maiesté & de sa Couronne. C'est pourquoy ie vous prie prendre cette visite en bonne part , & de croire que comme ie suis obligé à ce faire , ie ne faudray à vous faire paroître que ie suis, Messieurs , vostre bien affectionné à vous faire service , Maurice Landgraue de Hessen. A Castel le 21. May 1620.

PROPOSITION FAITE PAR
*les Ambassadeurs du Duc de Baviere à
 l'assemblée des Princes de l'Union.*

MESSEIERS,

Vous vous souviendrez fort bien comme Messieurs les Electeurs, Princes & Estats de l'Union ont toujours déclaré & offert que toutes leurs actions, intentions & volontez n'estoient portées qu'au repos & tranquillité de l'Empire Romain, & mesme que leur appareil de guerre n'estoit que pour leur defence contre l'iniuste force, & non pour offenser aucun. Qu'ils ne souhaitoient, desiroient & recherchoient rien plus que d'empescher que l'Empire Romain, son chef & membres ne tombassent en aucune diuision, dommage & perte, mais qu'il fut maintenu en son estat, paix & tranquillité, que chacun fust conservé en ce qui luy appartient : En sorte que Messieurs les Electeurs, Princes & Estats Catholiques par plusieurs fois, mesme dernièrement à la diette tenuë à l'Union à Nuremberg, tesmoignerent à M. le Duc de Baviere nostre Maistre que sincerement, appertement & en loyal Allemand, leurs intentions apres ce remuement de Boheme qui traine avec soy vn danger qui se glisse lentement en l'Empire, les leuées volontaires, l'oppression des pauvres suiets, aussi l'apprehension de quel-

que mutinerie & excursion estoient pour vne
 nécessaire deffence en ces temps dangereux
 pour la tuition d'eux & des leurs : ce que le
 droit des Gens a tousiours permis à vn cha-
 cun, & nullement pour exciter quelque émo-
 tion à l'Empire, ny pour persecuter ceux de la
 profession d'Ausbourg, Electeurs, Princes &
 Estats vnis, ny pour ie rendre plus puissans
 qu'eux, ny pour l'oppression & deffence d'au-
 cuns d'eux, tant & si longuement que l'on
 ne leur en donneroit en effet aucune occasion
 & suiet ; cause que les Electeurs, Princes &
 Estats Catholiques ne se pouuoient autrement
 imaginer qu'il en demeureroit és termes que
 de part & d'autre, il auoit esté promis, assuré
 & apertement déclaré en bon Alemand, que
 de là en auant il ne seroit donné aucune def-
 fiance, & peut estre au contraire, que tels in-
 conueniens & les occasions en seroient totale-
 ment retranchées. Et ainsi le tout remis en
 vraye sincerité & affermissement, & assure-
 roit tous les membres de l'Empire de toute
 oppression & inuasion, & vniroit les vns &
 les autres en bonne confiance & seureté, &
 trauiuilleroient tous vnanimement à remettre
 sus l'Empire penchant en ruine, & empescher
 son eminente sheute, mais tout le contraire
 semble se vouloir monstrier en effet en ce que
 la defiance a tellement gagné que les contra-
 rietez sont tellement enracinées & que l'on
 se donne tant d'impressions sans fondement,
 comme si la preparation des Catholiques à leur
 deffence tendoit seulement à rompre, surpren-
 dre & opprimer les Estats de l'Empire qui

font sous la confession d'Ausbourg , appelez autrement Euangeliques , & singulierement des villes Imperiales : l'on voit les Vnis & correspondans de iour en iour se fortifier de gens , munitions & autres preparations de guerre , mesme aussi comme ils menacent , leur armée en la Franconie , bouche le passage aux gens que les Catholiques auoient leuez, contre toutes offres & assurances , selon les statuts de l'Empire , & ainsi les Catholiques non sans leur grande incommodité auroient esté incitez de se renforcer pour necessiter le passage à leurs gens , ce qui fut arriué autrement , & ceux de l'Vnion auroient en partie conduit leur armée , pour bouscher le passage derechef en Alsace , se seroient retranchez & fortifiez sur les lieux , & avec telle intention qu'ils donnoient à entendre que c'estoit par ordonnance de l'Vnion , & que l'on estoit resolu de poursuiure , & les gens , & le pais , & qu'entre autres inconueniens que l'on auoit posé les sentinelles sur le terroir d'autrui , non autrement que si l'on auoit affaire à vn ennemy declare. En sorte comme entre autre chose il apparoit par les lettres que dernièrement le Duc de Vvitemberg escriuit à sa Maiesté Imperiale , dattées du 20. Avril , il tasche particuliere de mettre les Catholiques en mauuaise odeur à tout le monde , & leur impose plusieurs choses dont ils sont innocens , pour pouoir palier ses conseils aduersaires. Or l'on n'en est pas demeuré en ces termes : mais ceux de l'Vnion ont retiré leurs gens de leurs precedens quartiers , iceux conduits , posez &

Sj

retranchez és lieux prochains , & commodes aux Catholiques , & tant de menaces , sans honte , & apertement font iuger de l'intention : de sorte que de part & d'autre , on est venu iusques là que de s'estre approchez , comme si estoient ennemis , & bien que l'on s'estoit proposé d'en demeurer és termes de la deffence , il se void neantmoins qu'il est presque impossible que quelque acte d'hostilité n'advienne spécialement entre les particuliers soldats , dont pourra incontinent ensuiure que l'on viendra à l'offensive , pareillement les inconueniens qui pourront subuenir partie d'erreur , partie de rapports , ce que l'occasion semble du tout rendre impossible autrement , & aussi le peu de retenue qu'il y a entre les soldats , comme il est arriué à Sonthem , & Bechingen , & ainsi que ce que tant les Catholiques que les correspondans Vnis , souhaitent , cherchent , & desirent empescher , sçavoir que le feu qui brusle ailleurs , & dont l'Empire ne peut mais , ne s'y allume , ny que tels mouuemens , maladie , destruction de paix , espanchement de sang Chrestien , mesme finalement qu'il n'y arriue vne entiere ruine & desolation dudit Empire , & de tant d'illustres Electeurs , Princes & Chefs d'iceluy , & que de ces moyens & pretextes dont ils ont usé iusques à present de propre deffence , ne s'en ensuiue leur propre ruine. D'auantage , est encore à remarquer comme en 1610. ceux de l'Vnion enuoyerent vne illustre Ambassade vers le Duc nostre Maistre , pour demander vne paix alléuée , donnant instamment

à entendre qu'ils n'estoient en l'intention de plus apparente deffence, incommodité & difficulté. Or maintenant les considerations sont égales, l'interet est, ou doit estre pareil, tant à eux, comme aux Catholiques, spécialement que outre les inconueniens sceus de part & d'autre qu'apportent avec soy les armées, bien qu'il n'y eust autre consideration, en outre les pauvres suiets sont ruinez & desolez, & faut de nécessité qu'ils soient reduits en tel estat, que tant suiets que maistres ne se pourront de long-temps remettre, sans parler des suiets, qui avec toute sorte d'oppression en leur honneur & moyens sont contraincts encore d'y laisser la vie. C'est pourquoy en consideration de ses causes, & autres, le Duc nostre maistre estant incité, desire entendre par cette Ambassade de Messieurs les Princes & autres de l'Vnion, cathégoriquement, clairement & apertement, sans aucune condition, si au moyen du pourparler, & de la promesse aux correspondans Vnis veulent demeurer en vne sincere paix non fardée, repos, & tranquillité, avec les Electeurs & Estats Catholiques, s'ils ne veulent les offencer, courir sus, incommoder, troubler, ou entreprendre d'effet quelque chose à l'encontre d'eux, avec les appareils de guerre de l'Vnion, ou autrement en aucune façon ou manière, ou sous quelque couleur que ce soit ou puisse estre, mais de les laisser aux Catholiques sans les molester, & en assurance, & si de ce, ils les en veulent assurer, les Electeurs, Princes & Estats Catholiques de l'Empire estiment ve-

ritablement que l'intention des correspondans & Vnis a tousiours esté, comme il appert par les procédures manifestes, & est encore, puis qu'ils reconnoissent deuant tout le monde pour bon, nécessaire, & conseillable, que pour l'Estat miserable des Royaumes voisins & pays hereditaires, l'on ne doit nullement exciter aucun trouble & mouuement dans l'Empire ou membres d'iceluy, ou y attirer du feu Estranger, & que par tel souleuement interne, ny autrement donner occasion à la ruine de l'Empire, & à l'ennemy, ou attirer le ioug de quelque autre nation, mais qu'il le falloit euer, en cas que les correspondans & Vnis soient encore en cette volonté & intention, & qu'ils en voulussent acertiorer & le promettre aux Catholiques, son Altesse de Bauiere, au nom des Electeurs, Princes, Estats & Catholiques acertiore, promet & assure le semblable en tout, comme il est dit cy-dessus. Et comme les Electeurs, Princes & Estats Catholiques estiment que cette ronde & aperte declaration & assurance ne sera tirée en aucune difficulté par les Electeurs, Princes & Estats correspondans, mais s'il ne se peut obtenir d'eux, ou qu'ils obiectent quelque difficulté ou subterfuge, ils protestent qu'il ne tient à eux Electeurs, Princes, & Estats Catholiques, qu'une paix assurée, & sans aucune difficulté ne s'establisce en l'Empire: mais que postposans plusieurs autres considerations qu'ils en ont cherché l'establissement par toutes sortes de

voye , maniere , & y ont contribué leur pos-
 sible , & tout ce qu'on pouuoit souhaitter
 & attendre d'eux , pareillement que toutes
 les emotions & maux qui en pourroient
 foudre en l'Empire , ne viennent d'eux ;
 mais d'autres qui auront à en respondre tel-
 lement & sans leur faute , toutesfois ils sont
 contrainsts d'auoir en consideration leurs
 personnes , les leurs , ce qui fait besoin à
 leur deffence , & ce qui est neccellaire à leur
 seureté , à quoy ils mettront ordre : &
 qu'ainsi que les Estats Catholiques avec
 leurs tres - diligentes & fort suffisantes &
 amiables exhortations , comme portent les
 lettres cy - dedus mentionnées enuoyées
 à sa Majesté , soient tenus pour ennemis
 declarez nonobstant leur innocence , & que
 l'on puisse & veuille ainsi traiter avec eux ,
 ils en remettent le tout à l'euenement , &
 au temps. Et plus bas est escrit : Nous les
 Ambassadeurs auons voulu représenter tout
 cecy , & le donner par escrit : signez Ac-
 cuvvig Comte de Sults , & Iean d'Ornsperg,
 & Louys de Vveylin. A Vlme ce huities-
 me Iuin 1620. heure de trois heures apres
 midy.

*EXTRACT DV POINT
principal de la responce faite par les
Princes & Estats Vnis , aux Ambas-
sadeurs du Duc de Bauiere.*

QUE sur la declaration que son Altesse de Bauiere a faite, tant en son nom, qu'au nom des autres Princes & Estats Catholiques Romains confederez, avec celle de vouloir tenir, garder, & obseruer inuiolablement les promesses & assurances par elle données cy-deuant : que les armemens faits par elle, & sesdits confederez ne tendent & ne seront employez à l'encontre des Electeurs, Princes & Estats Vnis, leurs terres & suiets, en façon quelconque, pourueu qu'ils soient d'autre costé assurez de mesme que les armes des Vnis ne seront employées contr'eux, leurs terres & suiets. Lesdits Princes & Estats Vnis & les Ambassadeurs des absens, tant pour eux, qu'au nom de leurs principaux, acceptent ladite declaration, promesses & assurances reiterées par sadite Altesse de Bauiere, déclarent d'autre costé, que comme leur vnion n'a pour but que la deffensue à l'encontre d'une iniuste violence, & l'entretenement de la paix du saint Empire, aussi veulent-ils tenir, garder & obseruer inuiolablement & sincerement les promesses & assurances par eux données cy-deuant, que les armes prises par eux, à l'imitation desdits Catholiques Romains, ne tendent & ne seront employées à l'encontre

de sadite Altesse, & des Catholiques Romains confederez avec elle, ains que lesdits Vnis entretiendront paix & amitié avec lesdits Catholiques, si long-temps que iceux ne contreviendront à leur dite declaration, car au cas de contrauention du costé desdits Catholiques Romains confederez: lesdits Vnis estimeront estre absous de cette leur declaration: aussi lesdits Vnis se promettent en suite desdites assurances données par sadite Altesse de Bauiere qu'icelle & ses confederez ne s'interreseront aux prescriptions & voyes de fait qu'on voudroit entreprendre contr'eux, & quelqu'un d'eux, ains plustost que visans à la tranquillité de l'Empire, ils travailleront à en auancer les moyens, comme aussi à faciliter le remede des griefs, dont les Euangeliques se sont plaints si souuent, &c.

REPLIQUE DES DEPUTEZ du Duc de Bauiere.

LEs Deputez de Monseigneur Maximilian Duc de la haute & basse Bauiere, &c. ayant entendu ce que les Princes presens vnies & correspondans, comme aussi ce que les autres Deputez des villes & Estats, ont respondu à ce qu'ils leur auoient proposé, tant par escrit que verbalement, & le tout reduit à quatre chefs: apres donc qu'eux Deputez ont leu cette declaration ayant trouué necessaire, & de ce ayant aussi pouuoir, ils font de-

rechef au nom du Duc leur maistre , la declaration en cette sorte suiuite.

Or quant à ce qui concerne le premier & second chef d'où procedent les dangers que le temps nous fait voir à l'œil , quelles leuées d'armes & preparations militaires se sont ensuiuies , quelle sincerité estoit interuenue de part & d'autre, comme l'on a contreuenue à icelle, ce n'est icy le temps ny le lieu de disputer & refoudre , c'est pourquoy les Deputez passans par dessus , le remettent en autre saison. Que si les Electeurs, Princes, & Estats Catholiques Vnis en vouloient représenter quelque chose de considerable , ils le feroient facilement & avec plus de fondement, & toutesfois le representeroient en tant que besoin seroit au Duc leur maistre , Electeurs , Princes & Estats Catholiques , lesquels s'ils le trouuent necessaire ne faudront à y respondre, bien que cela ne regarde l'affaire presente , & que par cy-deuant l'on a traité plusieurs fois.

Quant à ce qui touche le point principal de leur renuoy & requisitoire , sçauoir si les Electeurs , Princes & Estats correspondans Vnis veulent maintenir la paix entr'eux & les Catholiques , & de ce leur en donner conuenables cautions & assurances , les Deputez entendent que la declaration ne soit non seulement enucloppée d'aucune circonstance ou subterfuge , mais que l'on accepte purement les offres faites de la part du Duc leur maistre, autres Electeurs, Princes & Estats, & non vouloir proposer qu'au cas qu'on les assure & fournisse d'assurance, ils en feront le mesme.

de leur part, en telle sorte que les Deputez ne peuvent estre satisfaits de telle declaration : mais desirent d'entendre suivant le pouuoir de leur instruction, droitement, clairement & categoriquement, & sans aucune circonstance, veu mesme que les appareils des Catholiques ne se peuvent plus long-temps remettre, si les Electeurs, Princes & Estats correspondans Vnis avec leurs appareils de guerre, ou autrement entendent demeurer en paix & repos de l'Empire avec les Electeurs, Princes & Estats Catholiques, iceux ne molester, troubler, ennuyer ou offencer, soit par passages, logemens, traite de gens, ou autres actes, mais laisser iceux Catholiques avec les leurs paisibles & en repos, & de cela leur en vouloir donner suffisantes & acceptables cautions & assurances, & ainsi incontinent congедier leurs gens de part & d'autre.

Car touchant ce qui est ioint à la declaration donnée aux Deputez, que l'assurance que les Catholiques donneront de leur part, doit estre pour tout vn chacun Catholique, aucun n'en estant exclus ou exempt, comme aussi que l'appareil des Catholiques ne soit que pour la deffence d'eux, & de leur propre pays, & non pour aucun acte que ce soit, qu'ils n'ayent à se charger d'aucune execution du ban, qui semble se preparer, ny donner aucune resolution sur les griefs *ad extrema*, comme il semble estre fait en la declaration de Vvirtiburg, ce sont choses & dependances qui ne peuvent se discuter pour cette fois, ny ne sont de l'essence de l'affaire presente.

Le Duc de Baviere en tout euenement & au cas que de l'autre part l'on traite categoriquement dauantage de la declaration & assurance, offre pour luy, & tous les autres Princes, Electeurs & Estats Catholiques en l'Empire, avec lesquels il est vny, de ne rien entreprendre contre les Protestans. Quant à ce qui concerne les autres Cathol. qui ne sont vnis avec son Altesse, de mesme que son Altesse n'a rien à leur prescrire ou induire, aussi ne peut elle rien promettre pour eux. N'est aussi mal à propos que son Altesse & autres Catholiques se soient preparez pour la deffense d'eux, & de leur pays, bien ne leur est il expedient de demeurer vn si long-temps avec tel appareil de deffences, avec grande incommodité, & despences, mais desirent s'en liberer où besoin seroit, & que l'origine de ce mal-heur fut guerrie par tous moyens conuenables, & par ainsi se descharger de telle onereuse deffence.

Touchant le ban, son Altesse espere que l'on se comportera en sorte enuers sa Maiesté Imperiale, que l'on ne viendra, ny à la proclamation de ban, ny à autre difficile procedure, en sorte que le reestablisement de la paix en l'Empire, seroit vn bon commencement, pour empescher telle procedure, & que le craignant, le peril qui en pourroit arriuer aux Estats de l'Empire, seroit par ce moyen diuertty.

Son Altesse se souuient fort bien que la declaration faite à Vvertiburg, touchant les griefs, ne tend point aux extremitez, mais plustost a esté dressée selon l'occurrence, &

comme il se pouuoit & deuoit à procédures extraordinaires.

Or donc son Altesse desire categoriquement, & en bon Allemand, sçauoir e que luy & les autres Electeurs, Princes & Estats Catholiques, ont à esperer & attendre des correspondans vnis, s'ils sont en resolution, au moyen des propositions & conditions offerres de conseruer la paix & en donner asseurance: car en cas de paix, son Altesse offre derechef de faire pareille assecuracion, mais en cas de refus de telle declaration autrement de subterfuge ou conditions qui seroient mises au rang de refus, son Altesse sera contrainte de penser à soy & aux siens, & à ce que la necessité requiert, & à composer ses actions aux euenemens.

Mais son Altesse tesmoigne & proteste derechef deuant Dieu & les hommes, qu'il est innocent de tout ce qui pourra arriuer, & que tout le mal en doit estre attribué à ceux qui au pardessus des offres de paix, sont cause & origine de tous ces maux.

R E S P O N S E D E S P R I N C E S

*& Estats Vns à la replique des
Ambassadeurs du Duc de Baviere.*

M E S S I G N E V R S les Princes & Estats Vns, tant pour eux-mesmes qu'ayant plein pouuoir, & les Conseillers Ambassa-

deurs & Deputez des absens assemblez en ce lieu, ont entendu par la replique des Ambassadeurs enuoyez vers eux de la part de Monseigneur le Duc de Bauiere, que iceux en vertu de leur commission & instruction, ne se contentans pas de la resolution qui leur a esté donnée par lesdits Seigneurs, Princes & Estats, demandent encore vne responce claire, categorique, & sans aucune limitation, condition, & delay si les Electeurs, Princes & Estats, correspondans & Vnis, entendent d'entretenir paix & repos avec les Electeurs, Princes & Estats Catholiques Romains de l'Empire, sans les vouloir molester par aucune voye de fait, & les en alicurer par promesse suffisante, ajoutant que les demandes & declarations iointes à la resolution desdits Vnis ne pouuoient pour cette fois estre decidées ne comprises en cette affaire presente, & y presentant vne offre de pareille alicurance au cas d'une declaration de paix sans condition, ainsi qu'il appert plus amplement par ladite replique.

Surquoy lesdits Seigneurs Princes & Estats Vnis par les Ambassadeurs & Deputez des absens ne se veulent estendre icy par aucune dispute ou refutation de ce qui s'est passé iusques à present de part & d'autre, esperant que Dieu & le temps feront paroistre à tout le monde, laquelle des deux parties a tésmoigné plus d'equité, de moderation, de sincere affection, & de bon conseil au reestablisement & entretenement d'une bonne intelligence, & confiance entre les membres du saint Empire. Mais ils ne peuuent dissimuler qu'ils

trouuent ladite replique fort estrange, en ce que outre l'obscurité qui s'y trouue en diuers endroicts, elle contient vne prescription, communication, & prefixion de temps retranché de tout espace, veu que de l'autre costé on tesmoigna n'agueres vn si vif ressentiment de ce qu'on auoit nommé vn terme beaucoup plus long, c'est pourquoy ils ont beaucoup plus iuste suiet de faire la mesme contradiction que firent les Estats Catholiques Romains, cy-deuant assemblez en la ville de Vvertiburg, & se reseruent pareillement toutes choses.

Neantmoins leſdits Vnis reïterent derechef leur premiere resolution, & declarerent sur le point principal pour eux & leurs Superieurs, que leur volonté, & desir est de continuer avec leur armement en paix & repos, enuers les Electeurs, Princes & Estats Catholiques Romains de l'Empire, & de ne les molester ou offencer contre l'equité ne de fait, ains comme ils s'asseurent de n'estre molestez par leſdits Catholiques en ce qui est du leur, soit au temporel ou au spirituel, les laisser semblables & ne les troubler leur preiudicier en ce qu'ils possèdent, soit au temporel ou au spirituel biens Ecclesiastiques ou autres, si long-temps que par hostilité ou violence ils ne seront contrains de faire autrement & se seruir des moyens que la nature & tous les droits enseignent en tel cas.

Ce qu'ils repetent & assurent rondement, ouuertement & sincerement, ne pouuant comprendre pourquoy sadite Altesse desire-

roit vne allecuration precedente plus receuable & suffisante, veu que seulement de ce costé icy on n'a donné aucune occasion : mais aussi qu'on n'a pas peu encore entendre quelques assurances on pretend donner d'autre part, lesquelles on auroit toutes fois iuste raison de demander, puis que les Catholiques Romains se sont animez les premiers, sadite Altesse n'ayant sujet de douter aucunement de cette declaration desdits Princes Vnis faite en paroles de Princes sincerement & sans feintise, non plus que du costé desdits Vnis ; on ne met en aucune doute ne meffiance la parole & promesse reciproque de sadite Altesse.

Quant à la retraite de l'armée, tant d'une que d'autre part, tout ainsi que du costé desdits Vnis, on ne prescrit pas à sadite Altesse l'ordre qu'elle doit tenir en la conduite de ses forces ; aussi estiment ils qu'on ne pourra interpreter sinistrement ou trouuer mauuais qu'ils en vsent de mesme en la conduite des leurs selon leur commodité & nécessité, sans inquieter ou molester personne, attendu que sadite Altesse ne se veut faire fort que quelques autres Catholiques Romains qui ne sont pas liguez avec elle, n'ayent dessein d'entreprendre sur lesdits Vnis, & qu'elle n'entend les en destourner : de sorte que lesdits Vnis ont tant plus iuste occasion de veiller à leur conservation & se tenir sur leurs gardes sans qu'on les en puisse blâmer : Et pour ce regard ils attendent de sadite Altesse plus d'esclaircissement, quels Electeurs, Princes & Estats sont confederrez avec elle, & au nom desquels elle interpo-

se sa parole & offres reciproques , sans vouloir donner ordre ou prescrire aux autres, veu qu'il importe grandement ausdits Vnis de le sçauoir & estre certains pour quels Estats Catholiques & au nom de qui sadite Altesse offre telles assurances principalement en consideration de ce qu'une bonne partie des Estats compris en la ligue font selon les rapports communs de nouvelles leuées, & les autres ont encore près d'eux vn nombre de gens de guerre , mesme que l'Archiduc Albert , lequel à cette heure fait vn grand armement , eut n'agueres ses Ambassadeurs en l'assemblée de la ligue Catholique tenuë à Vvrtbourg conjointement avec les autres Catholiques Romains confederéz, & que partant il ne peut estre tenu pour autre que pour membre de ladite ligue. C'est pourquoy aussi on fit ces iours passez mention en la resolution donnée ausdits Ambassadeurs des prescriptions Imperiales dont on a fait courir le bruit & de l'importance qu'il y a de les surseoir & diuertir lesdits Vnis , prenant cette bonne confiance de l'equité & de la justice de sa M. Imperiale , que suiuant la capitulation confirmée si solennellement par serment corporel & les constitutions de l'Empire, comme aussi les ordonnances des cercles : elle ne decernera & ne fera executer chose quelconque que ce qui est requis pour la conservation des membres du S. Empire & pour le diuertissement d'un embrasement general & si dangereux à tout le corps, & le respect que lesdits Vnis portent à sadite Maiesté , les contenant non seulement, mais aussi les conuiant de

foy mesme au deuoir qu'ils desirent luy rendre. Ils se promettent entierement qu'elle ne se lairra porter à aucune chose contraire, & que son Altesse, ensemble ses confederez, n'approuueront & ne se chargeront de telles procédures capables de confondre du tout la paix du saint Empire & de le mettre en combustion, ains qu'ils auront en recommandation les constitutions de l'Empire, qui ordonnent d'empêcher aux gens de guerre estrangers l'entrée sur les terres de l'Empire, iceux y estans obligez par lesdites constitutions.

Pour ce qui concerne les griefs dont il est fait mention en ladite resolution, & desquels les Euangeliques vnis & correspondâs du saint Empire se plaignent si iustement & sensiblement, lesdits Vnis eussent bien désiré que suivant ce que son Altesse en a touché, le remede n'eust pas esté remis de l'autre costé aux extremités, ains qu'on leur monstrest quelque voye expediente pour en obtenir vn redressement equitable.

Mais puisque ce point concerne non seulement les Princes & Estats vnis icy assembléez, mais aussi les autres Estats Euangeliques de l'Empire correspondâs avec eux & touche l'un aussi prés que l'autre en ce qui regarde le bien & felicité temporelle & eternelle d'eux tous, & tout ce qu'ils ont de plus cher, & mesmes que sadite Maiesté & lesdits Ambassadeurs conioignent à chaque fois lesdits Vnis & correspondans ensemble: Il conuient ausdits Vnis à l'exemple de sadite Altesse (laquelle par cy - deuant ne se voulut declarer sur ce point

point sans en auoir prealablement communi-
qué avec ses confederez) de negocier en vne
commune avec conseil & consentement com-
mun, & ne peuuent se departir de la declara-
tion qu'ils ont faite quant ausdits griefs , mais
bien se remettent quant au reste à leur susdite
declaration & offre pacifique , ne doutant
aucunement que son Altesse & ses confederez
ne se contentent des asseurances claires & sin-
ceres qu'ils donnent iteratiuement de leurs
bonnes & entieres affections à la paix & con-
corde du saint Empire , & qu'elle n'aura au-
cun sujet de se meffier d'eux, ains qu'en cer-
te ferme certitude elle ioindra d'autre costé
les effets à ses offres reciproques. Mais si sa-
dite Altesse reiettoit cette sincere declaration
pour choisir ou practiquer vne autre voye &
tout au rebours de ses declarations & affirma-
tions precedentes sous ombre de se deschar-
ger necessairement du fardeau de son arme-
ment & deffensue , allumer le feu qui estin-
celle desia , & l'interesser au rauagement du
pays & aux inconueniens qui suivent ordinai-
rement la guerre, laquelle pourroit tourner à
la totale desolation de l'Empire, lesdits vnis se-
roient contrains de pouruoir par l'Assistance
diuine à leur deffence & conseruation en vne
cause si iuste. Et en ce cas ils reiterent dere-
chef icy leur protestation precedente , se te-
nans tres certains que tout le monde & la po-
sterité rendra vn euident & immortel tesmoi-
gnage , que leurs actions n'ont visé à autre but
qu'au redressement d'une bonne confiance &
intelligence enuers les membres de l'Empire

& au diuertissement de la ruine , par où vn chacun pourra iuger equitablement à laquelle des deux parties se debura imputer tout le mal & inconuenient qui pourroit naistre de ces choses. Donnée à Vlme le 12. Iuin. 1620.

LETTRE DE MONSIEVR
de Puisieux à Messieurs les Ambassadeurs
receuë à Vlme le 12. Iuin 1620.

MESSIEURS, Il n'y a que deux iours que ie vous ay escrit, depuis i'ay eu aduis que le sieur Arsens enuoyé de la part des Estats des Prouinces vnies des Pays-bas à Venise pour iurer l'alliance n'aguere contractée entre les deux Republiques , a eu charge de passer vers aucuns Princes de l'vnion , deuant que s'y acheminer. Monsieur de Preaux sçait quels ont esté ses deportemens contre la France, de laquelle il a receu en diuerses manieres honneurs & biens, en telle sorte que le Roy a cy-deuant requis qu'il fust chastié d'aucuns escrits & paroles qu'il auoit tenus & faits contre le gouvernement & ceux du conseil de sa Maieité , mais la diuision suruenue entr'eux ne leur a pas donné lieu d'en faire la iustice qu'il conuenoit, & que sadite Maieité attendoit de leur amitié & de ses bien-faits en leur endroit, depuis comme elle a sçeu que ledit Arsens passoit en Italie , elle a commandé à ses Ambassadeurs & ministres de ne pas visiter ny receuoir les visites de ce personnage pour sa consideration particuliere , & non aucune-

ment pour celle desdits Estats, avec lesquels elle entretient toujours pareille correspondance, & ainsi le devez faire entendre où il sera besoin, s'il eschet que vous en soyiez en ces termes, afin qu'ils croient que le fait ne s'adresse au general, ains simplement à cette personne, pour en auoir si mal vsé en ce qui concerne le seruice & dignité de sa Maiesté. A quoy vous prendrez donc garde s'il vous plaist, ayant eu commandement d'en escrire en ce mesme sens à Messieurs les ministres du Roy qui seruent sa Maiesté hors du Royaume. Elle est allée faire vn petit tour de trois iours à Montfort, dix lieuës de cette ville, pour passer le temps à la chassé, & se porte tres-bien, Dieu mercy, que ie prie, Messieurs, vous conseruer en sa sainte grace. De Paris ce premier Iuin 1626. Vostre tres-humble & tres-affectionné seruiteur, Puisieux. Et à costé Messieurs vous aurez icy deux escrits, l'vn en faueur de l'Empereur, l'autre de l'Electeur Palatin, ils ont esté faits hors de France, le premier est tenu pour bon & d'vn autheur bien informé, vous en tirerez lumiere pour ce qui se presentera sur ce suiet.

*LETTRE DE MESSIEURS
les Ambassadeurs au Duc de Baviere.*

MONSIEUR, Le Roy nous ayans enuoié de deça, nous auoit donné charge de visiter vostre Altesse & luy presenter ses lettres, ce que nous eussions fait au partir d'i-

cy, n'estoit l'aduis que nous auons eu de l'Empereur que ce Gentilhomme vous fera plus particulièrement entendre, n'ayant voulu passer sur les terres & pays de l'obeissance de vostre Altesse sans l'enuoyer saluer & l'asseurer de nostre bien-humble seruite, comme estans, Monsieur, vos plus humbles seruiteurs, Charles de Valois, Bethune & Preaux. d'Vlme le 16. Iuin 1620.

LETTRE DESDITS SIEURS
au Duc de Nienbourg.

MONSIEVR, Le Roy nous ayant commandé de vous voir & presenter ses lettres, nous esperons auoir ce bien partant de cette ville : qui sera aussi-tost que cette assemblée sera finie. Et cependant nous enuoyôs ce Gentilhomme pour vous en donner aduis, & vous assurer de nostre affection à vous rendre seruite, vous priant d'y adiouter foy, & croire que nous sommes, Monsieur, vos bien-humbles seruiteurs, Charles de Valois, Bethune & Preaux. d'Vlme ce 16. Iuin 1620.

A Monsieur, Monsieur le Duc de Nienbourg.

LETTRE DE MONSIEVR
de Puisieux à Messieurs les Ambassadeurs,
receuë à Vlme le 20. Iuin 1620.

MESSIEURS, Voicy la quatriesme fois que ie vous escriis d'affaires depuis

vostre parlement de cette ville, sans que le Roy aye eu aucun aduis de vous, ny moy pareillement, dequoy certes ie ne puis plus respondre à vostre descharge, y ayant fait iusques icy ce que ie deuois pleinement: Car la raison & la coustume vouloient que de Nancy vous nous eussiez mandé ce que vous auez trouué & fait pour vostre commission, qui nous eust tousiours donné lumiere esdites affaires d'Allemagne, & depuis nous attendions encore d'estre informez de ce que le sieur de Bunichausen nous auroit fait sçauoir que son M. auoit operé pour l'Assemblée des Princes vnis, que nous auons sçeu d'ailleurs estre intimée en la ville de Heilbron où le sieur Bostel Agent d'iceux en cette Cour arriué de Prague depuis quatre iours, nous a dit & assuré que deuiez vous rendre le 4. de ce mois. C'est donc ce que nous attendons d'apprendre par vos premieres, & la disposition en laquelle vous aurez trouué lesdits Princes pour vous en preualoir aux fins qui vous sont prescrites, mais il les faut prendre par leur interest pour les inuiter à l'accord, & y persuader Monsieur l'Electeur Palatin, ce qu'à mon opinion il ne vous sera difficile de faire, veu qu'ils ont déclaré à plusieurs qu'ils entendent conseruer leurs Estats & libertez, & laisser à part audit Palatin à demesler cette fusée. Ils doiuent penser toutesfois serieusement si la maison d'Austriche fait ses affaires au dommage dudit Palatin, qu'ils courroient fortune d'en patir eux mesmes, partant qu'ils doiuent obuier à ces incōueniens par tous moyens & conseils qui peu-

uent aduancer l'accord. Ledit Boistel fait la cause & le party dudit Electeur puissans, mais nous sçauons qu'il a plusieurs manquemens de consideration que la suite augmentera & fera decouurer plus à clair. Il requiert maintenant le Roy de le secourir des sommes à luy deuës par cette Couronne. Il nous prend en mauuaise saison, tant pour nostre esgard que pour ce qu'en ce faisant nous donnerions suiet trop grand de plainte à l'Empereur contre les promesses qui luy ont esté faites. Aussi y a il apparence qu'il fait cette demande plus pour nous diuertir d'assister la cause Imperiale, que pour espoir de tirer de nous cét argent. Or il nous importe de sçauoir ce que vous aurez aduancé avec lesdits de l'Vnion pour repaistre l'Empereur de quelque responce tolerable sur la presse qu'il nous fait de nostre secours, afin que cela nous serue pour le present à excuse, ainsi que iusques icy nous l'auons fondée sur nostre enuoy & offices. L'on nous donne aduis certain que le Roy de la grande Bretagne enuoye vn Ambassadeur à venise appelé le Cauallier Vvatou, lequel doit visiter lesdits Princes vnis en passant par l'Allemagne, & auoir l'œil à tout ce qui s'y passera, homme fort violent & aussi broüillon, tres zelé Puritain, & le pis de tout, ennemy iuré de la France : iugez par là de l'intention du Maistre, qui n'est pas pour fauoriser la paix. Ce qui vous seruira d'aduis pour y veiller & obuier en temps & lieu. Le Roy continuë en bonne santé, Monsieur de Blainville est encore auprès de la Reyne mere, pour essayer de luy faire

prendre la confiance que merite la candeur & amitié de sa Maieſté. Du reſte l'on trauaille, comme il en eſt beſoin , pour maintenir la concorde du Royaume. Je prie Dieu nous en faire la grace , & vous donner , Meſſieurs , la ſienne tres - parfaite. De Paris ce 12. Iuin 1620. Voſtre tres humble ſeruiteur, de Puiſieux.

*AVTRE LETTRE AVSDITS
Sieurs, dudit ſieur de Puiſieux.*

MESSIEVRS, Comme ie faiſois fermer cette depeſche, i'ay receu la voſtre du 3. de ce mois , qui eſt l'vnique que nous auons eu de vous , depuis voſtre parlement, & ne ſçay ce que ſera deuenüe celle que nous dites auoir enuoyé de Luneuille , dequoy il faut ſ'enquerir de toutes parts, crainte qu'elle ait eſté malicieuſement ſurpriſe. Je preſenteray voſtre lettre au Roy , & feray voir à ſa Maieſté le contenu , dont nous attendons la ſuite , afin de vous faire ſçauoir les volontez & commandemens d'icelle , ſelon qu'il ſera beſoin. Nous deuons pluſtoſt deſirer d'auoir de vos nouuelles que vous des nôtres , puis que nous deuons fonder principalement ſur ce que nous manderez ce que nous aurons à faire ſur leſdites occurrences, & que vous eſtes ja pleinement inſtruits des intentions de ſa Maieſté. Nous attendrons donc de vos nouuelles ſur l'aſſemblée qui a eſté transferée à Vlme , & vous baiſe tres-humblement les mains , demeurant, Meſſieurs voſtre tres-humble ſeruiteur Puiſieux. Ce 12. Iuin 1620.

LETTRE A MONSIEUR

*d'Angoulesme par Monsieur Miron ,
receuë à Vlnre le 22. iour de Iuin. 1620.*

MONSEIGNEUR ,

Ayant pleu à Monsieur l'Ambassadeur de Bethune me donner aduis de vostre passage à Strasbourg, outre ce que m'en a particulièrement escrit le sieur Bernard qui y a esté honoré de vos commandemens. I'ay creu qu'il estoit de mon deuoir de vous tesmoigner combien le peuple de ces quartiers est reuiouy de vous sçauoir si auant en Allemagne, n'esperant rien moins de vos vertueuses qualitez si dignement employées, qu'un accommodement amiable des affaires de l'Empire vniuersellement souhaité de tous les Chrestiens qui y contribuent leurs vœux & prieres. Je voudrois que parmy ces grandes occupations vous iugeassiez mon seruice digne de quelque employ, soit pour le public, ou pour vous en particulier, auquel il est voüé de longue main, & m'estimerois bien-heureux d'estre honoré de vos commandemens, que ie seray tousiours tres-religieux d'observer. Ce que ie vous supplie, Monseigneur, de prendre en bonne part & me pardonner cette liberté, à quoy i'adiousterois ce qui est des occurrences de ces liguez, si ce n'estoit point vous destourner de vos plus serieuses affaires, joint qu'ils ne consistent à present qu'en celles qu'ont ceux

de Berne, tant contre Monſieur le Duc de Longueuille, que contre Meſſieurs de Fribourg: le premier pour auoir voulu entreprendre ſur la Comté Souueraine de Neuf-Chaſtel, & l'autre pour la Religion que leſdits de Berne ont miſe au plus dans vn bailliage qu'ils ont en commun avec ceux de Fribourg, ce qu'ils pretendent leur eſtre permis par leur combourgeoiſie: de ſorte que les Bernois n'ont donné aucune ſatisfaction, ny audit Seigneur Duc de Longueuille qui auoit enuoyé en ce pays les ſieurs de Helincourt & S. Romain, pour vuider ce different amiablement, leſquels ont eſté neceſſitez de s'en retourner ſans rien faire, tant ils y ont trouué peu de diſpoſition pardeça; ny auſdits ſieurs de Fribourg, leſquels ne ſont pas reſolus d'en demeurer en ces termes, ayant fait conuoquer vne aſſemblée des Cantons Catholiques à Lucerne pour deliberer ce qu'ils auront à dire à la iournée de ſaint Jean prochaine; ſur le ſuiet où i'attens les commandemens du Roy pour m'y trouuer, d'autant que l'on ſe diſpoſe à renouerler les plaintes du retardement des payemens pour eſſayer de rompre le deſſein qu'on fait de diſputer en France à cét effet. S'il s'y prend quelque reſolution digne de vous eſtre mandée, ie ne manqueray de le faire, ſi vous l'auiez agreable. Et ſur ce ie prie Dieu, Monſeigneur, vous donner en parfaite ſanté tres-longue & tres-heureuſe vie. Voſtre tres-humble & tres-obeyſſant ſeruiteur, D. Miron. De Soleurre ce 21. Iuin 1620.

LETTRE DE MONSIEUR LE
Duc de Bauiere ausdits sieurs les Am-
bassadeurs, receuë à Vime le 22. Iuin
1620.

Excellentif. & Illustrissimi Dom.

QVandoquidem fors & occasio non tulit ut
Excellentissimis & Illustrissimis D.D.D.
V.V. Vestris officia nostra uti desiderabamus
coram offerre, & præstare possemus, nolimus
tamen, hanc occasionem penitus intermittere,
sed desiderio nostro quantum absentibus licet
in aliqua parte satisfacere, ac propterea ad Ex-
cellentissimas & Illustrissimas D. D. D. V. V.
Vestras mittimus præsentem Nobilem, ut ipsis
nostro nomine quædam exponat: proinde amice
ab ijs petimus ut dictum Nobilem benivolè au-
dire, & in ijs quæ nostro nomine relaturus est
plenam fidem habere velint, quibus nos ad offi-
ciorum studia parati prosperrimos rerum succes-
sus precamur. Datum ex ciuitate nostra Non-
ebica die 16. mensis Iunij, Anno Dom. M. D C
XX. Additissimus Maximilianus.

Excellentissimo Principi Carolo Valesio Duci
ab Angolesme: & Illustrissimis dominis de Be-
thune & de Preaux equitibus S. Spiritus Re-
gis Christianissimi ad sacram Cæs. Maiestatem
Germanosque Principes legatis.

Autre Lettre écrite à Messieurs les Ambassadeurs par Monsieur le Duc de Baviere , receüe à Vline le 22. Juin 1620.

Excellentiss. & Illustriss. Dom.

EX litteris Excell^{rum} & Ill^{rum} D. D. D. V. V. V^{rum} ad nos scriptis intelleximus ipsas à rege Christianissimo , domino , consanguineo & affine nostro colen^{mo} in mandatis habere , ut se se ad nos conferant atque regias litteras eorum tradant : quod cum perficere cogitarent illas ob nuntium à Cæsarea Maiestate acceptum fuisse impeditas pro ut presentium lator, quem ea de causa ad nos miserunt, pluribus nobis retulit. Quandoquidem ergo ipsi vicissim exposuimus quænam Excellentissimis & Illustribus D. D. D. V. V. Viris nostro nomine significare cupimus , amice ab ijs petimus ut illa percipere non grauentur quibus nos ad omnia officiorum studia paratos offerimus , & optimos rerum successus precamur. Data Nonachij die 17. Mensis Iunij anno M. D. C. X X. Excell^{mis} & Ill^{ous} D. D. D. V. V. Viris Addictissimus Maximilianus. Excellentissimo Principi domino Carolo Valesio Duci ab Angoleſme & Illustrissimis dominis de Bethune & de Freaux , equitibus S. Spiritus, Regis Christianissimi ad sacram Cæs. Maiestatem Germanosque Principes legatis.

LETTRE A MESSIEURS

*les Ambassadeurs par Monsieur le
Duc de Nienbourg, receüe à Vlme ce
sixiesme Iuin mil six cens vingt.*

MESSIEURS,

Tres-volontiers auons entendu ce que de vostre part a esté fait entendre par le Gentilhomme à nous enuoyé : Nous attendrons donc vostre venue avec la mesme volonté que desirons à toujours pouuoir seruir à sa maiesté tres-Chrestienne, esperant que les lettres de sa Maiesté ne viendront sans l'honneur de quelque sien commandement. Et à tant reseruant de vous faire encore de vive voix entendre nostre affection enuers vous, nous demurerons, Messieurs vostre tres affectionné seruiteur Vvolfgam Guillaume Comte Palatin, Duc de Bauiere, Juliers, Cleues & Bergere. De Nieubourg ce 20. Iuin 1620. & à costé, à Messieurs Messieurs, le Duc d'Angoulesme, de Bethune & de Preaux, Ambassadeurs extraordinaires de sa Maiesté tres-Chrestienne.

LETTRE DE MESSIEURS

*les Ambassadeurs à Monsieur le Duc
de Baviere.*

MONSIEUR,

Nous ne pouvons rien aiouster à nos précédentes qu'un bien humble remerciement à vostre Altesse du soin qu'elle a pris de nous enuoyer ce Gentil-homme, & des assurances qu'il nous a apportées de vostre affection vers le Roy, de laquelle nous ne manquerons de tenir sa Maiesté auertie, estant bien marris que les occurrences nous priuent pour le present, d'auoir l'honneur de vous voir pour vous porter ce que nous auons de creance vers vous de sa part, & en nos particuliers vous assurer de nostre bien humble seruice, comme nous estimerons à beaucoup de faueur les occasions qui s'en offriront, estant de vostre Altesse, Monsieur, vos plus humbles seruiteurs Charles de Valois, Bethune & Preaux. D'Vlme ce 21. Iuin 1620. Et à costé à M. Monsieur le Duc de Baviere.

LETTRE DE MESSIEURS LES
Ambassadeurs au Landgrave de Hessen.

M O N S I E U R ,

Celle qu'il vous a pleu nous escrire nous a esté donnée par Monsieur vostre fils , lequel par ses visites & tesmoignages de son affection, a grandement seconde les preuues que vous nous rendez de la vostre vers le Roy & sa Couronne , laquelle nous certifierons à sa Maiesté & en nostre particulier rechercherons les occasions de faire paroistre que nous nous sentons obliger de vostre courtoisie. Nous eussions bien desiré nous pouuoir acquitter du commandement que sa Maiesté nous a fait de vous visiter de sa part , & vous rendre nous mesmes les lettres , comme nous auons creu , par l'esperance qu'on nous auoit donnée que vous vous trouueriez en cette assemblée , ce que n'ayant pas esté , nous les auons renduës à Monsieur vostre fils auquel nous auons fait entendre nostre creance , & l'asleurant de la bonne volonté du Roy en vostre endroit que celle-cy vous confirmera , & le desir que nous aurions de vous rendre service. Estant Monsieur vos bien humbles seruiteurs , Charles de Valois, Bethune & Preaux. D'Vlme cc 26. Iuin 1620. & la suscription, à Monsieur Monsieur le Landgrave de Hessen.

TROISIEME LETTRE ESCRITE

au Roy par Messieurs les Ambassadeurs , enuoyée par le sieur Picant Courier, party expres le vingt-neufiesme Iuin.

SIRE,

Nous auons escrit à vostre Maiesté de Feni-
gen du 3. de ce mois , par là elle estoit auer-
tie du changement de l'assemblée de Heilbron
transferée à Ulme , où nous arriuasmes le 6.
dont nous auons donné auis à Monsieur de
Puisieux le 8. suivant, où vne heure apres arri-
uerent Messieurs les Marquis d'Anspach & Duc
de Vvitemberg , lesquels nous enuoyasmes
visiter par le sieur de la Borde , & leur de-
mander la commodité de les voir. Au mes-
me temps que le susdit fut party , il en arriua
deux de leur part vers nous pour le mesme ef-
fet , avec prieres de remettre au iour d'apres
leur visite , à laquelle ils ne vouloient pas man-
quer les premiers , comme ils s'y estimoient
obligez , & neantmoins le lendemain ils nous
prierent de la differer pour ce iour , à cause
qu'ils attendoient le fils de M. le Landgraue
de Hesse , avec lequel il nous tesmoignerent
vouloir rendre leur visite , toutesfois il
n'arriua que le Mardy au matin , & incon-
tinent lesdits Marquis d'Anspach & Duc

de Vvitemberg nous enuoyerent demander leur heure pour l'apresdinée , ledit Landgrau s'estant excusé de faire la visite avec eux , à cause qu'il auoit charge de son pere de nous visiter separement , comme tres humble seruiteur de vostre Maiesté, son pensionnaire , & nous presenter les lettres de sa part. Le iour d'après nous rendismes la visite ausdits Princes , & resolumes d'aller le lendemain à l'Hostel de ville , où se tenoit l'assemblée desdits Princes villes & Estats Vnis, là il leur fut donné à entendre par le Duc d'Angoulesme , que nous eussions desiré les visiter tous en particulier , comme vostre Maiesté nous l'auoit commandé , n'eust esté la proposition que le sieur de Bunichausen estant en Cour auoit fait de cette assemblée , à laquelle nous auions mis ordre de nous trouuer pour leur tesmoigner sur ces mouuemens presens qui trauail-
lent toute l'Allemagne , comme vostre Majesté desiroit , à l'imitation des Roys ses predecesseurs , s'entremetre de leurs differens , & leur faire connoître comme tres-iuste Prince, qu'après auoir donné la paix à ses suiets , elle seroit satisfaite, si elle la pouuoit procurer à ses voisins : qu'elle coniueroit d'y vouloir contribuer du leur , ce qui fera necessaire d'y paruenir , & considerer , que si le general patit par la fureur d'une guerre ciuile , où la Religion & les interets temporels ont part : à plus forte raison les particuliers en seroient grandement oppressez, crainte qui les deuoit tant plus toucher ; puis que outre les maux qui leur sont preparez par le mal present , la suite

enferoit sans remede que d'un accommodement, lequel viendroit infailliblement hors de saison, s'ils laissoient prevaloir en leurs divisions l'ennemy commun de la Chrestienté, duquel quoy que les offres puissent chatouiller les interets des plus presséz, toutesfois il est indubitable que ce ne seroit qu'à condition de s'establir dans leurs ruines, se rendre esclaves en leurs consciences & tribulations en leurs biens. C'estoit donc à eux de nous ouvrir les moyens de leur repos, lesquels nous embrasserions de tout nostre possible, tant pour y servir selon l'intention de vostre Majesté & le commandement qu'elle nous a fait, qu'en nos consciences nous le deurions pour le bien general de toute la Chrestienté, & l'affection particuliere qu'auons à leur conservation. Surquoy le Marquis d'Anspach ayant remercié tres-humblement vostre Maicsté au nom de toute l'assemblée, de l'honneur qu'elle leur faisoit, de tant de soin qu'elle prenoit de leur bien & de leur repos: nous pria de trouver bon qu'apres le sieur de Bunichausen portast sa parole pour la difficulté qu'il auoit de s'expliquer en langue François, remettant à nous enuoyer quelques Deputez de ladite assemblée au lendemain pour respondre à ce que dessus, ce que neantmoins ne fut accompli que le Samedy 13. à cause qu'il survint un auis ausdits Princes, que le Lieutenant d'une compagnie de Cavalerie auoit esté tué par quelques uns des troupes du Duc de Baviere, l'armée duquel, & la leur, estoient si voisines que les sentinelles se parloient, dequoy estans

entrez en meffiance que la paix en fut alterée, les occasions d'y aller en diligence, & s'estans esclaircis, que ç'auoit esté plutoft par vn mal entendu, que autrement, ils reuindrent le soir mefme, & nous deputerent le lendemain fix de leur corps entre lesquels estoit ledit de Bunichausen, qui reïterant les remerciemens, de l'honneur qu'il plaifoit à vostre Majesté de leur faire par le soin qu'elle prenoit de leur interest, entrerent en la iustification de leurs armes, dont la prise consistoit à ne vouloir demeurer sans deffence, veu que tous les autres voisins estoient armez, & à autre reparation des griefs qui auoient esté cy-deuant faits à ceux de l'Vnion, tant par la chambre Imperiale, que conseil aulique contre les constitutions de l'Empire, & ordre estably par les pacifications precedentes, dont ils s'offroient de donner les memoires pour les faire entendre à vostre Majesté, & en estre informez pour en parler si le trouuions à propos estant à la Cour de l'Empereur. A quoy leur ayans esté respondu qu'ils ne deuoient point douter de la bonne affection de vostre Maïesté en leur endroit : Nous leur accordasmes, que tres-volontiers pour leur contentement, & satisfaction estant arriuez pres l'Empereur, nous luy presenterions ce qui estoit de leurs plaintes, lesquelles nous appuyerions de toutes sortes d'affections, soin & peine, mais qu'il nous sembloit que le mal estant present tout ce qu'ils auoient dit, estoit bien general pour seruir de remede aux maux qui les menaçoient & euitier la guerre ciuile,

en laquelle ils estoient prests d'entrer , puis que selon qu'on pouvoit iuger, le suiet de sa Maiesté Imperiale, de l'Vnion Catholique, & de tous les Princes qui se ioignent aux intersts de l'Empereur , auoit pour fondement l'inuasion que le Palatin auoit faite du Royaume de Boheme , dequoy en leur discours ils n'auoient touché aucun mot ; & que nous estimions que cela estoit principalement ce à quoy il falloit pourvoir, & surquoy ils auoient à deliberer, n'y ayant point d'apparence que sa Maiesté Imperiale voulust cependant que l'on continuast à proceder contre luy par voye de fait , employer le temps à faire vne assemblée pour remedier à leurs griefs. Sur cela lesdits Deputez concerterent vn peu ensemble, & fut respondu par ledit Bunichausen qu'ils n'auoient aucune charge sur ce fait particulier ; mais qu'ils se chargeoient de le faire entendre à Messieurs les Princes & autres Deputez, pour en apporter leurs intentions. Le lendemain Dimanche 14. ils nous viennent trouuer au nombre de sept , lesquels nous firent entendre par ledit Bunichausen les griefs que les Princes & Estats pretendent leur auoir esté faits, & encores continuez , tant par la chambre Imperiale que Conseil aulique de l'Empereur : pour à quoy remedier ils desireroient prier sa Maiesté Imperiale leur vouloir bailler par escrit les chefs principaux de leur plainte, & mesme enuoyer Deputez si tant estoit que sa Maiesté Imperiale voulust donner & assigner lieu d'une assemblée ou diette : ayant adiousté que l'on ne doit trouuer estrange leurs armes, ny

desirer qu'ils les déposent sous pretexte d'une conference, d'autant qu'ils n'en doivent esperer autre fruit qu'ils ont eu des precedentes. Que l'Empereur avoit promis par Monsieur le Comte d'Oxolden son Ambassadeur à la diette de Nuremberg, de ne permettre pas qu'il fust procedé par voye de fait dans les terres & Seigneuries qui appartiennent aux Princes, Republiques & villes libres de toute l'Allemagne, pour aucun de ses interets particuliers, ny biens patrimoniaux, & que les Princes & Estats assemblez icy ne pourroient pas croire que sa Maiesté Imperiale voulust contredire sa promesse. Que quand sa Maiesté Imperiale voudroit attaquer le Palatinat, ce seroit le grief de leurs griefs, d'autant que par les constitutions de l'Empire, l'Empereur ne peut estre juge de sa propre cause, aussi il ne le pourroit faire sans vn notable interest de tous les voisins, attendu le peu d'ordre qui est maintenant parmy les gens de guerre, & les exemples familiers que l'on a tant au Royaume de Boheme, que dans toute l'Austriche, dequoy il arriueroit que pas vn des interessez ne le voulant souffrir, d'une cause il en naistroit plusieurs autres, qui feroient mettre les armes à la main à ceux mesmes qui en auroient moins de desir. Pour cét effet ils nous ont prié de représenter à l'Empereur, & en vn mot ont déclaré ne se vouloir departir de la deffence qu'ils se sont promise les vns aux autres, en ce qui est de leurs biens patrimoniaux, protestans toutesfois qu'en ce qui concerne l'affaire de Boheme, ils ny veulent avoir au-

cune part ny s'en meller. Que neantmoins Messieurs les Princes icy presens seroient tres-aises de conferer avec nous particulièrement des moyens d'accommodement qui se pourroient rencontrer sur ladite affaire. Vn Deputé du Palatin parla pareillement de la part de son Maistre , tendant à iustifier par plusieurs raisons & exemples , l'acceptation qu'il auoit faite de la Couronne de Boheme : pour à quoy plus particulièrement respondre apres les complimens ordinaires , nous remismes lesdits Deputez au lendemain Lundy 15. du mois, auquel iour nous estans venus trouver , ledit Duc d'Angoulême leur dit qu'il seroit superflu de nouveau offrir rien de la part de vostre Majesté puis que ses intentions estans si bonnes , & les tesmoignages si certains , il n'y auoit rien à desirer , si ce n'estoit que ses offices fussent secondez d'une rencontre auantageuse au bien & repos de toute la Germanie qui deuoit venir par des propositions raisonnables & iustes des interressez , sans s'amuser aux choses qui semblans vouloir colorer le pretexte des armes , les rendroient non seulement plus sanglantes , mais encore moins iustes parmy ceux qui n'ayans passion à la chose que le bien general, pourroient les condamner. Que si vostre Maieité eust creu que les plaintes desdits Princes & Estats vnis & correspondans eussent esté le fondement des mouuemens presens , elle neust pas manqué d'embrasser avec soince qu'elle eust peu par ses bons offices pour y remedier , ayant assez de resouuenir de l'affection & service que les-

dits Princes ont tousiours eue à la Couronne.
 Ce qui est d'autant plus aisé à croire , puisque
 suiuant les glorieuses actions de ses ancestres
 au fait de Iuliers & de Vezel, elle apporta ce
 qui estoit de son autorité, dont il estoit reüssi
 vn accord auantageux pour tous les deux par-
 tis : mais qu'il auoit semblé que l'un ny l'autre
 n'en auoient pas voulu vser , sujet à la ve-
 rité qui eust peu obliger vostre M. à laisser al-
 ler le cours des affaires; que toutesfois sa bonté
 a surpassé en cela ce qui estoit du sens com-
 mun : & voulant rendre encore du bien-fait
 à toute la Chrestienté, elle nous auoit donc-
 ques deleguez pour procurer le repos à tous
 ces peuples esmeus , desquels la ruine estoit
 tres-proche s'il n'y estoit remedié : Que s'ar-
 rester à parler des griefs passez , ce n'estoit
 pas pouruoir à la chose presente ; neantmoins
 nous nous chargerions volontiers de leurs me-
 moires , avec promesse d'y aiouster tous nos
 offices, lesquels quoy que l'Empereur defferast
 à nos demandes , toute fois cette affaire ne se
 pouuoit terminer sans vne assemblée de part
 & d'autre , dans laquelle formant chacun ses
 plaintes ce seroit plustost renouueller les sujets
 de la diuision qu'un reestablissement du pre-
 mier ordre : Qu'en cecy il y alloit d'une
 Couronne enleuée sur la teste d'un Prince
 qui en estoit en possession , que c'est où gi-
 soit le nœud de l'affaire , duquel dependoit
 non seulement la paix de la Germanie , mais
 qui ouuroit la porte à l'ennemy general du
 nom de Iesus-Christ : Que de dire que les ar-
 mes voisines leuées estoient à l'intention de

la deffence du Pa'atinat ; cela estoit repugner aux premieres remonstrances qu'ils nous auoient faites sur le suiet de leurs griefs : Qu'à la verité il ne seroit pas iuste que l'Empereur fut iuge en sa propre cause, qu'il voulut enuahir le Palatinat , & de voye de fait se l'approprier sans aucun sujet que du ban de l'Empite. Mais en cette action il falloit sainement iuger du progres de l'affaire, quel estoit l'agresseur, d'où prouenoit le premier mal, & en vn mot, porter les yeux d'equité & non de la passion , sur les motifs de tous les mouuemens ; car quoy qu'il peut estre allegué que sans pratique de l'Esleeteur Palatin il ait esté choisi par les Estats de Boheme pour leur Roy , ce n'estoit pas à dire qu'en le receuant l'Empereur n'eust iuste titre de vouloir donner remede au mal qui le pressoit , en portant le mesme mal chez celuy duquel il l'auoit receu , puis qu'il dependoit de la seule volonté de l'Esleeteur Palatin de refuser ou accepter la Couronne comme d'autres auoient fait , & mesme le Prince de Transylvanie Betlehem Gabor y auoit tesmoigné plus de retenuë , puisque ne voulant le titre de Roy , il auoit receu celui de Prince , moins significatif , mais peut estre aussi puissant, & toutesfois plus propre à vn accommodement : Que pour ces raisons ne falloit point douter que l'Empereur & toute sa maison ne perdist plustost tout ce qui luy restoit , que de laisser la chose en cét Estat : que les ennemis de leur bien & de leur repos seroient tres-aïses que l'occasion de Boheme arriuaist pour hazarder cette Couronne , afin d'auoir

estoyent la source & origine de tous les maux, & qui ont porté les affaires de Boheme en l'estat où elles estoient, comme cela arriue-
roit ailleurs, offrans derechef donner leurs
memoires & venir à vne conference, laquel-
le ils doutoient estre inutile comme plusieurs
autres, & neantmoins s'y soubmettoient,
pourueu qu'ils fussent armez, ne se pouuans
promettre qu'une bonne issue en ce qu'ils es-
peroient soustenir & deffendre. Et quant à
l'affaire de Boheme que les Princes & Estats
vnis ne tenoient pas que l'Electeur Palatin eust
vsurpé vne Couronne de laquelle il auoit trou-
ué la possession vuide: Et s'ils eussent estimé
la chose iniuste, ils ne luy eussent conseillé
de l'accepter, mais l'en eussent destourné sur
la preuoyance des maux qui en pourroient
arriuer par la guerre ciuile en toute l'Allema-
gne: Qu'ils connoissoient bien ce que nous
auions remarqué du dessein que les ennemis
pourroient prendre sur leurs Estats par l'occa-
sion de ce trouble, mais que cela les anime-
roit d'autant plus à mettre les affaires en tel
estat qu'ils ne peussent venir à bout de leurs
pretensions sans y trouuer toute resistance,
esperans le reste de l'assistance de Dieu: Qu'ils
reconnoissent que d'un costé on pouuoit alle-
guer l'interest de l'Empereur qui auoit suiet
de se douloir pour se voir vne Couronne rauie
& acceptée par son vassal, mais de l'autre on
pouuoit excuser l'Electeur Palatin y ayant esté
appelé avec telle instance que quand il l'eust
refusée les Estats de Boheme & peuples pas-
sionnez contre la maison d'Autriche, en

auoient esleu vn autre, & se fussent plustost mis entre les mains du Turc, & quand ledit Eleſteur Palatin seroit mort, que le mal ne cesseroit en Boheme ny dans les Prouinces vnies dudit Royaume, pource que ce peuple passionné en esliroit vn estranger, & valoit mieux qu'un Prince de l'Empire fut entré en cette Couronne apres l'auoir refusée deux ou trois fois pour y conseruer l'interest de l'Empire, qu'un autre qui eust causé vn feu general dans toute l'Allemagne: Que quand l'Empereur mettroit le Palatinat au ban de l'Empire, ce seroit trop precipiter les choses, & vaudroit mieux patienter & auiser aux expediens qui se pouuoient prendre pour accommoder ce different. Le Deputé du Palatin prenant la parole nous dit, qu'on ne pouuoit soustenir qu'il y ait inuasion ou vsurpation de la part du Palatin son maistre, qui porte tout honneur à sa Maieſté Imperiale comme Empereur, mais que l'affaire de Boheme est vne affaire particuliere qui ne touche l'Empire, que la Boheme est bien vn fief de l'Empire, mais exempt de toute soubmission à l'Empereur, & ne se trouue à aucunes conuocations ou diettes dudit Empire, sinon lors qu'il y est necessaire pour l'eslection de l'Empereur: que les peuples de Boheme ne sont suiets de l'Empire, & ont leur eslection libre. Et quant à ce qui regarde le ban Imperial, que les constitutions de l'Empire ne permettent de mettre audit ban aucuns Princes, sinon en cas d'infraction de paix publique; ce qui ne se trouue en ce fait qui ne regarde que le particulier de

Boheme & ses Prouinces vnies : que l'Empereur en son election auoit solennellement iuré de ne proceder contre aucun Prince de l'Empire que par conuocation de tous les Estats, & que les legitimes assemblées de l'Empire doivent estre composées de la chambre Electorale, du College des Princes, & du College des villes, sans l'auis desquels on ne peut proceder par ban Imperial : que le Palatin son maistre esperoit tant de la bonne iustice de vostre Maiesté, qu'il croit qu'elle embrassera la conservation de la maison Palatine : Et si l'Empereur vouloit venir à la rigueur d'un ban Imperial, il ne sçait pas si son maistre vseroit de prescription contre les Catholiques de Boheme, Silesie, Morauie, & autres Prouinces. Surquoy le sieur Bunichausen dit, que si en consideration de l'affaire de Boheme on vouloit faire la guerre au Palatinat, que cette guerre touchoit tellement les voisins qui sont interesséz à se deffendre, non comme appartenant au Palatin, mais comme vn pays adjacent au leur, qu'ils sont contraincts de dire qu'ils seroient obligez à employer toutes leurs forces pour le deffendre, & afin d'empescher la guerre en leur pays, & que ce qu'ils font pour le Palatinat ils le feroient pour le pays voisin d'un Prince Catholique, & neantmoins n'approuuent pas ce qui auoit esté dit sur la prescription des Catholiques de Boheme, comme chose qui ne seroit iuste ny raisonnable ce qu'ils ne pourroient souffrir. Apres tous ces discours, nous demandasmes derechef ausdits Deputez, si tant estoit que l'Em-

pereur leur donnaſt contentement ſur leurs
 griefs, attendu que les Princes vnis ont de-
 claré ne ſe meſler des affaires de Boheme, les
 tenans vn differend particulier, ils ſ'abſtien-
 droient de donner ſecours à l'Eleſteur Pala-
 tin hors le Palatinat : dequoy ayans remis à
 en communiquer à l'aſſemblée le lendemain
 iour de mardy 16. du mois, reuenant vers
 nous ledit de Bunichauſen, representa leur
 vnion auoir eſté baſtie par l'auis du feu Roy
 & de pluſieurs autres Princes pour la conſer-
 uation de leur liberté & Religion, ſans tou-
 tesfois ſe departir du reſpect deub à ſa Maieſ-
 té Imperiale, pour la grandeur de laquelle
 cette vnion auoit eſté formée pluſtoſt qu'au
 contraire, ayant charge de proteſter au nom
 de toute l'aſſemblée de ne ſe pouuoir relas-
 cher en aucune choſe ny ſe departir en façon
 quelconque de la reſolution déclarée à l'Em-
 pereur à la diette de Neuremberg, ny de po-
 ſer leurs iuſtes armes meſmement ſi on vou-
 loit ſ'attaquer aux membres de l'Empire ; &
 quand ils le voudroient faire, ils ne le pour-
 roient que par l'auis de tous les Princes cor-
 reſpondans à leur Vnion & Republique qui
 ſont hors de l'Empire : Nous prians de repre-
 ſenter à ſa Maieſté Imperiale les maux qui
 ſ'en enſuiuroient, que ſi autre moyen pouuoit
 eſtre mis en auant pour leur repos general
 non preiudiciable toutesfois à leurs libertez
 & alliances, Meſſieurs les Princes & Eſtats
 vnis l'excuteroient tres-volontiers, n'ayans
 meſme voulu iuſques icy commettre aucun
 acte qui peut cauſer vne rupture de paix. Et

pour respondre à la demande que nous leurs auions faite le iour precedent, si Messieurs les Princes & Estats de l'vnion se vouloient mesler de l'affaire de Boheme, ils nous auoient dit que l'Electeur Palatin ayant eu auisi de son election faite à son desceu & sans l'auoir recherché, l'auoit fait sçauoir aux Electeurs Ecclesiastiques & au Duc de Baniere, lequel au nom de la ligue Catholique luy auoit mandé & déclaré par escrit qu'il se vouloit mesler de l'affaire de Boheme, comme aussi les Euesques de Spire & de Vvirtburg auroient fait pareille declaration, voulans viure en la mesme paix & concorde qu'ils auoient fait auparauant avec ledit Electeur Palatin : En sorte que s'il aduenoit que les troupes dudit Duc de Baniere allassent contre ledit Palatin, alors les Princes & Estats de l'Vnion & correspondans intéressés à ce changement, trouueroient necessaire de le faire sçauoir aux intéressés absens pour en prendre leur auis & conseils, leur resolution estant cependant que leurs troupes soient employées du costé de deça pour la deffence de leur pays, avec asseurance que sans le changement de la part des Catholiques ils n'akteroient cette resolution en façon quelconque. Le Deputé du Palatin nous auroit aussi representé que son maistre n'auoit iamais accepté la Couronne de Boheme sans l'auoir au prealable communiqué aux Electeurs de l'une & l'autre Religion, & particulièrement à celuy de Mayence & au Duc de Baniere, qui luy auoient respondu qu'ils s'en remettroient à l'auis qu'il en prendroit de luy mes-

me sans qu'ils s'en voulussent mesler. Et sur ce que nous proposâmes qu'ils ne fassent aucune ouverture pour le contentement & satisfaction de l'Empereur, ledit de Bunichausen nous dit, que la question de Boheme ne regardant en façon quelconque l'Empire ny l'Empereur, comme Empereur, mais seulement comme Archiduc d'Autriche ou Roy de Boheme, il n'estimoit pas que sa M. Imperiale voulut alumer dans la Chrestienté vn feu & porter la guerre civile parmy les Estats dependans de l'Empire, puis qu'ils ne se sont meslez de l'affaire de Boheme, remettant le surplus aux conferences particulieres que nous deuions auoir avec lesdits Princes presens la visite desquels estant assignée pour le matin, Il survint que les Agens du Duc de Baviere arriuerent, dont lesdits Princes estans aduertis, ils nous l'enuoierent dire, avec priere de remettre à l'apresdinée nostre entreueüe, pour à ce qu'ils disoient, auoir moyen de voir lesdits Agens & nous apporter le suiet de leur enuoy. Cela estant accordé, nous aprîmes que lesdits Agents & eux estoient tous assemblez à la maison de ville : sur le soir les Princes sans autres Deputez arriuerent au logis du Duc d'Angoulesme où nous estions tous; apres les compliments ordinaires, le Prince d'Anspach commença à nous discourir de l'enuoy desdits Agents, qui consistoit en ce que vostre Maiesté verra par la coppie de leur harangue, comme aussi la responce qui leur a esté faite, lesquelles nous auons retirées par les mains des Princes vnis, les autres ne nous

ayans donné aucune part du suiet de leur enuoy, ny visité iusques icy, encore que nous croyons que de l'effet de cette negociation depend vne partie des affaires qui regardent le repos de toute la Germanie, pour lequel vostre Maiesté paroist auoir vn soin si particulier que nous estimons estre de leur deuoir de nous en faire part. Lesdits Princes apres auoir parlé du iuste pretexte de leurs leuées, des griefs qui leurs estoient faits, & de l'assurance qu'ils auoient que vostre Maiesté leur continueroit l'honneur de sa bien-veillance, nous protesterent d'estre aussi tres-affectionnez seruiteurs de vostre Maiesté, que leur vnion n'auoit esté bastie que sous le commandement & protection du feu Roy vostre pere. Aioustans que l'autorité de vostre M. auoit telle force sur toutes leurs volontez qu'ils se rangeroient tousiours à ce qu'il vous plairoit ordonner, osans esperer & attendre que vostre Maiesté ne leur commanderoit iamais rien qui ne fût pour leur bien & la conseruation de leurs priuileges, tant en ce qui regarde leurs consciences que leurs Estats. A quoy, S I R E, leur ayant encore fait entendre les intentions de vostre Maiesté & confirmez en la creance qu'ils en auoient, ledit Marquis d'Anspach se porta à quelques ouuertes venans, à ce qu'il disoit, de luy mesme, attendu qu'il y auoit desia quelque temps qu'il auoit sçeu le progrez des affaires de Boheme : ses propositions n'estoient en somme que de vouloir nous faire comprendre que l'Electeur Palatin n'ayant point recherché la Couronne de Boheme &

mesme refusée plusieurs fois , il ne l'auoit acceptée que pour éuiter vn plus grand mal , & empescher que le Turc , ou mesme Berthleem Gabor , ne s'en inuettissent : qu'il croyoit que l'Eleſteur Palatin feroit tres - aise qu'il se rencontrast vne voye d'accord, & que mesme il y contribueroit quelque chose du sien : mais que la difficulté n'en estoit pas l'à , que c'estoient les Estats avec lesquels il falloit traicter desquels la volonté estoit si alienée de l'obeissance qu'ils deuoient à l'Empereur & à toute la maison d'Austriche , qu'ils souffriroient plustost le feu que la restitution de leurs pays en ladite maison , de laquelle il nous conta des fuyets de plaintes trop longues à faire entendre à vostre Maieſté , & desquelles elle a peu desia estre informée. Sur cela nous luy representasmes que vostre M. outre le soin general qu'elle prenoit de toute la Chrestienté , en auoit vn tres - particulier pour eux , & que quoy que l'affaire de Boheme fut le suiet esclarrant de nostre voyage que toutesfois V. M. nous auoit commandé de leur dire qu'elle les iugeoit plus proches du peril , & lequel les menaçoit d'vne tres prompte ruine , ne voyans pas que leurs forces fussent bastantes pour defendre leurs Estats , & que comme interez en leur propre conseruation ils deuoient iuger que l'affaire de Boheme n'estant point de leur interez , toutesfois ils se trouueroient enuoloppés sous la passion des peuples souleuez contre leur iuste souuerain , sans que le succez de leur bien ou mal deust faire consideration en ce qui touchoit leur particulier. Le Mar-

quis receut avec satisfaction l'aduis que nous luy en donnâmes , & s'ouurant d'avantage , aduoüa que cette affaire à la verité ne les regardoit qu'en l'intérest de l'Electeur Palatin , duquel estans alliez & confederez ils ne pouvoient se séparer de sa protection , qu'ils auoient vnanimement iurée dans l'vnion contractée entre eux , tant en l'offensive qu'en la deffensive : que pour la premiere ils protestoient ne vouloir estre les premiers infracteurs de la paix publique : que pour le second si le Palatin estoit attaqué en ce cas , & non autrement , ils porteroient leurs armes où le mal les presseroit. Surquoy de nouveau les pressans de rechercher vne voye plus douce , avec remonstrances que la guerre ne pouuoit qu'infailiblement les conduire au chemin de leur entiere perte ; que leurs forces , quoy que bonnes & bien commandées , ne pouuoient toutesfois tenir teste à celles que les parens & amis de la maison d'Autriche pourroient assembler & maintenir. Sur le premier ils nous repartirent qu'ils auoient assurance des villes vnies de fournir aux fraiz de leur armée pour la continuer en mesme estat iusques en Novembre 1621. comme nous le sçauons tres-asséurement qu'il a esté icy arresté : que pour l'autre , ils tiennent leur caualerie aussi bonne que celle qui leur pourroit tomber sur les bras : que pour leur infanterie à la verité ce sont nouvelles leuées , mais qu'ils sont trop asseurez que Messieurs les Estats les assisteront de dix mille hommes de pied , & douze cens chevaux , & mesme que le Roy de la gran-

mesme quelque chose dauantage : que les pays patrimoniaux de l'Empire , & pays adiacens luy seroient conseruez & remis en son obeyssance , lesquels à present sont tous souleuez contre luy ; que la Hongrie entreroit dans le mesme accord , à vne condition qui semble estre bien dure , à sçauoir que le Royaume de Boheme seroit gouuerné souz le nom dudit Empereur par les Estats , sans qu'il y peut entrer ny rien innouer à ce qui est de present estably , & que venant à mourir l'election faite en la personne du Palatin tiendroit , portant à present le tiltre de Roy successif & esleu , tesmoignant au demeurant , que quoy qu'ils se seruent de Bethleem , que toutesfois ils en apprehendent le voisinage & l'auancement. A cela SIRE , nous leurs fismes paroître que demeurions contents de les voir portez à quelques ouuertes , mais avec creance que l'Empereur ne voudroit receuoir de telles & semblables conditions : nous les priasmes lors que de ce qui se passeroit entr'eux , & le Roy de Boheme d'oresnauant , nous peussions en auoir lumiere par eux , comme aussi se pouuoient asseurer qu'arriuez vers l'Empereur , ils seroient aduertis des occurrences qui s'y passeroient , adioustant que s'il se rencontroit vn moyen par lequel nous peussions porter les lettres de vostre Maiesté au Palatin , & faire entendre vostre affection en son endroit , nous le tiendrions à faueur. Le Marquis nous assura

qu'il y auoit enuoyé exprés pour ce sujet, & qu'au cas que cela ne se peut, le Prince d'Anhalt capé avec l'armée de Boheme à trois heures de chemin de Vienne pourroit y supplier. Du depuis, Sire, iusques au Lūdy vingtiesme nous n'auons tesmoigné qu'un desir de partir d'icy pour nous rendre vers l'Empereur : mais ce matin le sieur de Bunichausen, qui est le plus intelligent & le plus hardy en ses conceptions, estant venu au logis du Duc d'Angoulême sous couleur de luy rendre un compliment, estans tous trois ensemble, nous l'auons fait entrer & prié de repasser par vne conference de ce qui s'estoit delia dit entre nous : surquoy nous faisât quelque difficulté, s'excusant de n'en auoir charge, toutesfois il fut aisé à reconnoître qu'il y estoit venu à cette intention, & ce pour nous monstrier des aduis que le Duc son maistre auoit receus de Bruxelles, par lesquels on luy mandoit la leuée tres-assée des troupes du Roy d'Espagne, que les prouisions y estoient arrivées, que l'argent & commissions y estoient deliurées, que les rédez-vous generaux estoient donnez dans Iuliers ou Luxembourg, que les preparatifs de canons, en nombre de dix-huit, des munitions de toutes sortes de pionniers, de Matelots, de batteaux à faire ponts, estoient assemblez, & pour conclusion que cette armée en nombre de vingt - un mille hommes de pied, & cinq mille chevaux, ne marcheroit pas, mais qu'elle voleroit. Cela nous donna matiere de luy representer de nouueau combien il importoit à son Maistre de se mettre à couuert d'un si grand orage, & que

nous estions tres - maris de luy dire si hardiment , que nous ne voyons point de salut pour eux , s'ils ne nous ouvroient d'autres moyens que ceux qu'ils nous auoient representez pour venir à vn bon accord : que l'Empereur nous receuroit comme venans de la part du plus grand Roy du monde avec honneur , mais ouurant la bouche pour respondre aux complimens il fermeroit l'oreille à nos propositions : qu'en vn mot cette assemblée que luy auoit pourchassée, n'auoit produit que des effe &ts fort foibles pour des mouuements si grands , & qu'en quelque chose elle sembloit leur estre desauantageuse, puis que par là il seroit aisé à iuger que leur credit ne s'estendroir pas iusques là de pouuoir proposer chose conuenable pour la decision d'vne si grande & importante affaire : adioustant que les puissances qui marcheroient contr'eux , n'estoient pas souz la main des Princes particuliers du pays, desquels ils pouuoient auoir represailles par la mesme loy des armes : que c'estoit maintenant vn Roy puissant , & vne armée conduite par vn chef qui entroit comme conquerant en lieu où il ne craignoit rien perdre, & duquel la reputation estans tres connue , il est indubitable qu'il ne la voudra pas hazarder souz des foibles forces , dont il s'ensuit que passant sur le ventre à toutes les villes qui ne pouuans estre que le prix du plus fort, enfin en establira vne , de laquelle il fera obeyr le reste : que les exemples de leurs voisins doiuent les rendre plus aduisez , n'estant pas temps de rechercher le remede ,

lors que le cours du mal a desia fait faire place aux moyens , qui en temps & en lieu peuvent produire les rencontres d'un accommodement. En fin , S I R B , nos raisons jointes avec un peu d'estonnement que nous connoissions qu'il auoit, nous a donné iour pour iuger l'estat de leur d'effence , & où consistoit l'esperance de leur conseruation , l'un & l'autre dependant de l'assurance qu'ils ont, qu'au cas que le Marquis de Spinola marche en personne , le Prince d'Orange le suiura avec dix mille hommes de pied & deux mille cheuaux, les Estats ayant desia pour cét effet leué six mille hommes dans leurs terres pour remplacer les vieux soldats qu'ils tireront de leurs garnisons, faisant estat que les Princes & Estats Vnis d'icy mettront en campagne quatre mille cheuaux, & douze mille hommes de pied , sans y comprendre les milices des pays circonuoisins , qu'ils presupposent estre composées de dix mille hommes exercez au maniement des armes, & meilleurs que de nouuelles leuées , desquelles troupes ils font estat de saisir les passages , soit en Treues, si l'armée d'Espagne vient de ce costé , soit vers Mayence, si elle prend le chemin de Iuliers. Et parce qu'en ce discours , il n'estoit rien dit de Boheme , nous le priasmes comme ancien seruiteur du feu Roy , & de la Couronne de France, qu'il nous ouurit quelque occasion de pouuoir y apporter les accommodements de V. Maiesté avec efficace de donner moyen à l'Empereur d'entrer en conference : surquoy il ne se voulut que fort peu estendre , demandant temps

d'en conferer avec les Princes qui sont icy , disant toutesfois les mesmes raisons qui sont cy-dessus. L'apresdinée lesdits Princes vindrent chez le Duc d'Angoulesme où de nouveau cette question fut agitée , les raisons qui nous pressoient à la voye d'accord , duquel nous ne receusmes que fort peu d'esclaircissement , si ce n'est qu'ils croyent que si la Boheme pouuoit estre mise en depoit d'un tiers avec trefues , durant lesquelles vne diette fut conuoquée , c'estoit le moyen de remedier aux griefs d'un chacun , & iuger de tous les differens qui causent le mal present , comme aussi d'affermir vne bonne paix , & leuer les soupçons qui se sont glisséz dans les esprits de l'une & l'autre Religion. Voila , SIRE , tres-particulierement tout ce qui s'est passé icy , dont nous auons iugé que ces Princes & villes vnies croyent que la saison desia bien auancée , ne peut permettre qu'il reçoient tant d'oppression , comme ils en sont menacez , ioinct que leurs esprits tres-fiers veulent sentir le coup auant que de craindre le mal ; l'un d'eux & le plus aisé , nous ayant dit qu'il falloit que les armes fussent teintes du sang de quelques-uns auant que les articles d'une paix peussent estre tracez sur du papier , & que la paix ne se pouuoit faire qu'entre deux armées. C'est ce qui nous fait partir pour aller droit à l'Empereur sans passer chez aucun Prince , que le Duc de Nieubourg , lequel est sur nostre chemin , ayant enuoyé au Duc de Baviere, un Gentil - homme pour l'aduertir comme sa Maiesté Imperiale s'estoit chargée de luy fai-

re entendre que ses affaires requeroient prompt acheminement vers elle, à quoy il nous a fait responce que l'Empereur luy en auoit donné part : nous priant d'asseurer vostre Maiesté qu'il estoit son tres-humble seruiteur, & desiroit la seruir, tout ainsi qu'il vous plairoit de luy ordonner, ce que voulant confirmer plus à plein, il nous a encore enuoyé vn des siens, par lequel entre les complimens ordinaires, il nous a surchargez de vouloir resmoigner à vostre Maiesté le zele qu'il a à vostre seruice, pour lequel nous exposerons tousiours nos vies, comme estant de vostre Maiesté, SIRE, vos tres-humbles, tres-obeyssans, & tres-fidelles suiets & seruiteurs, Charles de Valois, Bethune, & Prcaux. D'Vlme ce 26. Iuin 1620.

LETTRE DE MESSIEURS LES

Ambassadeurs à Monsieur de Puisieux,

ennoyées avec la susdite.

MONSIEUR,

Depuis nostre derniere du huiſtiesme de ce mois nous auons receuë trois de vos lettres, la premiere nous fut renduë le douziesme de cedit mois, & les deux autres le 22. Par les deux premieres vous continuez à vous plaindre de

ce que nous ne vous auions escrit, & la dernière accuse la reception de nostre depesche du 3. de cedit mois. Vous aurez esté esclaircy par la susdite du 8. du soin que nous auons pris de faire à toutes occasions entendre au Roy & à vous, ce dont nous estimons deuoir tenir sa Majesté aduertie, vous ayant enuoyé vn duplicata de nostre depesche de Luneuille qui a esté esgarée, & ne pouuons dire d'où cela peut venir, mais auons assez clairement mandé par quelle voye nous auons adressé le paquet, n'en pouuant deçà faire recherche, mais s'il vous plaist vous en aurez soin de delà. Nous escriuons amplement à sadite Majesté par ce Courier que nous enuoyons express, de tout ce qui s'est passé en cette assemblée: Et par ce que vous en ferez assez informé, nous n'vserons point de redittes, adjoustant seulement que nous estimons vne lettre de sa Majesté nous estre necessaire pour l'Electeur Palatin, d'autant qu'elle n'auoit pas iugé à propos de luy escrire sans que parauant il eust accepté de nous voir en luy donnant le seul titre que d'Electeur. Et pour ce qu'il peut estre que par l'entremise de ces Princes, il s'y disposera si le trouuez bon, vous nous enuoyerez s'il vous plaist vne lettre de sa Majesté qui sera particuliere, de laquelle nous ne nous seruons qu'à l'occasion: il est bien vray que Arsens, duquel nous escriuez, est passé, & a veu les Princes. Nous vserons de l'avis que nous donnez sur son suiet aux occurrences, comme aussi estant arriuez à Vienne, nous executerons le commandement du Roy pour

le sieur Boirot, & apprenant par vostre penultiesme la legation faite par le Roy de la grande Bretagne du Cavalier Vvaton pour son Ambassadeur à Venise, avec charge de visiter en passant les Princes Vnis, nous auons l'œil à descouurir ce que nous pourrons de ce qui s'y passera, & le tenons bien pour tel que vous le descriuez à Monsieur de Bethune l'ayant connu en Piedmont. Les gens de l'Electeur Palatin nous ont bien parlé de l'argent, qu'ils disent luy estre deu par la Couronne de France, & dont nous escriuez vous auoir esté fait demande de delà : mais les Princes ne nous en ont rien dit. En vn mot nous vous pouuons dire qu'avec tout soin & diligence nous nous acquitterons des commandemens que le Roy nous a faits, & aduancerons tout ce qui nous sera possible pour le fruit de nostre legation, au contentement de sa Maiesté, vous rendant graces du soin que prenez de nous faire scauoir de sa santé, laquelle nous prions Dieu luy vouloir conseruer longues années, avec toute prosperité, & en nostre particulier, nous vous addeurerons de nos entieres affections à vostre seruice, & rechercherons les occurrences pour vous en rendre des preuues avec autant de desir que nous en auons de demeurer, Monsieur, vos bien-humbles seruiteurs, Charles de Valois, Bethune, & Preaux.

D'Vlme le 26. Iuin mil six cens vingt.

QVATRIESME LETTRE
desdits sieurs Ambassadeurs escrite au
Roy , enuoyée le 29. Iuin 1620. par
ledit Picart Courrier avec les susdites.

S I R B ,

Comme ce Courrier partoit, & nous prests à entrer dans nos batteaux pour aller à Vienne, les Deputez du Duc de Bauiere nous ont enuoyé prier de leur donner audience, dans laquelle nous auons reconnu qu'ils auoient trouué plus de difficulté en leur negociation qu'ils n'esperoient, puis que cela les obligeoit à nous en donner part, & prier d'y apporter ce qui estoit de l'autorité de vostre Maiesté. A quoy nous nous sommes volontiers accommodés en ayant aussi esté conuiez par les Princes & Estats vnis, lesquels en cela, comme en toutes les autres actions, ont rendu les preuves de se soubmettre à ce qu'il plaira à vostre Maiesté d'ordonner, ioinct que les armées estant logées si pres & sans empeschement de venir aux mains que de leur propre volonté, il seroit à craindre que si cét accord estoit rompu cela n'allumast le feu dans toute l'Allemagne, & ne portast tel preiudice aux armes de l'Empereur, & que de tout cét esté, il ne peust se mettre en campagne, ny paroistre en estat de nous ouurir vne voye d'accord. Et par ce **SIRB**, que selon les formes que les vns & les

autres tiennent , il est indubitable qu'il se passera encore quelques iours avant la conclusion entiere , nous n'auons pas voulu differer de rendre compte à vostre Maiesté de ce qui s'est passé iusques icy , comme nous ferons encore par homme expres , si les marques de vostre autorité paroissent toutes entieres par la fin de cette conference , comme elles ont fait au commencement , & qu'il en reüssisse vn bon accord entre les Catholiques & Protestans de toute la Germanie , comme nous l'esperons avec l'aide de Dieu, lequel nous supplions de conseruer vostre Maiesté , de laquelle nous sommes , **SI R U** , tres-humbles , tres-obeyssans , & tres-fidelles suiets & seruiteurs , Charles de Valois, Bethune , & de Preaux. D'Vlme ce 29. Iuin 1620.

LETTRE A MONSIEUR DE
Puisieux en suite de la precedente.

MONSIEUR ,

Vous verrez par celle que nous escriuons au Roy depuis nostre grande depesche, comme nous sommes encore retenus icy pour quelques iours , ayant iugé tres-necessaire de donner vne entiere conclusion aux traitez qui se sont commencez entre le Duc de Baviere au nom de la ligue Catholique , & les Princes & Estats Vnis icy presens , laquelle sans nostre presence eust receu des difficul-

tez d'où il eust procedé vne rupture , & par consequent vn tres notable interest , tant au repos de toute la Germanie qu'aux affaires de l'Empereur , lequel aura plus de secours des troupes du Duc de Baviere , qui autrement estoient engagées icy , que si nous eussions laissé l'affaire indecise. Et par ce que nous ne sommes encore qu'au commencement , nous remettons à vne autre fois de vous en faire sçavoir la fin que nous esperons heureuse , & à l'entiere gloire du nom du Roy. Cependant nous auons enuoyé à Strasbourg le sieur Bernard qui nous à seruy iusques icy d'interprete , & nous seruons en son lieu d'un nommé Desprez qui est Catholique , auquel nous auons fait expedier vne certification pour luy seruir en l'obtention de ce qui luy sera necessaire au bien de cette affaire : vous priant d'en vouloir commander les expeditions , sans lesquelles nous ne le sçaurions retenir , en quoy nous receurions de l'incommodité : & remettant à vous faire sçavoir de nos nouuelles au plustost , nous vous demandons la continuation de vos bonnes graces , avec assurance , que nous sommes , Monsieur , vos bien-humbles seruiteurs , Charles de Valois , de Bethune & Preaux. D Vme ce 29. Iuin 1620. & à costé ; Les expeditions que nous vous demandons pour le sieur Desprez , sont les lettres d'Estat dont il a besoin pour s'en seruir en vn procez qu'il a au Parlement.

LETTRE DESDITS SIEURS
*Ambassadeurs dudit jour , à Monsieur
de Puisieux en faueur dudit sieur
Bernard.*

MONSIEUR,

Suiuant vostre auis & ce que vous auons cy-
deuant mandé , nous prîmes à Strasbourg le
sieur Bernard & l'auons amené en cette ville
d'Vlme pour continuer à nous en seruir , tant
par les chemins que durant l'assemblée des
Princes & Estats vnis. Et estant sur nostre
partement pour nous acheminer à Vienne ,
nous l'auons congedié & le renuoyons vers
vous , & vous prions luy ordonner telle recom-
pense de son voyage que vous iugerez à pro-
pos. Et nous tenir tousiours , Monsieur, vos
bien humbles seruiteurs , Charles de Valois ,
Bethune & Preaux. D'Vlme ce 29. Iuin 1620.

TRAITE' FAIT A VLME , ENTRE
*le Duc de Bauiere au nom & comme
general de la ligue Catholique , &
le Marquis d'Anspach , comme Lieu-
tenant general de l'Vnion des Euan-
geliques.*

NOvs Maximilian par la grace de Dieu
Comte Palatin du Rhin, Duc de la haute

& basse Bauiere , &c. Et par la mesme grace nous Ioachin Ernest Marquis de Brandebourg Duc de Prusse de Stetin , Pomeranie , la Cosobie & Vvenden , aussi de Silesie Crossen & Iegendorff , &c. Burgraue de Neurembourg Prince de Ruggen, &c. Faisons sçauoir à tous , qu'attendu que depuis quelque temps en çà , tant dans le saint Empire de la part de la nation Allemande , qu'aussi en diuers Royaumes & Estats voisins se seroient mis en auant remuemens & troubles dangereux & de longue estenduë , dont non seulement les Catholiques , mais aussi les Electeurs , Princes & Estats vnies de la Religion Euangelique ont pris occasion de prendre les armes , ce qui auroit esté cause de grands mescontentemens & differents : pourquoy tous ces preparatifs de guerre si pour l'offensive avec autorité & puissance pour destruire l'vne ou l'autre Vnion, & par ce moyen susciter vn general remuement dans tout l'Empire ; partant afin de leuer cette deffiance & establir bonne amitié entre les deux parties vnies dedans l' Empire , nous auons fait vne composition aileurée & ferme par le moyen des celebres Ambassadeurs du Roy de France qui se sont trouuez en la ville Imperiale d'Vlme.

Et premierement promettons de parole & asseurons nous Maximilian Duc de Bauiere comme general de la ligue Catholique en vertu de nostre pouuoir : Et nous Ioachin Ernest Marquis de Brandebourg, comme Lieutenant general de l'Vnion des Euangeliques , en vertu du mesme pouuoir, en presence & approbation

aussi & contentement des autres Princes & Estats Euangeliques allicz presens, Conseillers & Deputez, avec authorité des absens, pour nous & de l'un & de l'autre costé d'Union allicz Electeurs, Princes & Estats par nos veritables paroles foy & fidelité en la plus stable & meilleure forme qui se puisse ou doiue en droicts ciuils, que nul des Electeurs Princes, ou Estats allicz à l'une ou l'autre Vnion en façon quelconque, ou sous quelque pretexte que se puisse estre, ny par sa personne mesme, ny par quelques autres, avec les armes appartenans à l'une & l'autre vnion, n'offencera ny contre le traicté de la paix, de la Religion & n'incommodera, pillera, logera, ny troublera en façon quelconque l'autre party ny autres choses à luy appartenantes, Electorats, Principautez, Estats subiets & autres reuenus tant Ecclesiastiques que seculiers, ains que tous les Catholiques enuers les Euangeliques, comme au semblable les Euangeliques avec les Catholiques, demeureront en vraye & sincere paix, repos & concorde, chacun d'eux asseuré dans ses biens sans crainte de trouble. Et afin toutesfois que cette promesse & bonne confiance ainsi qu'entre Princes & Estats voisins en vertu des constitutions de l'Empire conuient, soit perséueramment continuée. Il a esté conclud & arresté que les deux armées logées maintenant icy proche, au plustost que faire se pourra sans dommage de l'un ny l'autre, deslogeront du lieu où elles sont à present, & n'en logera-on point d'autre en la mesme place.

Secon,

Secondement, a esté composé & arresté que si parauenture quelque Electeur, Prince ou Estat de l'une ou l'autre Vnion, ensemble recherchoient en leurs necessitez vn passage en vertu des constitutions de l'Empire pour la deffence & seureté d'eux & de leurs subiets, ayant prealablement donné caution suffisante, ny l'un & l'autre Estat ne doit estre refusé de cela, pourueu que ladite recherche se fasse à bonne heure, & non au despourueu & auis precipité: quand l'armée seroit desia sur les frontieres ou tout a fait dans l'Estat de quelqu'un d'iceux à la charge & incommodité des subiets.

Tiercement, d'autant que nous Maximilian Duc de Bauiere, & autres Electeurs, Princes & Estats Catholiques allies, auons exclus de ce present traité le Royaume de Boheme avec tous ses Pays & Prouinces incorporées & autres Estats appartenans par heritage à la loüable maison d'Autriche, & compris seulement dans ce traité les Electorats & pays appartenans ausdits Electeurs, Princes & Estats vnis de l'un & l'autre party, sous lesquels s'entend aussi l'Electorat Palatin avec ses pays situez dans l'Empire, & ne s'estendans plus loin, attendu que pour cette heure nous ne persistons en ces differents avec les autres, mais demeurons avec les mesmes en bonne intelligence sans aucune suspicion.

Partant nous Ioachin Ernest de Brandebourg accordons cette resolution des Electeurs, Princes & Estats Catholiques touchant le Royaume de Boheme, ses pays incorporez & autres appartenans par heritage à la maison

d'Austriche, pour nous & nos alliez Electeurs, Princes & Estats, & ne desirons non plus de nostre costé que ledit Royaume de Boheme & ses Prouinces incorporées, comme aussi les pays hereditaires de la maison d'Austriche, soient compris en cedit traité, & attendant cette declaration aussi bien pour seulement les Electorats & Estats situez dans l'Empire.

Quatriesmement, puisque cependant que ce traité se faisoit l'on a souuente-fois fait métion des griefs de l'Empire non encore decidez, l'on en a remis la decision d'iceux en vn autre temps plus commode, attendula brieueté du temps: & que lesdits griefs ne touchent pas seulement ceux de l'une ou l'autre Vnion, mais generalement tous les Estats Catholiques & Euangeliques de l'Empire, desquels pour cette fois, l'on n'a pas autorité suffisante.

Et d'autant que les Vnis de l'un & l'autre party ont pretendu les dommages receus par les armées d'un & d'autre costé, & en particulier au village de Sunthrun & dans le voisinage l'on traitera de la restitution d'iceux par cy-apres raisonnement.

Toutes lesquelles choses, nous Maximilian Duc de Baviere, & nous Ioachin Ernest de Brandebourg, tant pour nous que pour lesdits nos confederéz Electeurs, Princes & Estats promettons garder & inuiolablement tenir les susdits articles: & pour l'asûurance de ce, nous auons sous signé de nos propres mains, & fait apposer nos sceaux principaux. Fait le troisieme Iuillet 1620. signez Maximilian & Ioachin Ernest.

CINQUIESME LETTRE ESCRITE

au Roy par Messieurs les Ambassadeurs, faite à Vlmé le 7. Iuillet, enuoyée ledit iour par Monsieur de la Borde Gentil-homme, party exprés.

S I R E ,

Depuis la depesche que nous auons faite à vostre Maiesté du 29. du passé : Les Deputez du Duc de Bauiere nous ont plus qu'auparuant tesmoigné combien nostre entremise estoit necessaire pour la conclusion de l'accord qu'ils estoient venus rechercher de la part de leur maistre & autres Princes de la ligue Catholique, fortifiant les prieres qu'ils faisoient pour nostre seiour de ces raisons, que vostre Maiesté nous ayant enuoyé icy pour tesmoigner l'affection qu'elle a d'y voir cesser les mouuemens qui s'y presentent, nous ne pouuions mieux commencer qu'en empeschant la guerre qui les menaçoit enuers les Protestans & les Catholiques, reconfirmant par nos entremises vne bonne paix parmy tous les Estats de la Germanie, sans priuer toutesfois l'Empereur de porter ses armes & de ses parens & amis qui ne sont de ladite ligue Cathol. dans le Palatinat, luy laissant cette faculté d'estre secouru en Boheme de toutes les forces qui sont sur pied leuées par ladite ligue, & que les Estats

X 2

Catholiques demeurans paisibles & en seureté ils auroient liberté entiere d'aller servir sa Maiesté Imperiale où il semble que le besoin les appelle & la necessité des affaires les y oblige, ce qu'autrement ils n'eussent sçeu faire. Toutesfois ne voulans paroistre trop portez à leur aduantage, & craignans de donner soubçon aux autres, nous nous resolusmes avant que de rien promettre, d'en donner part aux Princes vnis & deputez des Electeurs, Princes, Villes & Estats de l'Vnion qui estoient icy; ioint que nous voulions iuger si lesdits Princes & autres Deputez facilement se porteroient audit accord, & si l'autorité de vostre Maiesté y paroistroit avec puissance pour en venir à vn accommodement. A quoy, SIR, nous trouuâmes leurs intentions si portées qu'ils ioignirent leurs prieres aux mesmes fins que lesdits Ambassadeurs de Bauiere, non appuyées d'autres raisons, sinon qu'ils auoient le nom de vostre Maiesté entel respect qu'ils defereroient tousiours à ce qui pourroit luy donner entiere connoissance de leur tres-humble seruice. C'est pourquoy ayant reconnu que nostre seiour portoit coup aux affaires de l'Empereur comme à satisfaction ausdits Princes: Nous nous y resolusmes plus aisement, croyans que les deux parties ayans vne mesme volonté, les conditions de l'accord en seroient tres-faciles & tres-promptes à executer, mais au contraire de nos attentes depuis que les propositions d'accocomodement furent agitées, c'estoit vne telle confusion de demandes de part & d'autre, d'escrits baillez & de

repliques, que nous auons esté par plusieurs fois en termes de rompre & partir sans aucun effet. Et parce que des poincts principaux des propositions & des difficultez qui s'y sont muës, depend la connoissance de leurs intentions & l'estat des affaires generales & particulieres, tant de l'un que de l'autre party : Nous dirons à vostre Maieité que les Princes vnis voyans le mal qui les pressoit du costé du Palatinat Electoral, ayans aduis des leuées qui se faisoient en Flandres des troupes qui descendoient du costé d'Italie, & un preparatif tres-grand d'une armée royale presté à fondre sur eux, d'un costé ils inclinoient à la paix pour les troupes de Bauiere, & d'autre, ils vouloient aussi que ledit Duc fut compris dans eet accord, l'Archiduc Albert, comme confederé & correspondant à la ligue Catholique. Et aussi que par les constitutions de l'Empire estant expressement porté qu'au cas que des troupes estrangeres vinssent à vouloir attaquer l'un desdits Estats que tous les autres s'y opposeroient sans exception de l'un ou de l'autre Religion, lesdits Vnis opiniaistrement insistoient à ce que ledit Duc de Bauiere au nom de la ligue Catholique, promist de maintenir lesdites constitutions de l'Empire & de tourner ses armes vers les premiers infracteurs de ladite constitution. Cette demande, S I R E, estant non seulement iniuste en l'un & l'autre chef, mais impossible audit Duc, quoy que nous ayons sçeu le représenter, nous a neantmoins tenu trois iours en suspens, car sans raison que de leur volonté les Deputez desdits

Vnis protestoient ne vouloir entendre à aucun accord que le Palatinat Electoral ne fut à couuert des armes generales, offrans lesdits Vnis de comprendre audit traité tant le Roy de la grande Bretagne que les Estats de Hollande : à quoy les Deputez du Duc de Bauierne ne pouuans & ne voulans receuoir ces conditions, & nous ne voulans nous rendre mediateurs d'un tel accord ; iugeans assez quel prejudice il pourroit apporter aux affaires de l'Empereur, & que le seul moyen de faire céder à l'Electeur Palatin, est vn prompt & effectif attaquement dans ses pays patrimoniaux ; nous dismes ausdits Deputez des Princes vnis, puisque sans raison ils demandoient chose impossible & iniuste, que nous nous separions, mais avec regret, puisque toute la Chrestienté connoistroit qu'il n'auoit tenu qu'à eux ; que par l'entremise & autorité de vostre Maiesté la paix n'eust esté confirmée parmy les Estats de la Germanie. Adioustant que les anciennes affections qu'ils auoient témoignées pour le seruice de vostre Couronne nous conuioient encor de leur représenter que pensans se redimer d'un mal ils s'en procuroient deux, puisque Spinola entrant par le costé de dehors, & leurs forces obligées à s'y opposer, ils laissoient tous leurs Estats en proye des forces de dedans, & qui estoient si prestes qu'entre leur salut & leur perte il n'y auoit pour les en garentir que cette seule voye de venir à vne composition. Sur cela, SIRE, les Deputez en corps des Princes & Estats vnis nous représenterent, comme ils auoient au-

tres fois fait , que vostre Maieité auoit grand interest à la conseruation de leur Vnion , mais particulièrement de ne laisser attaquer le Palatinat sous quelque cause ou pretexte que ce fust , tant pour la situation du Palatinat tres-voisin des Estats de vostre Maieité , que pour la maison Electorale Palatine , qui s'est toujours renduë tres-obeyssante & tres-prompte à seruir lors que les Roys vos predecesseurs en auoient eu besoin , protestants que l'Electeur d'àpresent estoit en la mesme volonté. Sur toutes lesquelles raisons nous n'en respondismes qu'une , qui estoit , que l'on ne pouuoit demander que les choses possibles , & que celle-cy ne l'estant pas , il falloit ou qu'ils cedassent à la raison , ou que romrans ils fussent accusez d'estre les promoteurs d'une guerre iniuste. Cela les fit retirer avec une action qui ne nous sembloit pas bonne, & creusmes mesmes pour lors que les affaires prendroient le hazard des armes plustost que la seurété d'une paix; mais dès le soir les Princes d'Anspach & de Vvitemberg nous enuoyans visiter firent priere de ne nous ennuyer pas, & de les vouloir attendre au lendemain chez le Duc d'Angoulesme , où ils nous dirent que les deliberations ayans à passer par plusieurs d'aduis il estoit mal-aisé qu'elles se peussent rendre promptes & conformes à ce qui estoit de la raison: mais que l'interest auoit cette force que chacun en son particulier taschoit de profiter de cet accord , & blasmant le Deputé du Palatin , nous ont dit , que par ses violentes prieres ils auoient esté obligez à suivre sa pas-

sion : lors ils nous accorderent que le Duc de Bauiere ne se pouuoit faire fort de ceux qui n'estoient pas vnis avec luy, & qu'ils remetttoient à nous de disposer de ce poinct, comme chose qui regardoit autant l'intérêt de vostre Maiesté que le leur ; confirmant ses premières protestations de ne se separer iamais du tres-fidele seruice qu'ils vouloient luy rendre ; & qu'en ce qui concernoit le reste du traité, si les Ambassadeurs du Duc de Bauiere en demeuroient à nostre aduis, qu'ils en seroient tres-conténts. Surquoy apres auoir vſé de remerciemens, & fait iuger de quelle importance estoit non seulement determiner les dissensions de la Germanie, mais encore se porter aux ouuertes de l'accommodement de Boheme, nous reconnusmes qu'ils desiroient que ce fust à recommencer : mais se deffians d'y trouuer vn remede proportionné au mal, toute leur responce fut plustost vne approbation de tout ce qui s'y pourroit faire par nous, qu'une ouuerture pour y paruenir. Cette conference finie, nous en donnasmes part au mesme temps aux Ambassadeurs de Bauiere, preuans heure au lendemain matin pour nous assembler chez le Duc d'Angoulême, où s'estans rendus nous iugasmes à propos de leur mettre en auant tous les autres poincts qui estoient declarez par leurs propositions auant que de venir à celle des forces de Spinola, pour reconnoistre si à celles-là prés ils demeureroient d'accord du reste. Ce discours, S. I. R. M., fut fort long, & toutesfois peu explicatif, voulans comprendre sous des

causes generales ce qui sembloit meriter plus de particularité & toutes-fois au fonds demandans la paix, comme chose sans laquelle leurs troupes ne pouuoient estre employées qu'à vne deffense inutile de leurs pais, & arrestées en lieu d'où l'Empereur n'en receuroit aucun aduantage: ils tesmoignerent desirer de s'aboucher de nouveau avec les Deputez icy presens, pour à nostre opinion protester qu'à leur refus ils les declareroient perturbateurs du repos public; dequoy nous ne fûmes pas d'aduis, mais bien de recevoir le projet du traicté qu'ils desiroient faire, les assurant que s'il pouuoit s'approcher des causes raisonnables & qui les regardoient en la Germanie; que pour les forces de Spinola, nous esperions d'emporter ce point, & qu'elles ne seroient comprises en cet accord. Enquoy ils inclinèrent & donnerent assurance que le lendemain ils nous verroient pour donner leur projet, ce qu'ils firent, ce semble, avec plus de franchise qu'ils n'auoient fait iusques icy: & ce, à cause, comme nous l'auons sçeu, qu'ils en auoient eu commandement de leur maistre. Ce fut donc à nous de faire que ces Princes memoratifs de leurs paroles, acceptassent ce projet, mais ceux qui ne sont absolus en leur commandement & attachez à vne vnion, dependent autant de l'opinion d'autrui comme de la leur. Il en fut ainsi, puis que ces Princes voulans en conferer avec tous les Deputez, & particulièrement des villes, comme les plus nécessaires par leurs bourses au maintien de leur vnion, chacun d'eux y voulut adionster ou

diminuer selon son sentiment : de façon que nous nous aduifâmes que si nous voulions conclure , il falloit des deux proiects en former vn entre nous le plus approchant de la raison, & le proposer aux vns & aux autres pour voir s'ils s'y pourroient accommoder , leur declarant que s'ils ne l'acceptoient nous serions contraincts de nous separer ; ce qui nous profita , l'un & l'autre des partis , mais separement , nous estans venus voir : apres quelque changement qu'ils desirerent , enfin ledit accord fut terminé en la forme que vostre Maiesté verra. Les Princes & Estats Vnis demandoient avec instance que nous y signassions , mais nous ne le iugeâmes à propos , ioinct que ceux de Baviere ne tesmoignerent pas auoir le mesme desir, nous excusans aussi sur ce qu'estant dresé en langue Allemande nous ne pouuions signer ce que nous n'entendions pas , les priant de nous en vouloir dispenser : dequoy le sieur de Bunichausen ne pouuant se contenter se lacha de dire que nous n'en deuions point faire de difficulté , & que ce seroit vne marque de l'autorité, que vostre Maiesté se conseruoit sur les Princes , villes & Estats de l'Vnion, en esloignant par cette voye le Roy de la grande Bretagne , duquel ledit Bunichausen semble n'estre pas trop satisfait , voulant mesme faire connoistre qu'ils n'ont à faire de sa protection, puis que vostre Maiesté a soin d'intervenir en leurs differens, Toutesfois, SIRE, apres auoir resolu que ne le pouuions faire , il nous pria de la part de toute l'Vnion de faire sçauoir à vostre Maiesté, comme ils l'auoient.

tres-instamment recherché , sans oublier aussi comme tous les peuples ont en leurs prieres publiques, prié pour la conseruation & prosperité de vostre personne & Couronne, & ce avec tels tesmoignages exterieurs , que le nom de vos predecesseurs ne fut iamais plus dans le cœur de toute l'Allemagne que celuy de vostre Maiesté, y est maintenant. A quoy, S I R E , correspondent les paroles que le Duc de Baviere nous a fait tenir par ses Ambassadeurs , & depuis par le sieur de Vaubecourt, auoiant non seulement tenir la conseruation de ses Estats de cét accord fait par vostre autorité ; mais aussi tous les Catholiques estans remis en assurance de leurs biens , & l'Empereur secouru à ce moyen des seules forces , par lesquelles il se peut remettre en campagne , & se reestabliir en creance parmy les peuples , dont il est tellement descheu, que sans assistance d'aucuns de ses suiets, excepté de Vienne , il y a plus de six semaines que toute son armée est reduite au verd , & ne sort de son retranchement les ennemis estans quasi à leurs portes. Et par ce , S I R E , que vostre autorité seule a esté cause que les deux armées qui estoient icy ne sont venuës aux mains, encore qu'elles fussent campées l'une deuant l'autre, si proches qu'il n'est pas quasi croyable , que de si grandes forces ayent peu demeurer vn mois entier sans se rien dire , pour donner à connoistre à vn chacun combien vostre entremise a eu de force : Nous auons iugé qu'elle auroit agreable de voir la carte particuliere que nous en auons fait faire , remettant le

surplus au sieur de la Borde, lequel a veu par plusieurs fois toutes les troupes d'un costé & d'autre en bataille, & reconnu l'ordre qu'ils tiennent, tant en leurs gardes, que marcher, mesme s'ils venoient au combat. Nous auons appris que celles là des Princes s'en vont droit sur le passage de Mozolle, pour s'opposer au Marquis de Spinola qu'ils estiment venir par ce chemin, & qu'il faudra qu'ils changent, puis que ledit de Spinola vient, comme nous sommes auertis, par le costé de Spire, & prendre la premiere poste, dans vn lieu qui appartient à l'Euesque nommé Danden, autrefois razé par les Protestans: & celles de Bauiere se mettent sur le Danube, pour descendre en la haute Autriche, où le Duc fait estat d'attaquer Lintz & l'emporter par force promptement s'ils ne capitulent: ce qu'il fera avec plus de chaleur puis qu'il y va de son interest, l'Empereur l'y engageant, comme nous l'auons appris, pour les frais qu'il a faits, & fera tant à la leuée qu'entretien de quinze mille hommes de pied, & deux mille cheuaux, dont il fait estat de secourir l'Empereur, duquel nous attendons vn accueil condigne à ce qu'il doit à vostre Maiesté, tant pour la connoissance que nous auons que sans vostre entremise il ne peut pas se releuer des pertes qu'il continuë de faire, que pour auoir moyenné par cét accord le secours notable que le Duc de Bauiere luy peut maintenant enuoyer. Ledit Duc pour marque tres-certaine de satisfaction apres les articles signez nous enuoya son premier Gentil-hom-

me de chambre , le Baron de Tannebert , pour aileurer vostre Maieſté que l'obligation preſente luy ſeruiroit de memoire eternelle, pour employer tout ce qui dependoit de luy au ſervice tres-humble de vostre Maieſté , & dequoy il nous prioit de l'auertir, adiouſtant des complimens hors ſa couſtume , Pour ce qui nous regarde nous eſperons eſtre avec l'aide de Dieu à Vienne dans douze iours , & là porter les commandemens que vostre Maieſté nous a faits , avec la tres-humble, & tres-fidelle obeyſſance que doiuent à vostre Maieſté , S I R E , vos tres-humbles , tres - obeyſſans, & tres-fidelles ſuiets & ſeruiteurs , Charles de Valois , Bethune , & Preaux. D'Vlme le 7. Iuillet mil ſix cens vingt.

LETTRE DESDITS SIEURS
*à Monſieur de Puysieux , enuoyée
 avec la precedente.*

MON SIEUR ,

Par nos precedentes vous avez peu apprendre la cauſe de noſtre ſejour , maintenant vous en ſçaurez l'effet par la lettre que nous enuoyons au Roy, duquel l'autorité a eu telle force ſur tout ce qui ſe trouuoit icy en eſtat tres-puiſſant, que le reſpect ſeul de ſon nom a empesché que le feu d'une guerre cîuile ne ſoit allumé dans toute l'Allemagne, lequel n'embrasoit pas ſeulement ce qui eſt de la Germanie ; mais attiſoit encores tellement ce

LETTRE DESDITS SIEVRS
Ambassadeurs à Monsieur de Bangy.

MONSIEUR,

Estant arriuez en cette ville de Ratisbonne, avec dessein de continuer nostre chemin droit à Vienne pour nous y rendre au plustost que nous pourrons, nous auons bien voulu depescher ce Gentil-homme en auance pour vous en donner auis, & pour ce que nous estimons estre à propos de vous voir auant qu'arriuer pres sa Maiesté Imperiale, nous vous prions venir au deuant de nous à demie iournée: le dit Gentil-homme vous dira les causes de nostre retardement à Vlme, auquel vous aiousteriez foy, comme à ce qu'il vous dira de nostre part. Et sur l'esperance de vous voir bien-tost, nous demeurerons, Monsieur, vos bien affectionnez à vous seruir, Charles de Valois, Bethune & Preaux. A Ratisbone ce 10. Iuillet 1620.

LETTRE DV ROY A MESSIEURS
les Ambassadeurs, du 21. Iuin, receuë à Closternienburg le 19. Iuillet.

MON COUSIN, & Messieurs de Bethune & de Preaux, i'estois en peine de n'auoir point de vos nouuelles depuis vo-

estre depart d'aupres de moy , quand i'ay receu
 vos lettres du 3. de ce mois , & veu depuis par
 celles que vous avez adressées au sieur de Puy-
 sieux le 8. d'iceluy , comme vous m'avez fait
 sçavoir de Luneuille , ce qui s'estoit passé à
 vostre passage, & sciour de Nancy, laquelle de-
 pesche ne m'a esté présentée ains i'ay appris
 qu'elle auoit esté esgarée par les chemins, &
 dont i'ay commandé exacte perquisition estre
 faite , ayant connu par le duplicata d'icelle ,
 qu'elle meritoit bien de m'estre renduë seu-
 rement. Vous avez esté bien receuz par tout
 où vous avez passé selon ma dignité & mes
 bonnes intentions de mon oncle le Duc de
 Lorraine , de l'Archiduc Leopold , de la ville
 de Strasbourg , comme des Princes , par les
 terres desquels vous avez cheminé , qui est
 vn resmoignage de la créance qu'ils ont de
 mon procedé, & de la fin que ie me suis pro-
 posé pour leur bien commun. Je ne m'arreste-
 ray point aux propos qui vous ont esté tenus
 par ledit Archiduc Leopold , puis que vous
 avez eu vn Courrier de l'Empereur apres vo-
 stre arriuée à Vlme avec lettres du sieur de
 Baugy, par lequel vous estes priez & inuitez
 de l'aller trouuer, deuant mesme que d'auoir
 veu les Electeurs Ecclesiastiques, qui semblent
 aussi incliner au mesme desir. Ce que i'ap-
 prouue que vous faciez , & luy donniez ce
 contentement , apres auoir satisfait selon mes
 volonteiz & commandemens que vous avez
 portez aux Princes de l'Vnion Protestante ,
 avec lesquels vous vous estes assemblez. Je n'ay
 rien à y ajouster , ains plustost à attendre de

vous la deliberation & auis desdits Princes & Estats sur les propositions que vous leur aurez faites en mon nom, m'asseurant bien que vous n'aurez oublié aucun moyen & raison pour les persuader à leur propre avantage: car en l'estat que vous connoissez mieux à present lesdites affaires publiques de la Germanie, vous iugez bien qu'il leur est vtile à tous de prendre vn conseil pacifique, de crainte que l'uy des armes n'apporte des inconueniens facheux & difficiles à reparer. Vous aurez soin de faire valoir aupres dudit Empereur & autres Princes que visiteriez ou aurez à traiter, mon affection au bien & repos public, d'aider à la conseruation des droits d'vn chacun avec equité, & ne pretendre autre interest & benefice en cette occasion que celui du general, la satisfaction des interessez, & la gloire de Dieu, sur toutes choses. Je vous enuoye la copie des memoires qui m'ont esté presentés par celui qui fait icy les affaires de l'Elector Palatin, nagueres retourné d'aupres de luy. Je demeure par mes responses aux termes de vos instructions, n'ayant rien changé pour ce regard. Et quant aux debtes desquelles il pretend estre maintenant payé, je luy fais connoistre les grandes despences que j'ay eues sur les bras qui m'ont empesché, & retiennent encore de luy donner contentement: à quoy j'auray volontiers esgard quand la commodité de mes affaires me le permettra; qui sont termes pour eluder doucement & amiablement vn payement present & actuel. Mais faisant tous ces offices en faueur de l'Empe-

reur & de sa maison , ie suis peu satisfait de
 la façon , que son Ambassadeur extraordinaire
 le Prince deSauelle a traité avec le mien à Ro-
 me , ayant defferé à celui d'Espagne par pre-
 ference audit Marquis de Cœuvres , contre ce
 qui m'appartient , & sans pratique, par autres
 qui l'ont precedé en cette mesme qualité, de-
 quoy sera à propos que vous faciez sentir quel-
 que chose à ses ministres, comme d'une chose
 non seulement contraire à ce qui doit , mais
 que ie deurois moins attendre en cette saison,
 que ie me porte pour eux avec telle affection,
 qui servira tousiours quand i'auray occasion
 ou volonté de ralentir mon assistance ou mes
 offices, & qu'ils connoissent qu'il n'est pas cor-
 respondu par eux à cette sincerité , toutesfois
 vous en userez avec discretion , telle qu'ils
 soubçonnent que ie vueille me refroidir , &
 leur estre à present moins favorable , & puis-
 sent iuger toutesfois qu'ils sont tenus de mieux
 proceder en mon endroit. L'essayé tousiours
 d'asseurer mes affaires dans le Royaume, pour
 estre plus vtile à celles de mes voisins. Je
 fais mesme tout ce que ie puis pour donner
 tout suiet de contentement à la Reyne Mada-
 me ma mere , & luy faire prendre la creance
 que merite ma cordiale affection. Je veux es-
 perer quand elle y aura bien pensé, qu'elle def-
 ferera en cela à mon desir , & à son plus grand
 bien , si elle prenoit autre conseil, ie sçauray
 tousiours bien ce qui me sera plus expedient
 de faire. Vous aurez sceu du sieur de Puyfieux
 depuis vostre partement les autres affaires qui
 sont escheuës, & apprendre du sieur de Bau-

gy, ce qui luy a esté semblablement mandé & ordonné pour sa conduite par de là, qu'il vous communiquera & assistera fidèlement en tout, pour la connoissance qu'il a desdites affaires. Je prie Dieu mon Cousin, & Messieurs de Bethune & de Preaux, qu'il vous ait en sa sainte & digne garde. Escrit à Paris ce 21. Juillet 1620.

Signé,

L O V Y S.

Et plus bas,

B R V L A R T.

LETTRE DV DIT IOVR

ausdits sieurs Ambassadeurs, par Monsieur de Puyzieux.

MESSIEURS,

Horsmis la depesche escrite à Luneville, j'ay receu les deux autres du 3. & 8. de ce mois, nous nous sommes enquesté ce qu'elle peut estre deuenüe: ie trouue desia qu'elle a esté perduë par de là Chaalons, les autres particulieres sont venuës neantmoins à sauueté, dequoy nous nous sommes estonnez, veu qu'ils estoient enfermées dans la grosse depesche qui s'adressoit à moy. Nous faisons venir expres les Maistres des Postes pour nous en rendre compte par le menu, autrement il y auroit soupçon que les autres lettres s'estans sauuées,

celle-cy auroit esté prise avec dessein , ce qui merite estre verifié : Cette perte a porté avec soy la raison pour vous de ce pretendu manquement , qui a esté tout à fait conuert par la verité à quoy ie seruiray tousiours d'entiere affection.

Le Roy respond en general aux points de vos lettres , sur lesquelles il n'eschet pas de vous rien mander de plus precis , puis que sa Maiesté n'a aussi rien changé en ses deliberations , & qu'elle attend sçauoir ce que vous aurez operé enuers les Princes de l'Vnion , qui seront bien sages s'ils approuuent & suivent vos bons conseils. Nous croyons qu'après cela vous serez arriuez à Vienne pour satisfaire au desir de l'Empereur. Mais il eust esté à propos qu'il vous eust laissé le temps & la commodité de visiter les Electeurs Ecclesiastiques après auoir veules Protestans : car vous eussiez peu tirer lumiere utile à vostre commission enuers l'Empereur : toutesfois vous n'y pouuez insister honnestement plus auant que vous auez fait. De là nous attendons de vos auis , & vous sçaurez de Monsieur de Baugy l'estat des affaires plus particulièrement avec les offices qu'il a ia faits, suivant ce que luy auons mandé , auquel nous adressons cette depesche , faisant nostre compte selon le contenu en vostre derniere , que y serez maintenant heureusement arriuez. I'ay des lettres bien fraisches de Hollande qui ne font aucunement mention du Landgraue Maurice de Hesse, lequel selon que i'ay tousiours bien remarqué est porté à la paix de son pays : il

MEMOIRES D'ESTAT. 501
est grand Caluiniste , mais non factieux , &
tesmoigne vne affection particuliere au nom
& seruice du Roy. Je vous ay escrit le douziés-
me de ce mois, par la voye de Mets , adressant
le paquet à l'ordinaire au sieur de Flauigny,
qui est la quatriésme que ie vous ay enuoyée.
Quant à ce que demandez (Messieurs) le mois
d'Auril i'en ay parlé mesme à vostre depart, &
depuis encore sur ce que m'en auez escrit ,
mais i'ay trouué vn peu de resistance, laquelle
il ne tiendra à moy de surmonter & vous ser-
uir en tout.

Pour nos affaires au dedans du Royaume ,
nous eslayons de les tenir en bonne assiette ,
qui donnera plus de force & de iustice à vostre
negociation, mesme sa Maiesté vsant de sa de-
bonnaireté ordinaire fait tous bons offices &
deuoirs enuers la Reyne sa mere pour luy lais-
ser d'elle toute satisfaction. Il y a tousiours
de beaux esprits qui trauaillent à destourner
ce que l'on met en peine de bastir à si bonne
fin , & toutesfois le Roy & les gens de bien ne
se lassent point en vne action si vtile , & si
louable : car sa Maiesté fait estat d'y renvoyer
Monsieur de Blainville , & y ajouster quelque
autre personnage pour demonstrier son affec-
tion & desir à contenter ladite Dame Rey-
ne mere : que si elle ne respond à tous ces de-
uoirs & tesmoignages de bonne volonté , elle
en sera blasmée, & le Roy grandement iustifié
en son procedé , lequel aussi auisera de pour-
voir à ses affaires contre ceux qui la porte-
roient & soustiendroient en des resolutions si
desreglées , nous auons peine à croire qu'elle

s'y laisse aller. De temps en temps nous vous en manderons des nouvelles. Le Roy ne part point encore de cette ville, & s'y trouue avec tres-bonne disposition. Je vous baise tres-humblement les mains, & prie Dieu, Messieurs, qu'ils vous donne en santé longue & heureuse vie. De Paris ce 21. Iuin 1620.

Vostre tres-humble seruiteur,
de P V I S I E V X.

MEMOIRE PRESENTE' AV ROY
*de la part de l'Electeur Palatin, que
sa Maiesté a enuoyé à Messieurs les
Ambassadeurs, avec la precedente de-
pesche.*

MEMOIRE de ce que le sieur Bostela charge de représenter au Roy tres-Chretien, au nom de la part de celuy de Boheme, en vertu des lettres de creance de sa Maiesté.

Que les Estats generaux de la Couronne de Boheme & des Prouinces incorporées, n'agueres assembles à Prague, ayans mis en deliberation de leur propre mouuement la designation d'un Roy futur ou successeur de sa Maiesté, auroient procedé le 19. ou 29. du mois d'Auril dernier, par le moyen d'une legitime election tous d'une voix, à la nomination de la personne du Prince Federic Henry, fils aîné de sa Maiesté, ce qui auoit aussi esté agréé par icelle, comme vne œuvre prudente

sans doute, veu toutes les circonstances de la providence singuliere de Dieu. Elle auroit estimé en deuoir donner part & auis à sa Majesté tres-Chrestienne, s'asseurant que veu la tres-entiere affection qu'icelle & ses predecesseurs Roys de France ont tousiours tesmoignée porter à la serenissime maison Electorale Palatine, elle se resjouira aussi de cét accroissement de bon-heur & de prosperité, de tant plus qu'il sera tousiours employé au bien & à la conservation de la France.

En second lieu, bien que ledit Roy de Boheme aiouste beaucoup de foy aux assurances qui luy ont esté souuent données de la part de sadite Maiesté tres-Chrestienne de la continuation de cette ancienne & sincere affection, & de ne vouloir rien entreprendre ny permettre qu'il fut entrepris aucune chose à son preiudice: Si est-ce que voyant les artifices des ennemis du repos commun croistre à veüe d'œil, il auroit trouué à propos de rafraischir derechef la memoire à sadite Maiesté tres-Chrestienne des notables assistances & seruices signalez qui ont esté rendus en tant d'occasions & avec tant de zele & de franche volonté à cét Estat par les Princes de la serenissime maison Electorale Palatine, les vtils effets desquels estans bien & meurement consideréz; sadite Maiesté de Boheme prend cete ferme creance que sadite Maiesté tres-Chrestienne en suite de ses Royales promesses, non seulement ne prestera point l'oreille aux fausses persuasions de ses ennemis pour se laisser emporter à favoriser leurs pernicieux

desseins , mais plutoſt qu'elle trauuillera de tout ſon pouuoir à deſtourner & empescher tous attentats & entrepriſes contre la perſonne & les Eſtats dudit Roy de Boheme.

Meſme que mettant en conſideration les grandes & exceſſiues deſpenſes , dont ledit Roy eſt maintenant chargé , elle auisera à ce que les ſommes de deniers dont elle luy eſt encore redeuable & qui ont eſté ſi liberalement preſtées & fournies pour le maintien de cette Monarchie & de la maiſon Royale de France , ſoient promptement & ſans plus de delay aquittées & remboursées. C'eſt dequoy il prie & requiert ſa Maieſté tres-Chreſtienne avec tres-grande inſtance, eſperant que ſa longue patience & ce glorieux titre de Juſte que ſadite Maieſté porte à bon droit, & lequel ne luy peut permettre de retenir le bien d'autrui , luy feront trouuer cette demande equitable, & qu'elle commandera qu'il y ſoit pourueu au plutoſt.

En troiſieſme lieu , ſadite Maieſté de Boheme deſire que ſadite Maieſté tres-Chreſtienne ſoit de nouveau aſſeurée que ſon intention n'eſt point de rien innouer en la Religion , moins de chaſſer ou perſecuter ceux qui font profeſſion de la Catholique Romaine , ainſi qu'on luy impute calomnieuſement, contre ce qui eſt notoire à vn chacun : à ſçauoir que pas vn de ſes ſuiets ſe tenant paiſible & en ſon deuoir n'eſt inquieté en ſa conſcience , ains l'exercice libre de quelque Religion que ce ſoit permis à vn chacun ſelon ſa profeſſion. Que ſi depuis peu il a eſté procédé par conſiſcation & autres

& autres telles voyes , alencontre d'aucuns Catholiques en Morauie & Silesie, cela ne seroit arriué sans legitime suiet , non à cause de la Religion , mais pour auoir esté lesdits Catholiques coupables & trouuez conuaincus de diuers crimes , & spécialement de perfidie & trahison enuers l'Estat , soit en se ioignans ouuertement à l'ennemy , soit en trainans diuerses conspirations & entreprises secrètes au preiudice du public & de leur propre patrie.

Finalemēt sadite Maieſté de Boheme loüe & approuue grandement les ſaintes intentions de ſadite Maieſté tres-Chreſtienne pour le bien de la paix , la prie & coniure de vouloir continuer & ſ'entremettre conioinctement avec d'autres Princes & Potentats pour moyenner vn bon & aſſeuré accommodement tant en la Boheme & aux pays confederez , qu'en l'Empire , afin de reſtablir parmy les Eſtats d'iceux l'ancienne confiance & bonne intelligence , & pour les rendre d'autant plus puillants & capables de reſiſter en vne vnion de forces & de volonté à ſes communs ennemis du nom Chreſtien & à ſes deſſeins & entrepriſes. Mais d'autant que les entrepriſes de l'Empereur & de ceux qui ſont conioints avec luy , ont touſiours eſté reconnuës fort eſloignées d'vne fin ſi ſalutaire , voire ſi contraire à ce but , que ſ'ils continuent , les choſes ſe porteront bien-toſt ſi auant aux extremités qu'elles ſeront hors de termes de tout accommodement : Sadite Maieſté de Boheme trouue qu'il ſeroit tres-neceſſaire d'y exhorter &

disposer l'Empereur le premier à bon escient, n'y ayant nulle apparence d'esperer vne paix aileurée tant que les animositez croistront, & que les actions de l'un des partis se trouueront si contraires aux paroles & protestations qui ont esté faites.

*MEMOIRE PRESENTE' AV ROY
de la part du Prince d'Anhalt, &
que sa Maiesté a enuoyé à Messieurs
les Ambassadeurs, avec la deuesche
du 21. Iuin, receuë le 19. Iuillet.*

MEMOIRE de ce que le sieur Bostel a charge de représenter à sa Maiesté tres-Chrestienne au nom & de la part de Monseigneur le Prince d'Anhalt.

Que la sincere & tres-humble affection de mondit Seigneur au seruice du Roy & au bien de la France, tesmoignée en tant d'autres occasions, luy auroit donné la hardiesse de faire entendre à sadite Maiesté par ledit Bostel en vertu de ses lettres de creance, comme les protestations faites à diuerses fois, tant par les lettres de sadite Maiesté, que par ses ministres, ny les deuoirs & bons offices que luy mesme y auroit contribuez, n'auroit eu encores assez de force pour leuer les ombrages & opinions qui auroient esté conceuës en Allemagne par quelques vns. Que sadite Maiesté estoit portée à fauoriser le party de l'Empe-

reur au preiudice de celuy auquel elle a tant d'obligations laquelle creance auoit esté fomentée & fortifiée par quelques apparences conformes à icelles.

Et d'autant qu'il croit qu'il importe infiniment pour le seruice de sadite Maiefté d'y remedier de bonne heure pour diuerfes raisons, quand ce ne seroit que pour rendre l'entremise d'icelle d'autant plus factieuse, il auoit estimé estre de son deuoir d'en proposer comme par forme d'auis quelques moyens.

Le premier est, de donner quelque contentement au Roy de Boheme & aux Vnis ses alliez, en certaines choses iustes & raisonnables & quelque effect des promesses si souuent reiterées, en leur faisant payer les sommes qui leur sont deuës par sadite Maiefté, laquelle en ce faisant ne peut estre accusée de partialité, n'y ayant rien de si iuste que de rendre ce qu'on doit.

L'autre, de gratifier ledit Roy de Boheme du titre que sa legitime vocation & possession semble luy auoir acquis, lequel ne luy peut estre refusé & donné à l'Empereur, sans engendrer quelque soupçon de partialité. Et icy merite d'estre mis en consideration l'exemple du Roy de Suede, en cas beaucoup moins fauorable & plusieurs de pareille nature.

S'il plaisoit aussi à sadite Maiefté empescher toutes sortes de leuées de gens de guerre & autres menées qui se font en ce Royaume pour l'Empereur au preiudice de son autorité Royale & contre ses expressees deffences sans que le Roy de Boheme en ait tiré iusques icy

vn seul homme , que ce seroit vn puissant moyen pour faire connoître à vn chacun qu'elle veut tenir la balance égale.

En quatriesme lieu , ce seroit trouué grandement conuenable & vtile qu'il pléust à sadite Majesté exhorter l'Empereur à bon es-cient à la paix , & à s'abstenir de toute violence & entreprise contre le Roy de Boheme, spécialement à se comporter avec prudence & circonspection en cette menace & publication de ban qui est vne procedure contraire à toute iustice & equité , nul ne pouuant estre iuge en son propre fait , & du tout preiudiciable aux droits & coustumes de l'Empire, voire de si dangereuse consequence: que l'execution est pour ietter l'Allemagne en vne contribution vniuerselle & sans remede , au lieu que le Roy de Boheme & toute l'Vnion n'ont but que de chercher en leur conseruation le repos de l'Empire, ny autre desir que de tesmoigner à sadite Maiesté le respect qu'ils portent à sa personne , & à sa Royale entremise, dont sa Maiesté de Boheme n'auoir desiré ny demandé le retardement , que pour auoir preueu le peu de fruit qui en réussiroit pour l'heure , veu les extremités & violences , à quoy l'on se preparoit du costé contraire avec tant d'opiniastreté que rien ne sembloit bastant pour arrester le cours d'une telle furie.

Et si sa Maiesté de Boheme n'a encore rendu depuis son aduenement , le deuoir accoustumé d'un enuoy solemnel à sadite Maiesté tres-Chrestienne, que cela n'est arriué faute

de respect, mais pour ne rien preiudicier à ses droits, rang & qualité, iusques à ce que sadite Maiesté tres-Chrestienne se soit declarée plus fauorablement pour ce regard, à quoy mondit Seigneur le Prince d'Anhalt la supplie tres-humblement de pouruoir au plustost, afin que la bonne intelligence ne soit altérée ny la communication, si necessaire au bien de la Chrestienté, interrompuë à l'occasion d'une simple formalité & pointille. Protestant au reste qu'il n'est meü à représenter ces choses par aucun interest ou dessein particulier du Roy de Boheme ny de luy, mais par le seul deuoir qu'il a, & la tres-humble affection qu'il porte à la Couronne & personne de sadite Maiesté tres-Chrestienne.

LETTRE A MESSIEURS LES
*Ambassadeurs par Monsieur de Puy-
 sieux, du premier Iuillet 1620. receüe
 à Vlme le 20. ensuiuant.*

MESSIEURS,


Surce que vous escriuistes dernièrement au Roy que huit iours apres vous esperiez vous acheminer vers l'Empereur, sa Maiesté a adres-
 sé sa responce & ses commandemens à Mon-
 sieur de Baugy, pour vous estre par luy deli-
 urée la depesche : toutesfois nous n'auons
 point encore eü auis de ce qui se sera passé en
 l'assemblée d'Vlme, qui nous fait douter que

vous vous soyez rendus si tost à Vienne, où nous enuoyons encore la presente sur cette incertitude. Vous trouuerez deux copies des lettres de l'Empereur & de l'Archiduc Leopold avec les responses que sa Maieſté a commandées y estre faites, lesquelles ont esté baillées à vn Gentil-homme que le dernier a depesché exprés. La substance de sadite response est remise à vous, Messieurs, pour faire connoistre la perseuerance de la bonne volonté du Roy & de ses deliberations, mais dont l'effet ne peut auoir lieu presentement pour les faire vtilement durant l'employ de vos offices, afin de ne nous rendre suspects, voire partiaux enuers les Princes de l'Vnion, pour les mieux persuader à passer les choses par voye de la douceur. Vous vous démeſserez de ce passage le plus dextrement qu'il vous sera possible, sans leur laisser neantmoins autre opinion de nos intentions. Nous auons sceu aussi outre ce que ie vous ay mandé, ce que le Roy de la grande Bretagne auoit deliberé de faire en Allemagne par le Cheualier Vvaton qu'il enuoye Ambassadeur à Venise, qu'il fait estat à l'imitation de sa Maieſté par ialousie de son entremise d'y enuoyer deux autres Ambassadeurs, mais de basse estoſſe, tant pour visiter les Electeurs Ecclesiastiques & l'Empereur, que pour s'employer enuers l'Electeur de Saxe & de Bauiere, & mesme pour proposer quelques conditions d'accord, c'est à dire, se faire de feste, & monſtrer qu'il y peut beaucoup, neantmoins ils ne sont encore partis de Londres: Il ne faut douter que cette depu-

MEMOIRES D'ESTAT. III

tation ne soit nuisible au dessein de la paix ,
quelque apparence qu'elle ait , & qu'elle ne
s'efforce sous-main de trauerser vostre entre-
prise , dequoy toutesfois vous ne ferez paroi-
stre estre en défiance , ains plustost desirer que
ledit Roy & autres cooperent à cette bonne
œuvre d'un accommodement, auquel les Prin-
ces vnis ont vn notable interest de penser de
bonne heure pour les grands preparatifs qui
se font en Flandre , destinez (à ce que nous
tenons de bon lieu) pour attaquer le Palatinat,
dequoy lesdits Princes pourroient bien patir
en leurs Estats : seruez vous de cét argument
pour les induire à faciliter la composition de
ces differens.

Au demeurant, Messieurs, nos affaires ne demeureront guere en mesme assiette : vous sçaurez que depuis quatre iours Monsieur de Nemours est allé trouuer la Reyne mere sans prendre congé du Roy, qui l'eust volontiers accordé s'il l'eust demandé. Monsieur le Comte & Madame la Comtesse de Soissons sont aussi partis de nuit, il y a deux iours, pour aller à Dreux. Monsieur le Cheualier de D'Angosme à Caën, tout cela à la dérobee. Sa Maiesté estoit bien auertie de la resolution de ce dernier, & l'a volontairement mesprisée, n'estimant pas y deuoir donner empeschement, cela fait vn peu de bruit en nostre Cour. Sa Maiesté comme bon pere qui veut auoir soin des enfans de la maison, fait estat d'enuoyer quelqu'un vers mondit sieur le Comte, pour sçauoir la cause d'un depart si soudain, elle depesche aussi Monsieur de Montbazou

grand Escuyer , & l'Archeuesque de Sens vers la Reyne mere , pour essayer par cette celebre deputation , à luy donner plus de suiet de confiance , & luy donner de plus en plus les conseils qu'elle aduifera les meilleurs : elle espere que Dieu benira ses intentions & desseins si bien fondez contre tous ceux qui voudroient se bander contre son autorité Royale. Il sera à propos de diminuer la chose quand vous en entendrez parler afin de tenir nos affaires en quelque reputation pour la donner à vostre legation , & faire connoistre que le Roy sçait bien les moyens de remedier à semblables accidens. Monsieur de Blainville est encore à Angers qui est attendu bien tost. Le Roy & la Reyne sont en bonne santé , en laquelle ie prie Dieu les conseruer , & vous donner , Messieurs en bonne santé , longue & heureuse vie. De Paris ce premier Iuillet mil six cens vingt , vostre tres-humble seruiteur de Puyfieux , & à costé : Nous auons fait la per-
son de la depesche de Luneuille , ce que nous pouuons descouurir assez obscure-
ment est , qu'elle a esté dérobée pres de Chaalons , par autuns Courriers estans à Monsieur de la Valette.

LETTRE DE L'EMPEREUR

au Roy , du 28. May 1620. enuoyée
par Monsieur de Puyzieux à Messieurs
les Ambassadeurs , avec la depesche
susdite du premier Iuillet.

FERDINANDVS secundus diuina fauente clementia Electus Romanorum Imperator semper Augustus , ac Germania , Hungaria , Dalmatia , Croatia , Sclauonia , &c. Rex , Archidux Austriae , Dux Burgundiae , Stiriae , Carinthiae , Carniolae & Witembergae , Comes Tyrolis , &c. Serenissimo & Christianissimo principi Domino Ludouico Regi Franciae , &c. Consanguineo , affini & fratri nostro charissimo salutem & fraterni amoris omnisque felicitatis continuū ac perpetuū studium. Serenissime Princeps consanguinee , affinis & frater charissime postquam rebellium nostrorum audacia renouatis confederationibus quotidie augebit & consiliis desperatis extrema nobis denunciat , nunc maxima necessitas efflagitat ut irritata vniuersorum Regum & Principum potentia unitis viribus à Maiestate diuina tributam sibi Maiestatem inter homines supremam tueatur ; magnam hoc loci in promissis à Serenitate vestra copiam , quae iam pridem versus Imperij Romani fines castra mouerint , fiduciam locamus & omnino nobis pollicemur eas citra haesitationem , vel impedimentum praesto futuras ; pendent enim omnia

Y 5

ex temporis momento, quod in alijs quidem negotijs, ut saluari queanti; certè in bello feruescente ubi de rerum summa agitur longa annorum series non restauret. Peramanter itaque & fraterno affectu Serenitatem vestram requirimus, ut succursum militare nisi iam antè quod opinamur factum est, quantocyns ad Imperij confinia properare iubeat, unde per serenissimum & fratrem nostrum Archiducem Leopoldum Commissarijs ad hoc ordinatis confestim deducantur ac disponentur ubi reipublicæ Christianæ emolumento, & immortalis sanguinis Gallici laude vires in hostem fortiter exercere adeoque in partem gloriae victoriae quam iustissima causa freti à divina Majestate speramus concurrere queant: perspicit pro eximia qua pollet prudentia Serenitas vestra quanti suæ quodque & nobilissimi regni sui, quanti uniuersorum orbis regum & principum intersit ne contagiosissimus rebellionum fomes una cum auctoribus suis præualeat, adeoque non dubitamus quin pro stricta multiplicis necessitudinis nostræ coniunctione accuratissimam hac in parte temporis rationem sit habitura: nos vicissim Serenitas vestra in omnia quouis tempore beneuolentiæ & fraterni amoris argumenta promptos propensosque experietur. Datum in ciuitate nostra Vienna die xxvij. mensis Maij anno domini 1620. Reg. nostrorum Rom. primo, Hungariæ 2. & Bohe. 3. eiusdem Serenitatis vestræ bonus frater Ferdinandus.

LETTRE DE L'ARCHIDUC

Leopold au Roy, du huitiesme Juin
enuoyée avec la precedente.

Serenis.&Christianis.Rex domine
consanguinee&affinis charissime.

Salutem & promptissimum gratificandi atque
obsequendi studium. Cum omnis boni incre-
mento commendatis nobis per hanc Cæs. Ma. do-
minum ac fratrem nostrum clementis. literis ad
Reg. M. vestram datis intermittere pro debitæ
observantiæ nostræ officio non debuimus quia
ad eandem illas quantocyus destinaremus per
præsentem Iohannem Fridericum SKrencken
de Moling Consiliarium nostras efferendas. Ex
ijs Reg. Majest. vestra pluribus intelliget quo-
nam loco, & statueres bellicæ sæc. Cæs. Majest.
sint, quantumque confederationes & machinamen-
ta hostium in dies incrementum capiant, quibus
cito reprimendis promissa à Reg. Majest. vestra
auxilia primo tempore submitti flagitat, ma-
gnumque rei bene gerendæ pondus & momentum
in illis ut merito collocatum habet.

Quia ergo deinde nobis evidens & auxilia
prædicta sacræ Cæsareæ Majestati non modo gra-
ta, sed etiam rebus in tali periculo positis op-
portuna summeque desiderata essei, nec dubita-
mus illorum accessione vires Cæsareas ita au-
gendas ut ne dum sese ab hostium invasione tue-
ri, sed ultro illos invadere & de male occupa-

tis, & detentis hactenus assistente diuino auxilio deturbare possit. Reg. Maiest. vestr. eum quem in promissione dictorum auxiliorum ostendit reipsa etiam in transmittendis illis affectum exhibituram non ambigimus, ut hoc pacto videlicet non modo sac. Cæs. Maiestatis iusto desiderio satisfiat, sed hostes etiam experiantur ac omnes rerum novarum cupidi intelligant Reg. Maiest. vestræ curæ esse, ut rebellionem fomenta extinguantur, suisque subditis respectus & auctoritas constet.

Erit id regiæ Maiest. vestræ religiosum eiusdemque æquanimittatis prouidentie consentaneum, & Christianissim. Gallia regibus sereniss. domum nostram præter arctam quæ modo intercedit sanguinis coniunctionem plurimum deuinciet ad ipsum occasione data mutuis obsequiorum generibus promptissime demerituram quod ipse ex mea parte pro viribus præstare paratus Reg. Maiest. vestræ studia & officia mea continue defero. Brisaci 8. Iunij anno 1620. Reg. Maiest. vestræ ad seruitia paratissimus & fidelis consanguineus & affinis, Leopoldus.

RESPONSE DV ROY A l'Empereur, enuoyée comme dessus.

TRES-HAUT, tres-excellent, & tres-puissant Prince, nostre tres-cher, & tres-ami bon frere & cousin, Nous auons receu vos lettres du 28. du mois de May dernier, qui nous informent de l'estat present des affaires de la Germanie, & ce que vous desirez de nous en

cette occasion , en laquelle comme nous continuons en la volonté que nous vous auons cy-deuant tesmoignée d'y contribuer , ce qui peut dependre de nostre credit & autorité , aussi nous auons donné charge à nos Ambassadeurs de vous en donner toute asseurance , lesquels estimant estre maintenant pres de vostre Maiesté , ils luy feront entendre nos intentions sur le suiet particulier qu'elle desire , luy renouuellant la declaration de nostre cordiale amitié & affection en son endroit. Et prions Dieu tres - haut , &c.

RESPONSE DV ROY A L'ARCHIDUC Leopold , receüe avec la susdite.

MON COUSIN,

I'ay receu par les mains du sieur Iean Frideric Schrenken de Moling vostre Conseiller , vos lettres du huiëtiesme de ce mois , accompagnant celle que m'a escrite l'Empereur mon tres-cher frere & cousin , pour me faire entendre l'estat des affaires de la Germanie au bien & auantage desquelles , comme de ce qui sera de son particulier contentement , i'ay tousiours la mesme volonté d'employer ce qui dependra de mon credit & autorité , ainsi que plus particulièrement ie l'en ay fait assurer par mes Ambassadeurs qui seront maintenant pres de luy , & luy feront entendre de-

rechef comme ie persiste en ma premiere deliberation avec le reste de mes deliberations pour ce regard, ainsi que ie luy tesmoigneray tousiours par effet, aussi bien qu'à vous mon Cousin, l'affection que ie vous porte, & l'estime que ie fais de vostre personne, comme vostre dit Conseiller qui s'en retourne vous trouver, vous dira plus amplement de ma part, sur lequel ie m'en remets. Et prie Dieu mon Cousin, &c.

SIXIESME DEPECHE FAITE

au Roy par Messieurs les Ambassadeurs estans à Vienne, le 21. Iuillet 1620. enuoyée à Monsieur Pericard par l'Ordinaire de Bruxelles le lendemain.

S I R E ,

La creance que nous auons que vostre Maiesté aura receu la depesche que nous luy auons faite par le sieur de la Borde, nous empeschera d'vser de redites sur ce qui s'est passé à Vienne, d'où nous partismes le 6. de ce mois, & vinsmes disner en la tente du Marquis d'Anspach, où le Duc de Vvitemberg & autres Princes Vnis nous attendoient pour nous dire à Dieu, & faire voir toutes leurs troupes consistans en sept mille hommes de pied, desquels l'ordre estoit tres auantageux pour

paroistre , mais nous ne trouuâmes que les
 hommes faillent soldats aguerris , ny de bonne
 mine , & de deux mille cinq cens cheuaux
 bien armez & montez , ledit Marquis d'Ans-
 pach tesmoigne souhaitter qu'il s'offrit occa-
 sion où il peut rendre son tres-humble serui-
 ce à vostre Maiesté , nous priant de l'en asseurer ,
 comme firent les autres Princes qui y estoient .
 Le iour mesme nous pensions venir à Delin-
 guen , où estoit le Duc de Bauiere ; mais
 estant forcez de demeurer à Louuigen , ledit
 Duc en estant auerty par nous , il nous ren-
 uoya en diligence pour nous prier de l'atten-
 dre audit Louuigen , où le matin nous venans
 trouuer chez le Duc d'Angoulême , il tes-
 moigna auoir vne tres-grande obligation à
 vostre maiesté de ce qu'il luy auoit pleu de
 s'entremettre des affaires de l'Empire , & que
 les bonnes intentions de vostre Maiesté ayant
 desia esté heureusement accomplies au traité
 fait à Vlme , il falloit esperer que dans le
 progrès des commandemens que vostre Ma-
 iesté nous a faits , quoy que la difficulté y fut
 tres-grande , que toutesfois la cause estant si
 iuste , Dieu la fauoriseroit de sa grace , & don-
 neroit des moyens pour paruenir à vn bon suc-
 cez. Nous n'oubliaâmes pas de luy représenter
 l'interest qu'il auoit à seconder les instructions
 de vostre Maiesté , & de ses bons amis , de ses
 propres moyens , à quoy il protesta s'em-
 ployer avec plus de chaleur , puis qu'il recon-
 noissoit que c'estoit l'intention de vostre Ma-
 iesté de laquelle il protestoit estre tres-hum-
 ble seruiteur , à tel point qu'il vous plairoit

luy commander , vſant meſme enuers nous pour le reſpect de voſtre Maieſté de courtoifſies tres-particulieres. De là nous auons paſſé à Nieubourg , où le Duc a eu memoire des grandes obligations qu'il a à voſtre Maieſté , à laquelle il ſe dit tres-particulier ſeruiteur , d'où ayant continué noſtre voyage apres auoir paſſé à Linx , où tous les Eſtats de la haute Auſtriche eſtoient assemblez ; nous auons ouï par eux les raiſons de leurs rebellions , deſquelles le commencement & les ſuites ſont poſées ſur de ſi mauuais fondemens, qu'il eſt plus aiſé de les condamner que de les iuſtifier , toutesfois crainte des troupes du Duc de Bauiere , qui ſont de plus de vingt quatre mille hommes de pied & de cheual, ils voudroient bien trouver quelque expedient de traité pour deſtourner ~~le~~ orage , & ſe garentir de leur perte qu'ils ne peuuent euitèr ſ'ils ſont attaquez. Le Lundy 20. de ce mois nous ſommes arriuez icy , l'Empereur ayant enuoyé vne journée deuant le Capitaine general de ſa garde , nommé Machefelt , & vn Seigneur principal du pays avec tous ſes Officiers, pour nous deſfrayer , & aſſeurer de ſa part , combien il auoit agreable noſtre venuë. Al'abord il deſira que nous deſcendiſſions du bateau à demie lieuë de la ville , où il nous enuoya le Mareſchal de la Cour du ſeu Empereur , nommé Logeſtin , accompagné de trois cens Gentils-hommes de ſa chambre , & de plus de quatre vingt caroſſes , tous à ſix cheuaux , le reſte de la Cour eſtant à cheual , pour nous conduire en nos logis , leſquels il auoit fait

preparer & tendre de ses meubles avec grand soin, où incontinent apres le Comte de Mecco grand Chambellan nous vint visiter de sa part. Rome, Espagne, & Sauoye, nous enuoyerent receuoir iusques hors la ville, & du depuis Florence, Modene, & Malte, nous sont venus trouuer en personne. Nous esperons demain Mercredy vingt-deuxiesme du mois, auoir audience de l'Empereur, pour incontinent apres en rendre compte à vostre Maiesté, à laquelle les seruices de Monsieur de Baugy sont si reconnus, qu'il n'est pas besoin de les luy ramenteuoir, mais bien, SIR B, de dire qu'il nous vint rencontrer à Crema, & qu'il a eu tel soin, que nostre reception d'icy fut semblable à ce que l'on doit à vostre Maiesté, que nous auons tout suiet de nous en grandement louer, comme aussi des bons aduis qu'il nous a donnez sur les occasions presentes, qui se rencontrent icy, pour vostre seruice, auquel nous supplions vostre Maiesté de croire de nous, que ne pouuons iamais estre autres que de vostre Maiesté, SIR B, tres-humbles, tres-obeyssans, & tres-fidelles suiets & seruiteurs, Charles de Valois, Bethune, & Preaux. De Vienne ce 21. Iuillet 1620.

LETTRE A MONSIEVR, DE
Puisieux envoyée avec la precedente.

MONSIEVR,

Vous serez assez informé du iour de nostre arriuée à Vienne, par la depesche que nous en faisons au Roy, mais encore nous n'auons voulu manquer à vous faire celle-cy en particulier, pour vous dire que Monsieur de Baugy estant venu nous trouuer à six lieuës de Vienne, nous a rendu vos deux dernieres depeschés, l'une du 21. du mois passé, l'autre du premier de celuy-cy, & vous rendons graces du soin que prenez de nous faire sçauoir la santé du Roy, qui est la plus agreable nouuelle que nous puissions auoir de France, pour la continuation de laquelle nous employons nos vœux, & pour l'heureux succez des affaires de son Estat. Nous trauiillons de deça pour y effectuer les commandemens de sa Maiesté, avec tout le soin & la fidelité qui se peut attendre de nous, & continuons à reconnoistre que le traité fait à Vlme, tourne à satisfaction des vns & des autres. Vous apprendrez par celle que nous escriuons au Roy, comme nous auons veu les Ducs de Baviere & de Nieubourg. Nous aiousterons que l'Archiduc Leopold ne s'estant rencontré à Passau, à nostre passage, nous y a fait receuoir avec honneur, & venans de deça nous auons passé

deuant plusieurs forts qui tiennent pour le party contraire , & auons logé à Linx & autres lieux de la haute Autriche qui se sont rebellez contre l'Empereur , & par tout on nous a rendu des honneurs qui tesmoignent le respect qu'on porte au nom du Roy, & la satisfaction qu'on reçoit du soin qu'il plaist à sa Maiesté prendre des affaires de la Germanie. Nous auons receu en cette Cour vn accueil aussi fauorable que nous l'eussions peu desirer , & esperons demain auoir audience, & à la premiere occasion nous ferons sçauoir au Roy tout ce qui se sera passé, dont nous vous tiendrons particulierement aduerty. Cependant nous vous reïterons la priere de tenir la main que le mois d'Auril ne nous soit point osté ; car nous nous trouuerions grandement incommodez pour les grandes depenses que nous faisons en vn pays si ruiné , que le tout y vaut le quadruple. Attendant cela de vostre iuste faueur , nous continuerons à vous assëurer de nos entieres affections à vostre seruice , comme estant , Monsieur , vos bien-humbles seruiteurs Charles de Valois , Bethune & Preaux. De Vienne le 21. Iuillet 1620.

LETTRE DV ROY A MESSIEURS

*les Ambassadeurs , du 11. Iuillet 1620.
receüe à Vienne le 24. suiuant , par
le sieur Picant Courrier.*

MON COUSIN , & Messieurs de Bethune & de Preaux, vostre lettre du 26. Iuin, avec les memoires & coppies qui l'accompagnent m'a esté renduë le 4. de ce mois, j'apprens d'icelle par le menu tout ce qui s'est passé entre vous & les Princes qui se sont trouuez à Vlme, les responce & repliques de part & d'autre, sur les occasions presentes de la Germanie. J'ay bien remarqué aussi la peine & le soin que vous avez pris pour les induire & persuader par viues raisons qui concernent leur interest avec celuy du public, à vn accommodement, & semblablement leurs considerations & deffences pour reietter sur l'Empereur & les siens la cause de leurs griefs pretendus, qui tesmoigne l'ombrage, & la deffiance où ils sont aujourd'huy peu capables, si Dieu ne les inspire, de produire encore le fruit que ie desire pour eux mesmes, & le bien general de la Chrestienté. Toutesfois il semble que ne vous estans rendus aux responses & plaintes qu'ils vous ont faites, ils se soient laissé aller à faire des ouuertes qui peuent laisser quelque suiet d'espoir de venir à l'accord, pourueu qu'ils temperent en quelque sorte les propositions que j'ay veu

qu'ils ont faites touchant le Royaume de Bohême, car en la maniere qu'ils les ont mises en avant, il y a grande apparence, comme vous avez sagement jugé, que l'Empereur n'y consentira jamais que par la force, & vne extreme necessité, à laquelle il ne semble pas qu'il soit réduit à present, ains plustost qu'il eslaye avec ceux de sa maison, & de ses amis, de faire vn effort puissant pour gagner par les armes ce qu'il estime luy appartenir par iustice & raison. Cette forme de decision seroit pour apporter des inconueniens notables au public de l'Empire, comme aux interressez en la cause, qu'il est expedient à vn chacun d'éuiter, eslisant plustost la voye de la douceur pour sortir d'affaires, que celle de la violence. Aussi que bien à propos vous avez mis peine de les persuader, mais iusques icy non avec l'utilité qui seroit à desirer par leur deffaut, y ayant employé les remonstrances & bonnes considerations qui peuvent tomber en l'affaire. Ils se veulent targuer, soit pour continuer ce ieu, ou pour penser par là rendre leur party plus puissant, de l'assistance & force de leurs allicz; mais ie ne voy pas par les auis qui me viennent de plusieurs endroits, qu'ils en soient en termes si favorables, car chacun sçait ce que le Roy de la grande Bretagne veut & pretend faire en ces occurrences, personne n'ignore aussi l'estat present des affaires des Prouinces vnies des Pays-bas assez occupez chez eux pour ne pouuoir departir qu'un secours bien mediocre à leurs amis qui en ont besoin. Ils veulent separer leur cause de celle

de Boheme ; mais croient ils quand leurs aduersaires seroient venus à bout de leur dessein de Boheme par la force , qu'ils soient pour les laisser iouyr de leur repos. J'apprens d'ailleurs qu'ils pourront bien commencer par attaquer le Palatinat avec les troupes qui sont assemblées en Flandre , esperant par cette diuision cheuir plus facilement de l'Electeur Palatin. Et quoy qu'ils dient , si ceux de la maison d'Autriche l'entreprennent ouvertement , ils auront peine à soustenir cét effort , lequel ils deuroient preuenir par deferer aux conseils & exhortations que vous leur auez faites en mon nom , & ne pas tant s'amuser , comme vous leur auez représenté , à des pointilles friuoles qu'aux choses essentielles qui regardent leur seureté & conseruation. Je suis bien aise que les Deputez du Duc de Bauiere vous ayent requis d'employer mon autorité en ce qu'ils ont à traiter avec lesdits de l'Union , qui est tousiours accroistre mon credit , & occasion de leur faire paroistre à tous ma bonne & prompte volonté en leur endroit , laquelle i'auray à plaisir pouuoir reüssir à leur bien & contentement , dequoy i'attendray des nouvelles , comme de vostre acheminement à Vienne , de la façon qu'aurez esté receus , & comme ils prendront ce que vous aurez fait avec lesdits Princes Vnis , pour voir si rapportant le tout ensemble les moyens & les dispositions des vns & des autres, vous pourrez trouuer suieût de faciliter avec le temps vne reconciliation par la voye de la surseance, ou par autre expedient qui sera trouué plus

conuenable , me remettant pour cela à vos iugemens , puis que vous estes pleinement instruits de mes intentions , & maintenant aussi en partie de leurs inclinations, m'asseurant que vous n'obmettrez aucun deuoir & sollicitude pour ma dignité & reputation & le bien du public pour adoucir & faire rapprocher les parties. Mais il faut que ie vous confesse que i'aprehende à bon droit pour la cause generale , & la fin de cette loüable entreprise , que les mouuemens qui commencent à paroistre dans mon Royaume , les conseils malheureux de ceux qui portent la Reyne Madame ma mere aux ialousies & meffiances de mes affections , ne diminuent par de là la creance de vos offices, & de l'employ de mon autorité, ce qui m'a obligé encore de retirer mes forces que ie tenois sur ma frontiere de Champagne sur ces affaires d'Allemagne , pour les approcher du costé de ma bonne ville de Paris, & obuier aux inconueniens & desseins des auteurs de ce desordre , & que l'Empereur se tienne affoibly par cette retraite, & mon intention moins puillante enuers tous. Neantmoins vous leur ferez connoistre comme ailleurs où il sera requis , que i'espere bien tost remedier par mes armes à ces commencemens , & chastier en sorte ceux qui me seront desobeyssans , que ie pourray encore secourir de conseil & d'effet mes bons amis & voisins. Ce que vous sçaurez faire valoir avec telle adresse , que d'un costé ils ayent occasion de iuger que i'ay euraison d'employer lesdits gens de guerre en mes affaires plus pressantes, & d'ailleurs suiet de bien

esperer de mon amitié & de mon assistance ,
 si tost que i'auray donné ordre à l'estat de mes
 affaires , comme i'espere faire puissamment
 & efficacement , mais en telle rencontre il est
 raisonnable & loisible à vn chacun d'accourir
 a ce qui luy est plus proche & plus sensible.
 Je suis venu en ma prouince de Normandie ,
 pour l'asseurer entierement à mon seruice ,
 contre les menées & pratiques du Duc de Lon-
 gueuille , apres cela ie verray ce que i'auray à
 faire , si le Duc de Montbazon , le sieur de
 Bellegarde, Archeuesque de Sens, & President
 Icannin ne profitent à l'endroit de la Reyne
 Madame ma mere , vers laquelle ie les ay en-
 uoyez , ce que ie souhaite pour le bien de mon
 Royaume & son contentement , preparant
 mes forces en tous les endroits d'iceluy pour
 me faire obeyr , conseruer mon autorité ,
 rompre & dissiper les pernicieux desseins de
 ceux qui ont eu l'audace d'entreprendre con-
 tre ma dignité & les loix qui obligent les su-
 jets enuers le souuerain. Continuez comme
 vous auez bien commencé , à negocier par
 delà avec toute l'adresse & conduite que vous
 iugerez necessaire, conseruant avec soin l'hon-
 neur & le rang qui me sont deubs , faisant va-
 loir mes bonnes intentions , & le soin que ie
 prens du public, & ie vous assure que ie le tien-
 dray à seruice aussi vtile & agreable comme si
 vous me le rendiez aux affaires propres qui se
 presentent dans mon Royaume , car autant
 que ie pourray , & dependra de l'industrie &
 prudence de mes seruiteurs & ministres , ie ne
 veux & ne dois laisser descheoir la reputation
 enuers

enuers mes amis & allicz. Je prie Dieu mon Cousin, & Messieurs de Bethune, & de Preaux, qu'il vous ait en sa sainte & digne garde. Escrit à Rouen ce 11. Iuillet 1620.

Signé, LOVYS.

Et plus bas, BEVLART.

LETTRE DE MONSIEUR
*de Puyfieux dudit iour, receüe avec
la susdite par Monsieur Picant.*

MESSIEURS,

Ainsi que vous vous estes remis par la mienne sur la longue lettre que vous avez escrite au Roy, ie me remets aussi à la responce que vous fait sa Maiesté, pour vous dire seulement qu'en ce qui depend de vous, il n'y a rien d'obmis en vostre negociation, & que si elle ne produit l'effet qui est desiré, la faute, comme le dommage, en tomberont sur ceux auxquels vous avez à faire, remplis d'ombrages & de soubçons. Neantmoins vous devez poursuivre vostre pointe le plus dextrement & vivement qu'il vous sera possible, tant pour rendre ce tesmoignage de la bonne volonté de sa Maiesté, au public, & au bien des parties, que pour faire connoistre par là que nous ne sommes si mal en nos affaires, que le bruit en pourra publier. Mais pour diray vray,

Messieurs, elles ne sont pas bien aussi, & si Dieu n'assiste la iuste cause du Roy de sa main puissante, il y aura de la brouillerie à bon esient, dans le Royaume : toutesfois sa Maiesté se prepare fortement pour y esteindre ce feu en sa naissance, & croy comme i'espere si la chose luy réussit, que ce luy sera vn affermillement d'autorité & de repos dans l'Estat, comme pareillement vn moyen plus grand d'estre vtile à ses amis & voisins, lesquels donc vous devez conforter quand il escherra, & diminuer l'opinion de nos maux, tant que vous pourrez, afin comme d'un costé nous essayons de mettre la paix chez-nous, de l'autre vous la puissiez procurer parmy les allies de la France, qui seroit vne grande reputation à sa Maiesté. Vous avez bien fait Messieurs, de vous arrester encore quelque peu à Vme à la priere de ceux de Bauiere, pour voir quel lieu il y auroit d'accommodement entre la ligue Catholique & la Protestante. I'ay quelque apprehension que ces derniers sur la creance de nos diuisions, voudront hausser la marchandise ; mais c'est à eux vn mauvais conseil, puis ce seroit toujours allonger leurs miseres, & que nous esperons bien-tost donner ordre à nos affaires, & estre plus puissans que iamais à fauoriser celles de nos voisins.

Nous vous croyons maintenant à Vienne, où nous auons adressé nos précédentes : en tout cas Monsieur de Baugy vous les aura fait tenir : nous esperons que vous y serez bien-reccus de l'Empereur, encore que nous y ap-

perceutions quelque ialoulie du costé des Espagnols , enuieux que le Roy y acquière trop de gloire , bien que la chose tourne à leur benefice , pourueu qu'il n'y aille point de l'honneur & de la dignité du Roy , vous en pouuez laisser passer , & neantmoins vous en seruir aucunement , si possible les occasions & nos affaires requeroient de nous refroidir en ce traité. En cela vous aurez à faire la guerre à l'œil y employant vostre adresse & prudence, pour d'un costé faire connoistre que nous auons tousiours la mesme affection , & pour faire sentir aussi où il escherra qu'il n'y est pas correspondu avec la mesme sincerité , afin que s'il est besoin de nous en seruir , nous le puissions faire commodement.

I'auray souuenance de l'interprete Desprez que vous recommandez , & ferons les expeditions qu'il desire. Le Roy veut asséurer cette prouince deuant que d'en partir. Sa Maiesté va s'acheminant vers Caën , où elle a enuoyé deuant Monsieur de Praslin avec dix compagnies du Regiment des Gardes pour se rendre maistres du Chasteau , quelques Suisses & du canon aussi. Monsieur de Longueville est à Dieppe , ie ne pense pas qu'il nous attende. Sa Maiesté a ordonné le rendez-vous de sa cualerie à Chartres , & de l'infanterie à Estampes , pour là auiser aux conseils qu'elle deura prendre en attendant des nouuelles de ces Messieurs enuoyez vers la Reyne sa mere, pour tousiours iustifier dauantage son action. Monsieur le Comte & Madame la Comtesse de Soissons, Monsieur de Vendosme, & le grand

Prieur son frere estoient encore à Vendosme. Cette faction est forte, mais la puissance du Roy est grande & son autorité comme sa resolution à auoir raison à quelque prix que ce soit de cette desobeyssance. Nous vous en manderons la suite, que ie prie Dieu estre telle que merite la bonté de sa Maiesté, & vous donner Messieurs en parfaite santé, heureuse & longue vie. De Roüen l'ii. Iuillet 1620. Vostre tres humble seruiteur de Puy-sieux. Et à costé, Presentement on vient de nous dire que le Cheualier de Vendosme est entré dans le Chasteau de Caën, nous verrons s'il y attendra la venuë du Roy qui part demain.

*L E T T R E D U R O Y A M E S S I E V R S
les Ambassadeurs, du 12. Iuillet, re-
ceüe à Vienne le 24. suiuant avec
les susdites, par ledit Picaut.*

M O N COVSIN, Messieurs de Bethune & Preaux, ma depesche estant partie est arriué le sieur de la Borde avec la vostre du 7. de ce mois, qui m'apprend encore les bons deuoirs que vous auez faits, & les diligences que vous auez employées pour auancer l'accommodement desiré de vous par les Deputez du Duc de Bauiere, avec mes Cousins les Princes de l'Vnion, dequoy ie vous sçay tres-bon gré, & souhaitte estre aussi heureux pour l'affermissement de mon autorité & repos de

mon Royaume, que ie le suis par vostre ministère & entremise à le moyennr à mes voisins & amis. Ie mettray peine, fortifié de la grace de Dieu, de venir à bout de ce dessein, comme vous me ferez chose tres-agreable de continuer l'employ de vostre industrie & labour, tant enuers l'Empereur qu'à l'endroit desdits Princes vnis, comme ailleurs où il sera requis pour la gloire de Dieu, le bien du public, ma reputation & mon contentement, qui consistera tousiours à bien faire à tous, & à vous re-smoigner celuy qui me demeure du seruire que me rendez par delà. Ie prie Dieu mon Cousin, & Messieurs de Bethune & de Preaux qu'il vous ait en sa sainte & digne garde. Escrit à Roën ce douzième Iuillet 1620.

Signé,

L O V Y S.

Et plus bas,

BRVLART.

LETTRE DE MONSIEVR DE
*Puysieux ausdits sieurs, receüe avec
 la precedente.*

MESSIEURS,

Le sieur de la Borde me vient presentement de rendre vostre depesche du 7. de ce mois que nous portons pour aller coucher à cinq lieues d'icy, de sorte que ie n'ay loisir par ce

Z 3

mot, sinon d'en accuser la reception que i' en-
 voye à Paris apres le Courrier Picaut, que ie
 vous ay depesché cette nuit, estimant que sur
 ce que ledit sieur de la Borde luy a dit par le
 chemin, il y sera encore, & remettray à la pre-
 miere commodité de satisfaire plus ample-
 ment à vostre depesche, qui tesmoigne aïlez
 avec quel soin vous travaillez de là. Nous sou-
 haitons que le reste de vostre voyage & ne-
 gociation suiue ce que vous avez si bien com-
 mencé. Il n'est rien survenu de nouveau en nos
 affaires depuis ma depesche, c'est pourquoy
 ie finiray celle-cy, vous assurant que ie suis,
 Messieurs, vostre tres-humble, & tres-affec-
 tionné seruiteur Puyfieux. De Rouën ce
 12. Iuillet 1620. Et à costé, Messieurs, ie vous
 puis aïeurer que le Roy reçoit tres-grande
 consolation de vostre gestion parmy nos con-
 fusions & tarabustemens. Ainsi les faut-il
 appeller.

*LETTRE DE MESSIEURS
 des Estats de Lintz à Monsieur d'An-
 goulesme du 18. Iuillet, receüe à Vien-
 ne le 26. dudit mois.*

Salute officiorumque nostrorum
 addictissima commenda-
 tione præmissa.

*C*V M illustrissime & celsissime Princeps,
 gratum celsitudini vestræ nos facturos in-

telligamus si Franciscum de la de
Touerray iustis atque legitimis de causis de-
tentum aliquantisper à nostris liberum dimit-
tamus, eam quæ celsitudinem vestram reue-
renter colimus quamque maioribus etiam stu-
diis exhibere parati sumus submissam animo-
rum promptitudinem hac quoque in parte de-
clarare volumus, dictumque Franciscum de
la & de Toueray absque incom-
modo suo liberum dimisimus, spem haud du-
biam foventes celsitudinem vestram nos ceteras-
que has nostras provincias Austriacas clemen-
ti favere posthac quoque prosecuturam, sacræ
Cesareæ Majestati domino nostro clementissi-
mo commendaturam, & quæ ad optatissimæ
pacis recuperationem facere possunt omnia pro-
moturam. Id quod celsitudinem vestram obni-
xe rogamus eidemque humillime nos commenda-
mus. Lincij xvij. Iulij anno 1620. Celsitu-
dinis vestræ ad officia quoque promptissimi
paratissimi Status & Ordines Archiducatus
Austriæ superioris. Et à costé Illustrissimo ac
celsissimo Principi & domino, domino Caro-
lo Valesio Duci Angoulemi pari Franciæ,
Comiti Aluerniæ & Oragis, equiti amborum
ordinum Regis Christianissimi domino nobis
observantissimo.

LETTRE A MONSIEUR
*d'Angoulesme , par un Baron de la
haute Autriche , du 18. Juillet, receuë
avec la precedente.*

TRES-ILLUSTRE
PRINCE.

MONSIEUR,

Dieu vueille que vostre chemin soit aussi heureux que vostre retour mesmement vostre commission à vous donnée par le Roy tres-Chrestien , concernant la paix & la tranquillité publique de tout le monde, autant desiréux comme les Estats icy se confient certainement & se rendent seurs que vous , M. selon vos tres-nobles , & tres-loüables offertes , ne laissez point de mettre en effet la bonne affection que vostre Excellence porte à la nation Allemande , tirant avec elle la tres-noble nation des François leur source du mesme sang , & n'ayant à tous les temps eu moindre soin , à la conseruation de leurs priuileges , que nous autres au temps present, ils ne reprimeront point en cela, que nous conformes les histoires des derniers troubles de la France , par exemple d'imitation a pris , & iusques icy pratiquez à nous. Il plaira aussi à vostre Excellence de conseruer tousiours les Estats de ce pays icy en vos bonnes graces , & diuertir tous les dan-

gers & dommages qu'on leur puisse menacer , ou contr'eux mettre en effect , ne desirent ils autre chose que de demeurer en perpetuelle obcyssance & deuotion del'ancienne maison d'Austriche ; mais qu'on leur garde leurs priuileges de leurs predecesseurs acquis , pensans fondre leur sang , qui vaut plus que tous les coffres remplis d'argent. Et si vostre Excellence veut auoir la peine de s'informer de toutes les actions des Estats en cét endroit , on n'en sera que tres-aise. Le Gentil - homme François par commandement de vostre Excellence , tantost de la prison liberé presente icy de ma part la corne de cerf de plus de 24. coings. I'aimerois bien qu'il vous fut agreable, Dieu conserue vostre Excellence en bonne garde , & moy en sa benigne affection, lequel ie suis & demeure à iamais , Monseigneur , vostre tres-humble esclau, Charles Iober, Baron de Lintz. Ce 18. Iuillet 1620.

INSTRVCTION DONNE'E PAR
Messieurs les Ambassadeurs au sieur de Sigongne , Gentil-homme enuoyé de leur part vers le Prince de Transylvanie , & Estats de Hongrie le 1. Aoust 1620.

LE sieur de Sigongne que nous auons choisi pour aller vers le Prince de Transiluanie & les Estats de Hongrie , sur la confiance que nous auons de sa suffisance & fidelité au serui-

ce du Roy fera diligence de se rendre à Neusoll , où ils sont assemblez le plustost qu'il pourra , & à cét effet se servira de nostre passe-port , où il en aura besoin pour faire connoître par qui & vers qui il est enuoyé. Estant arrivé audit lieu de Neusoll , il fera premièrement demander audience audit Prince de Transilvanie comme enuoyé par nous , & apres luy avoir présenté nostre lettre de creance , & l'auoir salué de nostre part , luy exposera le sujet de son voyage , qui est.

De luy faire entendre que le Roy nous ayant enuoyé en Allemagne, pour tascher d'obuier, & de remedier par l'entremise de son nom & autorité, aux malheurs & miseres , dont elle est menacée , & consequemment les Princes voisins , comme la Hongrie ; nous a aussi enjoinct de le voir , tant pour l'asseurer de l'estime que sa Maiesté fait de sa personne , & de l'amitié qu'elle luy porte, que pour le conuier à cooperer à ses bonnes intentions par l'employ du credit qu'il a avec les Hongrois , en les exhortant à rendre ce qu'ils doiuent & qu'ils ont promis à l'Empereur.

Qu'il a tout sujet d'en vser ainsi, tant pour n'auoir iamais esté offensé , ou mal traité par ledit Empereur , que pour l'asseurer d'autant plus dans ses propres Estats & des bonnes graces de sa Maiesté Imperiale, laquelle avec tous les autres Princes Chrestiens luy scauront gré, & luy auront vne particuliere obligation de ce bon office.

Que nous sommes prests tous trois, ou deux, ou l'un de nous selon qu'il en sera besoin , de

nous acheminer vers luy , tant pour luy confirmer de bouche ladite assurance, en luy présentant des lettres du Roy, que pour luy donner moyen d'agir plus vtilement en appuyant sa poursuite de l'autorité de sa M. & de nostre presence, ne voulant espargner, ny labour ny diligence qui puisse redonder au benefice du Royaume de Hongrie, & au sien particulier.

Luy tenant tels & semblables discours, il faudra bien remarquer ses responses pour nous les rapporter, & sur tout de prendre peine de descouvrir autant que faire se pourra le fond de son intention, pour sçauoir nous mesmes en quelle façon nous aurons à nous gouverner au progrez de cette negociation.

En apres ledit sieur de Sigongne luy dira qu'il est aussi chargé de nos lettres de creance adressantes aux Estats de Hongrie, auxquels il fera demander pareillement audience pour les leur presenter.

Sa creance sera apres les salutations accoustumées, de leur remonstrer de nostre part le peril duquel ils sont proches si la guerre continue en Allemagne.

Que pour l'euitier & s'en garentir ils ne peuvent tenir vn plus assuré moyen ny qui les mette en meilleur odeur aupres des autres Princes Chrestiens, que de s'accommoder à l'Empereur, lequel dès son aduenement au gouvernement apres le deceds de son predecesseur se seroit mis en deuoir comme il est encore presentement en volonté de leur observer tout ce qu'il leur a promis deuant & lors de son couronnement; son intention estant de les

maintenir & conseruer en la paisible iouyssance de leurs priuileges.

Que s'ils iugent que nostre interuention leur puisse estre vtile enuers sa Maiesté Imperiale, nous la leur departirons volontiers apres que nous aurons entendu d'eux mesmes, en quoy, & comment lors que nous nous acheminerons vers eux, ainsi que nous sommes desia offerts au Prince de Transylvanie, selon que nous aurons suiet de nous y resoudre par ce qui nous sera rapporté de leur part & de la sienne.

Pour acquerir de la confiance parmy eux, il sera à propos de leur communiquer aussi ce qui aura esté traité avec ledit sieur Prince, & s'il y aura vn Chaoux à Neusoll, il sera bon de le voir, & de luy faire entendre les offices du Roy, pour l'affermissement de la paix en Hongrie, afin qu'il en face recit en Constantinople, comme aussi que l'Ambassadeur ordinaire qu'y tient sa Maiesté en sera par nous informé, afin que le grand Seigneur & ses ministres en soient semblablement par luy aduertis.

Mais si lesdits Princes & Estats alleguoient qu'ils ne veulent ou peuuent traiter sans les Bohemes, & leurs autres confederéz, il faudra repliquer que nous auons commission de traiter aussi avec lesdits Bohemes. Nous auons aussi depesché vers eux pour espargner le temps qui doit estre cher quand la longueur peut produire des accidens qui rendent la cure du mal plus difficile, & en cas que lesdits Princes & Estats se monstrent esloignez d'un

bon accommodement qu'il n'y ait aucune esperance de les y faire condescendre , le sieur de Sigongne leur declarera que tout ainsi que le Roy y contribue franchement ce qui depend de luy. Aussi sera - il fort desplaisant que ses offices , & de ses Ambassadeurs n'aient pas esté receus comme il conuient , & qu'il ne pourra faire moins que d'assister ledit sieur Empereur contre ceux qui sans raison , & par vne exemple de pernicieuse consequence pour les autres Souuerains , luy voudront raurir ce qu'un chacun sçait luy appartenir.

Si les Ambassadeurs de l'Electeur Palatin ou des Estats de Boheme veulent visiter ledit sieur de Sigongne , il les receura & rendra la visite ; mais il se gardera bien en parlant dudit sieur Electeur de luy donner le titre de Roy , ainsi que tous les seruiteurs de sa Majesté ont commandement de s'en abstenir.


Ledit sieur de Sigongne apres s'estre acquitté de ce que dessus , & auoir penetré le plus auant qu'il pourra dans les conseils & l'estat des affaires de delà avec prudence & dextérité , retournera en diligence pour nous en rendre compte , ainsi que nous ne doutons point qu'il fera à nostre contentement. Fait à Vienne le premier Aoust 1620.

LETTRE DESDITS SIEVRS
à Messieurs des Estats de Hongrie, du-
dit iour enuoyée avec la precedente.

MESSIEURS,

Le Roy continuant le soin que ses predecesseurs, & specialement Henry le Grand de tres-glorieuse memoire son pere, ont toujours pris de procurer le bien & le repos general de la Chrestienté, ce qui leur estoit bien souuent heureusement reüssi au grand profit & aduantage de plusieurs Princes & Royaumes, quoy que fort esloignez de la France, nous a enuoyez en Allemagne, pour eslayer d'esteindre par l'entremise de ses offices, & de son autorité, le feu qui commence de l'embraser non sans grand & apparent danger de s'estendre dans les prouinces voisines, & mesme dans vostre Royaume de Hongrie, enuers lequel nous auons vne particuliere inclination pour auoir esté tousiours en bonne intelligence avec la France. C'est pourquoy sa Maiesté nous a donné charge expresse de vous comprendre dans cette sienne Royale sollicitude pour en faire reüentir des effects proportionnez à vostre besoin, & à sa bienueillance, de laquelle vous serez plus particulièrement informez par le sieur de Sigongne, comme aussi de nostre dispo-

sition à la seconder , & à vous tesmoigner
 nostre affection à vostre service. En cette
 occurrence nous vous prions de luy aiouster
 foy , & le Createur de vous tenir , Messieurs ,
 en sa sainte & digne garde. De Vienne le
 premier Aoust 1620. Vos tres-affectionnez à
 vous faire service.



Fin du troisième Tome.







